

12
(1)



IANI NICII
ERYTHRÆI
EXEMPLA
VIRTVTVM
et
VITIORVM.
Editio Secunda.

COLONIE VBIORVM.
Apud Iodocum Kalcovium.
et Socios. clō Iōc xlv.



From. post. 171. 4. 195

THE
FIRST
EXHIBIT
OF
THE
ATTORNEY



L E C T O R I

T Y P O G R A P H V S.



Cribunt hodie plurimi. Præstaret, scribi à plærisque nihil. De iis loquor, qui non ædificant

quidquam, sæpius diruunt. Scriptores amamus bonos, eruditos. Hi promovent generis humani salutem, privatam & publicam. Hi merentur esse incolæ mundi, domicilii istius augustissimi, cujus tectum tot astris radiat, beneficio Dei in mortales maximo. Horum nos monumenta luce donamus lubentissimi. Neque enim tam lucello inhiare nostrum est, quam

quam eundem cum ipsis finem
nobis habere propositum. In his
vero cum primis eminet hodie
Ianus Nicius Erythræus. Hic vir
nobis demum satisfacit. Hic, siue
poëtam agat, siue solutum fun-
dat sermonem, & prodest & de-
lectat omnibus ubique modis.
Quid mirum? Præstantissimas
res adeo pura & nitida dictione
vestit, ut Plautus, Terentius, Tul-
lius, Varro, non possent cultius.
Videtur vetus ille Romanæ lin-
guæ decor & genius in Roma-
num hunc nostrum totus migras-
se, & quasi regnum ibi fixisse.
Cæterum laude nostra longe ipse
superior. Quare comparare sole-
mus nobis ejus lucubrationes,
quandocunque possumus. Adeo-
que illarum quasdam jam ante
dedi-

dedimus legendas publice. Nunc
prosequimur , quod bene cœpi-
mus. Argumentum hujus libri
est: *Declina à malo ; & fac bonum.*
Quid potest esse excellentius ,
quàm dare sic operam , ut homi-
nes detestentur vitia , & virtutes
ament, illas maxime, quibus æter-
na in præmium parata felicitas !
Non est quod emtōres mendi-
cem ego. Accurrent sponte, scio;
rapti , ut à magnete ferrum rapi-
tur. Dicamne vero novi quid, Le-
ctor , quod auditu futurum tibi
gratissimum ? Sunt mihi ad ma-
num scripta Niciara plura, melle
ipso dulciora. Et his te beabo,
cum tempore. Salvus tu interim
sis , mi Lector. Idibus Decem-
bris CIO IO CXLIII.

NON me fefellit spes mea. Vix
 lucem aspexerunt Exempla
 hæc: & mox divendita sunt. Adeo,
 ut ne quidem ad auctorem, aut in
 Italiæ partem ullam, ubi desi-
 derabantur omnium maxime,
 quidquam eorum vehendum re-
 liquum fecerint emtores, qui ab-
 erant propius. Qua de re queri-
 tur non semel ipse Nicius in Epi-
 stolis; quas, juxta cum Eudemia,
 nunc auctiore, ac Dialogis, ab
 eodem conscriptis, recens evul-
 gavimus. Quid restabat igitur,
 nisi ut prodirent Exempla ea de-
 nuo? Iterum salve. Kal. Decem-
 bris CIO IO CXLIV.

Illustrissimo ac Reverendissimo

D O M I N O

F A B I O C H I S I O,

Episcopo Neritonensi, & Sedis Apostolicæ apud Vbios Nuncio,

IANVS NICIVS ERYTHRÆVS

S. P. D.



*Q*uod maiorem, Fabi, Praesul optime, vim, ad revocandos à vitiis homines, & ad virtutem traducendos, habeant exempla, quam docta disertis cujuscumque vox & oratio, Diogenis pallium ac dolium ostendunt; quæ duo, ut veteres traderunt, acrius vehementiusque divitum luxuriam verberabant, quam aliorum, omnibus instructa ornamentis eloquentiæ, disciplina. sed quid ad vetera & externa revolvimur? ecquis non ma-

gis se commoveri, & ab inanibus rerum humanarum cupiditatibus revocari ad solida virtutis studia sentiat pœnis, quas à Deo in improbos edi, ac præmiis, quæ persolvi proborum recte factis animadvertit, quam sapientissimis sententiis, gravissimisque verbis, ornato sermone & perpolitò? neque obscura neque recondita ejus rei ratio est, sed aperta atque perspicua, quod argumenta, quibus vitiorum turpitudine, pœna supplicioque constringi, ac virtutis pulchritudo mercede ac præmio decorari probatur, ad sensus aurium admoventur, at quæ Deus, sive bona sive mala, probis vel improbis reddit, in cernendi sensum cadunt; qui sensus, cum sit longe ceterorum acerrimus, necesse est, ut majorem animorum permotionem afferant ea quæ cernuntur, quam quæ leguntur vel audiuntur. Magna illa ac prope innume-
rabilis

rabilis multitudo hominum, quæ Parisiis ad celebris illius Doctoris exequias accurrit, qui, falsa virtutis opinione ac specie, omnium ad se oculos animosque attraxerat, sæpe, sine dubio, suis auribus inculcari senserat, peccatis hominum atque sceleribus pœnam damnationis eternæ deberi; eandemque rem etiam in concionibus agitari sæpenumero audierat: at quotus eorum quisque ex illis sermonibus concionibusque induxerat animum, ad frugem redire, ac nova vitæ consilia suscipere? neminem arbitror; at ubi ille mortuus, ter in vitam revocatus, se demum justa Dei judicis sententia damnatum esse, omnibus audientibus dixit, ab eo aspectu vehementer commoti sunt omnium animi, adeo ut multi perpetuam sibi legem indixerint innocentiae, continentiae, virtutumque omnium; aliquot etiam pro-

* 5

gressi.

gressi eatenus sunt, ut, duce Brunone, re
familiari contempta, amicis, cognatis,
affinibusque relictis, opibus & honori-
bus valere iussis, in loca sola, horrida,
deserta, ac perpetuis fere nivibus obsita,
ubi ne feræ quidem cujusquam vesti-
gium appareret, sese contulerint, ibique
abditi, silentio totum vitæ suæ tempus
sibi transigendum esse, statuerint, mul-
tosque deinceps, suo exemplo, ad illud
tam asperum tamque horridum vitæ
genus suscipiendum attraxerint. Etenim
exempli ea vis est, ut non modo cum
res fit, verum etiam cum narratur vel
legitur, perinde quasi sub aspectum ve-
niat. magno cum pondere in animum
irruit, eumque ut suæ sibi salutis consu-
lat adigit. atque ipsemet Christus tan-
tam in exemplis esse vim statuit, ut,
cum vellet luxuriæ & incontinentiæ
vitia ex animis nostris evellere, non
alia

alia usus sit ratione , nisi sumtuosi illius
divitis exemplo , cuius profusa , dum
vixit , luxuries , omnium apud inferos
rerum inopia , coërcetur atque constri-
gitur , adeo ut ne unam quidem aquæ
guttam , quam linguæ aspergat , obtineat.
Quæ cum ita sint , statui , quæ nostra ac
paulo superiore memoria , notatione di-
gna extiterint , & ad formandos homi-
num mores utilia , breviter huic libro
mandare. Quem ideo , tuo inscriptum no-
mini , ad te mitto , ut , cum populum ,
tuæ à Deo fidei commissum ac creditum ,
ad veterem disciplinam , ad optimos
sanctissimosque mores , exudies , eidem
aliquod ex iis , quæ in hoc libro continen-
tur , aptum ad id de quo sit sermo , si tibi
videatur , exponas ; ut periculum ex
aliis faciat , ipsi quod ex usu sit. Atqui ,
ne librum hunc contemnas , nihil in eum
intuli , nisi quod ipsemet vidi , vel ab
iis ,

iis , qui ipsi viderent , accepi. sed non ,
quod quisque dixisset , continuo illud fi-
de ac memoria dignum duxi , sed habui
rerum delectum , ac personarum in pri-
mis rationem. etenim iis tantum fidem
esse habendam censui , qui auctoritate
aliqua , vel morum ac vitæ dignitate,
præstarent. neque ab hoc numero mulie-
res excludendas existimaui , in quibus
probitas ac virtus eluceret. cur enim
spectatæ probitatis pudicitiaque mulie-
ribus fidem abrogarem , non aliam ob
causam , nisi quia mulieres essent , præ-
sertim si nulla esset in eis causa cur
mentirentur ? genus autem orationis il-
lud sum secutus , quod tibi vehementer
probari video , quodque , ad ejusmodi
res explicandas , mihi in primis aptum
videtur ; nimirum liquidum , purum,
profluens , atque à cincinnulis fucoque
puerili, hoc est à Vanitate sententiarum
abhor-

abhorrens. ejusmodi enim deliciae, vel
potius ineptiae, in aedes tantum, ut ita
dicam, aurium influunt, neque in cordis
penetralia se inferunt: at contra, oratio
gravis, & à puerilibus ornamentis nuda,
in sensus commeat, in animum penetrat,
eumque, quo causa poscit, impellit. ne-
que eo minus data est opera à me (si ta-
men assequi potui) ut nulla verborum
barbarie infuscata, ad delicatas nostro-
rum hominum aures, mea perveniret
oratio, sed pura ac Latina prodiret. non
enim Latini sermonis nitor ac puritas,
rerum gravitati contraria est, sed cum
ea maxime convenit; quod dilucidiores
res faciat, quod eas pene ante oculos sta-
tuat, quod in mentibus altius infigat.
Sed, his omiſſis, illud in primis optan-
dum est, ut nostros hos qualescunque la-
bores fructus aliquis consequatur, salus
nimirum animarum, neque illi, in despe-
ratis

*ratas ac derelictas animas incidentes ,
tanquam fruges in segetem deteriore
datæ , prorsus intereant. quod minime
eveniet , si in concionibus , quas Episco-
pus , eo loco ac nomine dignus , ad tuos
habeas , mea hæc interdum , ut dixi , si
veniat usus , accipias , eaque tuis istis
oratoriis lacertis ac viribus torqueas.
Vale. Romæ, Kal. Maji. MDCLXIII.*



EXEMPLA hæc imprimantur.

*Henricus Francken Sierstorpffius, SS. Theol.
Doctor; Metropolitanæ & S. Cæciliæ Eccle-
siarum Colon. Presbyter, Canonicus; Gymna-
sii Laurent. Regens; librorum Censor.*

IN LIBELLVM
EXEMPLORVM
NICII.

Exemplum quidvis ibi: nil ibi regula. Quidni?
Fulminat exemplum: regula cassa strepit.


GREGORIUS AYALA.

Dicti refutatio.

Exemplum quidvis ibi? nil ibi regula? Quid vis?
Exemplum non est regula vivæ tibi?

CHRISTIANVS ALEMANNVS.

271111 271111
271111 271111



IANVS NICIVS
ERYTHREVS.

I A N I N I C I I E R Y T H R Æ I E X E M P L A.

I. *Sacerdotes sanctos esse, neque contumeliis ac verberibus afficiendos.*



Mulier quædam cum primis suæ civitatis nobilis, ruri cum esset, Parocho Missæ sacrificium facturo inisit, qui diceret, ut maneret tantisper, dum ipsa ad ecclesiam accederet: verum, ut mos est mulierum, quibus se poliendi ornandique nullus modus est, cum diu in expectatione fuisset, neque uspiam appareret, & quod caput est, cum jam meridies appeteret; coactus est ille sacerdos à popularibus suis, qui defessierant expectando, rem divinam facere: cujus rei mulier ignara, cum ad ecclesiam pergeret, admonita est in itinere à redeuntibus, ut labore illo supersederet; etenim omnes, sacro peracto, domum reverti: sed cum nihilo ea minus ire contenderet, venit ad Ecclesiam, & Parochum contumaci sane vultu aspiciens, ita ne, inquit, sine me sacrum fecisti, neque meum adventum expectasti? eademque opera, elata in altum manu, colaphum eidem impegit. nec mora; tanto scelere contaminata, domum revenit. Sed haud impunitantum facinus abstulit. nam cum esset gravida, temporibus exactis, enixa est filiam, altera manu captam; quæ deinde, jam nubilis, data est viro cuidam nobili in matrimonium; & quoad vixit (vixit autem diu) insigne illud prætulit maternæ superbiæ, audaciæque monumentum. Hæc circiter annum MDLXX contigisse, narravit Petrus Antonius Montagnanus, patricius Vicentinus, & P. Nicolaus Vicecomes Mediolanensis, summæ apud suos nobilitatis, qui Paulo V, Pont. Max. intimus cubicularius, ex honorariorum, ut vocant, numero fuit, deinde aula, unâ cum ejus honoribus

2 IANI NICII ERYTHREI,
valere iussis, nunquam satis laudatæ Congregationi
Oratorii nomen dedit.

II. *Eleemosynarum usum non dimittendum.*

ANtistes quidam, beneficentiæ ac liberalitatis fama longe clarissimus, non multis ante annis, opibus, honoribus, divitiisque præstabat; qui quidem sumtuosus, indiligens, ac profusus habebatur, attamen erat in pauperes Christi mire propensus: nam singulis annis multa aureorum millia inter eos dividenda curabat. Verum cum extraordinariis illis sumtibus, æs alienum grande conflasset, familiares quidam & amici, fuere illi auctores, ut profusam illam, quemadmodum ipsi ajebant, liberalitatem in pauperes revocaret, ex eaque æs alienum, quod contraxerat, omne dissolveret: quibus ille fidem habens, annuas eleemosynas ad dimidias contraxit. neque ejus auctores consilii in eo reprehenduntur, quod dederint operam, ut creditoribus fieret satis, sed quod ex eleemosynis præsertim, id quidem ab illis pessime atque immisericorditer factum asserimus. nam si erat illis cordi, ut acceptas fœnori pecunias vir ille dissolveret, immanes illi sumptus compescendæ erant potius; quibus equos, canes, ac tantam familiam alebat, quibusque ridiculos homines, ac muscos, quos in deliciis habebat, locupletabat. Rem miram; qui firmissima erat corporis valetudine, statim infirma esse ccepit, ac longius procedens, eam firmitatem, qua præstabat, prorsus amisit, ac demum è vita decessit; eorum autem, qui id illi consilium dederant, vix quisquam ultra triennium vitam protraxit.

Sed non erit alienum ab hoc loco, subjicere, quos ego vilis homuncio fructus ex eleemosynis tulerim; quod quidem ad Dei gloriam ac legentium utilitatem, non ad meam laudem dictum velim. Eram multis ab hinc annis, tum matris indiligentia, cui parens meus moriens reliquerat usum fructum omnium bonorum suorum, ut fruere una cum filiis, eaque præterea suum ad arbitrium administraret, tum infinitis fratris mei

mei sumtibus, in summas rei familiaris angustias adductus. nam, matre mortua, pignori opposita fere omnia inveneram, ac vix tantum relictum, unde parce ac duriter vitam exigerem. non sum propterea deterritus, qui pauperum inopiam, pro viribus, sublevarem. verum, me vix sentiente, fiebat, ut, are alieno dissoluta, paulatim res meæ ad me redirent, & quod mirabilius videatur, neque sordido quodam victu, neque insigni parsimonia id assequebar. Etenim nihil mihi deesse patiebar, sed quidquid usus vitæ posceret, mihi largiebar, nulla in re genium defraudans meum: quod summum Dei in me beneficium agnoscens, ejusque beneficii causam referens in pauperum preces, quorum tenuitatem sublevabam, dabam operam ne ingratus invenirem, sed, per æqua proportionem, tantundem ad veteres eleemosynas accederet, quantum facultatibus addebatur. in pauca ut conferam, non modo rem pene amissam recuperavi, verum aliquot etiam partibus ampliorem eam esse factam inveni; ac re ipsa didici, quod auditione perceperam, neminem unquam, ex largitione in pauperes, ad egestatem fuisse redactum, atque omni ex parte verissimum esse, quod in proverbii legitur, eum, qui dat pauperi, non indigere, sed scæneratum à Deo, quod largitur, accipere. Venit mihi in mentem, hoc loco, Cosmi Medicei, omnium ætatis suæ multo locupletissimi: de hoc proditum memoriæ est, ea fuisse in pauperes liberalitate, ut amici ipsius quidam, ob hanc causam, naufragium omnium bonorum illi metuerent, ac suaderent, ut aliquem eleemosynis modum statueret; quibus respondebat, nunquam tantam se Deo pecuniam elargiri, quin in suis accepti & expensi tabulis, majoris eum summæ creditorem inveniret. Verum ejus hæc in pauperes liberalitas, adeo fortunas illi suas non conturbavit, ut etiam stabiliverit, atque auxerit; ita ut nemo privatus, eo locupletior decesserit, neque, ea tempestate, mortaliū fere quisquam extiterit, qui non aliquo eidem ære obstrictus inveniretur.

III. *Mortuos suffragiis juvandos.*

PIo. Franciscus Carettonius Soc. Iesu, cum ad sodales B. M. Virginis Assumptæ, in domo professæ Soc. Iesu, circiter annum MDCXX, verba faceret de cura pro mortuis gerenda, me audiente atque admirante, narravit, etiam tum vivere, qui ab incunte ætate multis se flagitiis coinquinaverat, verum incredibili quodam studio animas defunctorum juvandi semper exarserat, ut etiam sæpissime piacularæ aliquod sacrum pro eis faciendum curaret. Erant huic inimiciæ graves & acerbæ, cum popularibus quibusdam suis; à quibus, vitæ capitique ipsius insidiæ perpetuè comparabantur. cum igitur nocte quadam, vitandi æstus causa, equo vectus, Tibur, si rectè memini, deferretur, illac iter fecit, ubi ad ingentem quercum, insignis cuiusdam latronis scissi membra suspensa pendebant, quæ membra (horrendum dictu) visa sunt inter se conjungi, atque in unum corpus coalescere; quod cum se demisisset in terram, equum illi detractum conscendit, imperavitque, ut tantisper ibi consisteret, quo ad rediret; cui ille, qui totus præ timore obriguerat, neque hiscere audebat, dicto audiens fuit. Sed vix cadaver illud, equo vectum, sexaginta ab eo loco progressum est passibus, cum ab hominibus quatuor invaditur, & sclopis in ipsum emissis, de equo deturbatur ac dejicitur; sed paulo post, inimicis ab oculis fuga sublatis, ad eum, qui hæc spectaverat, rediit, atque, Hæ tibi, inquit, insidiæ comparabantur, nisi me, Dei jussu, in eas coniecissem; idque eximix tuæ in mortuos pietati tributum ab eo est; contine igitur te in hoc perenni studio, & simul mores emenda, eosque ad divinæ legis rationem præscriptumque compone. his dictis, cadaver illud quatuor in partes distractum ac suspensum in quercu illa visum est, ut antea, pendere. qui vero tam manifesto mortis periculo, divinitus, illo miraculo ereptus fuerat, non solum pietatem & sollicitudinem suam efficacius, quam antea, defunctorum animis præstitit, sed extemplo omnibus aliis rebus

bus post habitis, arctiorem religiosorum hominum amplexus est vitam.

IV. Avaritiam seu pecuniæ studium procul à magistratibus esse debere.

PRæfectus oppidi cujusdam in Lusitania, octavo quoque die, peccata confiteri, & Eucharistiam sumere solitus erat, summamque in vultu religionem præse ferebat: verum iis, quibus præerat, avare admodum & crudeliter imperabat, & magnas ab invitis pecunias extorquebat; ut neque Deum vereri, nec rapacitate quidquam à lupo distare videretur. Sed dum maxime in istud, quo jure, quaque injuria, faciendæ pecuniæ studium incumbit, die quodam, ignotus quidam fit illi obvius in via, ac litteras reddit, qui statim evolavit ex oculis, nec visus est uspiam. Præfectus, litteris acceptis resignatisque, statim, Hei mihi, magna horribilique voce exclamat, & amissis viribus, domum inter manus delatus, in lecto collocatur; verum in eo cubiculo, ubi decumbebat, septem ac viginti dæmonum spectra, horribili sane forma, sese obtulerunt; quorum viginti, statim intro in hominem irruperunt, totumque immaniter possederunt, reliqui vero septem in eodem se cubiculo continuerunt. hoc aspectu perterrefactis omnibus, continuo sacerdotes evocantur, qui precibus immundos illos ab eo spiritus exigant; veniunt, atque adjurare energumenum ex ecclesiæ ritu incipiunt, conanturque dæmones corporis illius possessione dejicere: quibus illi; Operam, inquit, luditis; Dei jussu ac voluntate, in hominem immigravimus, neque nos hinc cujusquam jus ac potestas ejiciet; citius illi pellentur, qui cubiculum servant, quam nos nequam hunc hominem liberum dimittamus. quorum oratione commoti sacerdotes, conversi sunt ad eos pellendos fugandosque, qui cubiculum illud obsidebant, ac peccata singulorum, qui aderant, aperiebant: quorum sex cum jam abiissent, postremus, qui erat relictus, conversus ad eos, qui im-

migraverant in Præfectum, eumque acriter excruciant, Quandoquidem, inquit, relictī sumus à sociis, quid hic agimus? cur non suis eos vestigiis persequimur? Qui omnes illico, impetu facto, excesserunt, atque una secum infelicem illam animam in æterna apud inferos supplicia detulerunt. Hæc P. Virgilius Cæparius Soc. Iesu, v Kal. Novembr. anni MDCXIV, sodalibus B. M. V. Assumptæ in domo professa Soc. Iesu, pluribus audientibus, dixit, accepta, ut ipse narrabat, à Patre quodam ejusdem Societatis, qui ejus confessiones audierat, necnon ab altero, qui spectaculo illi interfuerat, cuique dæmones occultum quoddam flagitium palam effecerant.

V. In quovis loco, sed præsertim in Ædibus sacris, abstinendum esse ab inferenda alteri injuria.

PAUCIS ante annis, Perusii, Bacchanaliorum ludorum diebus, cum in Æde Soc. Iesu sacrosanctum Christi corpus, regali sumptu ac magnificentia, expositum esset, fiebat ut tota fere civitas eo conflueret: quambobrem accidit, ut in turba vir in primis nobilis ab altero, pari nobilitate prædito, calcaneo percuteretur. quod ille non ferens, barbara quadam animi impotentia elatus, in oculis tantæ frequentiæ, atque adeo in conspectu divinissimæ illius hostiæ, colaphum eidem impegit. Sed statim neglecti ab eo religiosissimi templi, & illatæ homini innocenti injuriæ persolutæ sunt pœnæ. erat ei, qui percussus fuerat, filius adolescens, ex lethali diutinoque morbo, adeo viribus exhaustus, ut vix præ macie consisteret; qui una cum aliis in illud idem templum, religionis causa convenerat. hic satiùs esse ducens, quidvis antea pati, quam tantam contumeliam insultam dimittere, exeuntem illum è templo aggreditur, & in certamen provocat; non recusat ille. itaque utrinque, eductis gladiis, pugna committitur; sed brevi, ita divina exigente justitia, contumax ille, quanquam animo ac viribus longe valentior, ab infirmis-

missimo adolescente transfixus occiditur. Hæc Romæ ab eo accepti, qui Perusii cum esset, suis ea oculis vidit.

VI. Dies festos, piis operibus, non ludis jocosque transigendos.

ANte annos sexaginta, Christi natalis pervigilio, coiere adolescentes aliquot ex iis, qui scholas Soc. Iesu frequentabant, in ædibus amici communis, ut mediam circiter noctem ad Ædem B. Mariæ Majoris ad Præsepe sese conferrent: sed interea dum abeundi hora veniret, decreverunt totum illud tempus hilaritati jocosque committere: verum cum satis jam sermoni traditum ab iis esset, jamque somnus videretur obrepere, ædium dominus talos poscit, & somni abigendi gratia, socios in aleam provocat; sed inter ludendum, unum ex illis sitis ingens invadit, cumque aliquid sibi poscit dari, quo sitim extinguat, dominus domus in cellam vinariam abiit, ut de selecto quodam dolio, vinum hauriret; sed improvise horribilis cujusdam demonis aspectu perterritus, pedem retulit; qui ater, immanis, ventriosus, ingenti capite, cui bini inerant oculi, ardentibus prunis similes, dolio innixus, brachium mento suffultum habebat. itaque exanimatus metu, quantum potuit cursu contendere, ad socios se recepit; quos alio non minus horribili monstro perterrefactos offendit. viderant enim pusillum alium demonem intra alveolum hac illac excurrentem, & talos calcibus impellentem. quamobrem cum id, quod ipse in cella vinaria vidisset, exponeret, fidem fecit; nec inventus est quisquam, qui crederet, ipsum timore perterritum, quod non vidisset, pro viso sibi renunciassent. ac statim omnes à ludendi cogitatione sunt ad preces supplicationesque conversi; atque ea ipsa nocte, diligenti confessione, præteritæ vitæ sordes eluerunt; & nonnulli etiam illorum, variis religiosorum ordinum familiis nomen dederunt. id ego admodum puer ab homine gravi & fide digno accepti, qui cum illis fuerat studiorum eorundem societate conjunctus.

VII. *Sacerdotes, ac reliquos divino cultui
mancipatos, castimonie sectatores in primis
debere esse.*

NOvi ego anlicum quendam, jam senio confectum, hominem fortunatum ac nobilem, ac pingui sacerdotio præditum; qui cum ob ætatem grandævam, & sacerdotalis ordinis reverentiam, castitatis, castimonie, virtutumque omnium specimen esse deberet, ut sanctos decet; non secus ac quivis adolescens dissolutus & intemperans, libidine luxuriæque diffuebat. cum igitur, die quodam, mulieri nuptæ, cui ille consueverat, prandium dedisset, eoque confecto, se oblectare cum ea cœpisset, ex improvise horribili apoplexia adeo correptus est, ut statim sensus fere omnes amiserit, neque ita multos post dies mortem obierit, &, quod est morte ipsa longe deterius, nullam peccata ore confitendi facultatem habuerit. at mulier, quod documento esset ceteris, quæ se cum hominibus Deo dicatis admiscerent, majore quadam vi à Deo verberata est. nam pridie diei D. Bartholomæo sacri, cum magna vis imbrium de cœlo decidisset, nec cloaca, domui mulieris proxima, lapidibus cœnoque obstructa, decurrentes aquas posset excipere, universas in ejus cellam vinariam humi defossam immisit, ac pene totam opplevit. erat illi cellæ ostium è ligno, tabernæ superimpositæ pavimento annexum; quod clausum pavimento instar habebat, supra quod mulier ex solito cum vellet ingredi, sive quod illud erat è lignis vetustate corrosis, sive iusto Dei judicio, assulatum comminutum est totum, atque illa præceps lapsa in cellam, plenam aquis, ut diximus; quibus antea obruta est, quam aut fidem vicinorum implorare, aut quisquam laboranti venire auxilio posset.

VIII. *Inimicitias non esse persequendas.*

FVere nonnulli in persequendis inimicitiis odio adeo implacabili & acerbo, ut ipsorum crudelitas, ne suorum

suorum quidem inimicorum sanguine expleri potuerit ; sed progressa sit longius ; hoc est , in illud tempus , quo desierant esse , quos odissent. Annum circiter M D X C V , juvenis quidam dabat operam sedulo , ut interfector fratris sui in potestatem judicum veniret , quo ejus supplicio oculos pascere , atque exsaturare animum posset. itaque ; per lictores , quocunque illum venturum arbitrabatur , ibi antea , capiendi ejusdem gratia , insidias locabat , & , die quadam , ita obseptum eum habuit , ut nulla vis sibi posset eripere. nam in ædium quarundam tectum compulerat , quod antea lictores occupaverant : at ille , cum omnem fugæ rationem sibi ereptam animadverteret , neque vellet in lictorum potestatem venire , morte ex illorum manibus elabi constituit ; atque illico ex tegulis præcipitem se deturbavit in viam ; satius esse ducens , mortalem hanc vitam una cum illa beata ac sempiterna amittere , quam in lictorum potestatem veniens , tantum de se inimicis suis gaudium objicere. verum cum miser obtritatus jaceret in via , non potuit crudelem inimici sui animum ad misericordiam flectere , vel saltem implacabili illo odio exuere ; nam ille majori , quam antea , crudelitate atque odio inflammatum , cerebrum , quo obtriti caput viam asperferat , utraque manu colligens , eo os sibi perfricuit , admirantibus , seu potius stomachantibus iis , qui spectaculo aderant.

Pari crudelitate atque odio , alius quidam , suæ civitatis primus , erga inimicum suum exarsit ; quem cum , multis confossum vulneribus , ad terram abjecisset , vetuit Sacerdoti , qui eò accurrerat , quemque maximè expetebat , peccata sua confiteri , neque antea discessit , quàm animam efflasse animadvertit ; ut , cui mortalem hanc & miseram vitam ademerat , æternam etiam atque beatam , quod posset , eriperet.

Ex contrario , non desunt alii , ad condonandas , Christi causa , injurias , adeo prompti atque propensi , ut iis , à quibus graviter offensi sunt , ultro pacem & amicitiam expetiturum adveniant. quem in numerum referendus est Fabius Benvoglientes , I. C. Senensis , omnium suæ ætatis , non solum Senis , sed in tota Italia , ejus facul-

tatis facile princeps. hic, quemadmodum mihi narrabat P. Lepidus Piccolomineus Soc. Iesu, ejus auditor atque propinquus, cum audisset, filium, quem diligebat unice, adolescentem lectissimum, fuisse interemptum, non modo nullas cum eo, qui occiderat, inimicitias sibi suscipiendas esse statuit, sed testibus accitis, ultro in publicas tabulas referendum curavit, omnem se acceptæ injuriæ memoriam abjicere, & cum eo, qui ea domum suam clade affecisset, esse velle in amicitia & gratia. hic postea ad extremam senectutem summa cum laude vixit, ac moriens magnam reliquit sui nominis famam.

In eadem probitatis & clementiæ fama versatur vir mihi omnibus officiis conjunctissimus, qui etiam nunc vivit, generis antiquitate, nobilitate, splendore, nemini ex nobilitate Romana inferior; cujus frater olim supplicio affectus fuerat. hic vir longe clarissimus eum, cujus opera præsertim, fratri ea calamitas acciderat, non modo in numero inimicorum non habuit, sed tecto exceptum, quoad vixit, omnibus in rebus liberalissimè habuit. illud vero novum & incredibile, quod cum ille parum molliter se apud eum cubare quereretur, quod culcita sibi lanea paulo durior obtrigisset, suam lectulo, ubi cubabat, detraxit, atque illi utendam tradidit. tantam homini in rebus adversis, ut ita dicam, impatibilitatem egregia virtus, & Christi imitandi studium confecit. Hæc ego Curtium Mutum, patricium Romanum, & Canonicum Lateranensem, de illo prædicantem audiui.

Verum ab hac clementiæ laude, ne mulierum quidem imbecillitas absuit, quarum animus, in retinendis odiis, ob rationis & sexus infirmitatem, solet esse tenacior.

Me adolescente, mater mea, scæmina religiosissima, fere quotidianum cibum præbebat viduæ cuidam pauperculæ, cui sicarius quidam, ex eorum numero, qui noctu libidinis causa tota urbe bacchantur, filium, à quo alebatur, nulla fere de causa, per ludum jocumque occiderat, cuique, ea ipsa nocte, qui simulatione officii ad eam venerant, videlicet ut in illo ejus gra-
vissimo

viffimo cafa conſolarentur , domum fere inanem & vacuam reliquerant : hæc , inquam , tantam injuriam , quæ ad vitam ſalutemque pertineret , ita forti , ita æquo animo tulit , ut nihil pene commota fit ; neque aliud ex ea verbum audiebatur , niſi illud , Ferendum eſt , ita viſum eſt Deo. ſapiens videlicet mulier intelligebat , quidquid à Deo nobis immittitur , forti atque conſtanti animo eſſe ſubeundum ac perferendum.

Quamquam mihi propoſitum ſit ab initio , mandare huic libro , quæ mea ætate , vel paulo ſupra eam contigiffent , quæque adhuc à nemine , quod ſciam , memoriæ prodita ſint ac litteris ; attamen cogor vetus quiddam exponere , quod olim Bononiæ , in Vico , qui dicitur pius , contigiffe narratur. cum enim cædes facta eſſet , & adoleſcens quidam notus , interfectus , ſceleris illius reus , quem liſtores fugientem proſequabantur , abdidit ſe in ædes matronæ cujuſdam , à ſe penitus ignoratæ ; quo cum liſtores comprehendendi ejus cauſa veniſſent , ac mulier , miſericordia videlicet capta , negaſſet , quemquam à ſe viſum , liſtores , quo acrius ejus in illum animum inflammarent , indicarunt , illum , quem tantopere ſalvum eſſe cuperet , eum eſſe , qui filium ſuum interfeciſſet : ad quam vocem illa exterrita ac prope exanimis facta eſt ; ſed ſtatim acerbiffimo omnium dolore ſuppreſſo , ſublatis in cælum oculis , & ſimul interfectorem filii ſui complexa , Quandoquidem , inquit , non me latet , quantopere , mi Deus , hoc remiſſionis injuriarum ſacrificio delecteris , illud majeſtati tuæ offero in odorem ſuavitatis ; quamobrem poſthac adoleſcentem iſtum in ſignum reconciliatæ gratiæ , in filii loco habebō ; ac , teſtamento , omnium bonorum meorum hæredem inſtituam. hæc res , tam ſingularis , tam admirabilis , tam nova in admirationem egregiæ illius virtutis ſpectantium animos egit ; qui , gratiis Deo immortalibus actis , & collaudata mulieris fortitudine , diſceſſerunt , neque auſus eſt quiſquam adoleſcentem illum attingere. verum , quo nunquam ejus facti memoria oblivione hominum deleſceretur , vicus ille , cum antea alio nomine vocaretur , appellari cœptus eſt Pius,

Et

Et quoniam Florentiæ mentio facta est, neque illud, quantumvis vetus, à D. Io. Gualberto editum, egregiæ virtutis facinus prætereundum videtur; qui prope ejus urbis muros, cum in odiosum & invisum sibi inimicum incidisset, ac prope esset, ut impetum in eum faceret, oratus obsecratusque est, per Christi passionem & mortem, ne quid gravius in ipsum admitteret, sed illæsum abire sineret. at Gaulbertus, inentione de Christi passione injecta, constitit, atque, Eamus, inquit, ad Christum ipsum, ejusque sententiam exquiramus; nam quod mihi dederit de hac re consilium, id certum est exequi. erat non procul ab eo loco, ubi hæc gesta narrantur, Christi cruci affixi imago vetus, è ligno; quo cum copulati venissent, petiit Io. Gualbertus à Christo, num, si inimicum suum inviolatum dimississet, id sibi foret acceptum. rem miram; ea Christi Salvatoris imago, caput, quod antea cruci hærebat, abduxit, & in signum, quod illud approbaret confirmaretque, demisit; atque etiam nunc in cœnobio S. Miniati, ubi religiosissime asservatur, capite ita demisso conspicitur. quamobrem Gualbertus, cognita Christi voluntate, rediit cum inimico in gratiam, cum eoque conjunctissime vixit.

IX. Diebus festis cultum & honorem adhibendum.

NArravit mihi Angelus Lomellinus, patricius Iannensis, quod anno MDCXCVI, Epidaurius quidam myoparo Iannensem in portum se receperat, atque aliquot in eo dies fuerat; qui quidem Epidauri cujusdam auctoritate & imperio administrabatur, sed magna ex parte ad Nicolaum Lomellinum spectabat, ad quem Epidaurius ille die quodam accessit, aitque, sibi deliberatum esse, VIII Kal. Ian. myoparonein è portu solvere, quod Episcopum, nescio quem, Carthaginem novam adveheret; qui dies natalis erat Christi domini. cui Lomellinus, nullo modo sibi probari respondit, ut diem illum, toto orbe Christiano celeberrimum, qui pietatis ac religionis operibus deberetur, navigan-

navigando consumeret; quamobrem rectius eum esse facturum, si diem posterum expectasset. at ille, non esse id sibi integrum ait, quod profectioem in illum diem pronunciasset, ac velle in eo, quod dixisset, fidem servare; præterea, magnam ex ea re spem lucri ostendi; se enim vectores amplius quadraginta tollere, præter equos & merces, pro quibus naulum esset persolvendum; postremo, ventum operam dare, quod sciret quam raro hyeme solet contingere. Lomellinus, cum eum ita obfirmatum videret, Quoniam, inquit, tibi fixum in animo est myoparonem solvere, Deum quidem propitium exopto, sed insignem aliquam calamitatem metuo. Sed vera illum prælagisse, eventus comprobavit. nam cum myoparonem solvisset, ut dixerat, adeo prospera usus est tempestate, ut quantum post diem delatus in Hispaniam, alteram ex iis insulis, quas Baleares vocant, attigerit, sed non sine magno suo malo: etenim à vento, qui invaluerat, arreptus, ad scopulos ibi proximos myoparonem fregit, quique in eo erant, ad unum omnes interierunt. cujus calamitatis fama, non nuncii cujusquam opera ad continentem permanavit; nam relictus est nemo, qui nunciaret, sed cadaveribus defunctorum equorumque, tabulisque percrebuit, quæ mari illo ferebantur.

X. Parentibus summum, ex Dei præcepto, honorem cultumque tribui oportere.

Quantum, & quam prope inexpiabile, in se scelus admittant, qui, ut divina lex jubet, debito parentes honore non prosequuntur, plurima atque gravissima, edita in eos exempla declarant, qui matrem vel patrem damno aut contumelia dignum existimarunt; è quibus unum recens proferam, in quo, ut mihi videtur, divinæ justitiæ severitas mirum in modum elucet.

Cum superioribus annis, capitale quoddam facinus esset admissum, venerat in ejusdem suspicionem homo quidam, qui re vera ab eo scelere aberat longissime: verum quæstione habita, sive metu sive dolore adductus,

ductus, coactus erat illud de se fateri; sed cum supplicii dies advenisset, traditus est sodalibus Misericordiæ, qui eum cohortationibus suis ad mortem æquo animo ferendam impellerent, at ille, qui sibi esset conscius, illud à se facinus non fuisse admissum, cœpit clamare, vociferari, Dei atque hominum fidem implorare, neque aliquam in se consolationem admittere; sed cum defessi essent cohortando consolandoque, neque quidquam proficerent, paululum interquieverunt. interim venit in mentem eorum uni, ita cum illo agere. esto, inquit, nihil ad te hoc scelus attinere, sed cogita amabo, num quid in vita adiniferis, cui id supplicii debeatur. ille primo contemnere, nec velle audire; tum animum ad id, quod ille dixisset, intendere; postremo, cum aliquantulum in attenta atque acri meditatione defixus hæssisset, eos vocare, ac dicere: arbitror, me invenisse, quod Deus tam severe vindicandum censeat. ego paucis ab hinc annis matri meæ, quia me objurabat, calce ventrem ferii, eamque de scalis deturbaui; quo ictu casuque in morbum incidit, eoque paulatim consumpta, deperiit; ac, Dei auxilio, ita repente immutatus est totus, ut alius videretur. nam & se jure plecti, ac levius etiam, quam merita ipsius poscerent, fatebatur, tum peccata sua multis cum lacrimis sacerdoti aperuit, atque æquum, ad mortem illam inhonestam ac turpem, animum attulit.

XI. *De eadem materia.*

A Pud quosdam homines, rusticanos præsertim, quorum magna pars, si in alitiam & calliditatem excipias, nihil fere hominis retinet, apud eos, inquam, confecti ætate parentes, pene sunt odio, nec satis digni censentur, qui possint in hominum esse conspectu. itaque, quos morbus vel senectus, ad opus faciendum minus habiles reddit, rus abigunt, ut ibi cum feris alitibusque, quod reliquum est vitæ, traducant; cumque id faciunt, non sunt nescii, parem gratiam à suis sibi liberis redditum iri. nam, quemadmodum est in proverbio, *ut quisque sementem fecerit, ita metet.* quem
morem,

morem, cum alias fere semper, tum maxime, cum uxores ducunt, exercent. quæ cum ita sint, multis ab hinc annis, in quodam pago apud Samnites juvenis quidam, cum vellet domum uxorem ducere, parentem, annos natum supra centum, domo exegit, ac rus exulatum attraxit, ne senilis ille aspectus, adolescentulis præsertim invisus, uxori objiceretur. quem cum ad ostium villæ perduxisset, ac vellet discedere, senex lacrimans oravit, ne se tam cito desereret, sed saltem ad mensam usque perduceret: eodem enim patrem suum à se fuisse olim adductum. erat autem mensa lapis in summo rure, sub procera ac patula quercu, ad prandia & computationes expositus. hac re ille tanquam percussus, Quid audio? inquit, ô pater, eadem ne à te olim in parentem tuum profecta est injuria, quæ nunc à me tibi oritur, neque æquiore apud liberos meos futurus sum conditione, si vivam? non sinat hoc Deus. atque extemplo, mutata voluntate, domum eum reduxit, in præcipua & commodiori adium parte collocavit, ac summum in nuptiali cœna locum tenere voluit; cui plura missa sunt munera, ac plures invitationes factæ, quam cuiquam aliorum. exhiuc carum eum habuit, eoque, quo filios æquum est parentes, persecutus est honore ac benevolentia. Hæc mihi narravit mulier grandæva, & ab omni vanitate abhorrens, ac timens Deum; quæ, cum esset Taliacotii, ab oppidanis illis acceperat.

XII. Sacerdos è Soc. Iesu, novo artificio, mulieris insidias effugit, à qua ad stuprum incitabatur.

PFranciscus Rocca, è Soc. Iesu, vir cum primis sanctus ac religiosus, qui complures annos mihi fuit à confessionibus, annos natus septem & octuaginta, quorum sexaginta in Societate confecerat; hic, inquam, tam gravis vir mihi narrabat, olim sacerdotis cujusdam, ex eadem Soc. pudicitiam acriter fuisse tentatam oppugnatamque, sed divino auxilio integram inviola-

inviolatamque servatam. etiam inatrona quædam, genere & copiis in primis excellens, eo in Patrem illum amore exarserat, ut famam ac pudicitiam post libidinem suam haberet. itaque, libidine incensa, eundem magnopere evocandum curavit; simulans, se gravi morbo correptam, velle peccata confiteri, quo nuncio ille commotus, pro eo quod mulier, propter summam nobilitatem, magno erat apud omnes honore ac nomine, accurrit, eamque in interiori ædium parte, in lecto jacentem offendit; quæ statim, renotis arbitris, quo morbo affecta esset, aperuit; nam Dei timorem, ac generis nobilitatem oblita, cupide se in eum rejecit: quam ille, quanta vi potuit, à se repellens, multa severe & graviter dixit, ut ab eo morbo sanaret; sed laterem lavit. nam decretum erat mulieri, conata perficere. quamobrem furore libidinis amens, Nisi mihi, inquit, obnoxius fias, nunquam hinc pedem referes; omnes enim aditus sunt ad exitus clausi atque obstructi: itaque, quid agas, etiam atque etiam cogita. ille in eas se angustias adductum videns, tanquam altera Susanna ingemuit, & quia cor ejus erat fiduciam habens in Domino, à divino ejus auxilio non est destitutus, sed mirum in modum adjutus. nam cælesti afflatus spiritu, postulat sibi locum ostendi, ubi alvum exoneret; etenim se ejus dejectiendæ desiderio teneri. illa secretiorem quendam locum demonstrat; quo cum Pater se contulisset (honor sit auribus) eo, quod venter excreverat, os sibi perunxit, atque ita fœdus ac sordidatus mulieri in conspectum prodiit. cui, Ecce me, inquit, impura, tuum ad arbitrium tene, atque complectere. quæ stomachans continuo omnem de illo amorem ejecit, & in ejus locum odium admisit; ac primum abire eum jussit, tum vetuit quoquam ubi ea esset accedere, atque os ipsum suum ostendere. ille, facta abeundi potestate, discessit, & ad fontem ibi proximum os manusque lavit, sudarioque siccavit. itaque corporis sordes saluti fuere animo, ne luxuriæ cœno inficeretur.

XIII. *Alterius ex eadem Societate, falso crimine accusati, in sufferenda calumnia, virtus & constantia.*

QVoniam de Patribus Soc. Iesu mentio injecta est, aliud alterius ex eadem familia facinus commemorabo, in quo mihi omnes virtutes castitatis, patientiæ, humilitatis, fortitudinis inesse videntur. Sacerdos audiendis confessionibus præpositus, matronæ cujusdam, eximia pulchritudine, cum pari integritate pudicitiaque conjuncta, confessiones excipiebat. hanc juvenis quidam impurns ad insaniam concupierat; sed cum omnes ad eam aditus, suis cupiditatibus interclusos aspiceret, existimavit, id sacerdotis illius consiliis & admonitionibus fieri; ac pro certo credidit, illud tam munitum præsidium pudicitæ se expugnaturum, si dedisset operam, ut eo auxilio nudaretur. itaque sacerdotem illum, apud superiorem suum, probri flagitiique insimulare constituit; nec mora, ad eum venit, ostendit, sacerdoti illi veterem cum ea muliere stupri consuetudinem esse; fictos in eum testes dat, qui dicunt pro testimonio, eum à se manifesto in flagitio deprehensum; atque adeo rem totam ad similitudinem veri componit, ut omnis misero illi, tum inficiandi, tum existimationis suæ à calumniis vindicandæ ratio præcideretur, quamobrem superior, de consilii sententia, graviter animadvertendum in eum statuit, ac primo sacris eum intercidit, tum levioribus quibusdam provinciis præficit; nimirum ut domum verrat, ostium servet, & alia etiam humilia procuret; quam ille contumeliam, Christi Domini causa, tacite ferendam esse arbitrabatur. Sed non est oblitus Dominus servi sui. nam quem, ejus videlicet virtutis periclitandæ gratia, in ea invidiæ flamma esse permiserat, ab ea etiam cum voluit, eundem eripuit, atque lethali calumniatorem illum morbo percussit, quo cum acrius in dies premeretur, confessus est sacerdoti peccata sua; cui, inter alia, negotium illud aperuit, quod innocenti facefferat.

rat. at prudens sacerdos, non posse eum Deo judici salvum esse, respondit, nisi quem fama privaverat, existimationi hominum vindicaret. qui facti poenitens, rem totam in sacerdotem reiecit, ut nimirum ea faceret, quæ in rem animæ suæ esse intelligeret. ille nihil sibi esse faciendum prius existimavit, quam ut superiorem adiret, & ærumnosum illum, falso crimine circumventum, ea miseria liberaret. sed satis dici verbis non potest, quanto superiorem illum gaudio jucundissimus hic nuncius affecerit, & quantas quamque ingentes sacerdoti illi gratias egerit. tum innocentem illum ad se venire jussum postquam arctissime complexus est, inul-
tis cum lacrimis exoravit, ut sibi parceret, quod per suam injuriam, tam multa in eum asperere sæviterque sanxisset.

XIV. *Juvenis meretricem, castitatem ipsius labefactare conantem, humani cadaveris capite objecto ad poenitentiam revocat, seque periculo eripit.*

Superioribus annis, quemadmodum mihi narravit P. Io. Matthæus Ancina, Congregationis Oratorii, Romæ juvenis quidam ex Sodalitate Deiparæ Virginis Assumptæ, in Aedibus Patrum Oratorii, adeo in piis operibus, quæ sunt ejus Sodalitatis propriæ, se exercebat, ut ceterorum fere studia assiduitate diligentiaque anteciret, & à cunctis in exemplum virtutis probitatisque suspiceretur. quod cum perpetuus humani generis hostis animo iniquissimo ferret, ac doleret, inter tot peccandi illecebras, ætate integra hominem, animum integrum inviolatumque servare, atque in humano corpore vitam imitari Angelorum, dedit operam per flagitiosos homines, ut præsertim meretriciis amoribus irretitum, in sua castra pertraherent. quamobrem ejus impulsu, juvenes aliquot, primum in eo omnes industriæ suæ nervos contenderunt, ut in meretricis cujusdam domum secum una perducerent. sed cum id parum procederet, alia via castissimum ejus propositum sunt

sunt conati pervertere. die quodam, conscia ea muliercula, apud quam in hospitium ille diverterat, ætate integra & forma egregia mulierem, ejus in cubiculo claudunt, atque his præceptis onerant, videlicet ut advenientem comiter excipiat, ac blandiciis & illecebris captum ad nequitiam adducat. illa, satis superque ad malitiam instructa, plus ex se daturam pollicetur, quam illi poscerent. itaque insidiarum ejusmodi ignarus, à piis suis exercitationibus, juvenis rediens, pedem intro in cubiculum infert; cum meritrix docta, dolis insistit. ille egregio mulieris aspectu, ex improvise percussus, sensit se non minimum commoveri; sed statim animum recipiens, spiritu Dei plenus, arrepto cadaveris humani capite, quod ad meditationes mortis habebat, id illi, prodeunti sibi obviam, objecit, ac, Mox, inquit, pessima, tua isthæc facies, tam compta, tam fucata, tam nitida, ad istius similitudinem, horrorem incutiet. hoc spectaculo exterrita, plane vehementer exhorruit, ac fusa in lacrimas, illius ad pedes accidit, veniam orans; quæ impetrata, longe alia discessit ac venerat. nam postridie flens ad sacerdotis pedes se abjecit, ut seria ac diligenti confessione præteritæ vitæ sordes ablueret, ac cum Deo rediret in gratiam; cui deinceps, ejusque Virgini matri obsequentissima, quoad vixit, fuit.

X V. *Cadaverum defunctorum aspectum,
ad vitia extirpanda, plurimum pro-*
desse.

ET sane nulla res tantam vim habet vel ad comprimendos libidinis æstus; vel ad compescendas inanium rerum cupiditates, quam mortuorum aspectus, aut arida eorundem cadaverum ossa. tunc enim, non cogitatione solum, vel auribus, sed oculis ipsis accipitur, corpus hoc nostrum tantopere à nobis cultum, & in deliciis habitum, nihil nisi fœtidum cœnum ac funestum esse pulverem. atque tantum huic rei ad vitam honeste ac laudabiliter exigendam, viri omnium sanctissimi tribuerunt, ut in ipsis mortuorum sepulcris ta-

bernaculum vitæ collocarint, neque usquam tutius, adversus carnis ac mundi illecebras habitari posse ducebant, quam ubi mortis memoria altius in ipsorum animis insideret, nec ab eis unquam excideret.

Quam multi in historiis sacris leguntur, qui visis cadaveribus eorum, quos unice in vita dilexerant, vel propter honorem, vel formam, vel gloriam, prope in deorum loco vel numero habuerant, repente ab inanum rerum cogitationibus animum abduxerunt, & in Deo collocarunt? insigne est illud, & à multis sæpe commemoratum B. Francisci Borgiæ, Gandiæ Ducis exemplum, qui cum Isabellæ Caroli V Imperatoris conjugis mortuæ faciem, adeo tetram, adeo foetidam, esset intuitus, ut neque ejus aspectum ferre, neque exeuntem ab ea foeditatem odoris pati quisquam eorum, qui aderant, posset, ac cogitans, quo deinum humanæ gloriæ fastus recideret, usque adeo commotus est, ut statim de novo vitæ genere ineundo cogitaverit, & quam primum potuit, principatu ac reliquis vitæ commodis repudiatis, Societati Iesu, humili tum ac neglectæ pauperum familiæ, nomen dederit, in eaque ad extremum usque spiritum sanctissime vixerit.

Neque illud est prætereundum, quod de adolescente quodam nobili narratur, quem ipsi, multis ab hinc annis, sumptuose eleganterque vestitum, equoque insidentem, tota urbe vagari conspeximus. hic, cum honesta in primis forma mulierem adamaret, sectaretur, eidemque propemodum, ut deæ, honorem haberet, necio quo casu, biduum domi se se continuit; neque quisquam affuit, quem percontari, quid rerum ea mulier ageret, posset; sed cum demum, tanquam diuturnam firim explere cupiens, iret, ut ejus aspectu oculos pasceret, forte, qua iter habebat, in æde quadam sacra, animadvertit, mulieri mortuæ exequias fieri; accedit, inspicit, atque in ejus facie magnam ejus mulieris, cuius erat cupiens, similitudinem reperit; quærit, ecquæ sit ea mulier; audit, eam esse, quam deperibat, cuiusque aspiciendæ tanta cupiditate flagrabat; eam enim bidui morbo consumptam, illuc elatam esse, ut sepulturæ mandaretur, quæ res, tam repentina, tam nova,

tam

tam atrox, quam illi admirationem, quem horrorem, quem animi dolorem inusserit, non est necesse dictu, sed in aliorum cogitatione relinquitur: ac nihil propius est factum, quam ut ibi ex ægritudine mortem obiret: verum cum se paululum collegisset, illinc vix vivus excessit, ac reversus est domum; ubi, cum in acerrima attentissimaque cogitatione defixus hæreret, paulatim tractus est ad rerum humanarum varietatem, inconstantiamque, ad vitæ brevitate, ad mortis necessitate, ad formæ muliebris vanitatem contemplandam; atque in ejusmodi cogitatione, adeo divinæ gratiæ lumine illustratus est, ut rebus tam falsis tamque fallacibus se subducere, & æternam suam salutem in tuto collocare statuerit; ac, ne longum faciam, paucis post mensibus, arctissimam fere omnium, quæ nunc vigent, religiosorum ordinum familiam ingressus est, in eaque, quoad vixit, ceteris exemplum castitatis, abstinentiæ, humilitatis, virtutumque omnium extitit.

XVI. Rei familiaris, vel existimationis damnum, rectam homini mentem injicere.

NEque solum Deus ex horribili mortuorum aspectu, verum etiam ex aliqua rei familiaris vel existimationis jactura, complures, à latissima sæculi via abreptos, inter religiosorum hominum claustra abstraxit; atque hos inter, ante annos circiter duodeviginti, præstanti nobilitate juvenem, qui ludis Bacchanalibus, in ludicra armorum concertatione, cui fortasse spectatrix aderat ea, quam his artibus sibi conciliare studebat, non modo nihil ex se se expectatione hominum dignum edidit, verum etiam se ultro deridendum ac deludendum exhibuit. nam cum in maxima totius fere Urbis corona Trojam luderet, cumque se maxime populo placere arbitraretur, infeliciter equo delapsus, omnium cum risu pene ab eodem est oppressus: qui casus tantum eidem rerum humanarum odium ingenuit, tantumque ruborem incussit, ut cum verecundaretur in publicum prodire, in claustris Religiosorum quorundam

dam hominum se abdiderit; ubi nunc, non solum imperio ac potestate, verum etiam probitate, animi demissione, ac rerum omnium contemptu, compluribus ejus familiæ præest. bene ergo rogat Dominum David, ut improbos ad pœnitentiam homines, hac in primis ratione traducat: *imple facies eorum ignominia, & quærent nomen tuum Domine.*

XVII. *Vir nobilis ac pius, ei, qui ipsi colaphum impegerat, alteram maxillam objicit.*

QUOD fieri vix posse existimatur, ut quisquam colapho percussus, alteram maxillam præbeat, id Dei auxilio facile posse contingere, nostra fere memoria, ostendit Alexander Luzagus, nobili genere Brixiaë natus. hic etiam tum viris duobus illis clarissimis sanctitatis luminibus, Carolo Borromæo, & Philippo Nerio, quibus cum illi amicitia atque usus. litterarum intercedebat, multarum splendore virtutum enituit; sed inter cetera pietatis opera, quibus suum ille studium dederat, summam in eo operam collocabat, ut suorum civium discordias sedaret, pacemque inter eos componeret. verum cum unus insignem ab altero injuriam accepisset, studeretque eum illi, à quo læsus fuerat, reconciliare; accidit, in altercando, ut ab eo graviter colapho ferirerur; qua contumelia, adeo non est illi factus iratior, ut etiam alteram oris partem verberandam tradiderit. hæc tam insignis animi mansuetudo atque patientia, tantam in eo, qui ferierat, commutationem effecit, ut se se illi ad pedes projecerit, ac vim lacrimarum effuderit, postremo, depositis simultatibus, ex illius arbitrio ac voluntate, pacem cum inimico confecerit.

XVIII. *Graviter vulnerato, condonando inimicis injuriam, statim vulnus obducitur & sanatur.*

EQues quidam, ab inimicis suis circumventus, grave vulnus acceperat, neque, tam insigni accepta injuria, quidquam æque studebat, quam ut iniquissimis illis parem gratiam referret; nullaque cujusquam oratione adduci poterat, ut aliquam conditionem pacis acciperet: verum cum Capuccinus quidam, egregius rerum divinarum interpres, ead venisset, rogatus est, ut hominem adiret, atque experiretur, num posset ejus animi duritiam flectere, & ad cogitationes pacis adducere; qui cum non invitus negotium suscepisset, venit ad eum, atque, ut erat in primis disertus, de condonandis Christi causa injuriis, multa graviter copioseque narravit; cujus orationis vi tandem extorsit ab eo, ut polliceretur, se pacem cum inimicis facturum. & sane, id tum ex animo ab eo dictum promissumque constabat; sed quoties vulneri curatio adhibebatur, fiebat, doloris magnitudine, ut de sententia dejiceretur, ac rursus ad persequendas inimicitias animum adjiceret: quod cum ipse animadverteret, ac dæmonis has esse technas agnosceret, cui utile erat maxime, ipsum ab odio non discedere, sed inimicitias, ut antea, gerere, vetuit sibi antea vulnus curari, quam tabellio venisset, & in publicas tabulas retulisset, omnem se acceptæ injuriæ memoriam abjicere, ac velle cum inimicis suis esse in amicitia & gratia. quo facto, cum medicus vulnus aperiret, sanatum obductumque illud invenit, vix ut ullum cicatricis cuiuspiam vestigium ostenderet.

XIX. *Malivulus quidam, dum probum ac pium virum ex insidiis aggreditur, subito stupore corripitur.*

IO. Angelinus, ex ea Sodalitate B. Virginis in ædibus patrum Oratorii, quam diximus, ex falsa qua-

dam suspicione, venerat cuidam in odium tantum, tamque acerbum, ut omnibus horis ad necem expeteretur. id odium acrius vehementiusque inflammabant alii quidam, quibus propositum erat hunc innocentem opprimere; qui fuerunt inimico illi auctores, ut red-
euntem eum ab æde Oratorii aggrediretur vitæque spoliaret: quæ cum illi ratio placuisset, iter, quod illi necessario ineundum erat, armatus obsidet, ferroque advenientem, ac nihil tale suspicantem, invadit: sed vix proxime ad eum accessit, cum eo horrore peresus est, ut brachia manusque torperent, vel potius totus sine aliquo sensu hæreret. quod ille veneficiis & cantionibus tribuens, Venefice, inquit, quid tecum effers, quod mihi vires atque animum adiunit? cui ille intrepidus, Christum, inquit, fero. (nam eo die, Christi corporis sacramenta perceperat,) hic me tibi eripit, hic omnes tuos conatus in irritum redigit. quo audite, admiratus est hominis probitatem, seque falsis inle-
volorum accusationibus aures dedisse poenituit; tum ad eum conversus; Satis jam, satis, ait, tua mihi perspecta est virtus, satis iniquorum tuorum nota malitia, qui te mihi falso conati sunt in suspensionem adducere; abi, ac Deum pro me comprecare, in cuius tutela patrocini-
noque versaris. tum abiens, rem totam, id quod factum antea oportuit, diligentius indagandam investigandamque curavit, atque invenit falsas illas criminationes, odii causa, ab invidis confictas esse, neque quidquam ad eum, quem pro inimico habuerat, pertinere.

XX. Fratricida justas Deo facinoris sui poenas exsolvit.

IN Polonia, ejus Regni Proceres, hoc plane sunt iure, ut si quis decedat, relictis ex se pluribus filiis, qui est natu maximus, solus hæreditatem accipiat, reliquis autem fratribus, pro ipsorum nobilitate, victum vestitum, & reliqua ad vitam necessaria suppedet. Erat Comes quidam fere ejus Regni primus, tribus liberis præditus, quorum qui primo erat ætate proximior, hæres patri esse cupiebat, sed Regni legibus, non pote-
rat,

rat, superflite illo, ut diximus, qui ipsum ætate antecede-
bat. quamobrem amens cupiditate, decrevit illum in-
sidiis ac fraude, ac, si minus res procederet, palam ex-
tinguere. itaque dat sicariis quibusdam negotium, ut
eum quovis modo obtruncet; qui, ut erat imperatum,
efficiunt. sed non diutius impune hoc abstulit. nam cum
paulo post tanto scelere inquinatus, in Italiam, ac Ro-
mam venisset, atque inde Neapolin ejus urbis visendæ
studio contenderet, dum apud Citerum quiescendi
gratia consilium, atque interim equos in proximum ibi
agrum pabulatum dimittit; à rusticano homine, ejus
agri custode, quem verborum contumeliis affecerat,
glande è sclopo diuissa trajicitur, ac subito moriens,
minime diu perceptæ ex fraterna cæde voluptatis po-
titus est.

*XXI. Dæmonis insidiæ, cogitationes, quas in
nobis excitat, cum prudentiore communi-
cando, vitantur.*

Cum pravas cogitationes dæmon in animum nobis
immittit, nihil æque studet, atque illud, ut occul-
tas eas habeamus, neque cum iis communicemus, qui-
bus ipsi moderandi regendique nostri potestatem, quasi
quasdam habenas tradidimus. neque enim dubitat, si con-
tinuo aperiuntur, quin omnes ejus artes palam fiant, &
conatus in irritum recidant. hic igitur, tam callidus ac
veterator humani generis hostis, cum matronam in pri-
mis nobilem, suadendo incitandoque, compelleret, ut
adulterium cum adolescente committeret, à quo pro-
pter formam expetebatur, cumque incertus mulieris ani-
mus æstaret dubitatione, & in varias partes rapere-
tur; tandem fluctuanti, ac jam pessum eunti subvenit
Deus, subjecitque, ut ad insignem concionatorem, qui
tum magnum doctrinæ & sanctitatis nomen habebat,
rem totam referret, quodque ipsi dedisset de ea re con-
siliium, exsequeretur. itaque venit ad eum, egregium
adolescentis in se amorem commemorat, propensam
uam in eum voluntatem exponit, quid sit opus facto,

perquirat; quibus auditis, Video, inquit ille, te in adolescentem istum mire propensam, eo quod ab eo te diligere arbitreris; at si tibi alium ostendam, cujus in te amor & studium longe majus existat, non ne æquum est, illum priores apud te partes habere? At mulier, (quod erat illi sermo cum viro sanctissimo religiosissimoque) hac oratione Christum designari existimavit: atque, Ita est, inquit, Christus est præ ceteris diligendus, & in oculis ferendus, cujus in nos amor ceterorum studia, infinito intervallo, præcurrit; at si de hominibus loquamur, egregiam hujus adolescentis in me benevolentiam esse percipio. cui ille, erras, inquit, alium intelligebam. quem igitur? ait illa; me ipsum, respondit; ego, inquam, amore in te & benevolentia longe istum, quem prædicas, anteo. uter, obsecro, majori te dilectione complectitur, ille ne qui tibi famam ac pudicitiam studeat adimere, an ille, qui hæc ipsa facta recta præstare conetur? at quisquis te amore venereo prosequitur, dum suam abs te voluptatem expleat, non laborat, si pudicitia atque existimationis faciat expertem; contra ego nullius rei ita sum cupidus, ut existimationis tuæ bonæ, & quod refert, salutis æternæ. atque, occasione sumpta, tam multa de fama pudicitiaque tuenda, de fœditate peccati, de poenis apud inferos improbis constitutis, atque ita graviter copioseque dixit, ut mulier sententia destiterit, eoque perducta sit, ut milles antea mori decreverit, quam quidquam admittere, quod esset contrarium divinæ legi, ac matris familias honestati. cujus voluntatis, amatorem suum certiore per litteras fecit, eundemque conata est ad officium sanitatemque reducere; neque operam perdidit. nam litteris lectis, ad se ipsum rediit, atque probrum castæ, labem integræ, famam bonæ se voluisse inferre, poenituit, & simul novam mentem induit, nova consilia suscepit, & usque eo, castitatis amore studioque, processit, ut multis, qui in eodem curriculo erant, vitæ integritate sanctimoniaque præierit. Hæc ego de eodem illo concionatore audiui; pro suggestu cum diceret, nusquam fortius nostro ab animo dæmonem rejici, quam si probo atque experienti cuipiam magistro, inti-

ma cordis nostri cubilia atque recessus aperiantur. & in hanc sententiam refert Ioannes cognomento Climacus, se vidisse, in quodam coenobio, insignem ætate & sanctimonia monachum, cuius lateri tabella pendeat, in qua cogitationes omnes suas, deinceps, ut veniebant in mentem, describebat; quo eas facilius Abbati, ut præceptum erat, ostenderet. prudens videlicet Abbas intellegebat, cordis cogitationibus palam factis, dæmonis insidias non esse magnopere pertimescendas.

XXII. *Optimum & Christiano viro dignum vitæ exitum à Deo esse petendum.*

Nihil tam optandum est Christiano viro, quam ut ipsius anima moriatur morte iustorum: sed sunt aliqui ingenio adeo pravo, adeo perverso, ut pessimam peccatorum mortem exoptent. nam sunt, qui cupiant fortiter in acie dimicantes occumbere; alii, ne vivi in hostium vel iudicum potestatem manusque perveniant, similem Catoni exitum concupiscunt, qui se, voluntaria morte, inimicorum acerbitati subduxit; alii, quod est peccatorum genus longe pessimum, in complexu amiculæ optant diem supremum obire, vel, si minus id liceat, morte pro eadem fortiter subeunda, vim sui in eam amoris ostendere. nam stulta quadam opinione ducti, nullam vitam putant, huic morti anteponendam. Ex hoc genere fuit unus, qui pluribus abhinc annis fidicinæ cujusdam, magni nominis, amore tenebatur. hic cum ob æs alienum, quod debebat, in vinculis publicis detineretur, atque incredibili absentis amicæ desiderio excrucietur, illa, quo fortasse eam homini miseriam leniret, nocte quadam ad eum, ante carceris ostium venit, & cantilenam quandam recens compositam, in qua de amatorum morte fiebat mentio, ad fidium cantus, scite admodum ac lepide cecinit; qua conclusa, ille miser, fidicinæ illius desiderio correptus est, adeo, ut à carceris clathris abiens, unde feralem illum cantum per aures in animum miserat, seque prònum in lectum abiciens, morte extinctus subita sit.

XXIII. *Alter*

XXIII. *Alter itidem ob amorem, prudens
sciensque, ad interitum ruit voluntarium.*

Similem prope exitum vitæ nactus est alter, qui cum mulierem nobilem ad insaniam adamaret, sectareturque, admonitus est à plerisque, ut incepto desisteret, neque committeret, ut propter insanam illam cupiditatem, in apertum vitæ discrimen veniret; quibus ille respondebat, longe sibi vita cariorē mortem illam fore, quam ejus mulieris causa subiisset; quamobrem veniret; non se illi libenter occursurum: verum infortunium, quod negligebat, sive potius optabat, non fuit in mora, sed properavit accedere. nam cum in eadem insaniam perseveraret, ac propter eam mulier in populi sermonem vituperationemque venisset, ab ejus viro, qui eam infamiam ferre non posset, ex insidiis oppressus, eum, quem concupierat, vitæ finem obtinuit.

XXIV. *Male illis evenire, qui Deum sacrosque ejus ritus deridiculo habeant.*

Quo anno F. Hyacinthus Casalensis Capuccinus Romæ, in Æde D. Laurentii in Damaso, sacras ad populum conciones habebat, dabat operam sedulo ut intimum animi dolorem, ex peccatis in Deum commissis, in auditoribus suis excitaret. itaque sæpe eos jubebat, positis humi genibus, magnæque voce, Dei misericordiam implorare. Sed quia adsunt interdum, qui ea, quæ salubriter ad hominum utilitatem instituta sunt, cum risu excipiant, (quod est commune vitium adolescentiæ,) ut omnis scurrilitas removeretur, narrabat; dum Mediolani, nisi memoria me fugit, concionaretur, & hac eadem ratione populo fletum movere studeret, inter eos qui divinam misericordiam implorabant, fuisse derisorem unum, qui loco misericordiæ, vocum similitudine, peteret semilibram cordæ, (ita enim Itali funem appellant) sed, paucis interjectis mensibus, se venisse evocatum ad quendam, aiebat, qui esset

esset ultimo supplicio afficiendus, quo eum, ut fit, in extremo illo casu consolaretur, sed adveniente in se arctissimis fuisse ab illo amplexibus circumplicatum, multisque cum lacrimis exoratum, ut sibi ignosceret, Deumque pro ipso deprecaretur; se enim eum esse, qui, cum voce ac lacrimis, Dei in se misericordiam implorare juberetur, joci causa, cordæ semissem exclamasset; itaque præsto esse illum funem, quem expetiisset; etenim ob sua sibi scelera vitam esse suspendio terminandam; quod si tunc ex animo divinam misericordiam, ab ipso admonitus, implorasset, eam in se facile expertus esset, tantamque vim malorum à sui capitis peste depulisset. Quamobrem ille miser expertus didicit, vere dictum à sapiente, *parata esse derisoribus judicia. Proverb, ix, 29.*

XXV. *Egregium singularis cujusdam obedientiae exemplum.*

Adolescens quidam, ex optima sanctissimaque Religiosorum hominum familia, novum hoc & inauditum egregiæ cujusdam obedientiæ specimem edidit. Huic cum, ex morbo, alvus esset adstrictior, ac propterea clystere emollienda, recusabat illum acciperet, eo quod, modo ab igne detractus, effervesceret. verebatur enim id, quod postea accidit, ne sibi intestina incenderentur. quod valetudinarii præfectus, rudis atque imperitus rerum, ad molliciem animi, atque ad delicias referebat. quamobrem clystere ad ignem rursus appposito, ne tepesceret, ad superiorem adiit, accusavitque eundem apud illum inertiae, & criminis, animi parum dicto audientis: at superior, ad eum veniens, quem nimirum cuperet, ex eo quam primum morbo convalescere, Ejicienda est, inquit, hæc mollicies animi, ac medicis jussis obtemperandum; jam videro, quantum obedientiæ tribuas, cujus voto Deo te obligasti, atque eadem opera se è cubiculo foras ejecit: at bonus ille adolescens nullum existimans excusationi locum esse relictum, ac simul, voti religione objecta, metuens ne parum obtemperans haberetur, passus est illud ardens medicamentum sibi in alvum immitti, quod visceribus infusum,

fasum, mortem ipsi, quam acerbissimam attulit. maluit videlicet certissimum vitæ periculum adire, quam aliquam vel tenuem non ita obsequentis animi suspicionem injicere. Hæc mihi etiam tum puero tradita sunt à Septimio Cenino, à quo in bonis artibus erudiebar, qui fuerat Seminarii Romani Clericus, atque eadem hæc à moderatoribus ejus Collegii, viris gravissimis acceperat.

XXVI. *Libidines hominum à Deo, non solum in futura, verum etiam in hac vita, pœnis suppliciiſque conſtringi.*

ADed Deus, qui ipsamet sanctitas est, impudiciæ omnisque incontinentiæ crimina detestatur atque horret, ut ad ea vindicanda sæpenumero supremi judicii tempus non expectet, sed in præsentia, damno, dedecore ac morte coërceat. F. Nicolaus Ricardius, qui ab incredibili ac pene prodigiosa ingenii magnitudine, Monstri cognomen invenit, narrat, olim se à quibusdam magno opere fuisse evocatum, ut ad morientem accederet, ejusque confessiones exciperet; & cum ipse, pro sua egregia in omnes caritate, non invitus has partes suscepisset, sensit continuo, sibi caput obvolvi, seque ita obvoluto capite, in quoddam conclave perducì; ubi, remoto ab oculis velo, ad exiguum nescio quod lumen, mulierem adolescentem plorantem aspexit, cui, manifesto in flagitio deprehensæ, ferro vita erat eripienda; additque, transactis jam suis partibus, capite ut antea obvoluto, eodem se, unde deductus fuerat, reductum fuisse.

Verum, è re nata, non incommode alteri cuidam mulieri accidit; quæ cum ex furtivo concubitu gravida evasisset, cumque ad pariendum vicina, temporibus exactis, laboraret ex dolore, simulavit, se lethali morbo ex improvise correptam extingui, ac continuo, in ejus auxilium animæ, Capuccinus quidam accitur; cui illa, remotis arbitris, veram morbi causam aperuit; neque, si reticuisset res ipsa non indicasset; nam eo adhuc præſente enixa est puerum. tum mulier lacrimans cœpit misere

misere Patrem illum orare, ut sibi subveniret, daretque operam, ut partus ille clam parentes atque adeo cognatos ejus omnes eveniret; neque enim, parturire se, aut gravidam esse, quemquam consciunt; ceteroqui, si id paululum suboleret, sibi omnes cruciatus esse perferendos. at bonus ille Capuccinus, misericordia captus, bono esse animo eam jussit, pollicitusque est, eam sibi rem cordi futuram; magnam se habere spem, & diligentia sua, & Dei præsidio, fore omnibus occultam. nec mora, id, quod pepererat, intra vestes abditum, nemine animadvertente, foras extraxit; & sacro baptismatis fonte ablutum, nutrici alendum tradidit. itaque neque illam fuisse puerperam, ac ne prægnantem quidem, adhuc quisquam rescivit.

XXVII. *Panes benedictos, ut vocant, S. Nicolai Tolentinatis, magnam vim habere adversus tempestates & incendia.*

Angelus Loinellinus, cujus antea meminimus, cum, in mense Majo anni MDCXXXII, Sorianum, quod est oppidum Calabriae, pietatis ac religionis ergo contenderet, Alexandro cuidam à Turre Panormitano, qui illuc eadem de causa proficiscebatur, se comitem addidit. erat hic Alexandro famulus vehemens, ac moræ cujusvis impatiens; huic abundi cupido nullis rationibus suaderi potuit, ut triduum saltem Pentecostes, in quod tempus adventus illorum incurrerat, ibi traderet, sed importune perfecerat, ut itineri se se committerent; sed cum ad Circeum montem pervenissent, ob difficultatem navigandi, quod tum ventus mari infederat, qui est Cajetam petentibus contrarius, coacti sunt ibi quandam in turrim se recipere. at famulus ille, eadem expectandi impatientia exagitatus, Parvulus mihi, inquit, est panis in honorem D. Nicolai Tolentinatis benedictus, ut ajunt; hic, ut alias expertus didici, tempestates abigit, serenitates advehit; nunc si mihi ille idoneum ad navigandum mare non reddit, omnem posthac Divo illi fidem abrogabo, neque cultum aut honorem

rem aliquem adhibebo. quæ cum loqueretur, acriter ab illis vehementerque est objurgatus. res mira; vix mare panem illum excepit, cum summa tranquillitas est consecuta, cœpitque ventus ille, quo maxime indigebant, ita operam dare, ut cum meridie solvissent, fere ante solis occasum Cæjetam attigerint, quæ distat ab eo loco millia passuum quinque & quadraginta.

Idem Angelus, cum, anno MDCXXXIII, Epiphaniæ die, venisset Neapolin, exceptus est hospitio, à viro ejus civitatis nobilissimo, cumque cœnatus cubitum isset, removeri lumen vetuit. nam solitus erat, ante quam somnus obreperet, aliquod tempus lectioni tribuere. sella erat proxima lectulo ubi cubabat; in ea femoralia, tibialia ac thoracem collocavit, candelam vero accensam alteri sellæ manubrio commendavit. sed cum satis lectioni dedisset, jamque somnus videretur accedere, deposito libro, extinctoque lumine, quieti se tradidit; sed cum eundem arcte somnus esset amplexus factus est familiarium ad eum strepitus atque concursus, quibus cubiculum intus lucere videbatur; quorum vocibus expergesfactus, sellam una cum vestibus arsisse, seque prope circumdatum flammis aspexit, quare perterritus, se è lecto foras ejecit, & suam unâ cum aliis ad comprimendum ignem, operam contulit. inerat sacculo femoralibus adjuncto clavis, cum pane uno S. Nicolai Tolentinatis, quæ ille inter cineres quærens, in quos vestimenta redacta fuerant, deprehendit, clavem nigredine, ex igne fumoque, obductam, panem vero, quamvis in eadem cum clavi flamma fuisset, nullum ab igne detrimentum accepisse, sed suam prorsus integritatem & albedinem conservasse.

XXVIII. *Non esse, in rebus dubiis, de Dei providentia desperandum.*

HEbræus quidam, non ita multo ante ad Christi fidem conversus, in eas rei familiaris angustias redactus erat, ut omnia ad necessarium usum deessent. accedebat ad egestatem morbus difficilis ac diuturnus; quod fiebat, ut ne suis saltem operis sibi victum quæriraret, &c. quod

quod gravius est, omnium in se benignitatem clausam esse intelligebat. quamobrem totus à Dei providentia pendebat. non sibi deerat dæmon, sed, tam opportuna occasione suscepta, assiduas illi pugnas dabat, atque tales quasdam cogitationes immistebat in mentem, videlicet ut Christiana religione relicta, unde illud sibi incommodum provenisset, Iudæorum castra repeteret. aderant etiam Iudæi, cum munusculis, quæ ille forti & constanti animo respuebat, atque objicientibus, quod falsis Christianorum promissis se credulum præbuisset, respondebat, minime se à Christo fuisse deceptum; nam cum Christianis sacris initiaretur, nullas sibi honorum divitiarumque pollicitationes esse factas, sed contra, multa aspera & adversa prædicta, quæ Christi sectatoribus parata essent. ne multa, jam eò miseriarum redactus erat, ut nihil ipsi superesset, præter unicum sacrarum literarum volumen, quod Biblia vocant; quod, quamvis in suis illis calamitatibus magno sibi esset solatio, attamen amico cuidam suo vendendum tradidit; quod cum ille bibliopolæ ostendisset, cœpit cum eo litigare de precio. etenim tam elegans volumen minimo auferre conabatur. sed dum maxime altercatur, exauditus est ab homine locuplete ac nobili, qui forte illac iter habebat, rogatusque quid litigaret, illi & litis causam & simul extremum miseri illius casum, in quem erat adductus, aperuit. continuo ille, Eamus, inquit, visere; duc me. it, venit, ac suis, ejus viri inopiam, oculis, majorem etiam esse quam ille loqueretur, accepit. quamobrem misericordia captus, non eam modo in præsentia sublevavit, verum etiam, quoad vixit, liberaliter suis opibus sustentavit.

XXIX. *Cuidam, D. Dominici Aedem, quæ
Syriani colitur, visendi vehementer cupido,
equi ad iter divinitus suppeditantur.*

Syriani in Calabria, mira est religio D. Dominici; adeo ut ad ædem ejus sacram, non vicinarum modo urbium, sed remotarum etiam regionum homines confluant;

fluant. ardebat cupiditate incredibili, eodem accedendi. Alexander à Turre, Panormitanus, de quo diximus, ac invitabatur etiam loci propinquitate; nam cum in Siciliam reverteretur, non procul ab eo iter habebat, sed inopia equorum sibi animum explere non potuit, atque Angelo Lomellino, qui peregrinationem illam, ex voto, susceperat, nummis aliquot traditis, quos oblationis nomine in religiosam illam ædem inferret, institutum prosecutus est iter. sed cum postridie mane Tropia Messanam versus solvisset, & secunda uteretur navigatione, intimo quodam animi dolore compulsus, Ergo, inquit, ô Dominice, neque Surianum accedere, neque religiosissimum tuum templum invisere, posthac mihi licebit? obsecro, fluctus move maritimos, qui nos illuc rejiciant, unde discessimus. vix ea locutus fuerat, cum adversa tempestas exoritur, quæ nautas vorsoariam capere, ac retro vela dare coëgit. itaque in litus expositus, è vestigio ædem D. Dominico sacram ingreditur, ac positis humi genibus, ejus ad imaginem, ejuscemodi orationem habuit; Perspicuum est tibi, vir sanctissime, quod corpore sim obeso atque infirmo, neque te fugit, quam hæ duæ res sint inutiles, ad millia passuum quatuor & viginti, pedibus, conficienda; da operam, obsecro, ut aliqua equorum mihi facultas obtingat; secus enim, cras, ubi illuxerit, recedendum erit, atque à te longius abeundum. qua oratione, ita perorata atque conclusa, exiit foras è templo; & ex insperato, vidit homines, cui duo ephippiati erant equi, & ad iter faciendum ornati; tum gaudio, supra quam dici potest, elatus, eorum unum famulo tradidit; alterum ipse inscendit, ac celeritate incredibili, Surianum ante solis occasum pervenit; ubi Angelo Lomellino, qui præierat, rem totam exposuit; simulque ingentes Deo, ac B. Dominico laudes & grates egerunt; quibus actis, discessit, ac spirituali expletus gaudio, se recepit in patriam.

XXX. *Impurus muliebrium formarum in templo spectator, à Deo graviter plectitur.*

Quo tempore Cæsar Baronius, nondum Cardinalis, apud Patres Congregationis Oratorii audiendis confessionibus operam dabat, animadvertit, in Æde ejusdem Congregationis sacra, adolescentem nobilem, summa hominum cum offensione, & in gravem Dei contumeliam, hac illac sæpe vagari, ut mulierum formas contempleretur: quem cum sæpe, vultu & significatione, conatus esset abstergere, neque quidquam profecisset, tandem, quia in eo graviter Deus offendebatur, coactus est ad admonitiones objurgationesque descendere; ac primo blande hominem appellat, atque, ut incepto desistat, admonet; tum edocet, quantum sit flagitium, ædibus sacris, ad libidines suas, abuti, neque Dei conspectum vereri; postremo orat, ut facti poenitens, Deum sibi propitium facere studeat, nisi ejus vim mallet experiri. at ille, cum deberet optimi sanctissimique viri objurgationibus aures dare, quæque sapienter admoneret, efficere, elatus iracundia, arrogantibus sane verbis, *Quid ea res, inquit, ad te attinet, quid ego agam, vel non? abi sis, inquit, cum tua isthac insolentia, vel potius exi foras, inepte; jam tibi ostendam, quid periculi sit, honestis viris, mei similibus, velle præscribere, quemadmodum templis utantur. cui Cæsar, Pedem, inquit, hinc foras non efferam; meæ enim partes sunt confessionum audiendarum, non autem decertandi; sed Deus est, qui pugnat pro nobis. neque dicto fides absuit; nam vix templi limen egressus, cum vellet equum conscendere, ab eodem excussus in terram, crus fregit; atque inter summos cruciatus, domum delatus, spretæ religionis admonitionisque à se poenas repeti, non obscure, sed liquido comperit, ac paulo post P. Baronium ad se accitum, eundem ad novam vitæ rationem instituendam sibi magistrum adhibuit, &c, quoad vixit, à confessionibus habuit.*

XXXI. *Ad castitatem tutandam, nihil esse
utilius, quam occasiones omnes evitare,*

CVi corporis animique mundities cara est in primis, nihil agendum est prius, quam ut omnes peccandi illecebras occasionesque devitet. etenim adversus carnis insidias, ea vis in hoc uno est, ut nulla res ad vincendum plus possit. quo magis dictum illud viri sapientis omnium in animis esse debet, cum ejusmodi hoste Parthorum more esse decertandum, qui, fugiendo, hostem feriunt: & quemadmodum S. Philippus Neri, solitus erat dicere, segniores, timidioresque, qui fuga salutem quarunt, sunt ad hoc bellum aptiores. tum quemadmodum in bello, omnia sunt in metu, neque quidquam contemnitur, quod vel tenuem suspicionis aditum præbeat, quod parvis sæpe momentis magnæ rerum commutationes existant; ita etiam in hoc longe omnium periculosissimo bello, quæcunque occasiones formidandæ sunt, quæ hosti callidissimo ad nos opprimendos aditum inuipiant, quamvis remotissimæ sint, quamvis nunquam obfutura videantur. quam multa sæpe oppida, natura ac manu munita, tenui aditu aperto, in hostium potestatem pervenerunt! quoties munitissima castitatis præfidia, ex levi plerunque occasione, expugnata ac diruta legimus! Venit mihi hoc loco in mentem, quod P. Franciscus Rocca Soc. Iesu, quem habui à confessionibus, ut dixi, in hanc sententiam mihi narrabat; quod, quamquam vetus sit, quia plurimum ad rem facit, exponam. narrabat igitur, cujusdam cœnobii monachis, quibus Abbas præerat, vir sanctus ac prudens, decretum fuisse, mulierculæ cujusdam opera ad res domesticas uti. sapiens Abbas, qui recte nosset, quantum periculi, à mulierum quarumcumque consuetudine, animarum salutem oriretur, dabat operam sedulo, ut eam illis sententiam eriperet; sed nihil proficiebat. non enim poterant intelligere, castitati ipsorum, damnum esse aliquid metuentum, à muliere tam sordida, tamque deformi. quam obrem omisissis verbis, id illis Abbas hoc artificio est conatus ostendere. die quodam, imperat coquo, ut obso-

niis.

hiis, paulo liberalius, salem inspergat; qui fortasse etiam largius quam fuerat imperatum, indidit, ac falsissimum monachis prandium apposuit; quo confecto, jubet Abbas, cellæ vinariæ, ac præterea putei, sibi claves afferri, neque liquidi quidquam domi superesse, quod sitim extingueret, præter aquam, ubi coquus ollas, & cetera vasa culinaria lavisset, quæ posset, etiam siti enecto, stomachum movere; ac domo excedit, neque ante vespere redit. Vix hora intercesserat ab eo praudio, quod comederant; cum omnes monachos tam ingens sitis arripuit, ut mori viderentur; cumque ad cellam vinariam, ad puteum, ad cœnationem accurrerent, atque omnia clausa invenirent, venerunt demum in culinam, ac sitis impatientia, cum aliud nihil suppeditaretur, aquam illam foetidam, turbidam, sordibus plenam, avide in ventrem ingurgitarunt. vespere advenientem domum Abbatem monachi omnes circumstant, ac queruntur, se fuisse coactos, ad sordida culinæ purgamenta, sitim sedare. quibus Abbas, Quæ, inquit, vos causa impulit, ut eam hauriretis, si movebat stomachum? cui illi, inopia, ajunt; alia non erat. bene agitis, inquit Abbas, quoniam melior aqua non suppetebat, ad eam, quæ objecta est, sitim sedatum ivistis: ita etiam potest contingere, ut cum forma ac specie liberaliori, mulier desit, eâ, cujus copia suppetat, libidine in expleatis. hac illi similitudine & oratione permoti, dant Abbati manus, neque sunt ausi deinceps mulieris cujusquam operam ad domesticos usus exposcere. Hæc bonus ille senex mihi narrabat; sed non venit mihi in mentem ab eo exquirere, quo esset ille Abbas nomine, & unde, quæ ex historia id quod dixerat exceperat, ut ex eodem fonte, unde ille hausisset, ego quoque haurirem; sed nondum mihi erat in animo, hoc exemplorum volumen contexere; ideo nunc, uti ab eo illud accepi, ita refero; nec prætermittendum statui, quod potest esse aliis disciplinæ, ut peccandi occasiones quascunque removeant.

XXXII. *Rusticanus quidam, diras in Deum ac B. Virginem execrationes fundens, ex improviso de cælo tactus extinguitur.*

ERant in hoc homine, quem dicimus, omnia pecudi propiora, quam homini; neque quidquam Christiani, præter nudum nomen, habebat; immo non tam Deum vereri atque diligere, quam ludibrio odioque habere videbatur. liquidem, vel leviter ira commotus, vel aliquo detrimento accepto, diras in Deum ac B. Virginem preces execrationesque conjiciebat. hic cum in agro, quem excolendum acceperat, arborem conscendisset, videlicet ut fructus inde decerneret, subito exceptus est imbre; qui, more suo, cœpit impiis Deum vocibus execrari; neque, cum graviter corripèretur ab iis qui aderant, linguam cohibebat, sed acrius in Deum inflammabat: at cælum, tanquam si ferret indigne, eam à scelerato homine, conditori suo contumeliam inferri, extemplo intonuit, ac impium illum fulmine verberatum, mortuum ad terram abjecit.

XXXIII. *Vir quidam nobilis, pugione transfixus, S. Dominici ope, divinitus sanatur.*

Quantum nobis præsidii in Sanctorum ope auxilioque constitutur, demonstratum est nuper in patricio Ianuensi, cui inimici latus alterum pugione transfixerant. etenim, ex eo vulnere, in eum calum erat adductus, ut à medicis, desperare de salute sua juberetur; jamque propius aberat à morte, ac sacerdos evocatus fuerat, qui sacro eum oleo libiret. ferebat inique, eum sibi amicum eripi, Angelus Lomellinus, de quo sæpius commemoravimus; ac, pro sua eximia atque præstanti in B. Dominicum pietate ac religione, ex intimo animi sensu, amici salutem Sancto illi commendavit; qui non est passus, pii hominis vota, ardore caritatis incensa, in irritum cadere, sed laboranti præfens suum auxilium obtulit, atque è vestigio, admirantibus cunctis, vitam sanitatemque restituit.

XXXIV. *Egre-*

XXXIV. *Egregia Allobrogis cujusdam pietas religioque narratur.*

Cæsar Cardinalis Baronius, adversaria quædam, sua manu conscripta reliquit, in quæ multa, commemoratu digna, vel ad memoriam antiquitatis, vel ad studium eruditionis, relata cernuntur, collecta ex variis auctoribus, ac præsertim ex libris manuscriptis, bibliothecæ Vaticanæ, quos ipse perpetuo volutabat. in his adversariis traditur de singulari Allobrogis cujusdam pietate ac religione; quod quamvis longe superiori memoria contigerit, attamen, quia paucis, quod sciam, notum est, non pigeat huc referre. Narrat Baronius se scriptum invenisse, anno Domini M C C C, quando Bonifacius VIII Pont. Max. jubilæum centesimo quoque anno, solempni ritu, Romæ celebrandum instituit, ex omnibus Christiani orbis partibus, infinitam pene hominum multitudinem, Romam confluisse; in eis Allobrogem, de quo diximus, qui singulari pietate ac religione, sanctissima ac religiosissima urbis templa obiit; quibus adeundis colendisque, tanta perfusus est animi voluptate, lætitiæque, ut non exiguam cælestium voluptatum partem se percepisse existimaverit, ac fortasse, ea cælestis solatii vis, tanquam vitale potum, prorogare illi vitam usque in centesimum annum potuit. nam vixit ad annum M C C C, jubilæi item lætitiæ solemnem ac celebrem; sed quia, ætate ac morbo impeditus, neque ingredi, neque equo hærere poterat, inter filiorum magnus delatus est Romam: atque eundem atque etiam majorem in se, spirituales lætitiæ atque solatium instaurari, quod ante centesimum annum hauserat, sensit, ac domum relictus, est mortuus.

XXXV. *Sanctos Dei, non verborum contumeliis esse prosequendos, sed honore cultuque afficiendos.*

Cum S. Philippus Neri, Romæ corporis custodia solutus exolasset in cælum, magnamque sanctitatis suæ

suæ famam ad posteros reliquisset, primis illis diebus, ut fit, non alii ferme sermones conventusque, nisi de summis ac singularibus ejus virtutibus habebantur; omnes, qui eum noverant, in cœlum laudibus efferebant, ac palam sanctum affirmabant: verum in quodam amicorum conventu, quorum colloquiis ego quoque etiam tum adolescens intereram, cœpti sunt de viro sanctissimo varii sermones haberi; cumque me una cum frequenti populo, ad sacrum ejus corpus visendum, præsto fuisse narrarem, nulla de causa unus, qui in eo conventu erat, sacerdotii munere præditus, cœpit multas in eum & graves contumelias injicere, ac palam affirmare, nulla sibi ratione persuaderi posse, fuisse eum cœlo exceptum, ac sanctorum civium numero adscriptum; adeo ut omnes qui audirent, ceteroque neque ita religiosi neque ita spirituales viri, graviter in eo offenderentur. vix pauci dies ab hoc sermone intercesserant, cum inter ipsum atque hominem ipsi amicissimum, qui cum ad eam diem conjunctissime vixerat, neque eum aliter quam in germani fratris loco dilexerat, ortæ sunt iræ; tam graves, tamque acerbæ, ut pluribus ab eo famosisque criminibus in judicium vocatus sit. quamobrem conjectus in vincula, biennium fere totum carceris angustias, tenebras, pedoremque sustinuit; postremo bonis omnibus amissis, quæ erant non parum multa, coactus est, ab urbe discedere.

XXXVI. *Aulicus quidam, in complexu meretriculæ, subita morte extinguitur.*

ANno salutis MDCXI, Cardinalis cujusdam Archi-
triclinus, veteri amicitia mihi conjunctus, vir sane nobilis, & in speciem honestus ac pudens, propter ejus mores ab omnibus diligebatur. etenim nihil cuiquam nocebat, immo omnibus, quibuscunque rebus poterat, commodabat; nullum eidem verbum ex ore, quod magnopere reprehenderes, nullum obscœnum dictum exibat. hic, cum die quodam, à prandio, constitisset cum sociis rhedam inscendere, animique causa cele-

celebriores urbis partes obire, cumque jam omnes ad condictam horam venissent, ac vellent rhedæ se tradere, rogavit ille, ut manerent tantisper, dum reverteretur; esse sibi quoddam in ea vicinia negotium, cui primo præverti necesse esset; sed mox affuturum se, neque illis futurum in mora. sed paulo post adest nuncius, qui eum affert, in complexu cujusdam meretricis, diem suum obiisse. tum omnes exterriti, surgunt, in domum illius meretricis advolant, atque eundem humi, sine sensu suum offendunt; quarunt ex ancilla, quid sit actum; quæ respondit, miserum illum in concubitu ipso defecisse, se omnia expertam, quibus fugientem animam revocaret, sed frustra. illi attoniti inspiciunt, exhorrescunt, revertuntur; at nemo eorum, ejus atrocitate spectaculi compulsum, effectus est melior.

XXXVII. *Pessime sibi eos consulere, qui, metu inopiæ, à Domino Deo suo recedunt.*

Similem vitæ exitum, non multis ab hinc annis, vidua quædam invenit, quæ magis inopiam & egestatem, quam Deum metuens, cœperat stupri consuetudinem habere cum nescio quo viro; nolens, ex Apostoli sententia, omnem sollicitudinem suam projicere in Deum, quoniam ipsi est curæ de nobis. itaque die quodam cum amatore suo cubans, ex improvviso mortem peccatorum pessimam obiit. nimirum ut esset ceteris exemplo, qui humanis præsiidiis magis, quam divinis nituntur, quanta æterni Regis providentiæ injuria inferatur ab iis, qui solliciti sunt, animæ suæ, quid manducant, & corpori suo, quid induant, cum eadem hæc tam magnifice ac liberaliter Deus volatilibus cœli, ac liliis agri, quæ non serunt nec metunt, neque congregant in horrea, præbeat.

XXXVIII. *Dux alia mulieres, quæ, quia
divinæ providentiæ spem ab animo eiecerant,
& in libidinibus collocarant, infelicem sortitæ
sunt exitum.*

Mulier vidua, cujus vir decoxerat, desperans se posse vivere, filiam suam, virginem indotatam, viro cuidam principi, animi voluptatisque causa utendam dedit, ipsa vero alteri cuidam, corporis obsequio sese devinxit; sed paucis post annis, in contubernio, ac pene in complexu illius viri, repentina morte periit; tum filia, quæ dotis sibi comparandæ causa, viro illi principi tradita fuerat in concubinatum, ab eodem, sine dote, uni ex suis familiaribus collocata est in matrimonio. sed cum nihilo ea minus ille ad libidines suas uteretur, lethalem in morbum incidit; cujus vim diu sustinere non potuit, sed ferè jam moriens, cum adolescentulæ, quam amabat, minus à se prospectum esse intelligeret, mandavit marito illius, ut, quidquid auri in armariolo ibi proximo invenisset, acciperet, sibi que haberet; sed jam cognati illius, ut sit in morte nobilium, ac fortasse istuc idem metuentes, totum abstulerant, ac domum suam averterant; quod ubi rescivit, ingemuit, atque in alteram lectuli spondam conversus, confestim animam efflavit. Narrat hæc mulier, (si fides istis habenda est) sæpe venire illum in somnis ad se mortuum, ac queri propter ipsam, male sibi apud inferos esse, multis de causis; primum, quod ipsi vitium obtulisset; tum quod, post oblatum sibi vitium, impedimento fuisset, quo minus viro locupleti nuberet, qui eam incolumem ab omni turpi facto servasset; postremo, quod propter ipsum, prope meritricium quæstum instituisset. Verum, ut ad id, de quo erat sermo, revertamur, hæc mulier, cujus pudicitiam mater prostituerat, quo dos ipsi inveniretur, primum una cum liberis octo, tum ex aliis, tum ex viro susceptis, sine dote, cum egestate & inopia conflictata est, nec fere quidquam ejus inopiam sublevavit vulgati corporis quæstus; denique, morbo capitis,

pitis, ex medicamento, quo fucatum capillis nitorem inducebat, contracto, in ipso ætatis flore decessit.

XXXIX. *Senis decrepiti, pecuniæ adipiscendæ causa, fratricidium.*

SI ullum est vitium, quod statim ab ineunte adolescentia, ab aditu cordis nostri propellendum sit, id profecto est crimen avaritiæ. nam si semel infederit, nulla humana ope à nobis evellitur. etenim libidinis ardor plerunque, ætatis deflexu, defervescit: at vero pecuniæ studium non modo annorum accessione non minuitur, sed vires ab annis acquirit, & interdum in immensum excrescit. atqui insatiabilis divitiarum sitis, illud est vitium, in quo, tum omnis ætas, tum senilis præsertim, fœde prolabitur; neque quidquam veterum comœdiis tam exagitur, quam senum avaritia; neque ulla est historia, quæ non plura & illustria ejus rei exempla suppeditet. sed qui, decurso ætatis spatio, pecuniæ gratia tam atrox facinus susceperit, quam quod modo decrepitus & capularis quidam senex est ausus committere, nusquam me audivisse vel legisse; quod meminerim, scio. In actis, quæ octavo quoque die circumferuntur, abno MDCXXXIV, mense Augusto, legimus, Ianuæ in vincula publica senem esse conjectum, annos natum non minus septuaginta, qui fratris bonis inhians, eundem veneno sustulerat, tanquam si tum primum, ad decurrendum vitæ spacium, è carceribus, ut ita dicam, exiret, & non jam ad calcem pervenisset. etenim eo consilio tantum in se scelus conceperat, quo mollius ac lautius vitam exigeret. huic stulto comico seni persuasum fuisse arbitror, ad Mathusalæ annos se esse perventurum. quod nobis argumento esse debet, ut ad extremum usque spiritum à Dei ope auxilioque dependeamus. nam si ex nostris nos viribus metiri velimus, nullum erit flagitium tam fœdum, nullum facinus tam atrox, tam audax, quod alienum à nobis sit futurum.

XLI *Infelix libidinosi cuiusdam aulici exitus.*

Venio ad illud, quod me, supra quam dici aut cogitari potest, horrore metuque complexit. Erat aulicus alter, in sortem Domini receptus, multisque ecclesiasticis redditibus abundans. hic, jam inde ab adolescentia, libidinibus deditus, ad hoc longa mulieris cuiusdam consuetudine implicatus, nulla divinæ severitatis formidine, nulla salutis æternæ cura, contineri videbatur: verum cum in hac prava vitæ ratione perseveraret, horribili atque perpetua à Deo cæcitate percussus est, ut nihil plane oculis uteretur. quæ cæcitas, cum deberet illi mentis oculos aperire, omnemque ab animo peccatorum caliginem pellere, visa est tenebras eidem in majores offundere, nec tam miseri istius peccatoris oculos claudere, quam cor excæcare. nam adeo, ab ea muliere, cui consueverat, non est abstractus, ut etiam arctius eidem adhæserit. in pauca ut conferam, hæc tam pertinax hominis contumacia, divinæ iracundiæ quasdam quasi faces admovit, justamque sibi illatæ à flagitioso illo injuriæ vindicandæ causam attribuit. etenim anno MDCXXXII, solemnibus sacrosanctæ Eucharistiæ feriis, cum, per viam quandam urbis, rheda veheretur, atque in solemnem quandam pompam incurreret, qua Christi corporis mysteria deferebantur, admonitus est à suis, ut consisteret, & in genua procumberet; cumque ille, ad has voces, honoris scilicet causa, caput demitteret, continuo, tanquam si à divinissima illa hostia telum vel fulmen aliquod prodiisset, quod lethale ipsi vulnus infligeret, ita ut erat, capite demisso, extremum vitæ spiritum reddidit: utrum autem Deo judici salvus fuerit, nec ne, non definio, neque ullam in partem disputo. Ea enim esse mors potuit, cum eo animi dolore conjuncta, qui sit ad veniam impetrandam satis: at si dolor hic abfuit, pensate, inquit Gregorius, qualis ad conspectum districti judicis pervenit, cui non vacat flere quod fecit.

XL I. Antea , quam Deus flagellis nos feriat , admonet , ut caveamus.

CUm Deus peccatis ac sceleribus nostris infensus est, quæ publice in populos ac nationes flagella immisurus est, solet, vel monstris prodigiisque, vel prophetarum vocibus aliquanto ante prædicere, quo ad poenitentiae præsidia confugiamus, quibus probe muniti, ea à nobis mala propulsemus. id quod Fossani, in subalpinis, paulo supra hanc memoriam accidit. Erat in ejus oppidi agro, anno MDXXI, non procul ab Vrbe, pastor quidam, oppidanis omnibus notus, jam inde usque ab ortu mutus; huic B. Virgo se obtulit, præcepitque, ut ad Fossanenses abiret, suisque eos verbis admoneret, ut vitam moresque corrigerent, nisi mallent experiri, quid divinæ justitiæ vis possit; & quo fides ejus dictis fieret, fandi usum, quo adhuc caruisset, ipsi tribuere. abiit ille, ex adepta loquendi facultate lætus, remque ad Fossanenses retulit; qui rei novitate percussi, paululum quidem meliores sunt facti, sed brevi ad ingenium redierunt. verum quod incidit illis mali, non vanam fuisse pastoris illius prædictionem, ostendit. etenim tanta eos pestilentiae adorta vis est, ut ab eadem prope deleri, neglectæ admonitionis pœnas penderint. sed postea Fossanenses, quos ea clades reliquos fecerat, eo in loco, ubi mutus ille loqui divinitus cœperat, Ædem B. Virginis sacram excitarunt.

XL II. Turcæ , ad Christum conversi , mira in retinenda fide constantia.

Pjuvenalis Ancina, Congregationis Oratorii, qui, Saluciarum Episcopus, tanta cum laude sanctitatis, eam provinciam administravit, ut de eo inter Sanctos referendos agatur, narrat, se de Roberto Bellarmino, qui Romæ anno MDLXXXII, in Collegio Societatis Iesu Theologiam docebat, audivisse, cum diceret, Constantinopoli, summum quendam Turcarum imperatoris Prætorem, lecto Euangelio, ad Christi fidem conversum,

versum, palamque Mahumetanam superstitionem detectatum esse, dixisseque, solam Christianam religionem veram esse, reliquas sectas falsas atque mendaces. quamobrem Turcarum imperatorem iratum, iussisse eum interfici, & inhumatum canibus objici; sed canibus, sanctum inviolatumque extitisse, neque eorum quemquam esse ausum ad illum accedere; ad hoc, novo quodam lumine circumfusum coepisse fulgere; verum eam rem, tam novam tamque admirabilem, impio Turcarum Principi, non ostentui & admirationi, sed ludibrio fuisse; qui, non esse mirandum, ait, si ab eo canes abstinuissent, nam, ut est in proverbio, *canes canibus non vescuntur*, (hoc enim nomine Turcæ Christianos appellant;) itaque iussisse eum, aiebat, sectum in frustra, canibus iterum dari; sed nihilo magis canes esse ansos attingere; illud quoque mirabiliter evenisse, ut splendor ille, qui totum corpus illuminabat, plures postea in partes scissum atque distractum non defereret, sed pro numero partium divideretur, adeo ut earum singulis singulæ tanquam faces hærere viderentur.

XLIII. *Adolescentis libibinosi pudenda, ejus in morte, tetro comprehensa igni, ardere conspiciuntur.*

ANuo MDCI, adolescens quidam impurus, qui longa consuetudine impudicæ cuidam implicabatur, incidit in morbum; quo cum gravius confisteretur, persuasus est ab amicis, vel potius coactus, ut peccata sua sacerdoti confiteretur; quod fecit, magis id adeo, ut amicis gratificaretur, quibus id gratissimum fore videbat, quam quod aliquo animi dolore, ex injuriis Deo factis, afficeretur; id quod eventus ostendit, nam cum à Patribus ministris infirmorum admoneretur, ut dulcissimum Iesu Christi nomen frequenter in ore haberet, atque ea tantum loqueretur, quæ æternæ ipsius saluti expedirent, non obtemperabat, atque agre eorum monita accipiebat. interim parens, filii visendi causa, cubiculum, ubi ille decumbebat, ingreditur, atque illum

miserum

miserum terribili pavore perfusum offendit; quem fortasse horribilis demonum aspectus excitabat; præterea, horrendum dictu, tetro pudenda ejusdem igne uri conspexit, neque ita multo post, in eo dolore cruciatuque, desperantem rebus suis mortem obire.

XLIV. *Duos quosdam adolescentulos, gravissimè peccantes, ignis exurit.*

QUOD omnis luxuries, sed ea imprimis, quæ naturæ ipsi adversatur atque repugnat, ignis supplicio coercenda sit, anno MDLXXXIII, in duobus adolescentulis Deus ostendit; qui cum vetito commercio una corpus animumque contaminarent, subito horribilique igne, qui ex eorum corporibus obscurus ac teter afflabat, arrepti, ita ut erant juncti, eamens exarserunt, quoad in cinerem sunt redacti. itaque in duobus impuris adolescentibus, longo intervallo, renovatum est illud, in Sodomam & Gomorram, divinæ animadversionis exemplum. hoc ex P. Io. Matthæo Ancina, P. Io. Juvenalis Ancinæ fratre, accepimus.

XLV. *Vir atque puella, simul concumbentes, repentina morte tolluntur.*

Scriptum est in sacris litteris, Deum, non patientiæ solum, verum etiam justitiæ ac fortitudinis laude præstare; quo fit, ut quos diu sustinuit, interdum subita, ut Gregorius inquit, morte castiget; sicut aliquot ante annos in viro, atque in puella, quæ præter æquum obsequentiæ illi erat, vim suam exercuit. Parentes quidam, ut opinor, pauperculi, mittebant quotidie filiam suam ad virum, cui nullus erat servus, ut res illius domesticas procuraret; nimirum ædes verreret, vasa elueret, lectos sterneret, atque ejusmodi aliis in rebus eidem operam daret: verum accidit, ut ea sæpius adeundo, & consuetudine familiari, ac munusculis fortasse devicta, viro illi, contra quam fas erat, morigera fieret. quamobrem die quodam, cum ex solito in opus

ad

ad eum exisset, jamque nox appeteret, nec reverteretur, parentes suspicari cœperunt, mali aliquid filia evenisse, vel ab eo, cui navabat operam, moram objici, ne rediret. itaque ad ædēs illius veniunt, fores pulsant, nec cum quisquam aperiret, aut responderet, capiunt consilium, ut ad prætorem eant, & quod ipsorum filia ab eo viro non remittatur, sed ingratis retineatur, exponant. veniunt, querimonias ac postulata sua edunt; Prætor imperat lictoribus, ut per viam in domum illius irrum-pant, ab eoque puellam abducant; qui, ut erat imperatum, fores effringunt, intrant, atque (horrendum dictu) inutuis ambos amplexibus illigatos, ac sine sensu jacentes offendunt. Angelus enim Domini, ut credibile est, eos percusserat, ac morti tradiderat, atque hanc filia ad se non remittendæ causam fuisse comperiunt; & sero intelligunt, quam tuto scœminæ viris committantur, quorum illis etiam sermo, atque adeo halitus ipse, sit pertimescendus.

XLVI. Horribilis cujusdam mors, qui scœminam rursus ad flagitium, cujus ipsam pœnituerat, conabatur adducere.

VIr quidam improbus, & impurus, blandiciis, precibus, partim etiam insidiis, firmum quoddam atque munitum pudicitia præsidium ceperat. hoc est, probæ atque pudicæ mulieris castitatem expugnauerat; at postea illa facti pœnitens, cum per Sacramentum pœnitentiæ rediisset cum Deo in gratiam, decreverat milles antea mori, quam pati quantumvis minimam castitati suæ labem afferri. quod ille ægre ferens, dolensque, tantum sibi bolum esse ereptum ex faucibus, omnes industria suæ nervos, in eo contendebat, ut sanctum illud mulieris propositum labefactaret, atque convelleret, rursusque una secum in idem lutum attraheret. sed operam sumebat inanem; nam illa ad omnes ejus conatus, tanquam murus ærens erat. Verum ille, vetitæ mulieris desiderio acrius incensus, quemadmodum suæ eum libidines facere admonuerant, dando pollicendoque per-fecit,

fecit, ut ab ancilla in mulieris cubiculum includeretur. sperabat enim, si solam adortus esset, eam se in suam sententiam perducturum. interim revertitur illa è templo, ubi orationi ac piis aliis exercitationibus tota se dederat; cumque intro in cubiculum pedem inferret, objectus est sibi impurissimus ille; cujus aspectu vehementer exterrita, tanquam altera Susanna ingemuit, ac manibus & oculis in cælum sublatis, suppliciter à Deo opem expetiit. non defuit supplicanti ex animo Deus, sed statim in precibus & votis occurrit. nam repente canis ingens atque atra præsto fuit; quæ, impetu facto, homini in os involavit, caputque præcidit. itaque fuit omnibus exemplo, qui studiosos castitatis à proposito detertere conantur. Id mihi idem Io. Matthæus narravit.

XLVII. *Tres adolescentes, qui ierant, ut pudicitia S. Tuscanæ vim afferrent, à dæmone strangulantur.*

Simili prope animadversionis genere usus est Deus, ad scoërcendam adolescentium quorundam audaciam, qui pudicitiam Sanctæ Tuscanæ labefactare per vim conati erant. hæc mulier forma vultuque, supra quam dici potest, eleganti atque venusto, viro suo orbata, facultates omnes in usus pauperum erogaverat, ac totam se jejuniis, vigiliis precationibusque tradiderat. verum eximia ejus pulchritudine, secus quam par est, delectati tres adolescentes, statuerant omnia conari, quo potiri eadem possent. itaque collem, in quem illa, orandi causa, Deoque liberius inserviendi, secesserat, ex compacto petentes, eorum unus, ceteris juvenili licentia ferocior, parietes domus repens incendit, ac per fenestras in cubiculum mulieris, in attentissima divinarum rerum meditatione defixæ, se se demisit. sed cum vellet in ejus complexum irruere, à dæmone cohibitus ac strangulatus est; idemque aliis duobus, qui frustra fociorum reditu expectato, deinceps ad mulierem irruerant, accidit.

XLVIII. *Non esse, in rebus adversis, de Deo desperandum, nec ad dæmonem confugiendum.*

Aliqui sæpennúmero, ita fracto abjectoque sunt animo, ita ab omni fiducia divinæ in se bonitatis misericordiæque deserti, ut quovis affecti vel damno vel dolore, vel contumelia, dæmonem evocent, ac disertis verbis sui corripiendi abstrahendique potestatem permittant. quod nullo ab eis consilio factum apparet. utrum enim existimant, vel eos dæmonem abducturum, ubi ex miseriis erepti, solutiore animo vivant, an ubi, secretis bonis omnibus, cumulata malorum omnium complexione excipiantur? utrumvis horum arbitrentur, constat eos insanire, planeque desipere. quid enim est tam stultum, quam putare, posse boni aliquid provenire cuiquam ab eo, qui capitali à nobis odio dissideat, ac perpetuas nobiscum similitates exerceat? quid autem tam à ratione alienum, quam, quo breve ac leve aliquod malum effugiatur, velle in summam & æternam calamitatem miseriamque demergi? Illi vero, longo intervallo, omnium furiosorum dementiam antecedunt, quibus cum præsto sit Deus, qui ultro suum auxilium polliceatur, quique de ærumnoso & calamitoso homine dicat, *clamabit ad me, & ego exaudiam eum, cum ipso sum in tribulatione, eripiam eum, & glorificabo eum*, ad illum potius se convertunt, qui nec possit nec velit ipsis opem afferre, sed contra, mala & adversa evenire omnia cupiat. Nondum quatuor & triginta sunt anni, cum Romæ erat mulier; ea habitabat ad D. Blasii & Caroli; ejus mulieris vir, propter æs alienum, vinctulis publicis detinebatur. itaque illa perpetuò domi in squalore luctuque manebat, una cum filio, quem unicum ex illo susceperat; à quo cum, die quodam, ut mos est puerorum, ingens clamor ac luctus esset sublatus, neque ullus flendi modus fieret, illa, seu impatientia seu mœrore quo intus macerabatur adducta, heus diabole, inquit, quid moraris? quin venis, & odium istud

istud abripis ac tecum adducis? vix ea dixerat, cum humani generis hostis adfuit, atque mulieri in conspectum se dedit, sed cum conaretur in puerum manus injicere, non tulit illa, sed, clamore sublato, Dei genitricis fidem imploravit. at dæmon, Mariæ nomine audito, à puero manus abstinuit, & confestim fugam arripuit.

XLIX. *Meretricis, impudentissimæ protervitatæ, palam corripientiæ gratia, complures honesti viri publice plectuntur.*

Circumforaneus, omnibus notus, cum singula Italix fora perlustraret; venit in urbem, quam non est necesse nominare; atque una secum mima, facie quidem honesta & ætate integra, sed lasciva, prociac, proterva, luxuque perditæ; cum hac coepit quotidie suggestum in medio foro, ab ipso excitatum, ascendere, atque improbissimos sermones habere. quamobrem tantæ ad eos, adolescentium præsertim, concursus fiebant, ut mirum videretur; quod eveniebat non sine maxima castitatis eorundem perniciæ, & summa proborum hominum offensione, qui ferebant indignæ, tam insignem Deo contumeliam imponi, & mores civitatæ, unius meretricis protervitate, corrumpi; tantumque justus hic dolor, in eorum animis potuit, ut statuerint, illecebram illam voluptatis ac libidinis, quantum in ipsis esset, ab adolescentium peste repellere, atque eam populi frequentiam circulatori illi surripere. res non procrastinatur, sed illo eodem die perficitur. erat proximum foro sacellum Sodalitatis cujusdam, cui præfecti nomine præerat vir, ex ea civitate, in primis nobilis ac timens Deum. itaque, ejus opera, coiere honesti viri complures, quibus æque spectaculum illud displicebat; ibique instruxere agmen se verberantium; qui, Christi crucifixi imagine præunte, forum illud sapius circumiere; quorum aspectu commoti, qui aderant, compuncti sunt corde, atque è vestigio dilapsi, circulatorem cum muliere solum reliquerunt;

qui à corona relictī, coacti sunt domum inanes à pecunia redire. res accepta est aliter, quam putabatur, ab iis, qui eam tum Remp. administrabant; nam visum est illis facinus audax & animadversione dignum, paucos privato consilio, esse ausos è foro, ac propemodum ex urbe, eos expellere, qui ipsorum auctoritate atque concessu suggestum illud inscenderent, ac populum fabellis oblectarent. quocirca probos illos homines ac domi nobiles, pecunia multatos, reductis ad tergum manibus, tractorio funi, qui est in foro, singulos deinceps alligari iusserunt, ac ter unumquemque eorum in subline raptum, totidem vicibus sinī deorsum suomet pondere ruere; sacerdotem vero illum, in quem nihil juris habere poterant, in exilium ejecerunt. itaque tot viri, genere ac pietate præstantes, non aliam ob causam nisi ob Dei gloriam, & ad removendum è civium suorum conspectu pessimum exemplum, affecti sunt damno & ignominia. neque impius ille circulator, qui tantum illis mali creaverat, divinæ in se animadversionis pœnam effugit. nam paucis ab eo die, annis an mensibus? diem obiit supremum, in ipso ætatis flore. etenim, nisi memoria me fugit, vix quartum & vigesimum ætatis suæ annum excesserat. sed, quod est longe morte ipsa deterius, verendum est maxime, ne in eorum numerum rejectus sit, quibus Salvator noster dixit, *moriemini in peccato vestro*. nam tum est mortuus, cum in alia Italiæ civitate, eodem spectaculi genere, juventutem ad nequitiam adducere conaretur.

L. Vetus exemplum, superiori simile.

L Ibuit huc adjicere aliud vetus exemplum, superiori hand ita multum absimile. Quæ tempestate Respub. Florentinorum à populo tenebatur, ejusque auctoritate consilioque administrabatur, B. Bernardinus Feltrius, magna tum temporis, apud omnes, sanctitatis doctrinæque fama ac nomine, Florentiam venit; ubi frequentes atque utiles ad populum, de rebus divinis, sermones habebat, in quibus corruptos ejus sæculi hominum mores acriter vehementerque objurgabat, & in primis, quod

quod Iudæis nimis familiariter uterentur; & sumpta inde occasione, eorum fraudes, dolos, perfidiam, & acerbum in Christianos odium aperiebat; qua oratione commoti, qui aderant, cœperunt eos palam lapidibus insectari. res acta est in senatu; inventus est nemo, qui non existimaret, concionatorem illum, tanquam commotæ multitudinis auctorem, ejiciendum è civitate; præter unum, qui non solum non ejiciendum, verum etiam maximis eum præmiis retinendum arbitrabatur. quamobrem iniquorum illorum sententiis pulsus Florentia, sanctitatis doctrinæque suæ lumen ad alios transfudit: verum illi ipsi ejus ejiciendi auctores haud diuturniorem à Deo tanti facinoris impunitatem sunt assecuti. etenim, non ita multo post, omnes sunt mortui, præter eum, qui ab ipsorum auctoritate dissenserat.

L I. Adolescens, in complexu amiculæ, à rivali confoditur.

EXtremo Clementis VIII pontificatus anno, à Christo autem nato MDCIV, erat Romæ formâ liberali mulier, quam parentes honesto cuidam viro, cui agricultura vita erat, in matrimonio collocaverant; qui vir, quoniam arationes multas conductas habebat, maximam anni partem cogebatur ruri esse, & uxorem, sub unius ancillæ custodia, Romæ relinquere; quod quidem haud è re mulieris adolescentis erat, cui ægre erat, viro carere. atque forma & ætate ferox, non invita suam ab iis formam spectari ac diligi patiebatur, qui ejus erant cupidi. quo fiebat, ut istos mundulos urbanos amafios circa se plures haberet; è quibus unus præ ceteris elegans, ac domi nobilis, in ea vehementius exarserat; sed quia disciplina est ejusdem, ut Terentianus inquit Clitipho, munerarier ancillas primum, ad dominas qui affectant viam, perfecerat cum ea, quam vir uxori custodem apposuerat, ut nemo eidem carior ac jucundior existeret: hæc mulierem, satis sua ad id sponte propensam, ad gerendum adolescenti morem impulerat; nam cum ab ea primum extorsisset, ut fateretur,

tur, se cum eo, qui ipsam deperibat, mutuum facere, cœpit eam hortari, ne occasionem tam bellam se oblectandi dimitteret; non enim eandem perpetuo dari, neque illam sibi semper ætatulam fore; suamque, eam ad rem, operam pollicita est. mulier conditionem accepit, & clam viro cœpit cum adolescente illo stupri consuetudinem habere. verum fere perpetua viri absentia, & cognatorum negligentia, factum est, ut ædes mulieris non minus adolescenti paterent, quam si domus ipsius essent. nam ubi lubebat, ad eam introire licebat. erat adolescenti sobrinus, forma, ætate, nobilitate prope eidem geminus, atque simillimus; & tanquam ininus grata atque jucunda sit ea voluptas, quæ sine teste percipitur, suorum amorum participem eum fecit, & mulieris forma, quam in cælum laudibus efferebat, quanta esset edocuit, simulque daturum se operam spondit, ut ea pulchritudo ejus ad oculos perveniret: verum petere ab eo, pro sua fide atque amicitia, ne ubi mulierem aspexisset, animum ad eam adjiceret; se enim tantam in se injuriam non esse laturum, perducit igitur hominem ad illam, non semel tantum, sed iterum, tertio, ac sæpius. at bonus ille consobrinus, ab hoc aditu januaque patefacta, ad mulieris amicitiam, sibi viam munivit; atque oblitus fidei, quam dederat, perfecit, ut ab eadem in societatem flagitii reciperetur. mulieris igitur consuetudinem adeptus, in ea se continebat, neque ejus iracundiam verebatur, cui conceptis verbis juraverat, nihil sibi rei cum illa futurum. verum, die quodam, cum mulieri operam daret, atque oblitus esset pessulum ostio obdere, venit ille alter, januam aperit, scalas scandit, cubiculum intrat, ac in manifestum flagitii eum, cui juranti crediderat, tenet. non tenuit iram neque dolorem, sed, educto gladio, in eum irruit, & aversum in sinu amicæ tranfixit; tum foras se præcipitavit ex ædibus, ac salutem fuga quæsiuit. mulieri, rei atrocitate perterritæ, pene animus evolvit è corpore, nec cum satis liqueret, quid ageret, fuit auctor ancilla, ut in cella vinaria, interfecti corpus humarent; quod, de ejus consilio, perfectum est. postridie ejus diei, res ad prætorem defertur; mittuntur reo lictores, qui continuo ad cellam

vina-

vinariam accurrunt, mortuum defodiunt, adhibitis testibus inspiciunt, mulieres in publica vincula rapiunt: habetur de illis quæstio, non eunt inficias, sed rem totam, ita nti gesta erat, enarrant. atque ejusmodi ea res habuit exitum, ut ancilla, quæ suis consiliis dominam in flagitium illexerat, quæque ejus mortui sepeliendi auctor fuerat, tota urbe flagellis caderetur, domina vero, eorum principum honoris gratia, qui eam defenderant, è reis eximeretur: sed non ita multo post, viro, animi morbo, è vita sublato, laxam mundi viam deseruit, atque arctam religiosarum quarundam mulierum amplexa est vitam.

LII. Novum divinæ justitiæ exemplum, in mulierem perditæ libidinis editum.

ANtea quam Tridentinæ Synodi decreta promulgarentur, quibus ecclesiastica disciplina pene collapsa restituebatur, erat Romæ liberior vivendi potestas, adeo ut sacrarum Deo virginum familiæ, domi suæ claustris perpetuo inclusæ non tenerentur, sed egrediendi, & quo vellent abeundi facultatem haberent. in hac igitur tam corrupta vivendi ratione, virgo quædam, honestis orta parentibus, quæ quidvis potius, quam castam & religiosam vitam meditabatur, parentum imperiis coacta & egestate, uni ex illis familiis nomen dederat; sed brevi, desertis suis castris ad juvenem, qui erat cupiens sui, transfugit; ex cujus congressu concepit, ac puerum peperit. quamobrem compulsi sunt parentes ejus, nuptui eam tradere, sed ita Deo usi sunt propitio, ut pistori cuidam satis locupleti collocarint. sed non est inventa melior nupta, quam virgo fuerat. nam amore cujusdam capta, cœpit pecunia virtum exuere, ex eaque amatoris sui sumtibus suppeditare; quo factum est, ut illum brevi ad egestatem adegerit, atque in eas rei familiaris angustias adduxerit, ut cogeretur ipsam deserere, atque operas suas alteri pistori locare. at mulier, mariti molestia liberata, solutiore animo, suis libidinibus obtemperabat. verum aliquanto post vir,

partim ex pecuniis, ex operarum suarum mercede redactis, partim ex iis, quas ab amicis mutuas sumpserat, novam tabernam aperuit, atque, ut erat industrius ac diligens, dissoluto ære alieno, jam cœperat esse in suis nummis ac multis; cum uxor, quæ, ab omnibus deserta, egestate & inopia laborabat, egit per amicos & religiosos viros interpretes, ut pacem cum viro faceret; se enim quovis ille vellet, descensuram; sed nihil proficiebat. etenim erat illi statutum ac fixum, nunquam eam domum reducere; sed cum amici pertinacius contenderent, expugnatus tandem, mutavit sententiam, & statuit cum ipsa redire in gratiam. sed ne tum quidem inventa est sui dissimilis. nam cum ab eo omnibus in rebus commode ac liberaliter haberetur, cœpit rursus viri sui bene parta non solum indiligenter tutari, verum etiam per luxuriam effundere, adeo ut, paucis mensibus nihil fere illi reliqui fecerit, ac vim imposuerit, ut operis suis locandis victum quæriraret. sed mox debita eam pœna consecuta est. nam cum in morbum gravem incidisset, neque esset, unde curaretur, delata est in nosocomium S. Ioannis in Laterano, ubi per aliquot dies defixa lectulo jacuit; sed cum tandem ex eo morbo convaluisset, & infirmis etiam tum viribus bacillo innixa domum suam reverteretur, via sacra, ab una ex iis buculis, quæ ibi venales habentur, expetita est, & in æde Sanctorum Cosmæ & Damiani, quo tanquam in aram confugerat, ante quam quisquam posset obsistere, multis vulneribus confossa, exanimis relicta. atque hunc mulier flagitiosissima, dignum moribus factisque suis, exitum vitæ invenit.

- LIII. *Ægrotus quidam, ad extremum casum perductus, non potest adduci, ut concubinam ejiciat.*

AVdivi ipsemet, etiam tum juvenis, in Æde D. Augustini concionatorem ex eadem familia, virum doctum ac piuin, qui de loco superiore narrabat, se paucis diebus ante, celebri quadam urbis via euntem, de fe-

de fenestra cujusdam domus magnopere fuisse evocatum, rogatumque ut ascenderet, quo morienti cuidam, extremo illo tempore, ad salutem animæ, opem præstaret, accurrisse eum subito, invenisseque virum in lecto cubantem; cui, graviter ægotanti, mulier aderat concubina, & egregiam omnibus in rebus operam navabat. nec mora, ejus confessionem excepisse, & cum comperisset, quid ea ad illum mulier attineret, admonuisse eum graviter, atque etiam, pro potestate quam gereret, præcepisse eidem, ut si Deo salvus esse veller, illam statim mulierem domo, quantum potest, ejiceret; sed respondisse eum ajebat, se nunquam commissurum, ut mulieri optime de se meritæ eam gratiam referret, ut, ex improvviso, nihil minus expectantem, foras ejiceret, præsertim, ut cum maxime ejus opera indigeret: etenim habere se neminem neque cognatum neque amicum, cui suam salutem ac vitam posset tuto committere, præter eam, cujus operam utilem atque fidelem, multis in rebus, esset expertus. quo audito, petiisse ajebat, ut saltem conceptis verbis juraret, simul ac convalesceret, se nuncium remissurum mulieri, nec quidquam sibi amplius rei cum illa futurum. ad hæc respondisse illum, se nihil posse in præsentia promittere, verum ubi amissam valetudinem recuperasset, de ea re serio deliberaturum, illudque consilium sibi capturum, quod magis in rem suam esse videretur. tum vero ipsum, desperata hominis salute, tristem abiisse, sed statim revocatum, hilarem rediisse, summa spe præditum, quod Deus meliorem homini mentem injecisset; sed frustra. nam sine mente, ac sine sensu, exhalantem eum animam offendisse. cui mulier illa cerenum lucebat, fortasse, ut properanti ad inferos, atque ad æterna supplicia, in tenebricoso illo itinere, lumen non deesset.

LIV. *Qui castitatem sartam tectam habere possulat, debere eum oculos in primis abstinentes habere.*

NOvi ego, tanquam me, hominem, qui etiam nunc vivit, qui beatam vitam, non animi, vel corporis, aut externis bonis definiret, sed ex Minnervi sententia, in amore jociisque positam esse arbitraretur. itaque, ut olim D. Augustinus in confessionibus suis de se fatetur, ita ille nihil præstantius, nihil optabilius, nihil jucundius existimabat; quam amare & amari; cumque de aliquo audiret, quod misere amaretur, discruciabatur animi, non posse idem sibi contingere. ne multis morer, sine amoribus nullam esse vitam existimabat. verum resipuit aliquando, & ad bonam, ut dicitur, frugem se recepit; sic, ut omnes ejusmodi cogitationes prorsus abjiceret, neque alios amores meditaretur, nisi caelestes atque divinos; in quo vitæ genere, usque ad senectutem se continuit. sed cum omnibus periculis se esse perfunctum existimaret, commigravit illuc viciniæ ubi habitabat mulier vidua; quam primo contempsit, nullas inde castitati suæ insidias metuens; sed postea, miser, fuit omnibus exemplo, quantum referat, oculos habere abstinentes, neque illud aspicere, quod non liceat concupiscere. nam cum attentius eam semel aspexisset, atque illa, salutatione amicissima, eum in se oculorum obtutum excepisset, sensit ipse, se vehementer commoveri; sed facile eum animi motum, assidua resistendi consuetudine usuque, cohibuit. sed quoniam mulieris deinceps colendæ quadam quasi necessitate se esse devinctum arbitrabatur, salutando resalutandoque assecutus est, ut primo tacito quodam amore corripere-
tur, tum totus ab eodem corripere-
tur, postremo, quod sine lacrimis commemorari non potest, in ea muliere turpiter laberetur. sed postea cogitans, quantum flagitii admisisset, vim lacrimarum effudit; cumque conaretur, ex iis sese laqueis eximere, operam perdidit. nam mulier ferox atque impotens, sæpe vi in ejus domum irrupit, ipsoque invito ac repugnante, apud ipsum versatur,

tur, cœnat, dormit, ac, sive utilitate, quam ab eo percipit, ducta, sive quod ægre ferat, se contemni ac despicì, sive quod mulier paupercula hominis locupletis nuptias aucupetur, simulat se ejus amore differri, ac metuere, ne altera eum mulier sibi præripiat; & facit prope plura iis, quæ amant ex animo. ille, quamquam Dei amore metuque, eam peccandi illecebram detestetur, atque horreat, attamen, tam propinqua occasione, tanquam vallo circumdatus, queritur, flet, ingemiscit, Dei opem implorat, crebro in hæc verba prorumpit, Miserere mei Domine, adjuva me Domine, ne obliviscaris, neque repellas in finem, quam diu iratus erit super me furor tuus? quamdiu extenta super me manus tua? ac pro certo existimat, detestabilem eam cupiditatem, qua olim adolescens flagrabat, nimirum ut mulierem aliquam ejus semper lateri hærentem haberet, hac poena supplicioque constringi.

L V. Alterum, de incontinentia oculorum, simile superioris, exemplum.

IN eandem prope calamitatem, ex incontinentia oculorum, incidit alter, qui usque eo castitatis erat amator, ut ne verbum quidem ferre posset, quod obscœnitatis suspicionem haberet. hic cum, die quodam, rheda ad Ædem D. Ioannis in Laterano veheretur, incurrit in plaustrum; quamobrem coactus est paululum subsistere. hoc intervallo contigit, ut oculos ad fenestram cujusdam domus attolleret, ubi forma luculenta mulier hæbat; & cum deberet oculos revocare, &, quam vidisset, à memoria repellere, horum omnium oblitus, primum altius oculos in ea defixit, ac diutius quam par erat detinuit; tum ejus imaginem non solum ab animo non abstergendam, verum etiam in eo imprimendam defigendamque curavit. quod mulier animadvertens, ore, oculis, vultu, aliisque benevolentis animi significationibus, ad intimos ejus cordis recessus penetrare, ac totis visceribus hære contendit. id quod illi contigit ex sententia, etenim ille indiligens, nec satis paratus ad caven-

cavendum, hamum voravit, ac mulieris imaginem, nisi postea multis cum lacrimis doloribusque delendam, animo infixam, attulit domum. itaque postridie, perendie, atque aliis deinceps diebus reversus est eo, quo trahebatur, semperque mulierem in fenestra, ipsi operam dantem, offendit. postremo cum durare nequiret, egit per interpretes, ad eam rem aptos, cum ea, ut intromitteretur. illa primo negare, ac se non esse ejus notæ mulierem dicere, quæ cum alienis & ignotis viris fabularetur; deinde se illorum precibus victam simulans, quandoquidem, inquit, eo est in me animo ac benevolentia, quam dicitis, &, ut verum fatear, quia nemo antehac conspectus est à me, in quo magis commota sim, adeat, me colloquatur, hæ semper illi fores patebunt. quid opus est verbis? simulac habuit ad ejus mulieris gratiam atque amicitiam receptum, ita repente mutatus est totus, ut ex optimo frugalissimoque deterrimus profusissimusque evaserit. ac finis fuit ejusmodi, ut, cum nullus, neque poscendi, neque dandi finis esset, æs alienum grande contraxerit, cumque non esset solvendo, urbe excesserit, seque creditoribus fuga subtraxerit.

LVI. Cui sunt res minus secundæ, dilapsam in alias res animum, ad Deum atque ad seipsum revocat.

QUod vexatio det intellectum, ut in sacris literis legitur, perspicuum est magis, quam ut mea vel cujuscumque oratione indigeat. quos enim plerumque res prosperæ de optimo vitæ statu dejecerant, adversæ ad sanitatem revocarunt. vix quisquam invenitur, qui calamitate aliqua affectus, non suis eam peccatis referat acceptam, ac Deum, cujus antea ne meminerat quidem, non sibi facere propitium studeat. quid? nonne isti etiam sentiunt ii, qui capitalis cujuscumque sceleris damnati ad supplicium rapiuntur? qui etiam interdum de illo eodem supplicio immortales Deo gratias agunt; nam fateri coguntur, nisi ad iudices illos venissent, se ex Dei manibus non elapsuros, in quas, ut Apostolus inquit,

quit, est horrendum incidere. superfluum est, ac non necessarium, hujus rei exempla proferre. neminem enim esse arbitror, cui non plures veniant in mentem, ex iis, quos viderint, vel de quibus audierint; quos à perdita ac flagitiosa vita, vel lethalis aliquis morbus, vel rei familiaris jactura, vel aliquod ejusmodi infortunium, ad sanitatem revocaverit; sed cogor unum in præsentia referre, quod haud ita pridem à P. Io. Matthæo Ancina accepi.

Erat quidam superioribus annis, qui ita in re familiari sua viveret, ut, pecudum more, suavia in præsentia quæ essent, prima duceret, ceterum Dei metum, & salutis æternæ rationem prorsus à memoria abjiceret. sed quamquam ipsum Dei oblivio cœperat, minime tamen eum Deus in oblivionem adduxerat, sed recordatus misericordiæ suæ, cogitabat ovem, quæ errabat, in viam revocare, atque intra ovilis sui septa reducere, quamobrem passus est eum in magnam quandam in Remp. fraudem delabi, cui, pœnæ loco, Princeps, publici cuiusdam muneris, quod gerebat, administrationem abrogavit, atque insuper pecunia, quatuor videlicet aureorum millibus multatum à se dimisit. ex qua contumelia, damnoque, continuo mens illi & consilium, quod aberat, rediit, ac, vetere repudiata, novam vitæ rationem inivit, seque ad divinæ legis præscriptum conformavit. itaque omnibus audientibus non pudet eum dicere, se maximas & ingentes Deo gratias habere, quod ipsum calamitate illa pulsasset; iis enim plagis atque verberibus timorem Domini didicisse, ac prorsus hominem esse factum ex pecude. itaque quod aliis solet esse dolori atque tristitiæ, id est illi causa voluptatis atque lætitiæ; Davidis exemplo, cui divina flagella convertebantur in consolationem & gaudium. nam verberatus à Deo, *Virga tua & baculus tuus*, inquit, *ipsa me consolata sunt.*

LVII. *Ecclesiam non esse bonis suis evertendam, neque alios ex eis locupletandos.*

Q Vanto, quamque inexpressibili se scelere alligent ii, qui res Ecclesiæ diripiunt, quæ Deus exempla in Carolum Francorum Regem, Pipini patrem, edidit, satis superque declarant. quam rem, quamvis à non nemine, tanquam temere confictam rejici, non me lateat, quia tamen sacris canonibus consignatam invenio, ac multis posse prodesse intelligo, referam. hic igitur Carolus bona, Deo dicata, Ecclesiis ademerat, & quibus libitum fuerat impertierat. eo vita functo S. Eucherius Aurelianensis episcopus, fusus in preces, sibi visus est à corpore abstrahi, atque, Angelo duce, ad loca, improborum suppliciiis scæda & horrenda, perducitur, ubi Carolum exquisitis tormentis excruciaci conspexit; cujus tam gravis in eum animadversionis causam cum rogasset, respondisse Angelum, quod eorum Sanctorum sententiis, quorum ecclesias expilasset, quique una cum Christo genus humanum iudicaturi essent, ante diem iudicii, pariter cum corpore, æternis esset ignibus addictus. quod in se reversus, Sancto Bonifacio ac Fuldrado Abbati narravit; quibus vehementer exterritis, placuit ad Caroli sepulcrum accedere. quod cum aperiendum curassent, draconem ex eo, horribili sane forma, evolantem, illudque præterea intus igne peresum, fumoque nigrum aspexerunt. quare Pipinus, ut par erat, commotus, bona ecclesiis erepta perquirenda eisdemque reddenda curavit. verum, ut ut se res habeat; hæc à Deo sacrilegis ecclesiarum prædonibus, sceleris merces & gratia rependitur. prædones autem ecclesiarum, non eos tantum voco, qui bona ecclesiis per vim ereptum eunt, verum etiam, qui ingentes annuas pecunias, à majoribus nostris, religiosissimis mortalibus, ad sustentandam pauperum inopiam, relictas & traditas, vel ipsi per luxuriam effundunt, vel filiis, cognatis, ac nepotibus ipsorum, perdendas dissipandasque relinquunt, qui filii, vel nepotes, non parum sæpe, majorum suorum cupiditatis avaritiæque poenas pendunt. nam pecunia

cuniar illar, tanto ab eis labore studioque coactar, nescio quo pacto, dilabuntur, & in nihilum abeunt, ipsi vero ad eam egestatem adiguntur, quam in pauperibus Christi neglexerunt.

Erat Romar, paulo supra hanc aratem, vir quidam, qui ad summos honores divitiasque, ex pingui sacerdotio coactas, pervenerat, adeo ut, eo mortuo, quos sibi heredes instituerat, partim ex opulenti ecclesiasticis beneficiis, partim ex optimis pradiis, supra triginta aureorum millia quotannis acciperent, praterea ardes pulcherrime factas, in celeberrima urbis parte sitas, obtinerent; quas ardes ut in urbis pene modum arificaret, dederat ille operam, ut maxima religiosissimi antiquissimi que cuiusdam templi pars dirueretur. sed contentus hac iniquitate non fuit: nam cum ardes, quas extruxerat, templo annexar continerentur, atque eas vehementer cuperet insular cuiusdam instar habere, ita à templo sejunxit, ut illud, ad exigui cuiusdam sacelli modum redegerit. ne multa, vix quinquaginta ab ejus interitu anni intercesserant, cum ingentes illar divitiar disperierunt, neque ullum fere sui vestigium reliquerunt. nam ex ejus filiis ac nepotibus alii, quod, magno are alieno obstricti, solvendo non essent, ac propterea exilium patria sede mutassent, sacris interdicti, & à communione ceterorum fidelium segregati, discesserunt è vita; alii, bonis fere omnibus amissis, dignitatem suam tueri vix poterant; qui vero reliqui sunt ex ea familia, partim in egestate ac solitudine indignam ipforum genere vitam exigunt, partim cognita rerum humanarum vanitate & inconstantia, iis valere iussis, ad religiosorum hominum castra confugerunt, ubi angelorum vitam in humanis corporibus agunt.

Hoc loco libet interponere, etsi paululum à re alienum videatur, male cessisse omnibus, quos quidem ego noverim, qui ad privatas domos arificandas, vel ad hortorum suorum terminos proferendos, sacras ardes solo aruarunt. nam alii hortos, domosque, quas excitarant, aliis precio abalienarunt, neque iis uti frui voluerunt; alii in furorem prolapsi, infelicem vitar exitum sunt adepti; alii, liberorum cupidi, nullam ex uxori-

bus

bus suis masculam vel virilem prolem susceperunt ; alii, quos habebant , in solitudine & egestate reliquerunt ; alii amplas atque florentes res suas , præcipiti fere lapsu ad extremum pene casum perductas conspexerunt. Sed jam eo , unde digressi sumus , revertamur. is de quo commemoravimus , perpetua usus felicitate , nec dum alteram fortunam expertus , decessit è vita , ac cupiditatis avaritiæque suæ poenas posteris luendas reliquit. at consuevit etiam Deus sacrilegos istos , non impunitos ab hac vita dimittere , sed ab eisdem etiam tum vivis eas poenas repetere , quæ cupiditati illi , cujus æstu rapiuntur , in primis adversetur. quoniam fere accidit , ut in suo quisque vitio plectatur : nam quid raptores hujusmodi , tam sectantur , quam divitias ? quid tam fugiunt , quam paupertatem ? at ab illis sæpenumero absunt , hanc frequenter incurrunt.

Fuit olim in oppido quodam subalpinæ regionis vir nobilis , ecclesiastici cujusdam beneficii patronus , præterea opibus ac divitiis , sui loci atque ordinis facile primus. hic annuas pecunias , quas sacerdotem , ejus sacelli rectorem , capere oportebat , tanquam calamitas aliqua intercipiebat , ac domum suam avertebat. querebatur sacerdos , inopiam suam cum lacrimis aperiebat , eum etiam admonendum corripiendumque curaverat , sed plus apud illum poterat paxillulum illud lucri , quam jus , quam æquitas , quam Dei metus , in cujus offensio- nem incurrerat. non tulit diutius tantam hominis iniquitatem Deus , sed , quam minime ille volebat , poena compescuit. etenim sacra illa pecunia , tanquam si ali- quod incendium fuisset , universum fere ejus patrimonium absumpsit ; adeo ut , ex locupletissimo , factus sit omnium longe pauperrimus ; & quod mirabilius videri debeat , quærens ille , atque investigans , quid subitæ illius inopiæ causam attulisset , nihil reperiēbat ; nullis , neque publicis , neque maritimis negociis affinis fuerat , nullam mercaturam habuerat , ubi rem perdidisset , nullos extraordinarios sumptus fecerat , nullum rei familiaris damnum indiligentiâ contraxerat , sed contra , à negociis alienus , frugalissimus , & in tutanda re sua diligentissimus fuerat.

LVIII. *Indus quidam infidelis, divinitus ad Christi fidem vocatus, sanctissime vivit ac moritur.*

VIr quidam Indus, nomine Emanuel, præter fluminis cujusdam ripam iter faciens, sensit tacite intra se agi ac dici, Deum verum esse eum, qui humanam pro nobis naturam induisset; cumque animi ipsius aures crebro ejusmodi vocibus personarent, cœpit secummet ipse quærere, quisnam esset hic Deus, humana carne, tanquam veste quadam, indutus; erat enim funditus Christianæ religionis expers ac rudis; ac sensit; sibi intrinsecus responderi, ne consisteret, sed pergeret, ac progrediretur longius. quod cum factum ab eo esset, devenit in latronum insidias; à quibus comprehensus est, atque ethnicis quibusdam precio in servitutem addictus. qui cum ægre servitutis incommoda ferret, die quodam, rebus aliquot convasatis, se fugæ mandavit. sed cum abeuntem eum domini prosequerentur, tandem assecuti sunt, ac multis plagis, atque aliquot etiam vulneribus affectum, sibi ad pedes abjecerunt. sed cum nihilo minus in eum sævirent, viator quidam Hebræus rogavit, ut homini pene jam mortuo parcerent. tum illi, antea multo aceto ac sale ejus vulneribus perfricatis, inde sublatum, rursus in servitutem abstraxerunt. neque tot injuriis oppresso, illa Dei hominis cogitatio excidebat, sed altius hærebat in animo; & cum primum ei rei facultas oblata est, rursus se dominorum sævitæ, fuga subtraxit, atque in navim, quæ tum solvebat, ascendit; ubi tam diu sub quoddam tabulatum delituit, quam fuit suspicio, ne ab insequentibus reprehensus, à fuga retraheretur; & quamvis latitanti omnia fere humana præsidia deessent, divina non aberant. nam quotidie, pueri cujusdam opera, tantum cibi & potionis eidem deferebatur, quantum satis esset ad famem sitimque tolerandam. postquam vero omnis suspicio metusque discessit, è latibulo prodiens, cœpit Christiani concionatoris partes agere, & clare, omnibus

E

audien-

audientibus, dicere, Deum verum, nec præterea alium
 tot rerum admirabilium effectorem extitisse, quæ cælo,
 terra marique continerentur; atque, admirantibus curi-
 ctis ac quærentibus, cur homo à Christiana religione
 alienus ea loqueretur, respondebat, se quidem nescire,
 quid diceret, verum id suggeri dictarique ab ea voce,
 quæ sibi intus in animo loqueretur. cum vero navis ad
 Lusitaniam appulisset, traditus est in servitutem mulieri
 longe piæ religiosæque; à qua etiam duo jumenta acce-
 pit, quibus in urbem ligna conferret; atque, ex eleemo-
 synis, quæ multæ ad eum undique conferebantur, alta-
 ria & sacella Deo excitanda ædificandaque curabat. at,
 ea muliere vita functa, tanquam voti causa, ad Ædem
 B. V. in monte Serrato se contulit; tum aliam ejusdem
 ædem invisit, quæ vulgo B. Virginis Spei vocatur; ubi,
 cum in iis, quæ ad nostram fidem spectant, esset prope
 rudis atque hospes, ut diximus, (ad ea enim rite perci-
 pienda, neque spaci, neque facultatis ita multum ha-
 buerat,) plenus spei ac fidei, Dei matrem enixe roga-
 vit, ut ad ea cognoscenda, aliquod sibi lumen afferret;
 ac statim sensit, suo ab animo quasdam quasi tenebras
 pelli, ac summa fidei Christianæ capita fieri aperta at-
 que perspicua; & si quem adversæ fortunæ fluctibus ja-
 ctatum conspiciebat, eundem hortabatur, ad D. Virgi-
 nem confugeret, huic supplicaret, eamque firmissi-
 mam spei nostræ anchoram teneret; ita enim fore, ut,
 quod cuperet, impetratum referret. post hæc, tacita qua-
 dam vi, sensit se attrahi Romam: verum cogitans, se
 perperam eo venturum, ubi nulli esse usui posset, homo
 videlicet Indus, pauper, ac rerum omnium imperitus,
 facile cupiditati illi obstitit; sed demum ab intrinseca
 illa voce, de qua diximus, confirmatus, quæ ubique
 locorum Deum sibi propitium fore pollicebatur, venit
 in urbem; ubi acceptus est hospitio à Lusitanæ Regis
 legato. ad quem dum divertit, nocte quadam à dæmo-
 ne abripitur, atque in cloacam plenam sordibus abstra-
 hitur; unde, postquam illuxit, emerit, ac sum in cu-
 biculum se recepit, sed adversus dæmonis impetus, hoc
 singulari utebatur præsidio, ut crucis eidem signum ob-
 jiceret, eodemque se muniret. quamobrem ille non est
 ausus

ausus eum amplius attingere, quamvis variis sæpe mon-
stris prodigiisque sit conatus in terrorem inducere. sed
postquam egregiam hominis virtutem coepit rumor
efferre, vel potius ipsa ejus virtus suæ se lumine prodi-
dit, multorumque oculos in se convertit, expetitus est
à pluribus, & in his à Carolo Mutio, Cardinalis Mutii
episcopi Viterbiensis, qui aliquot ab hinc annis est mor-
tuus, optimi clarissimique viri, patre; à quo etiam in-
vitatus, atque adeo attractus est in domum suam, tum,
eo in subalpinos ad Ducem Sabaudia profecto, exce-
ptus humaniter est ab Hortensio Frangipane, atque om-
nibus in rebus humaniter habitus; cujus etiam domi ac-
quievit, annos centum atque eo amplius natus, atque
in Æde D. Mariæ super Minervam sepultura mandatus.
Multa toto hoc tempore extiterunt, quæ viri sanctita-
tem significarent, è quibus, brevitatis causa, unum aut
alterum afferam. cum domi Caroli Mutii, lethali im-
plicitus morbo teneretur, quia Carolus ab urbe aberat;
familiarium negligentia, multos dies sine cibo jacuit;
sed ex eo tandem morbo divina ope convaleuit. quodam
etiam die, cum de inore in cubiculo clausus, ad Deum
preces effunderet, oranti, in hæc verba, Quo ore, cor-
poris vinculis solutus, tibi in conspectum veniam, om-
nium rerum rudis! Christus multa luce circumfusus ap-
paruit, ac blande Emanuelem appellans, capiti ejusdem
manum admovit; tum Emanuel, ingenti perfusus gau-
dio, Domine præsto sum, ait; cui Christus, tu quidem
apud me eris, sed ejus rei dies nondum advenit; ne-
cesse est enim antea te paululum operæ, poenitentia
tribuere. Interdum inspiciebat in hominum animos, &
clausas eorum cogitationes & consilia, ipsis admiran-
tibus, aperiebat; quemadmodum usu venit in eo, qui,
nemine conscio, constituerat, nescio quam rem cuidam
muneri mittere. nam conventus, & admonitus ab eo
est, ut cogitatione illa desisteret; fore enim tempus,
quo ejus indigens rei esset, quam properaret amittere.
nonnunquam etiam, quæ, ipso absente, de se homi-
nes loquerentur, Deo revelante, percipiebat. nam cum
quidam de ejus probitate sermones laceffissent, neque
vererentur, sanctum eum appellare, venit ad eos sto-

machans , &c, Quid, inquit, vobis venit in mentem, me falso sanctitatis nomine onerare ? sanctus est D. Petrus, sanctus Divus Paulus , Sancti ceteri omnes , quos sua merita in cælum vocaverunt ; equidem nihil sum , nisi foetidus quidam pulvis, ac cinis. Hæc, pene eisdem verbis , translata sunt à me in hunc locum , ex quadam pagella, Italice scripta, à P. Iacobo Vulpono Congr. Oratorii accepta.

LIX. *Infideles , congruenter natura viventes , à Dei auxilio non deseri.*

QVod homines Deus , ex naturæ præscripto vitam agentes , non deserat , neque sine Christianis sacris interire patiatur , tum alias sæpe , tum hac nostra memoria , in quodam Turca , mirum in modum apparuit. Petrus Alaona Soc. Iesu Siculus , Marco Cornelio , Episcopo Patavino , mihi que narravit , olim Regis Hispaniarum classem , ex insula Siciliæ in Africam solvisse, eo consilio, ut afficeret eas regiones clade, se autem præda locupleraret ; & classem quidem eo esse appulsam, & milites in terram egressos , sed neque esse aulos quemquam bello laceßere , neque captivum in servitutem abducere, extra unum Turcam, annos natum prope nonaginta ; quem navi impositum , in Siciliam detulerunt ; & rogatum , num vellet Christianus fieri , respondisse ajebat, nihil sibi longius videri , quam dum Christiana sacra perciperet ; itaque statim, sacro regenerationis lavacro fuisse lustratum ; tum eam illi provinciam traditam , ut pro eo xenodochio , ubi alebatur , à populo stipem exigeret ; postremo, paucos post, annos an menses ? egregie eo munere functum , diem extremum obiisse. sed cum quærerent , & investigarent , quibus præditus moribus in vita fuisset, inveniebant, eundem congruenter naturæ vixisse, & pauperum Christianorum inopiam pro opibus sublevasse. quamobrem palam factum est omnibus , divino consilio eam classem fuisse comparatam & instructam , tantæque celeritate in Africæ litus impulsam , ut hominem unum exciperet, ac Christianis sacris imbutum, in æternæ salutis portum adveheret.

LX. *Quatuor mulieres, in primis nobiles, sed formæ bono feroces, dignas vanitatis contumaciæque ipsarum pœnas luunt.*

DEus, audiui auditionem tuam, & timui; consideravi opera tua, & expavi. Liceat mihi iisdem verbis humiliter Deum affari, quibus sanctissimus Propheeta, in admirationem elatus, eundem Deum alloquitur. ita mihi se se aliqua divina ejus judicia offerunt, quæ sua gravitate terrorem metumque incutiant; è quibus, primo loco, illud proferam, quod primum venit in mentem. Quatuor, uno fere tempore, me puero, mulieres nobiles, formæ ac venustatis laude, ceteras anteire existimabantur; neque in eo homines decipiebantur; erant enim re ipsa tales; sed inerat illis non minor vanitas, ambitio, atque superbia, ex opinione ac fama, de ipsarum forma elegantiaque concepta. quo fiebat, ut minus Deum, quam par esset, metuerent. nam, quocunque pergerent, cultiores ornatioresque, quam probas decet, incedebant; tum, ostentationis gloriæque causa, certatim amatorum spectatorumque greges secum trahebant; neque alias magis in ejusmodi iniquitatis operibus versabantur, quam diebus festis, cum se se in templum agebant, ut rebus divinis interessent. eo enim diligentius expolitæ, pictæ, fictæque veniebant, eodemque exquisitis, atque adeo superstitiosius ornamentorum genus deferebant; ibi majorem circa se numerum eorum habebant, qui se dici volunt elegantes; ibi formas suas ociosius spectandas præbebant; ibi modo hunc modo illum intuentes, lascivis oculorum obtutibus, cupidorum hominum insanias acrius inflammabant, summa eorum, qui aderant, cum offensione atque dolore, qui ferebant indigne, tam insignem Deo contumeliam inferri. sed ex ad unam omnes vanitatis, petulantia, & sacrilegii ipsarum pœnas dederunt. nam nni earum, quæ, ut fama erat, virum tollendum curaverat, quo alteri potentiori nuberet, à quo misere amabatur, in ipso ætatis flore erepta vita est; alteri manus, ob cujus candorem

pulchritudinemque se in primis circumspiciebat præcisa; ne lethale virus, quod contraxerat, totum videlicet corpus inficeret; sed nihilo minus statim est mortua; tertiæ, quæ palam à viro quodam principe ad insaniam adamata, in graviolem populi offensionem incurrerat, foetidus obscenas partes cancer adedit; postrema, cum rem familiarem, quæ erat amplissima, propinquos, ornatissimos viros, ac liberos, lectissimos adolescentes, amisisset, diutina est tabe confecta.

LXI. *Quid sit periculi, in rebus dubiis, opes suas in hominum gratia, non autem in Dei ope collocatas habere.*

Humanarum calamitatum fluctibus agitatæ, tutissimum esse perfrugium ac portum in Deum, intelligunt ii qui, desperatis omnibus aliis auxiliis, toti ab ejusdem Dei providentia ac bonitate dependent. quorum quia magnus est numerus, unius testimonio Davidis contentus ero, qui totus hac fiducia plenus, *Mihi autem adharere Deo bonum est, inquit, ponere in Domino Deo spem meam.* ex contrario, si, Deo relicto, spes nostræ ad solam hominis alicujus fidem & patrocinium advolent, ferre semper naufragæ, ad aliquem perfidiæ aut infelicitatis scopulum, navem, ut ita dixerim, frangunt. id quod perpetuæ eorum querimoniæ luctusque declarant, qui eos, à quibus decepti sunt, ubi fides sit, orant, aut adversam fortunam conqueruntur. neque eo minus inveniuntur aliqui, qui in calamitatibus positi, totos se ad hominum gratiam atque potentiam conferunt, neque magis Dei opem auxiliumque implorant, quàm si ille non esset, aut nihil in eo præsidii inveniretur. quocirca in sacris literis, malè illis Spiritus Sanctus imprecatur, qui confidunt in homine. Erat superioribus annis, in vinculis publicis reus quidam, flagitiis ferè omnibus coopertus, seque emitti posse sperabat, viri cujusdam opera, qui, auctoritate & gratia, plurimum apud Principem poterat; in eoque spes suas omnes fixas & locatas habebat: verum à religioso quodam viro admonitus est,

ut, ne consideret in Principibus, in filiis hominum in quibus non est salus, sed potius in Dei opem confugeret, ejusque potissimum gratia niteretur. at non magis improbe, quam impie, respondit, Quid Dei mihi gratiam narras? nihil eam inoror; principe ego illo egeo, ejusque mihi opus est gratia, qui hac me custodia liberare potest. & sane tum est ab ea dimissus, ut optabat; sed paulo post, execrandæ illius blasphemiae poenas dedit. nam repentina morte correptus, fuit omnibus exemplo, quantum intersit in Dei tutela patrocinioque latere, neque ejus gratiam parvi pendere, vel à se se rejicere.

LXII. *Suam iis spem decollare atque decoquere, qui peccata, quæ fecerint, occulta & impunita fore semper existimant.*

GAllus quidam, ex provincia Aquitaniæ, domino de Villa cognomine, unus ex regiis machinatoribus, forma eximia & ætate integra mulierem domi suæ alebat; quam etiam ob amorem in illam summum ac singularem, prope in uxoris loco habebat. Sed cum ille egregie navaret operam Regi, fiebat, ut ex illius muneribus rem quotidie familiarem suam augetet; & quia literos non habebat, venit illi in mentem, adolescentem aliquem, arcta sibi cognatione devinctum, educare, generi monumentum & sibi, ad quem morte bona sua omnia redirent. itaque ad fratrem scribit, ut suis ex filiis, ad se aliquem mittat; atque eadem opera ad amicum, cordi suo carissimum, dat literas, ut suum ad se filium perducendum curet. Sed vix pauci ab his literis scriptis intercesserant dies, cum adolescens uterque se se illi in conspectum dedit. verum continuo suspiciones metusque orti sunt maximi inter fratris filium & mulierem, quam ab eo diligi vehementer, diximus; quod mulier vereretur, ne amator omnem de se amorem ab animo ejiceret, & in fratris filium refunderet; fratris vero filius, quod metueret, ne amor ille venerens, quo, tanquam clavo, fixus apud mulierem erat, animus pa-

trui, caritatem, quæ cognationi in primis debebatur, exstingueret. sed mulier, cujus erat acerbius in adolescentem odium, conata est prior, dolis eam à se molestiam dimovere, hoc est, aliquam in illum tragulam injicere; atque hoc ad eam rem consilium capit. erat patruo adolescentis, amatori suo, ephēbus. ex illorum numero, qui suas ad usum domesticum, ut mos est in Gallia, operas locant; hunc aggreditur, & pluribus verbis docet, in rem utriusque non esse, adolescentem in ædibus illis versari, sed inveniendum esse aliquid, quo ille foras excluderetur; quod se jam reperisse putabat; proinde fabrum aliquem, clavium concinnatorem, adduceret; illi se, quid fieri vellet, ostensuram. ephēbus obtemperat, advolat, fabrum adducit; cui illa imperat, ut armariolum, quod inter alias res preciosas, multis refertum aureis nummis, iisque duplicibus, habebat, machinatione aliqua referet; nam clavem, qua aperiebatur, se amisisse assimulabat. verum ille, cum diu multumque conatus esset, operam lussit; sera enim firmissima, opere Germanico facta, omnem ejus conatum reddebat inanem. mulier re infecta, jubet illum abire; sed cum patruus adolescentis, domum se recepisset, seductum, hac eum oratione convenit; Si das mihi firmatam fidem, te taciturnum, ac ne commoti quidem animi signum aliquod ostensurum, tibi pulcrum filii fratris tui factum aperiam; qua impetrata, Vide, ait, quam bonus ille vir tot tantisque tuis in se beneficiis gratiam referre studuerit; armariolum, ubi aurei nummi, nihilo à te dono dati continentur, per vim est aperire coactus, & auro vacuum facere. unaque opera in cubiculum introducto, seram illi vitiatam & corruptam ostendit; quæ neque clavim amplius admitteret, neque eam libere circa se verti pateretur. qui habita dicenti fide, non ita multos post dies, accitis adolescentibus, fratris filio. Mihi, inquit, non lubet, tua dehinc opera uti; desine velle hujus rei causas exquirere, non enim te est æquum, omnia scire; propterea, quantum potes te hinc amove, & ad patrem, unde profectus es, recipe. percussit illico adolescentibus animum suspicio, mulieris id gratia fieri, cujus, animi à sese alieni, signa non obscura a-

quan'o

quanto ante vidissent ; sed certi , quod affirmarent , cum nihil haberent , abierunt , sed non in patriam ; quod decreverant Parisiis consistere , suumque in ea urbe domicilium collocare ; id quod ipsis , per parentum facultates , quæ satis erant amplæ , facere licebat. At muneris , quod gerebat , ratio deposcebat , ut ille , qui eos domo expulerat , sæpenumero Regem , quam in partem iret , sectaretur ; itaque die quodam cum ephebus , qui fuerat mulieris fallaciæ conscius , cum illo una iter faceret , Si mihi , inquit , fidem das , te nullum de me supplicium esse sumpturum , facinus in quod me conjeci , aperiam. quam cum ille dedisset , crimen à muliere in fratris filium , falso confictum exposuit. quo ille audito , data sibi verba fuisse , plurimum doluit , seque vehementer facti poenituit : verum , quia nimis arcto amoris vinculo mulieri adstrictus tenebatur , acceptam ab ea injuriam mustitandam duxit , ac ne nutu quidem ac significatione , se eidem esse iratum , ostendit , sed revocatis adolescentibus , cum vos , inquit , domo foras ejiciebam , clam ejus rei causam habui ; at neque nunc faciam vobis palam , quid me sententiam mutare compellat , ite , agite ; en vobis domus inæ fores patent ; pergite , sicut antea fecistis , bene de me ac de familia mea mereari. illi , quibus jam noti fuerant atque perspecti mulieris doli , gratias egerunt , ac , de referenda improbæ illi gratia , excogitare cœperunt , cumque jam pulcre omnia instructa in corde consilia haberent , summam dederunt operam , omnibus officii benevolentiaque significationibus , ne quid ad mulierem permaneret ; tum totam suæ vindictæ rationem cum quodam patruï amico communicarunt , quem , mutuaë amicitiaë vinculo , sibi conjunxerant ; qui primum , omni animi contentione , agere cum illis cœpit , ut sententia desisterent , neve tantum in se scelus admitterent ; tum pericula , quibus se objicerent , supplicia in eos qui facinus tam atrox perpetrassent , constituta , proponere ; postremo , cum ab eo , quod constituissent , deduci non possent , manus dedit , ac suam ad eam rem operam detulit. jam nihil deerat , nisi cogitata perficiendi occasio ; quæ brevi se obtulit , cum nimirum patruus adolescentis , Regis sui causa ,

nescio quod iter esset suscepturus. itaque, ex compacto , mulierem adeunt , anni tempus lepidissimum laudant , in prædium amœnissimum ac venustissimum, quod non amplius ab urbe leucis tribus abesset , invitant , ut ibi tantisper , dum ille reverteretur , hilaritati se traderent. illa, quæ nihil suspicaretur, voluntati eorum gratias agit, promittit ; ne multa , die quodam, cum jam vesper appeteret, tres illi , una cum Italo quodam , Gamorrino cognomine , cujus pater principem in regiis machinatoribus locum obtinuerat , rhedam inscendunt, ad mulierem , quæ jam profectionem ornaverat, veniunt, rheda plenam hilaritatis excipiunt, ac sub vesperam in amœnissimum illum locum adducunt ; ubi statim illa cœsit , animi gratia , suis oves manibus mulgere , & lac patera exceptum ebibere. quod ubi est ab illis animadversum, accurrunt , ac lacti faccarum , multo cum opio mistum , quod ad eum usum attulerant , indunt. quo , illa epoto , cum se jam venenum in venas infunderet , continuo exclamavit , à somno se arripi , & totam ab eo obsideri ; illi collapsam excipiunt inter manus , in cubiculum ibi proximum deferunt , vestibus exiunt , & in lectulo collocant. quam ubi adolescens , qui præcipuas cum ea inimicitias gerebat , fusam , ac sine sensu jacentem offendit , collo ejus , funem innectit , cujus caput unum ipse in manus sumpsit , alteram ephebo , quem sibi pedissequum duxerat , tradidit , atque , Adsisite , inquit , altrinsecus , & ambo, tu ad dexteram, ego in contrariam partem , funem usque trahamus , dum mulieri gula frangatur. sed antea , quod oblitus fueram dicere , miseræ, nec ob soporem, quo ante complexa tenebatur , ad resistendum idoneæ, bis stuprum intulerat. quo audito , ephebus plane vehementer exhorruit , ac magna voce , Nunquam , ait , committam , ut tanti me sceleris alligem. ad quam vocem Gamorrinus , quem paulo ante nominavimus , ejus rei ignarus accurrit ; qui re improvisa perterritus , gravissimis verbis accusavit illorum improbitatem , quod essent ausi , illuc eum adducere , ubi tantum esset facinus perpetrandum ; ac nisi nox obstitisset , quæ jam fere terras opacaverat , illis relictis se in urbem , quantum potest , recepisset. verum ephe-

ephebus, qui summo clamore recusabat, traditas sibi carnificis partes accipere, metu mortis injecto, (nam dominus, Nisi mihi, inquit, dicto audiens fueris, tibi vitam adimam,) coactus est imperata facere, & mulieri necem asserre. corpus extinctæ, una cum subucula, tenuissimo lino contexta, atque admirabili opere facta, quam solam illi reliquerant, primum de fenestra ejecerunt in agrum, consitum tritico; tum elatum, ducentis introrsum passibus, abstulerunt, ibique leviter humo conspersum, quam suis ipsi manibus abraferant, cum nihil esset quo terram foderent, reliquerunt. postridie mane, prædii illius conductore valere jussu, discedunt; sed prius, ne quam homini suspensionem commoverent, si mulierem quæ una cum ipsis venerat, simul etiam abeuntem non vidisset, ephebum vestibus, mulieri, ut diximus, detractis, exornant. in urbem reversi, bona, quæ fuerant mulieris, inter se partiuntur, nummos videlicet aureos sexcentos, eosque duplos, & francos quadringentos, ex illius supellectile, cauponi cuidam vendita, redactos; in quorum partem Gamorinus etiam venit, qui antea tantopere à scelere illo abhorre visus fuerat; sed auri fulgore perstrictus, quo particeps illius fieret, se se ad tanti sceleris societatem aggregare non dubitavit. interim patruus adolescentis revertitur, partem illam ædium, quæ à muliere habitabatur, nudam & inanem offendit. quærit, quid factum sit, respondet adolescens, rhedam, quæ ad ipsam tollendam venerat, conscendisse eam, neque ullum deinde ipsos accepisse ab ea nuncium. quod cum audisset, pro certo credidit, sua eam voluntate fuisse ab aliquo quopiam abductam; quam ejus opinionem confirmabat simultas, qua illa & fratris filius obrectabant inter se, & crimen, de tentata atque corrupta, auri suffurandi gratia, scrinii sera, temere in illum ab ea confectum, verum qui tanti sceleris conscientia constricti tenebantur, subvereri coeperunt, ne minus alta, quam par esset, fovea defunctæ corpus humassent, ac propterea, si palam res fieret, ne pœnas legibus darent. itaque communi consilio constituunt, proxima illud nocte defodere, atque alio in loco, suspicionibus minus obnoxio, altiori sepul-

sepulturæ mandare. ergo instructi rebus omnibus, eam ad rem aptis, eunt, defodiunt, efferunt, & in publico ad lunæ radios, ante villæ, advocati & senatoris cuiusdam, ostium condunt, ac supra gramen, proximis ex locis, radicibus extirpatum addunt; quibus actis, ociosi ab animo, tanquam, si res omnis esset in vado, revertuntur. per eos dies, advocati illius filia, ex gravi diuturnaque agrotatione, magna ex parte viribus amissis, quo eas recuperaret, & simul ad camporum viriditates, ad avium cantus, ad florum amoenitates, ad liquores perlucidos fontium, omnem animi molestiam abstergeret, in patriam villam se contulit; ac die quodam, cum, sumpta in manus testudine, nna cum cubicularia, ambulationi se daret, exarsit cupiditate exeundi in viam; sed vix pedem ab ostio foras extulit, cum sensit se retineri. existimavit primo, id fruticis, vel rami cuiuspiam opera fieri; sed cum se convertisset, ut ab eo se expediret, exstantem prominentemque ab humo manum aspexit, quæ ipsi, vestibibus comprehensæ, moram & impedimentum objiceret. quo illa metu, quo horrore, qua formidine correpta sit, non dico, sed in cogitatione cuiusque relinquo. cubicularia, quæ debebat ferre opem dominæ, ex metu collapsæ ac prope ab anima derelictæ, ipsa quoque exanimata, curriculo ad illius matrem se contulit, clamans, ut filiæ auxilio veniret, quæ jam à vita destitueretur, nisi præsens auxilium esset. advolat illico illa cum multis, filiæ succurrit, medicamentis fugientem animam revocat, & simul dat ad maritum literas, ut relictis rebus omnibus ad se veniat, ita sibi, filiæque, rem esse. qui statim rheda vectus excurrit, rem cognoscit, ad magistratum urbis villæ proximæ defert; qui tabellione ac testibus adhibitis, cadaver exhumandum curat, atque, ex præstantia formæ, quæ adhuc in ejus facie inerat, & ex eleganti subuculæ, qua tegebatur, opere, illustris cuiuspiam foeminæ illud esse, fuit omnium opinio. quam rem, cum non ita multo post advocatus ille senatori cuidam, Parisiensis senatus facile principi, cujus erat domi, narraret, forte accidit, ut ibi patruus illius adolescentis adesset, & perquam diligenter in aures, quæ dicerentur, admitteret, qui ea, quæ

quæ de egregia mulieris forma, capillis,preciosaque subucula narrabantur, secum in corde volutans, in eam est opinionem adductus, ut putaret, eam mulierem illam esse, quam adamasset, & stupri consuetudinem cum ea habuisset, neque alium esse posse crimini illi caput, nisi fratris filium, qui per eam rationem ultus esset mulieris injuriam, ex falsa scrinii corrupti accnsatione sibi factam; ac domum se recipiens, senatum cogitationum suarum in animum convocat, & quid optimum factu sit, consulit, num videlicet præstaret, verum ab adolescente, placide eum interrogando, exprimere, an terroribus ac minis exsculpere; sed magis hoc ultimum placuit. nam si placide illum esset adortus, omnia iturus fuisset inficias. venit igitur domum, & cubiculorum omnium foribus obseratis, adolescentem in intimam ædium partem adducit, & tanquam si crimen manifesto comperisset, ac manu teneret, acri ac vehementi oratione cœpit in illud invehere. ardebant oculi, & toto ex ore ira eminebat, cum pugnaret, in ejus animo, decus existimatioque familiæ, & amor quo illam mortuam prosequeretur; qui ex acerbissimo indignissimoque ejusdem casu, factus erat etiam ardentior. non est ausus adolescens negare, sed rem totam, ita ut erat gesta, narravit. tum ille, Fratris me, inquit, pietas cogit, ut te supplicio, quod præ ceteris commerruisti, furripiam; contine te domi; in eâ erunt partes, quæ tibi ad salutem sint necessaria, prospicere; & cum tibi equum ad fugam attribuero, cave ne uspiam consistas, quoad principis alterius regni fines attingas. postea quæsiit, & investigavit, num illi, qui una cum fratris filio affuerant in interfectione mulieris, sceleris conscientia compulsi, commutassent coloniam; quos ubi eos esse Parisiis intellexit, amico illi suo, qui primo adolescentis consiliis obstiterat, deinde se comitem illis ducemque præbuerat, quo omnis ab eo metus suspicioque removeretur, condixit in posterum diem, qui, ut suo arbitratu, veniret; coctum enim prandium se esse inventurum, respondit. ergo, cum fratris filium, bene viaticatum, in equo collocasset, atque admonuisset, ut quantum potest, fugæ se daret, ubi jam, extra omnem

nem aleam eum arbitratus est esse, summa vi à lictorum duce contendit, ut amicum, cui prandium imperaverat, aliosque duos, sceleris ejusdem conscios, sine alio iudicis mandato, comprehendi, & vinctos in carcerem condi imperaret; atrocitatem enim sceleris, quo constricti tenerentur, esse ejusmodi, ut iudicis mandatum non esset expectandum, sed antea occurrendum, quam illi è manibus fuga elaberentur. quod ubi factum est, quaestione habita, confessi sunt crimen; neque ita multos post dies, crurifragio, quod supplicium omnium acerbissimum putatur, affecti. Gamorrino Rex facile percipisset, sed quia prædæ ejusdem particeps esse voluerat, eodem atque illi, comprehensus supplicio est. ephēbus, quia invitus, ac metu mortis coactus, navaverat operam domino, iudicum sententiis, ex reis exemptus, abire liber est iussus.

Quod factum, mirum nobis in modum Dæmonis artes ad nos decipiendos ante oculos statuit, & ad eas cavendas, præcepta in primis bona ac salutaria præbet. Atqui, cum ille nos ad facinus aliquod vel flagitium alacriter ac strenue suscipiendum impellit, quo, suas in insidias trahat, duplici utitur artificio: primum, omnem nobis ab animo metum conatur expellere, quo sapius à peccando deterremur, verentes, ne id, quod improbe flagitioseque fecerimus, aliquando illustretur, ac nostra ab omnibus cupiditas, scelus, improbitas, audacia, manifesto teneatur; simulque stultam illam ac falsam opinionem inferere nititur, ut credamus, perpetua illud nocte atque caligine obrutum iri, neque ullo unquam tempore ex illis tenebris emergsurum. in quo non error, stultitia, atque temeritas, satis verbis explicari non potest, qui inducamus animum, magis dæmoni credere, qui capitali à nobis odio dissidet, qui nos depressos, perditos, & extinctos esse cupit, quam Christo fidem habere, cujus in nos amor, summo ac singulari, nulla par inveniri potest oratio, qui vult omnes homines salvos esse, qui æternam nobis vitam sua morte ac sanguine peperit. ille, quo liberius libidines nostras, in omni genere intemperantiæ, insas habeamus, ab hoc metu liberare nos studet; hic, quo cupiditates nostras faci-

facilius teneamus, dat operam sedulo, ut perpetuo hic nobis terror infideat, cum, *nihil opertum est*, inquit, *quod non reveletur*, neque *absconditum quod non sciatur*, quoniam *quæ in tenebris dixistis, in luminis dicentur*, & *quod in aulam locuti estis in cubiculis, predicabitur in templis*. potest ne, majore vi quisquam hunc metum in animo, ne cadat, infigere? & interdum, ubi ad crimen aliquod detegendum desunt humana præsidia, monstra atque prodigia succurrunt. nec longius abibimus; hac re, quam modo narravimus, nostra continebitur oratio. quam multa in ea occurrerunt, quæ non possunt defendi, nisi ad miracula confugiatur? primum, quantam illud admirationem habet, quod cadaver bis defossam, bis tertia obrutum, incorruptam suam pulcritudinem venustatēque servaverit? nam dies aliquot intercesserant, inter ejus interitum & diem illum, quo jussu magistratus erutum ac inspectum est. deinde, cuinam credibile videatur, tum cum in agro illo, de quo diximus leviter humo conspersum jacuit, potuisse effugere vim luporum, ac canum præsertim, quibus omnis ager in Gallia, ob multitudinem ædificiorum & incolarum, abundat? postremo non ne fidem omnem excedat, potuisse cadaver, alte defossam, se sursum efferre, brachium attollere, manum, unde omnis sensus aberat, ad puellæ vestes extendere, eamque mordicus retinere? id adeo contingit, quia peccata hominum atque flagitia Deum spectatorem & vindicem habent, qui tecta & inulta ea esse non patitur; quod non sine divini numinis afflatu, (ut sic loquar,) poeta, ceteroqui levissimus, duobus his versibus, graviter & eleganter expressit;

Nec tibi celanti fas sit peccare; paranti.

Sit Deus, occultos qui vetet esse dolos.

quo nihil ab eo dictum esse verius, nihil divinius, constat; nam veritas, à quocunque est, à Deo est. non igitur quisquam, secreti fiducia, in aliquam se fraudem delabi patietur. Alter dæmonis dolus ac laqueus, in quem sæpe multi se induunt, impunitatis spes est. vix enim quisquam, cum peccat, peccati poenas se esse daturum, excogitat, sed impune illud esse ablatum existimat; in quo ipsi se decipiunt, qui, hac spe inflati, ad
scelus

scelus aliquod vel flagitium vela dant; quoniam tandem, ad pœnam ac supplicium, sceleri eorum debitum, navem offendunt. nam ut vetus poëta cecinit,

Raro antecedentem scelestum

Deservit pede pœna claudo.

LXIII. *S. Antonius, cognomento Patavinus, cuidam, suum auxilium imploranti, succurrit.*

P Bernardus Colnagus Soc. Iesu, quo ego multos . annos usus sum familiarissime, præcipuo quodam amore studioque ferebatur in D. Antonium, cognomento Patavinum; &, si quid ipsi à Deo opus esset, non alio fere patrono & avvocato utebatur; neque solum hoc institutum tenebat in suis rebus, sed, si quem inopem, calamitosum, afflictum, aut alienæ opis indigentem offenderat, dabat operam, ut ille per epistolam sanctum virum adiret, eidemque, quæ sibi usui essent, exponeret. cum igitur, per hanc rationem, multi à Deo multa impetrarent, accidit, ut vir quidam Neapoli cum adversa fortuna conflictaretur, adeo ut, si nescio quid à Prorege, per beneficium & gratiam, non impetrasset, afflictas atque prostratas res suas ad extremum casum venturas intelligeret. sed cum precatores non parum multos adhibuisset, nihil plane profecerat. itaque prope erat, ut animum desponderet. persuasit huic Bernardus, ut supplicem libellum, quem Proregi oblaturus esset, in aram D. Antonio dicatam imponeret, ac rem totam illi committeret; fore enim, ut brevi præsentem ejus vim auxiliumque sentiret. paruit ille; ac statim consecutum est, quod Bernardus fore prædixerat. nam illo ipso die, si recte memini, qua hora omnes ad proregem aditus obsepti, atque adeo interclusi sunt, penetrasse in proregis cubiculum intimum Franciscanus quidam dicitur, veneranda facie, atque ea vi, eo ardore animi atque verborum, calamitosi illius causam egisse, ut Prorex victus nihil eidem postulanti negare sit ausus, eo autem fores egresso, evocasse illos, qui ad fores cubiculi vigiliæ agerent, objurgasseque, quod tam alieno tem-
por

pore Franciscanum illum intromississent, at eos sancte affirmasse, neminem ab ipsis visum, neque Franciscanum, neque ex alia quavis familia; tum Proregem admiratum, quievisse; sed postea, re patefacta, ac rota Neapoli celebrata, vix tandem intellexisse, se cum D. Antonio collocutum fuisse, & spiritali gaudio refertum, ingentes Deo gratias egisse. Hæc ego ante annos triginta, recenti negotio, ac eodem P. Bernardo adhuc superstite, Romæ à Neapolitanis atque aliis compluribus accepi.

LXIV. Defunctus quidam, qui secus quam decuerat, vixerat, servo suo se videndum præbet.

QUOD non omnia nobis in morte pariter cum vita tollantur, sed diverso itinere, boni à malis, ad æterna vel supplicia vel præmia contendant, multis sæpe visis, omnibus fere sæculis Deus ostendit; ut quodammodo jam sit obscurius, lucere meridiem, quam animas hominum esse sempiternas. Non multis ab hinc annis, vir quidam nobilis Romæ decessit; cujus nomen, quoniam satis est per se notus, ac plurimum illustrium virorum affinitatibus implicatur, à me reticebitur. huic famam, existimationem, ac præterea patrimonium libidines totum absumpserant. itaque vita functus, humatus est in Æde D. Augustini; quo cum paucis diebus post, orandi causa, venisset familiaris ejus quidam, qui suas operas vivo illi locaverat, jamque pedem è templo foras efferret, sensit se nomine appellari; respexit, & obscuram hominis cujusdam imaginem vidit, quæ, Nosti me? inquit; ego sum ille, cui servus navabas operam vivo; ne Deum pro me ores; etenim exorari non potest, quod æternis addictus sum ignibus; abi, & cognatis amicisque nuncia meis verbis, ut aliam vitæ rationem ineant, neque meis me vestigiis persequantur, quibus auditis, adeo ille totus exhorruit, ut non ultra triduum vitam produxerit; cum antea rem ad amicos detulisset. idque ego, recenti tum etiam re, audiui.

LXV. *Hebræus, capitis sententia damnatus, susceptis Christianis sacris, mortem æquo animo subit.*

Magna profecto in dolore metuque vis inest, ad revocandos à vitiis homines, & ad honestatem traducendos; sed nisi timori succedat amor virtutis, simul ac periculum abest, & licentia consecuta est, continuo omnis illa timoris vis residet, & peccandi studium, celerius quam abactum fuerat, redit. *metus* enim, ut inquit Cicero, *non est diuturnus magister officii.* quid est, quod Deus impium illum Antiochum tam multa tamque præclara pollicentem contempserit, neque audire voluerit, nisi quod intelligebat, magnifica illa promissa, non antea actæ nequiter vitæ poenitentiam elicere, sed studium recuperandæ sanitatis exprimere? etenim, si convaluisset, eundem, qui semper fuisset, ac fortasse aliquanto etiam nequiores improbioremque futurum, attamen inventi sunt aliqui, quos fractæ ipsorum res, aut præsens aliquod periculum, vere cum Deo in gratiam reduxerunt, qui, ne viderentur exilii, vel mortis, vel alterius cuiuspiam periculi declinandi causa potius, quam Dei amore studioque, ad ipsum confugisse, neque voluerunt mala illa deprecari, neque, cum possent, effugere; ut Hebræus quidam; quo tempore Octavius Bandinus, qui postea à Clemente VIII in collegium Cardinalium cooptatus est, civitati Bononiæ cum imperio ac potestate præerat. de quo Præsule libet interponere, etsi sejunctim à re, ita eam Remp. administrasse, ut multis justitiæ, æquitatis, prudentiæ, & in primis abstinentiæ, continentiaque suæ tamquam vestigiis impressam reliquerit. cuius continentia, illud insigne accepi ab eo, qui tum illi erat à cubiculo, eundemque adeuntibus velum allevabat. cum, die quodam, ut consueverat, adeundi sui potestatem omnibus fecisset, oblatam à puero epistolam, in morem supplicis libelli complicatam, accepit; quam postea cum legeret, invenit in ea scriptum, forma egregia mulierem, si jussisset; proxima ad eum nocte venturam. qua re plane vehementer

ter exhorruit, ac sublati in cælum oculis, sibi pectus salutari crucis signo munivit; tum, elatus ira, scelerosum illum evocari jussit. at ille, quasi prædivinans, quid futurum esset, è conspectu evolaverat, neque visus est uspiam. sed redeo ad Hebræum.

Hic manifesto in flagitio cum puero Christiano deprehensus, quod crimen inficiari non posset, judicium sententiis damnatur ad mortem; qui statim cepit summa vi petere, ut sacro baptismatis fonte ablueretur: se enim nolle, nisi Christianum, ex hac vita decedere. ac ne existimarent homines, Christianæ religionis simulatione aliquod mortis effugium exquirere (nam ecclesiæ mos est, Iudæis, aliisque vere religionis expertibus, si Christiana sacra recipiant, quamlibet noxiam, quantumvis capitalem, dimittere, eosdemque ex reis eximere,) ne tale, inquam, aliquid de se homines suspicarentur, vetuit sibi ignosci, æquissimoque animo, mortis supplicio, suis flagitiis debito, caput objecit; atque ægre impetratum est ab eo, ut nollet, sicuti decretum fuerat, suspendio sibi animam adimi, sed pateretur saltem se honestiori mortis genere affici. itaque baptismo, ex ipsius voto, lustrans, candidis ita ut erat vestibus de more indutus, morti se obtulit; & cum antea, non pauca pœnitentis animi & divini amoris igne succensi signa dedisset, dulcissimum Iesu Christi nomen identidem invocans, securi caput objecit, atque animam ei, à quo redemptus fuerat, reddidit.

LXVI. *Turca moriens, subita baptismi cupiditate corripitur.*

Similis baptismi voluntas divinitus indita Turcam quendam, morti proximum, cepit. Narrat Alexander Zambeccarius Bononienfis, miles Hierosolymitanus, classem Melitensem adversus prædones solvisse, ac proxima illi insulæ maria excurrentem, in Turcarum triremes incidisse; quamobrem fuisse necesse, cum illis prælio contendere; in quo multum utrinque fusus est sanguinis; verum, Dei beneficio, nostros superiores dis-

cessisse; sed postea, prælio confecto, cum sauci curarentur, animadversum fuisse, inquit, unum ex captivis Turcam, multis confectum vulneribus, in ultima triremi jacentem, atque, ad eum curandum, medicum quoque missum fuisse, sed, proxima nocte, excitatum à somno, coepisse illum clamare, ac sacerdotem summa vi petere, à quo baptisinalis lavacro ablueretur; nam velle se Christianam fidem amplecti; cumque concursus ad eum fierent, ac de eodem quæreretur, quæ nova illi res eam mentem injecisset, respondisse, sibi visam esse, in quiete, mulierem egregia forma, ac veste indutam candida, dicere, ut si salvus esse vellet, aliquem advocaret, qui Christianis ipsum sacris imbueret; quapropter se tanta fuisse baptisini cupiditate inflammatum, ut ejus desiderii æstum ferre non posset; itaque eum statim sacro fonte ablutum fuisse. illud vero idem Zambeccarius, de hoc homine, novum & incredibile narrat, quod etiam suis se oculis accepisse testatur, quod simul ac ablutus est, ex atro scædoque eam repente pulchritudinem candoremque contraxisset, ut omnia in eo Angeli, quam hominis, similia viderentur.

LXVII. *Adversus res nostras arduas atque difficiles, multum esse præsidii in orationibus justorum.*

QUod deprecatio justī assidua multum possit, cum alias sæpissime, tum nostra memoria in muliere quadam, quæ, paucis ab hinc mensibus, Neapoli diem obiens supremum, magnam sanctitatis suæ famam reliquit, apparuit. hac enim postulante, fere nihil erat, quod à Deo homines non impetrarent. de qua, ceteris omissis, illud commemorabo, quod paucis ante ejus mortem mensibus accidisse, narravit P. Io. Matthæo Ancinæ nūtrique vir religiosus, qui tunc erat Neapolī. Hæc, propter eximiam ejus sanctitatem amicitiamque cum Deo, fiebat ut à pluribus, in suis rebus adversis, patrona atque advocata apud Deum expeteretur. sed ex ceteris, qui in ejus opem præsidiumque confugerunt, mulier

mulier fuit vidua, cujus filium iudices, ob nescio quam fraudem capitalem, capitis condemnauerant. ab hac illa multis cum lacrimis exorata est, ut filii salutem à Deo precibus obtineret; quam illa fidenter, bono esse animo, iussit; nam suum propediem filium domum ad ipsam reversurum; Deum enim saluum ac servatum eum velle. sed cum jam dies accessisset, quo die, ex iudicis decreto, sumendum erat de illo supplicium, & carnifici traditus, ad mortem raperetur, curriculo mater ad mulierem abiit, atque ejulans, seque diverberans, Ita ne, inquit, filius domum se recipiet, qui in laqueum collum inferuit, ac mox vitam suspensio finiet? at mulier, nihil sane commota, Ajo, inquit, mortem illum non obiturum, sed tibi mox domi saluum affuturum; tu interim, genibus nixa, precibus ac lacrimis, Dei matrem ora, ut sit propitia. jam ille stipatus lictorum turba, ac medius inter duos reos, ad supplicium ducebatur, cum conspectus est, ab uxore Proregis, quæ una cum viro, è fenestra, funestam illam pompam, illac prætereuntem, intuebatur, atque hominis misericordia supra modum capta, coepit à Prorege summa vi petere, ut ejus rei sibi gratiam faceret. ille, qui uxorem diligeret, ac fortasse non minori intus animi sensu commotus erat, quo ab uxore gratiam iniret, imperavit, ut reus ille clam ab aliis subduceretur, ne qua populi admiratio vel motus oriretur, ac, demptis vinculis, sineretur abire quo vellet. qui statim ad parentem reversus, argumento fuit omnibus. quantum sanctissimæ illius mulieris preces, quibus mater se commendaverat, apud Deum ponderis habuissent.

LXVIII. *De duobus improbis liberis, qui matrem verberaverant.*

Quanto quamque inexpiabili scelere se alligent ii, qui tam projecti sint ad audaciam, ut parentes verberare sustineant, satis edita in eos exempla declarant, de quibus antea commemoravimus; quibus alii duo adjiciuntur, qui in eandem fraudem delapsi, pœnas dederunt.

Quidam, per iracundiam, colaphum matri magnum impegerat; quæ mater, tantum filii in se facinus execrata, Tam impia, inquit, dextera digna est, quam ego recisam aspiciam. neque hoc matris dictum tam imprecationis, quam vaticinii, vim habuit. nam ille, morbo animi, in insaniam delapsus, diu quodam, sicut facere suadebat furor, in proximam lanienam accurrit, ferroque, quod de Iani manibus abstraxit, sibi dexteram abscidit; quo facto, eas ipse à se se impietatis suæ poenas exegit, quibus eum mater dignum esse prædixerat. Alter itidem Romæ, qui fuerat in matrem contumax, ac pugnis eam contuderat, subito oppressus morbo, ejus vim ferre non potuit. nam, qui tanto se scelere contaminarunt, haud vitales sunt, sed plerumque in ipso ætatis flore rapiuntur. Deus enim, cum vitæ præcepta hominibus traderet, postquam legem de colendis parentibus dedit, iis, qui præcepto obtemperassent, diuturnam & affluentem bonis omnibus vitam promissit: at ille de quo loquimur, ferme jam moriens, sacerdoti peccatum suum aperuit, ac Deum ex animo, ut propitiussset, oravit; quem hac lege sacerdos absolvit, ut demissis ac supplicibus verbis, parentis pacem exposceret. sed extinctus est antea, quam posset ad eam mater accedere; & sepultus est in cœmeterio Basilicæ Apostolorum principis proximo, quod campum sanctum appellant. sed postridie visum est id brachium extare ac prominere, quo matrem verberaverat. quam rem ejus custodes ecclesiæ vespillonum incuriæ tribuentes, demittendum humoque contegendum curarunt; sed cum altero ac tertio die brachium illud foras projectum extare conspiceretur, venit matri in mentem, id adeo contingere, quod, temporis angustius exclusus, admissi in se sceleris veniam impetrare non potuisset. venit, & clare, Hanc tibi, inquit, noxiam, & aliam, quamcumque admiseris, mitto; quiesce. quibus dictis, continuo brachium illud, ad reliquum corpus adductum, se continuit, neque amplius foras emerfit.

*LXIX. Dens S. Francisci de Paula, crystallo
inclusus, osculo meretricis tactus, abrumpi-
tur.*

Nihil est tam foetidum, neque tam turpe, quam vitium libidinis; adeo ut hoc vitio contaminatos Dei Sanctorumque oculi refugiant, nec videre sustineant. tritum est illud de Eremita, & Angelo itineris comite, qui cum offendissent in via projectum foetidum quoddam canis extinctæ cadaver, cujus odorem Eremita ferre non posset, nullum Angelus nauseantis signum offendit; at cum postea incidissent in adolescentem ornatum, elegantem, unguentatum, cujus odore Eremita ille recreari videbatur, Angelus se in contrariam partem convertit, & sudario nares obduxit; non aliam ob causam, nisi quod esset impurus ac libidini deditus. quamobrem scite admodum eleganterque scriptum est à D. Ambrosio, de capite Io. Baptistæ, mulieris impuræ rogatu, à cervice præciso, & in illud funestum Herodis Regis convivium allato, quod clausa haberet lumina, non tam mortis necessitate, quam horrore luxuriæ; tanquam si minorem ille dolorem ex ipsa morte caperet, quam ex duorum impudicissimorum capitum accubitu atque conspectu. Hæc cum ita sint, Neapoli, in urbe totius Campaniæ multo maxima locupletissimaque, in Æde religiosissima S. Francisci de Paula, dens ejusdem, crystallo inclusus, asservatur, ac summa populi totius religione colitur. hic dens, die ejusdem sancti viri festo, omnibus spectandus exosculandusque proponitur; ad quem osculandum mulier meretrix cum accessisset; vix crystallo illi labra admovit, cum dens tennem quendam sonitum edidit, ac statim inventus est disruptus, ac duas in partes ex æquo divisus. quod fuit indicio, quantum vir ille sanctissimus, & castitatis cultor eximius, impudici illius oris osculationem, vel potius accessum, formidaret atque refugeret.

LXX. *Librorum inutilium tractationem interdum morborum causam existere.*

STanislavus Hofius, S. R. E. Cardinalis, & Episcopus Varmienſis, fuit, ut omnes norunt, dum vixit, exemplum innocentiae, virtutumque omnium; de cuius viri ſanctitate, multa, memoria & admiratione digna traduntur; ſed illud in primis, quod ſingulis feriis ſextis, quo fieret aliqua ex particula ſocius earum paſſionum, quas Chriſtus pro omnium ſalute ſuſtinuit, iubebat ſe nudum ad lectuli ſui columnam alligari; atque à præfecto cubiculi, cujus ille fidei multum tribuebat, tantisper flagellis cædi, quoad ſanguinis rivi deſluereat, erat præterea Chriſti pauperum ſtudioſiſſimus, adeo, ut fere quotidie ingenti illorum multitudine, ejus ædes complerentur; quibus, de œconomo ſuo, cui partiendæ inter eos pecuniæ partes attribuerat, tanquam per jocum ajebat, Niſi erogaverit vobis eleemoſynam, nolite eum recipere in æterna tabernacula. hic vir igitur, ſanctitatis laude clariffimus, acceperat, virum nobilem ex amicorum numero, graviter ægotantem, libris delectari, turpi argumento conſcriptis, atque in eorum tractatione tempus, rem omnium pretioſiſſimam, fallere, quamobrem, ſtatuit eum inviſere, non tam ut officium illud amico præſtaret, quam ut illius animæ, periculofus laboranti, ſuccurreret. Venit igitur ad eum, rogat, ut valeat; reſponder ille, moleſtiſſima ſe febris jaçtari, neque poſſe partem ullam quietis accipere. quærit, num, ſaltem fallendi temporis gratia, elegantis cujuſpiam libelli ſe lectione oblectet; & eadem opera inſpicit in cervicali libellum; ſumit, aperit, legit, atque eundem flagitioſe ac nequiter ſcriptum invenit; tum in eum inſtuens, Quid mirum eſt? ait, ſi tibi valetudo decreſcit, & morbus fit amplior, qui hoc ſcriptorum genere delecteris? ſi aliud nihil in vita commeruiſſes, ſolum hoc flagitium gravius, quam nunc eſt, eſſet animadvertendum; remove te ab his ſtudiis, & cum iis libris te libenter oblecta, unde melior ac doctior evadas. ad hæc, alia etiam non pauca addidit, quibus impuros ei libros in

in odium & contemtionem adduceret; illud magis laborans, ut hominem amicum, animi, quam corporis morbo, levaret; neque operam perdidit. nam amicus, ea objurgatione acriter verberatus, perniciosum illum libellum Vulcano mandavit, atque, eodem puncto temporis, tanquam si materiam morbi ejecisset, à se febrim una discussit.

LXXI. *Deum non irrideri.*

Quid sit periculi, velle Deum fallere, & quantam fere semper vim malorum in se attrahant ii, qui id conantur efficere, exemplo sunt infelices eorum exitus, qui vota, quæ pro sua salute fecerant, non persolverunt, vel religiosorum hominum claustra, ad quæ confugerant, deseruerunt, vel pollicitationes. Deo factas, præstare contempserunt.

Multis ab hinc annis, virgo erat nubilis, quæ proposuerat, in aliqua sacrarum Deo Virginum domo, virginem castam exhibere se Christo; ac fortasse ad id etiam voti se religione obstrinxerat, ac plurimos ejus rei conscios habebat; at repente, mutata voluntate, animum ad connubium adjecerat; atque omnibus horis D. Catharinam virginem & martyrem summa vi orabat, ut aliquam sibi conditionem, se dignam, objiceret. hanc enim sanctissimam virginem sibi puellæ patronam ad nuptias conciliandas adoptant. quam Virginem cum ejusdem diei natalis pervigilio enixius deprecaretur, simul lacrum illius fictile, ad cujus pedes in preces fusa jacebat, nullo impellente, est in terram delapsum, & quâ parte cum capite collum adnectitur, fractum. neque eam rem ostentui habuit, verum ardentiori etiam conjugii cupiditate flagavit. sed tandem, quod voluit, impetravit; & sponsum nacta ex animi sui sententia, cum, nova nupta, in viri domum rheda adveheretur, jamque ad eam pervenisset, cum vellet descendere, pedelapsa est, eoque casu in ipso ædium sponsi limine collum perfregit, statimque è vita migravit.

LXXII. *Deum solum esse, qui possit à nobis animi corporisque morbos expellere; neque quemquam ex hominibus esse, tanta potentia præditum, in quem ea res cadat.*

P. Franciscus Maria Taurusius Congr. Oratorii, qui postea à Clemente VIII, ob singulares ejus animi dotes, relatus est in numerum Cardinalium, de quodam Rege narrabat, qui aulicum quendam suum voluit acerbissimis corporis doloribus distractum invisere; quem cum hortaretur ut aliquid peteret; nihil enim non ab ipso, qui Rex esse, non impetraturum; tum illum petiisse, ut eos sibi dolores adimeret, vel saltem leviores efficeret; sed cum respondisset Rex, neutrum illorum in manu sua esse, illum sublati in cœlum oculis ac manibus exclamasse, Me miserum, qui tot illi annos fideliter servio, qui, ne minimam quidem partem potis est mihi, de dolorum acerbitate, quibus crucior, eripere; at posthac, si me ad sanitatem perducere contingat, certum est ejus amicitiam & imperium persequi, qui possit mihi, de salute dimicanti, succurrere. sed votis non respondit eventus. etenim est magnitudine morbi consumptus. quod exemplo esse omnibus debet, ut, dum tempus & occasio suppetit, illi nos domino in servitutem dicemus, qui possit salutis vitæque compotes facere.

LXXIII. *Puer impudicus, Deo ita permittente, jugulatur ab eo, cui erat corporis obsequio devinctus.*

IO. Baptista Gratiolius Rinaldinius, patritius Anconitanus, qui pluribus annis versatus est in aula magnorum Etruriæ Ducum, narravit mihi, paucos ante annos Pisis, unum è numero tabellionum, amasse turpius, quam par erat, singulari puerum forma, atque cætenus zelotypia insaniisse, ut eum cogeret, non modo cujusvis alterius

alterius amicitiam, verum etiam aditum sermonemque defugere; interim illud incidisse negocium, ut tabellio Pisis extraheretur, ac biduum, ea ab urbe, abesse cogeretur, sed, dum ille abest, puerum qui ob eximiam pulchritudinem ab aliis item expetebatur, fuisse à quibusdam invitatum, vel potius precibus atque adeo vi adductum, ut cœnaret foris; sed cum tabellio, re confecta, domum revertisset, cœpisse puerum interrogare, interea dum ille abfuisset, quid rerum egisset, ubi fuisset, quibusque se dedisset; at puerum, veritum, ne ille aliunde rescisceret, non habuisse eum celatum de cœna; quamobrem magnas inter eos lites esse ortas; sed dum litigant, dum se puer excusat, contra tabellio verbis male puerum accipit, urget, impulsisse eum ait ad fores quarundam ædium, ac percitum ira ac zelotypia, ea vi pugionem demisisse illi in jugulum, ut foribus illis, tanquam clavo quodam affixum hærentemque reliquerit. quod exemplum videtur voluisse Deus in eum puerum edere, quo discant adolescentes honestius pudicitiam habere, ac possidere vas suum in honore & sanctificatione, non autem in impudicitia & contumelia.

LXXIV. *Lepidum Philippi III, Hispaniarum Principis, ad Philippum patrem, de illius potentia, responsum.*

Quam angustum in gyrum, Regum vel maximorum potestas compellatur, lepidum ac sapiens regii cujusdam pueruli dictum ostendit. Philippus II, Hispaniarum Rex, non suæ modo ætatis Regum, sed longe etiam superioris multo maximus atque clarissimus, cum venandi studio adductus in agrum exisset, atque una secum filium admodum puerum adduxisset, dum eos maxime venationis voluptas detinet, subitus imber oppressit; tum puer orasse dicitur patrem, ut imperaret, nubibus ac cælo, ne plueret; Regem vero respondisse, nihil hoc suum ad imperium attinere, sed longe superioris potestatis esse, imbrem cohibere, vel remove. quibus

quibus intellectis, ille, qui nimirum de patris potentia tam multa tamque admirabilia prædicari perceperat, Quid audio, inquit, ô pater, tam parvam rem præstare non potes? quid si aliud aliquid majus postulasset? jam plane, te nihil posse, comperio. ita est, ait pater, Deum igitur metue, qui plus omnibus potest.

LXXV. *Gravissima duorum liberorum supplicia, quorum unus patrem damno & contumelia, alter verberibus matrem, affecerat.*

MAximus improborum filiorum numerus efficit, ut sæpius incurramus in eos, qui parentibus de se optime meritis pessimam gratiam retulerunt.

Refert. P. Iacobus Fuligattus Soc. Iesu, quo anno, in oppido Sabinorum, Turri nomine, sacras Quadragésimales conciones ad populum habebat, oppidanum quendam, quem parens suus, damno & contumelia ab ipso affectus, diris execratus fuerat, sibi narrasse; se, cum inambularet in foro, à tetro & inhumano quodam spectro comprehensum fuisse, & male multatum ad terram abjectum, & inde pro mortuo fuisse sublatum; verum cum aliquandiu sine sensu ac sine mente jacuisset, tandem ad se reversum, intellexisse, eam sibi calamitatem execrationes patris, cui debitum honorem cultumque non exhibuerat, attulisse, ac vereri, nisi expiaretur, ne sæpius teterrimi illius monstri vim experiri cogeretur, ac diris tandem exemplis pessime ab eodem excruciatu necaretur.

Alter, cujus in matrem crudelitas, non tantum intra verba constiterat, sed etiam progressa erat ad verbera, eamque pulsaverat, novo quodam infantiæ genere correptus est. hic putabat, ex homine se esse conversum in bestiam; quamobrem fugitabat hominum societatem; cubiculis, lectis, uti nolebat; cibos, ad hominum vitam institutos, æque horrebat; solum equorum stabula vel bovia adamabat; ibi perpetuo se continebat. ne multa, quoad vixit, stabulis inclusus, una cum aliis quadrupedibus fœno victitavit & hordeo. Atqui
divina

divina in impium ac scelerosum illum hominem animadversio fuit: illa quidem gravis atque atrox; sed si sceleris magnitudo æstinetur, infra ejus meritum invenietur esse. nam qui immanitate feras etiam bestias superasset, meruerat, ut canibus, vel potius leonibus obiceretur, à quibus dilaceratus atque discerptus, esset omnibus exemplo, qui impias in parentes manus injiciunt, neque eum illis exhibent honorem cultumque, quem debent.

LXXVI. Homines libidinosi subita interdum morte rapiuntur.

INcontinentiæ ac libidinis vitium est ejusmodi, ut, nisi ab ineunte ætate reprimatur, ac procul à nobis esse jubeatur, se se in animum influat, eundemque, quibusdam quasi vinculis alligatum, usque ad extremum vitæ spiritum habeat in potestate. ad hæc animadversum est, eos, qui se libidinibus constringendos tradidissent, subita sæpe morte oppressos, nullum vel saltem exiguum ad se comparandos spacium obtinuisse.

Pictor quidam, omnium omnis fere ætatis multo præstantissimus, Leoni x Pont. Max. ob eximiam ejus artis scientiam summe carus, feria iv majoris hebdomadis, in villam Vaticano proximam secesserat, ut esset ibi cum muliere, apud quam ejus erat animus clavo cupidinis fixus; ubi cum totum illum diem, quo sacra redemptionis nostræ mysteria, summa omnium cum religione, celebrantur, flagitiose ac nequiter contrivisset, vespere, ex intemperantia, in febriculam incidit, ac delatus domum, atque accersitis medicis, interrogatus est ab eis, quibus fortasse notus erat ejus animi morbus, num quid intemperanter fecisset. negavit ille, pudore fortasse deterritus. tum medici sanguinem mittendum decreverunt; quo misso, tum ille veram morbi causam aperuit, neque fuit quisquam, qui de ejus salute desperandum non judicaret; nec perperam; nam postridie, summo Pontificis aliorumque, qui ejus artificio delectabantur, cum mœrore, tanquam per ludum jocumque decessit.

Alter item, cui magnum erat in pietoribus nomen, octuaginta fere annos, hoc immerfus cœno, confecerat; verum, die quodam, cum nihil minus cogitaret, repente exanimatus concidit.

Sacerdos quidam à confessionibus mulieri, quæ longum cum nescio quo viro commercium habuerat, neque ab eo distrahi poterat, sæpius conatus erat persuadere, ut flagitiosam illam societatem dirimeret, ac salutis animæ suæ consulere. at mulier, crebris boni illius sacerdotis cohortationibus, atque etiam objurgationibus victa, pollicita est, se morem illi gesturum; sed aliquod ad eam rem spacium exposulavit, quod cuperet, veterem cum eo, cui consueverat, usum amicitiamque potius dissuere, quam dirimere; stulte prorsus atque inepte. etenim ejusmodi vinculorum genus, non dissuendum, sed distrahendum est ac præcidendum; aliter enim nulla se ab eis expediendi ratio relinquitur. quod ita esse, in ea ipsa muliere res docuit; nam cum prolatando, ac diem ex die ducendo, rem sibi difficiliorem indies redderet, neque inveniret, quomodo, quæ fecerat promissa, impleret, ea, ex improvviso, cunctantem vis morbi oppressit, ut omnibus fere sensibus amissis, nec satis compotem mentis, vix sacerdos adduxerit, ut, manus vel oris significatione aliqua, indicaret, se velle peccata confiteri.

LXXVII. *Bona Ecclesiæ in pauperum usus dividenda sunt, non autem ad proprias utilitates cogenda.*

Cum avaritia, quæ pecuniæ studium habet, in quovis hominum genere digna sit reprehensione & odio, tum maxime execrabilis est in sacerdotibus, quorum sunt partes pecuniis ecclesiæ, pauperum inopiam alere, Dei ac Sanctorum suorum templa reficere, atque alia ejusmodi pietatis opera exequi. quo fit, ut, justo Dei judicio, non parum sæpe contingat, eos, qui sunt ad rem nimis attenti, ex lethali aliquo morbo animam agentes, ab omnibus desertos expilatosque, in summa egestate atque inopia diem obire supremum.

Anno

Anno salutis MDXCVII, Antistes quidam Neapoli, cum graviter ægrotaret, excessit è vita; qui, quanquam cæteroqui vir probus, attamen ex annuis ecclesiæ suæ pecuniis multa aureorum millia congefserat, eaque trapezitæ cujusdam fidei crediderat, qui in ea urbe argentariam non ignobilem faciebat; præterea suppellectilem sibi propemodum regiam comparaverat. hic, cum ejus fortasse consilia ad honestum finem spectarent, à sede Apostolica impetraverat, ut sibi testamenti condendi jus esset; nam ejusmodi homines, qui se ex bonis ecclesiæ locupletarunt, sacris summorum Pontificum constitutionibus, intestabiles esse jubentur. sed dum cunctatur testamentum facere (communi omnium fere hominum vitio, qui tum mortem existimant suis ab ædibus procul abesse, cum ea plerunque in foribus adsit,) dum, inquam, cunctatur, incidit in languorem, cujus vi, pene subito abreptus est, & translatns ad plures. eo mortuo, continuo sedis Apostolicæ nomine, in illa multa aureorum millia factus est impetus, & ornatissima illa suppellex distracta atque divendita; quo factum est, ut ille miser pene relictus sit nudus, hoc est, solo Capuccini habitu tectus, ac tenui cum cereo, quod unicui ipsi lucebat ad caput; neque ex tam multis facultatibus, tantum relictum, quantum satis esset ad piaculare sacrum pro æterna illius salute faciendum; & nisi magister quidam Cherubinus Augustinianus, veri amici functus officio; multa pro eo sacrificia Deo gratis offerenda curasset, in summa omnium oblivione jacuisset.

LXXVIII. *Vix fieri posse, ut, qui fæde flagitioseque vitam instituit ac prosequitur, non etiam eadem celeriter atque infelicitè devolvatur.*

Vix potest contingere, ut, qui totum vitæ suæ tempus, libidinibus suis explendis, consumpserint, nec ullum sceleris, flagitii, vel turpitudinis genus à se alienum duxerint, non etiam celeriter similem reliquæ vitæ exitum consequantur. neque est, quod quisquam,

cui

cui constitutum sit, in omnia se se flagitia ingurgitare, latronis illius exemplo, qui, cum ipse in cælo, una cum reliquis beatorum mentibus, agat ævum, tam multos ad æterna inferorum supplicia sedesque detrudit, suam confirmare audaciam, corroborare impudentiam studeat, pro certo existimans, mortis tempore fore sibi, sicut & illi, cælum apertum ac patens. nam si velit replicare memoriam temporum, vix unum aut alterum inveniet, cui id recte processerit, hoc est, qui, cum turpissime flagitiosissimeque vitam exegerit, sanctorum morte decesserit. neque, si secum agere ratione valuerit, fieri posse fatebitur, ut eo quisquam perveniat, unde diversum iter habuerit, ut videlicet ad æternæ salutis portum provehatur, qui omnibus, ut ajunt, velis remisque, recta ad damnationis scopulos navim impulerit. Narrabo breviter hominis unius, iude usque ab ineunte ætate ad ultimum vitæ diem in omnium vitiorum luto demersi, infelicem ac dignum ejus moribus exitum vitæ. hic Auximi natus, patre, ut fama est, viatore, à prima ætate, equestribus sellis conficiendis, sibi victum quæritavit; sed postea, operæ laborisque pertæsus, militatum abiit, ac pluribus imperatoribus navavit operam miles. omnibus se flagitiis ac sceleribus ita inquinnerat, ut illi anteferreretur nemo; aleator dolosus ac fraudulentus; quâ arte plures bonis everterat, quibus ipse locupletatus, vestitui ac genio largius indulgebat; præterea adulter, ganeo, sicarius, fur manifestus; ac multorum hominum cædes, atque insignia quædam furta, Camerini perpetrata, non alteri nisi ipsi tribuebantur; nihil pensi habebat, diras in Deum execrationes singulis fere verbis jaculari; quibus, etiam in amicorum conventibus, non abstinebat. lingua enim, longo in eas usû incitata delabebatur. quid opus est verbis? erat vitiorum omnium facile princeps; in vetitos autem puerorum amores ita propensus, ut, inter cetera ejus flagitia, forma egregia puerum, à domo atque à parentibus abductum, in varias orbis terræ regiones abduxerit, secumque habuerit; qui postea robustior factus, ab ejus se societate amicitiaque distraxit, & quoniam erat omnium illius scelerum conscius, venit homini in
suspi-

suspicionem, ne omnia illa detegeret, sibi que negotium periculumque faceretur; quamobrem, ut hac se suspitione liberaret, summam dedit operam, ut insidiis adolescentem opprimeret; qui, ut erat paratissimus ad cavendum, eas effugit. duas habuit uxores, sed ab nulla earum liberos suscepit; quod divino prope consilio factum esse arbitror, ne tam scelerari hominis progenies in posteritatem propagaretur, ac pro uno improbi plures Reip. substituerentur. verum cum, homo teterrimus, veteribus flagitiis aliquem semper cumulum adderet, cumque completa ejus esset maistia, hoc est, omnes suos numeros obtineret, vocata est à Deo in iudicium & condemnationem. qui quidem Deus, pœnas ab eo expetiturus, tamquam nocturnus fur, ut Petrus inquit Apostolus, venit; videlicet cum altiore quam unquam solitus erat somno, peccatorum suorum tenebris involutus obdormiret, ac de vita hilariter sumenda, ut cum maxime, cogitaret. Etenim cum ita res suas constitutas haberet, agro, pecunia, domo, familia, ut non alias ipsi magis expediret vivere, sponte occasione, qua sublatus est, obviam ivit, ac malam rem sibi suo, ut dicitur, jumento, accersivit. complures antea honestos homines læserat, injuriis lacefferat, contumeliis oneraverat, vulneribus ac plagis affecerat, ad mortem dederat, neque inde, mali quidquam sibi vel damni creatum fuerat; sed ecce subito, homo omnium infimus ac sordidissimus, paucorum custos vervecum, suas & aliorum est ultus injurias, hoc modo: æstate quadam, ruri cum esset, nullam fere ob causam cœpit esse villico molestus, injurias & contumelias imponere, eductoque gladio mortem minitari; cumque rusticanus ille perquam humilibus ac demissis precibus, genibus etiam nixus, ut sibi parceret, exoraret, neque, tam levi de causa, gravius quidquam statuere in ipsum vellet, homo sævus & iracundus nihil movebatur, nihil de arrogantia insolentiaque sua remittebat, sed, tanquam ille, ea animi demissione atque modestia, majores ipsius iracundiæ faeces subderet, confidentior contumaciorque fiebat, & cum impetu facto, iret, ut gladio eum transverberaret, ille, qui non alia ratione se vitamque suam periculo

posset eripere, educto cultello, quem apud se è zona pendentem habebat, rejecit se in eum audacter, ac duo lethalia eidem vulnera infixit; nec fuit homini magnopere elaborandum ut totum viscera cultrum exciperent, cum corpori pene nudo infingeretur; etenim ille, ob anni tempus fervidissimum, femoralibus ac thorace, tenuissimo ex lino confecto, indutus incedebat, quæ vestium genera, ob tenuitatem, statim vulnere locum aperiant. quibus vulneribus acceptis, cum ad terram coneidisset, continuo elatus est à familiaribus in domum, & in lectulo collocatus. qui cum, quanta vi possent, instarent, urgerent, ut ante quam è vita decederet, sacramento pœnitentiæ, maculas peccatorum elueret, & Christi corporis viatico instructus, universæ carnis viam ingrederetur, magis id adeo ut illis gratificaretur, quam quod ita ejus voluntas ferret, sua sacerdoti peccata aperuit, & sacrosancta eucharistiæ mysteria sumpsit; quod precibus illorum magis, quam sua voluntate, quoquo modo, vel dicis potius causa, fecisse, id, quod statim est consecutum, ostendit. nam cum in eo esset, ut animam exhalaret, atque ardentissima incensus siti, frigidæ haustum exposceret, allatus est ei cyathus aquæ, quam & parvam esse, neque ita frigidam ut vellet, diris execrationibus est questus; quibus illi, qui attulerant, exterriti, curriculo abierunt, & situlam frigidissimæ plenam retulerunt; qua ille avidissime hansta, aquæ ejus rigor, cum se in venas diffudisset, omnem caloris naturalis vim, quæ reliqua in corpore fuerat, extinxit: ac dum suo jussu ex uno cubiculo in alterum transferretur, in medio, inter utrumque cubiculum, conclavi, inter deferentium manus, excessit.

LXXIX. *Duos sacerdotes, unum lingua, alterum oculis captum, ob eximium illorum erga sacram Eucharistiam studium Deus idoneos ad sacrificandum reddit.*

Quam gratus, quamque acceptus sit Deo, sacerdotum illorum ardor, ac pietas, qui, quantum homi-

ni mortali fas est, quotidie, summa animi præparatione adhibita, sacrosanctam corporis filii sui hostiam ipsi immolaverint, utque multis sæpe significationibus ac prodigiis, summo opere hac eorum in se voluntate studioque delectari, significet, in duobus sacerdotibus, piis ac religiosis viris, nuper apparuit; quorum unus aliquot ante annos est mortuus, alter etiam nunc vivit, admirabile Dei, grati in eos animi monumentum, qui hoc sacrificii genere eam voluptatem, quæ nulla est illi major, student objicere. atque ut ab hoc primum, qui nunc vivit, exordiar, Io. Baptista Confalonerio nomine, Sedis Apostolicæ Tabularii Præfecto; cum aliquot ab hinc annis, summa hyeme ac tempestate perfrigida, ad nocturnos ignes, qui pluribus urbis locis, ob Ferdinandum Austriacum, Regem Romanorum electum, fiebant, visendos se contulisset, ut rerum sane admirabilium adspectu oculos pasceret, est enim homo mire curiosus, ab apoplexia, quæ magna vi in caput invaserat, oppressus est adeo, ut verbum fere nullum, ac ne nomen quidem suum proloqui posset; quod quamvis mœrorem doloremque illi summi inuret, cum omnem sibi facultatem esse ademptam intelligeret, quæ, & in dulcibus amicorum colloquiis, & in rebus sibi necessariis, id quod animo conceptum haberet, verbis exprimeret; at tamen nulla res adeo animi miserum eum habebat, ut illud, quod non posset id Deo sacrificium, quo maxime delectatur, quotidie, quemadmodum solitus erat, offerre: verum se continere non poterat, quin ejus rei cupiditati acriter vehementerque inflammaudum se traderet; ac sibi videbatur, si sacris induto vestibus, ad altare fas fuisset accedere, fore, ut etiam facultas fandi & rem sacram faciendi suppeteret; atque ab ejus ardore cupiditatis adeo interdum se abripi sinebat, ut Aedium illarum, ubi sacrificare consueverat, sacraria ingrederetur, atque nutu ac significatione ædituos rogaret, ut sibi vestes, ad celebrandum necessarias, exhiberent; quod ab illis cum risu excipiebatur; erat enim ridiculum, optare, ne dum sperare, posse illum, qui memoriam omnem & loquendi facultatem penitus amisisset, clara voce atque distincta, tam multa, quæ in sacrificio Missæ

vel sunt legenda , vel necessario memoriter recitanda , proferre. sed cum in dies magis hic illius ardor excresceret , & ædituis molestior semper accederet , atque irasceretur , quod sibi dicto audientes non essent , tundendo atque odio denique effecit , ut illi , animum ipsi exple- re , statuerent ; atque , sacerdotalibus ornamentis tradi- tis , fecerunt sacrificandi potestatem ; sed privato in sac- cello , atque omnibus remotis , ne , si res minus processisset , summa religiosissimi illius templi & augustissimi illius sacrificii cum offensione , magnos de se populo lu- dos jocosque præberet. Sed res accidit mira , ac digna , quæ omnium seculorum posteritatis memoriæ tradatur. ille , qui vocis usum amisisse videbatur , cuique ita cuncta ex memoria exciderant , ut ne nominis quidem sui meminisset , adeo celeriter , ac sine ulla hæsitazione , confessionem , quæque ad illam pertinent , Kyrie elei- son , partem psalmi , quæ à sacerdote , dum lavat ma- nus , pronunciatur , præterea verba , quibus ad populum conversus , illum affatur , oratque ut ipsius ad Deum preces cum suis adjungat , quo facilius litare eo sacrifi- cio possit , adeo , inquam recte , & clare , ac dilucide protulit , ut non desiderares melius. deinde quæ eo die prætermittenda erant , prætermisit , quæ legenda , legit ; tum , quæ clara , quæ summissa voce , quæ primo , quæ- que postremo loco dicenda , dixit ; tum , nulla in re , sa- crificii ordinem perturbavit , sed eundem mire servavit. quamobrem illi , Deo immortalī gratias agentes , passi sunt eum in publico celebrare ; cui celebranti ipse quo- que , attonitus rei novitate atque miraculo , sæpius in- terfuit. at , re divina peracta , si quæras ab eo , ut unum tantum verbum tibi dicat eorum , vel quæ legit , vel quæ memoriter recitavit , operam inanem sumas ; nam ni- hil eorum meminit , ac plane muto similis hæret. at , hoc anno MDCXLIII , cum in Æde S. Spiritus in Saxia , quo jam ætate confectus , est enim annos natus supra octuaginta , ob vicinitatem sæpe se confert , cum , in- quam , Dominica Palmarum , sacrum ibi faceret , ac , peracta confessione , ascendisset ad altare , cœpit conspi- cilia , quæ naso applicaret , quærere , in altari , in ferno- raliū sacculis , quo non ? tum , in sacrarium , ubi ea

se reliquisse ajebat , mittere , qui sibi referret ; sed , cum nusquam invenirentur , nam , nullius memoriæ homo , domi reliquerat , neque recordatus fuerat ea secum asserre , affligari , conqueri fortunas suas , quod eo die , quo Christi passionis historia recitatur , ejus sibi muneris functione carendum esset. quod cum animadverteret senex quidam , qui aderat ibi , sua ad eum conspicienda misit , quibus , si essent apta , uteretur. quæ cum naso commendasset , maximo esse usui intellexit ; atque plenus hilaritatis , inchoatum sacrificium ad extremum usque perduxit.

Hæc cum , ipso Io. Baptista præsentem & audientem , P. Nicolao Rodulpho , totius Dominicanæ familiæ Generali Magistro narrarentur , Quo minus , inquit ille , admiremini , fuit è nostro numero quidam F. Thomas Lerma nomine , verbi Dei prædicator eximius , sed apprime doctus , religiosus ac pius , qui , in sacra Eucharistia conficienda , incredibili se voluptate perfundi sentiebat ; hic , sive senio , sive nescio quo alio morbo confectus , ita oculis erat æger , ut iis nihil plane uteretur ; itaque neque librum aliquem legere , neque horarias preces recitare poterat ; sed non minori quam hic Io. Baptista , immaculatam illam hostiam Deo sacrificandi cupiditate flagrabat ; sed rem , de qua desperabat , tentare non audebat ; tantum in preces fusus , ardens hoc desiderium Deo , qui posset illud explere , aperiebat. sed , divina ope auxilioque confusus , voluit die quodam experiri ; atque experienti adfuit Deus. rem miram , mihi que ipsi , nisi eam oculis sæpius accepissem , incredibilem ; illi , qui aspectum omnino amiserat , cœperunt Missalis literæ sub aspectum venire , seque eidem legendas objicere ; quare sibi ipse non defuit , sed hoc tanto tamque insigni Dei in se beneficio properavit uti , & quotidie , quoad vixit , ac per valetudinem licuit , nullum unquam diem intermisit , quin Missæ sacrificium perageret. atque hæc hominis pietati est à Deo merces persoluta. verum fiebat , ut cum à sacrificio Missæ discederet , in eandem rursus cæcitatem rediret , neque ullam aliis ex libris literam oculis posset accipere. hæc ille , multis audientibus , dixit.

LXXX. *Qui periculi vel damni evitandi causa ad Deum confugit, si postea ab eo desciscat, interdum in ea mala incurrit, quæ se effugisse crediderat.*

SVnt aliqui ingenio adeo improbo, adeo servili, ut, nisi malo coacti, recte facere nesciant; qui postea, metu omni remoto, in veterem morem relabuntur, ac recidunt. sed fit plerunque, ut isti, qui metu soluti, ab officio discedunt, in illud ipsum malum incurrant, cujus periculo se esse defunctos arbitrabantur.

Adolescens quidam, multis ab hinc annis, hominem nobilem atque potentem, insigni contumelia affecerat, cujus iram veritus, quod intelligebat, quam vellet cunctaretur, se tandem in illius potestatem esse venturum, dedit operam, ut in eam Religiosorum hominum familiam reciperetur, qui sanctissimum in primis vitæ genus amplectuntur, ac colunt. quod ubi inimicus accepit, sponte ad eum adiit, ac metuentem trepidantemque confirmat, ac bonum habere animum jubet; nullum enim à se periculum ipsi adesse, & Quandoquidem, inquit, te Deo factum esse amicum intelligo, ego quoque, Dei causa, depositis omnibus simultatibus inimicitiisque, redeo tecum in gratiam; ac post hac mihi carissimi amicissimique hominis loco ac numero eris; tu vero continue te in hoc tam laudabilis vitæ proposito, ac Deum, mihi ut sit propitius, exora. at ille, ubi sensit; se in possessione securitatis ociique consistere, non ita multo post, causam invenit, seque ex albo religiosorum illorum hominum expungendum curavit; qui deinde cepit se per urbem hac illac ociosus inferre, nihil jam sibi à quoquam pertimescens. quem ubi ille conspexit, qui suas ipsi injurias condonaverat, exclamans, Siccine, inquit, pessime, existimasti, una opera te posse Deo mihiq; imponere? tota erras via; non enim hoc tibi procedet in numerum; eductoque gladio hominem obtruncavit, sibiq; mortuum ad pedes abjecit. Hæc ego à viro religioso accepi, ex eadem familia, quam ille turpiter deseruerat,

LXXXI.

LXXXI. *Christi servos non esse ludibrio habendos.*

EA est sacerdotum dignitas, eorum præsertim, qui veteres Christi discipulos imitari, relictis rebus omnibus secuti sunt eum, ut non dubitet illos Deus pupillam oculi sui appellare; tum iisdem injuria affectis, vel deridiculo habitis, in eorum injuria atque contemtu se esse derisum ac spretum, Christus affirmat; *Qui vos inquit, spernit, me spernit.* quamobrem sæpe injurias, vel contumelias, illis illatas, tanquam sibi factas, acerrime vindicat.

Narravit mihi Franciscus Tebaldus, Io. Baptistæ Tebaldi, cognomine Elicona, fratris filius, Soc. Iesu Coadjutor, cum esset, nisi memoria me fugit, Anconæ, & in collegio Soc. Iesu ostii custodiæ præesset, adolescentem ibi nobilem, ludibrio habere solitum eos Patres, a singulis fere noctibus insignem lauri, vel alterius cujuspiam arboris ramum, collegii ostio impondere; quemadmodum fit popinis, signi gratia; sed Patres, utpote perferentes injuriarum, sicuti Christi sectatores decet, nec esse quidem questos hanc injuriam. sed non ita multo post factum agebat, ut derisor ille, fortunis omnibus eversus, ad mendicitatem adigeretur, adeo ut, cum esse Anconæ non liceret, eo quod popularium fuorur ipsum puderet, coactus sit Romam decedere, & victum emendicare; verum cum ab omnibus rejiceretur, in patrum ejusdem Societatis misericordiam confugisse, eosque, honorem pro contumelia, gratiam pro injuria referentes, binos eidem panes in dies singulos attribuisse; qui per ipsummet Franciscum præbebantur, tum ostii domus professæ custodem.

LXXXII. *Dæmon, medici forma atque habitu, spe certa salutis oblata, graviter ægrotantem illudit.*

P. Franciscus Maria Taurusius, de quo supra commemoravimus, cum accepisset, amicum quendam suum, cujus etiam confessiones excipiebat, graviter esse ægrum, quemadmodum sua eum caritas facere admonerat, venit ad eum domum, ac periculosiori implicitum morbo offendit, quam esset ad ipsum allatum, adeo ut ne tenuis quidem spes salutis reliqua videretur. quamobrem cœpit eum Pater hortari, ut jam non amplius de hac mortali, sed de illa sempiterna vita cogitaret, ac rationem suæ salutis in tuto constitueret. quod cum illi novum & incredibile videretur, cachinnos exulit, atque, Insanis, inquit, Pater, nam quantum verba tua audio, ita loqueris, ut si mox mihi discedendum sit è vita; at Alexander Petronius (hic erat medicus, ea tempestate summus,) qui hinc modo discessit, nihîl me ex hoc morbo periclitari inquit, sed cras incolumen è lecto surrecturum. quæ res ita Taurusium admiratione complevit, ut statuerit Alexandrum adire, atque ipsemet visere, illene an æger insaniret. qui interrogatus, ingenue respondit, nullum à se, eo die, ejus nominis ægrum fuisse invisum, atque eum, prorsus, quid hominis esset, ignorare. quæ Alexandri oratio Tauruso suspicandi locum aperuit, humani generis hostem, Alexandri forma atque habitu, ad ægrotum illum accessisse, quo, ejus ab animo, timore mortis sublato, omnibus rebus imparatum, in ipso mortis articulo aggredieretur; ac nisi Pater subvenisset, æger ille, insciens, in ejus insidias devenisset. nam paulo post, ex vi morbi, via devolutus excessit.

LXXXIII. *Mortem, omnibus locis atque horis, hominibus impendere.*

Nulla est ætas homini ad moriendum non opportuna. satis est eum nasci, quo maturus sit mortitum

tum nullus est locus, vel frequens, vel solus, quo mortis non pateat accessus; nulla regio, vel deserta vel culta, quæ non sit eidem pervia; nullus aditus tam arduus, tam interclusus, tam septus, quem non illa perfringat, sibi que patentem efficiat; denique nullum est anni, nullum diei tempus, vel noctis, quod, volenti adire, non sit opportunum vel aptum. vult enim nos semper esse paratos, semperque ipsam esse præsentem existimare. neque semper expectat, ut in lecto cubantes offendat; sæpe enim in via, in urbe, in agro, in foro, in templo, in epulis, in vino, & quod horrendum est dictu, in venere opprimit. quamobrem cum incertum sit, qua hora, quo loco, illa nobis allatura sit manus, sapiens profecto consilium est, ejus memoriam nunquam ab animo deponere, eamque sic metuere, ut si præsens adesset. putâmusne mortem in memoria habuisse eos tum, cum domo egrederentur, vel in forum ad negocia, vel in agrum ad amœnitatem, vel quopiam ad voluptates, quibus postea vel inimicorum insidiis, vel ictu fulminis, vel apoplexia, vel subito alio casu interceptis, redeundi facultas non obtigit? at verisimile est, eos quovis alio potius, quam ad cogitationem mortis, animum appulsum habuisse: attamen fuere omnibus exemplo, quam stulte, quam insipienter faciant, qui quavis in re, quam vel moliuntur vel agunt, mortis memoriam suo ab animo remonent; ex contrario, quam sapienter, quam recte, sibi consulant, qui ne punctum quidem temporis ab hac tam salutari cogitatione sibi esse recedendum existimant.

Superioribus annis rem oculis nostris accepimus, in qua omnes exhorrescant, atque in assidua mortis cogitatione versentur. quidam Romæ præter Cancellariæ ædes amplissimas celsissimasque iter habens, eam, quam minime excogitabat mortem incurrit. etenim ingens saxum, ubi Riariorum familiæ stemmata erant inculpta, à reliquo pariete avulsum, ex summo earum ædium fastigio, horribili in ipsum ruina concidit, at totum obtrivit.

LXXXIV. *Non esse temere de quoquam judicandum, quamquam aliquod ejus factum nulla excusatione defendi posse videatur.*

PRæclare atque sapienter à Christo præcipitur, ne quidquam temere de altero statuamus; tum quia non sunt partes nostræ judicare, sed ejus qui scrutatur corda & renes Deus, tum etiam quia multa nobis se offerunt, quæ extrinsecus improbitatis & maleficii speciem præbeant, intrinsecus autem rationem habeant virtutis & laudis: verbi gratia, cum quisquam alteri quidpiam auferit, non eum continuo furti arguamus oportet. nam incidunt sæpe tempora, quibus contrectatio rei, ut videtur, alienæ, furti rationem amittat; cum videlicet, ceteteris auxiliis deficientibus, fames vel aliqua alia vitæ necessitas urgeat; tum enim non minus fiunt communes res omnes, aves, quæ cælo involitant, vel pisces, quæ mari vel fluminibus ianant: etenim omnia hæc occupantium fieri, nemo est qui dubitet, at factum quoddam asseram, quod Paulo v Pont. max. Romæ contigisse narratur.

Vir quidam honestus ac locuples, cum horam noctis circiter primam via sacra iter faceret, exutus est pallio, quo tegebatur; sed quia locus ille est ab arbitris sane remotus, quod à paucis habitetur, & quia vir ille gravitate prudentisque præstabat, non dedit se querelis & lamentationibus, non popularium fidem imploravit, ut fere fit in ejusmodi rapinis, sed dissimulavit, ac rem totam silentio suppressit; quod fortasse fuit etiam causæ, cur ereptor ille non se in pedes conjiceret, sed pene ociosus inambulet; putabat enim, ex eo quod nemo sibi molestus esset, se lepide fuisse furatum. itaque, animadvertente eo, qui pallium amiserat, venit ille ad pistoris tabernam, atque Iuliis tribus panes coëmit, & quoniam præsens pecunia, quam daret, non aderat, pignori pallium opposuit; tum in vicum se contulit, turri proximum, quam Comitum vocant, & aperto tabernulæ cujusdam ostiolo, panes illos ad pedes quatuor puero-

puerorum abjecit, qui una cum muliere ibidem ad tenuescio quod lumen sedebant, ac, Sumite, inquit, hos panes, famemque sedate, jam vestra causa si semel deprehensus fuero, poenas collo persolvam. his suismet oculis atque auribus acceptis, vir ille probus, postridie mane, recta ad pistorem iter habuit, ac Iuliis tribus persolutis, pallium sibi redemit; tum in eam viciniam se contulit, ubi pauper ille degebat, ac percontatus vicinos, quid illic hominis esset, quoque officio se tueretur, invenit, pauperem esse hominem, uxore & quatuor liberis præditum, qui propemodum fame conficeretur, eo quod misero nulla fere facultas in opus eundem daretur. itaque domum profectus, tantum tritici ac vini eidem misit, quantum satis esset ad suam totiusque familiae vitam, quatuor mensibus, sustentandam; præterea scuta duodecim numerari iussit, ac nunciari, ne de pallio sollicitus esset, nam Iuliis tribus, qui pistori debebantur, persolutis, illud à domino cui eripuerat, fuisse redemptum,

LXXXV. *De altero, qui propter inopiam, per simulationem osculationis, pauculos ab altari, ore hianti, nummos exceperat.*

MAter mea, optima ac religiosissima forma, mihi etiam tum puero narrare solita erat, opificem quendam, cum, gravi diutinoque implicitus morbo, fere sua omnia in medicos effudisset, ad summam egestatem fuisse redactum; qui cum die quodam, cibi inopia, incenatus cubitum isset, postridie mane amenti similis egressus est domo; atque hac illac inambulans, contigit, ut præter sacram quandam Ædem transiret, ubi sancti ejus Ædis patroni; summa civium frequentia, natalis dies celebrabatur; atque ibant omnes, ut erat mos illorum temporum, ut aram maximam exoscularentur, eamque denario, vel nummulo aliquo, augerent. itaque tota pene redundabat argento. tum ille, cui ingenium acuebat inopia, una cum aliis accessit ad aram, atque simulatione osculationis, tantum nummorum excepit,

cepit, quantum os capere potuit, seque confestim è templo ejecit; è quibus nummis, cum diligenter eos antea enumerasset, ligulas, acus, & alia ejusmodi mercimonia coëmit; quæ statim aliis, cum quæstu compendioque divendidit, & precium, quod redegerat, rursus in aliis mercibus collocavit; quo fiebat, ut semper auctior locupletiorque discederet. sed cum primum coëpit esse in nummis, nihil habuit antiquius, quam ut pecuniam sancto illi redderet, quam ab eo, ut ipse dicebat, mutuam accepisset; quod summa cum fide præstitit, eundemque sibi patronum apud Deum ad res suas omnes adhibuit. quo facto, illud assecutus est, ut ad eas pecunias, ex mercatura, perveniret, ut postea nullius indigens fuerit.

LXXXVI. *Ecclesiasticas censuras esse metuendas.*

Quantum Ecclesiasticæ censuræ vim habeant, quæ contumaces ac rebelles sacrificiis interdicunt, atque à reliquo fidelium cœtu ac communione sejungunt, declararunt, hac nostra memoria, discessionibus hiatusque terræ, quæ civitates integras, una cum earum ædificiis absorbens, intra viscera condidit, tanquam ipsi propositum esset ostendere, quibus ita interdictum sit, sibi quoque eos impiorum ac sceleratorum numero esse. sed ut singillatim veniam ad eos, quibus hoc animadversionis genus pestem, & exitium attulit; ante annos prope triginta erant Neapoli vir atque uxor, non tam conjugii vinculo, quam improbitatis societate inter se conjuncti colligatique; qui ipsorum propinquis non parum multa surripuerant, & clanculum domum suam averterant. illi, cum aliter jus suum obtinere non possent, hoc eos flagello verberandos curarunt; cujus verberis ictum (quod ejus vim nondum experti essent) cum risu jocoque exceperunt, atque hilares & securi voluptatibus operam dabant. verum, dum liberiore sunt animo, neque quidquam minus quam divinæ iracundiæ vim metuunt, tum eam sibi supra caput esse intellexerunt. et-
enim

enim cum die quodam, à prandio, animi scilicet causa, in projectum sive mœnium existent, extemplo, multis spectantibus, repentina morte, subito conciderunt. quæ mors nefarium illorum furtum prodidit, & in oculis omnium conspectuque defixit, quod illi tantopere occultare conati erant.

LXXXVII. *Censurarum ecclesiasticarum
pœnam, in res quoque ratione sensuque caren-
tes, vim suam interdum exercere.*

NEque censurarum vis hæc maxima atque gravissima homines tantum, quorum præsertim audacia compescitur, alligat, pœnaque constringit, sed mutas quoque atque inanimes comprehendit; cujusmodi sunt arbores, atque adeo elementa ipsa; quas res, sensus atque rationis expertes, nulla pars sceleris potest attingere.

Olim Cardinales aliquot convenere, ut in villa Farnesiorum, pratis Neronianis adjuncta, de symbolis essent; quo cum, die atque hora constituta, venissent, ibique exornatum ample magnificeque convivium offendissent, statuerunt, nihil esse amplius expectandum, sed se quam primum sellis, prandendi causa, commendare; verum cum aqua manibus daretur, eorum unus annulum carissimum, è digito sibi detractum, arboris cujusdam ramo inseruit; sed postea, sermonum suavitate perceptus, qui erant in prandio laceffiti, non solum oblitus est illum recipere, verum etiam funditus loci memoriam, ubi collocarat, abiecit. at, confecto jam prandio, cum ejus meminisset, cœpit enim poscere; & quia nusquam inveniebatur, & quod sibi non veniebat in mentem, cui commendasset, venit in suspicionem furri familiaria, quæ circa ipsum fuerat. itaque, quisquis ille esset, è cœtu fidelium segregandum, & satanæ in interitum tradendum curavit. sed postea, quiescente jam illo, atque annuli jactura in oblivionem adducta, animadversum est, arborem illam, cujus ramis suspensus ille annulus fuerat, exaruisse: quem cum coloni diligentius inspi-

inspicerent, quo repentinæ illius ariditatis causam investigarent, pendente in ea anulum invenerunt, detractumque, summa cum voluptate, suum ad dominum retulerunt.

LXXXVIII. *Fons aquæ purissimus liquidissimusque, ex anathemate ater, multoque oblitus cæno prorumpit.*

IN quodam Italiæ oppido insignis fons est, & celebris ibi fullonia, quo magnus fit mulierum, in ea se exercitum arte, concursus; quarum una, cum preciosum ibi toral amisisset, existimavit, id sibi, cuiuspiam ex sociis dolo, fuisse sublatum; cumque exploratum non esset, quam ejus facinoris insimularet, ad hoc extremum præsidium confugit, ut, quæcunque apud se furtum celaret, anathemate feriretur. quo facto, fons ille, qui ad eam diem purissimus limpidissimusque emanaverat, præter modum lutulentus cœpit effluere, adeo ut jam nulli esse usui posset. sed cum diligentius earum sordium origo exploraretur, inventum est illud toral in ima aqua latere; quo inde extracto, ac mulieri cujus illud erat reddito, continuo pristinus fonti nitor accessit.

LXXXIX. *Mulier perjura, terræ hiatu, quemadmodum ipsa sibi imprecata erat, excipitur.*

ET quoniam fontium mentio injecta est, non alienum esse videtur, quod Romæ, me puero, ad D. Georgii in Velabro contigisse ferebatur, exponere.

Muliercula, quæ, una cum aliis pluribus, in eo fonte lavabat, suffurata erat alteri subuculam; quod cum vix illa posset inficiari; nam multa concurrebant verisimilia, quibus id de ea suspicari liceret; attamen id à se factum esse negabat, ac, si secus esset quam diceret, multa capiti suo dira imprecabatur, & in primis, ut terra dehisce-

dehisceret, seque vivam in ventrem abstraheret. at metuens, ne manifesta mendacii teneretur, accurrit illo, ubi subuculam, una cum aliis vestibus lineis, in sole exiccandam explicaverat, ut eam quantum posset removeret, atque ita reconderet, ut ejus inveniendi potestas non esset. quo cum venisset, terram discessisse ajebant, in eumque hiatum delapsam mulierem, statim eam, qua se dignam judicaverat, mortem obiisse.

XC. Duo nequissimi homines, admissi in hominem innocentem sceleris pœnas pendunt.

QUORUNDAM iniquitas criminum adeo manifesta est, adeo perspicua, ut, quamvis reorum vel potentia vel calliditate vel gratia, tanquam secundæ cujuspiam auræ impulsu, humani judicii tempestatem effugiat, non possit tamen se ita tueri, ut tandem non ad Dei judicis vim severitatemque, quasi ad aliquem scopulum, compulsa frangatur, hoc est, ea, qua digna est, pœna supplicioque coërceatur.

Olim sacerdos quidam, ex insigni Monachorum familia, relictis Catholicæ religionis partibus, in Angliam ad hæreticorum castra transierat; sed postea facti pœnitens, si tamen ea fuit vera pœnitentia, ab hæreticis defecerat, rursusque in Ecclesiæ Romanæ complexum confugerat; quæ, more suo, ecclesia non est hominem aspernata, sed humaniter ac benigne excepit, ac menstrua etiam pecunia, ad vitæ usum, adjuvit. erat ibi viciniæ, quo commigraverat, mulier, probo honestoque viro nupta; hanc ille, una cum adolescente, quem contubernii ejusdem jure, ac præterea arctissimæ familiaritatis vinculo, sibi devinctum habebat, amare cœpit. at mulier, quæ levi erat ingenio, non est passa se diutius sollicitari, sed brevi utrique morigera fuit, atque, vicinitate invitata, (erat enim idem ipsi paries communis cum illis) modo hunc, modo illum ad se recipiebat; neque id clam virum ita habere potuit, ut non aliqua ad ipsum permanarit. etenim suspicione vehementer offensus, multos illi colaphos impegit, ac magnum præter-

præterea malum minitatus est, si quod ipsi in posterum oboluisset. quæ illis mulier, multis cum lacrimis, omnia narravit; qui veriti, ne ille ipsis ludus in perpetuum præriperetur, statuerunt, ut rumor ait, de mulieris sententia, probum illum virum de medio tollere, & tanquam æmulum suis ab oculis remove. quas partes improbus ac sacrilegus ille sacerdos ad se recepit, atque idoneum tempus nactus, cum videlicet Cardinales, novi Pontificis in Gregorii x v demortui locum subrogandi gratia, conclave erant ingressi, quo tempore, omnium fere rerum impunitas & licentia in urbe bacchatur, postridie, rusticani hominis habitu, quæ necessario transeundum illi erat, confedit. quem ubi cum uxore venientem aspexit, pistoriensi sica adortus, in conspectu mulieris obtruncavit; quæ, utpote tanti facinoris conscia, nihil sane est commota, sed paululum ab eo recessit, quo commodius ac securius feriretur. nec multi ab eo die menses intercesserunt, cum illa adolescentem in matrimonio sibi conjunxit, adolescens vero sacrilegum illum, eandem in domum, ad vitæ societatem admisit, ut uxore sua una cum ipso uteretur ac frueretur, ac suis fere sumptibus familiam sustentaret. verum aliquanto post Deus, qui justus quidem iudex, sed patiens, interdum præsentis fraudis pœnam in diem reservat, justas ab utroque pœnas expetiit. nam primum adolescens, dum ruri sclopum discludit, alteram sibi manum tam gravi affecit vulnere, ut ejus usum in perpetuum amiserit; neque ita multo post, eo pituitæ genere correptus est totus, ut cum majorem anni partem lectulo affixus hæssisset, postremo sit mortuus. at ille sacrilegus, qui omnium fere malorum radix extiterat, cum in palatio Apostolico hominis cujusdam cædem faciendam curasset, pecuniæ surripiendæ causa, qua mulieri vestes, in aures, torques, quæ pignori opposuerat, redimeret, comprehensus & abreptus est in carcerem, ubi, quæstione habita, cum crimen inficiari non auderet, de eodem, tanquam de confesso, sumptum est supplicium.

XCI. *Sceleſtum plerunque hominem conſimilis delicti pœna proſequitur.*

AC non parum ſæpe contingit, ut, quo quis lethi genere alterum affecerit, eodem ipſe moriatur.

Vir quidam princeps inſignem doctrina uſque medicum jufferat in pntem demergi, cui iratus dicebatur, quod lethali implicitum morbo parentem, ex præcipiti non ſervaviſſet, tanquam ſi id ars profeſſioque inedicinæ profiteatur, ut, quibus illa velit, morbos adimat, ac ſalutem repræſentet. verum ille, non ita multos poſt annos, eas crudelitatis ſuæ pœnas dedit, quæ ſceleris admiſſi ſimilis eſſet. etenim ab ea civitate pulſus, quam dominatu regio premebat, cum vellet flumen tranſire, ejus vi abreptus ſubmerſuſque, interiit.

XCII. *ſpectatores comœdiarum acriter interdum à Deo puniri.*

IOſeph Caſtaliſ, vir non minus probus, quàm eruditus ac doctus, narrare ſolitus erat, quo tempore Ducis Sorani liberis erudiendis operam navabat, ludorum Bacchanaliorum diebus, veniſſe quendam ad ſe, ut ipſum ad fabulam quandam ſpectandam adduceret, quæ in ea vicinia, ubi erat, dabatur; ſed nulla conditione potuiſſe adduci, ut domo pedem efferret: verum, poſt aliquot horas, ingentem, ejus ad aures, ſtrepitum perveniſſe, vehementerque commotum rogaffe, quid novi ingens ille clamor afferret; reſponſum accepiſſe, aulam illam, ubi fabula edebatur, concidiſſe, eaque ruina aliquot oppreſſos interiſſe, complures brachium, crus, vel femur fregiſſe, nec parum multos, ſine ſenſu ac ſine mente jacentes, illinc pro mortuis fuiſſe ſublatoſ; itaque ingentes ſe Deo gratias egiſſe, quod eam ſibi mentem ab ejuſmodi nugis alienam injeciſſet.

XCIII. *Virgo, quæ pejeraverat, igne crematur.*

Festis Bacchanalibus, Romæ, in quadam vicinia, Iudi convivales quidam celebrandi erant; quibus virgo nubilus, psallere & saltare docta, se ornaverât; nimirum ut ibi esset cum adolescentulis, suis æqualibus; neque solum dederat operam, ut bene vestita & aurata conspiceretur, verum etiam multa malas cerussa candefecerat, ac purpurisso depinxerat. quam cum mater ita pictam fictamque esset intuita, exostulare cum ea cœpit, quod, nondum nupta, ausa esset pigmentum ullum attingere, atque ori adinovere. illa negare, à se tactum esse, neque cerussam, neque purpurissum, neque ullam aliam offusciam; ac nitorem illum à natura sibi datum esse, dicere, non aliunde petitum. mater instare, factum: virgo negare, ac D. Antonium precari, ut, si mentiretur, igne correpta deperiret. sed, nescio quo casu, ea nocte non est celebratum illud convivium, sed dilatum in crastinum. virgo, ejus rei certior facta, omni ornatu deposito, quiescendum in præsentia duxit; & cum esset tempestas perfrigida, ignem in patellam indidit, cum eaque in superiorem ædium suarum partem ascendit; ubi cum sedisset, divaricatis cruribus, cum sibi ignem supposuit; quo juvante, sopori se tradidit. interitum ita eam arcte complexus est somnus, ut antea totis ignem membris conciperet, atque adeps. eliquatus in terram deflueret, quam sopore soluta, clamores tollere, operamque implorare potuerit. verum cum, ad vocem clamantis, vicinorum concursus fieret, & hærentem virginis membris ignem aspicerent; ne ille longius serperet, recte curarunt; sed quia jam intra viscera penetraverat, nulla eam vis potuit morti surripere. itaque meritis perjuri sui pœnas D. Antonio dependit, quem mendacii sui testem simul & ultorem invocaverat.

XCIV. *Nobilis mulieris in pellicem sævitia.*

Quantum in se scelus concipiant, & quam graves sæpe pœnas mulieres illæ incurrant, quæ cum alienis viris rem habent; nec tam insignem legitimis toris injuriam verentur imponere, exemplum, in quandam viduam, non multis ab hinc annis, editum, docet. hæc lepida atque eleganti corporis forma mulier, sed animo turpi scædoque, in quodam Italiæ oppido, in primis claro ac nobili, quod, re adhuc recenti, non est necesse nominare, formæ ut diximus bono, quo præstabat, juvenem, genere, opibus, divitiis, civitatis primum, in sui amorem illexerat, & stupri consuetudine sibi devinxerat; quo fiebat, ut non is eum, qui par erat, uxori honorem haberet, nec jus illi suum, quemadmodum consueverat ante, tribueret. cui cum id grave accideret, incidit suspicio, ideo maritum à re uxoria abhorrere, quod apud pellicem aliquam, amoris clavo defixus, hæreret. itaque mulier, genere, ætate, ac patris potentia, qui aliquot imperabat oppidis, ferox, statuit, quidquid illud esset, quod mariti à se animum abalienaret, radicitus reperire; ac quærens, investigans, tandem, non odore aliquo, nec leviter presso vestigio, sed lata via atque patenti, ad intima rei totius cubilia pervenit; nimirum intellexit, quæ nam esset ea mulier, quæ sibi virum interciperet, qua forma, qua ætate, qua factione, quo genere; ac nihil sibi faciendum prius existimavit, quam ut eam, sicut merita esset, ulcisceretur. itaque dat literas ad patrem vehementes, quibus de viri sui injuriis expostulat, ejus flagitia aperit, & quid ipsi facto sit opus, ostendit, postremo suam ad id opem efflagitat. quæ, ut erant acerba atque indigna, cum sic patri viderentur, statim duos ad filiam homines misit, fortes, audaces, manu promptos, qui, nulla hominem de causa occidere, pensi nihil habebant, iisque imperavit, ut mulieri præsto essent ad nutum, quæque imperaret, omnia facerent; quos illa humaniter, advenientes excepit, & clam hospitio, victu, ac ceteris in rebus, liberaliter habendos curavit, expectans; dum pellicis opprimendæ tempus &

occafio fe daret ; interim eum , quo vir in fuis flagitiis interprete atque adminiftro utebatur , evocat , ac blandiciis , pollicitationibus , ac præfentibus etiam præmiis adigit , ut ipfi fignum proderet , quo adhibito , mulieris fores , cum ad eam veniret , viro paterent. cumque jam fatis in dolos fe effe inſtructam arbitraretur , die quodam , cum vir mœſtus , five ex amore , five ex aliqua alia ægritudine , in lecto jaceret , ficariis , à patre miſſis , ad fe accitis , negotium dat , ut ad ædes mulieris adeant , fores pulſent , fe virum effe ſuum , qui ad eam veniat , aſſimulent , & ſignum , quo illi fucus fiat , tradant , domum ingreſſi , necem inferant , ac peremptæ caput ad feſe apportent. illi imperata faciunt , veniunt , ſignum dant. mulier , ſigno ſibi noto commota , ſurgit una cum ancilla , ad fores venit , aperit. illi intrant , ac primo ancillam obtruncant , & in puteum mergunt ; tum dominæ caput præcidunt , & ad eam , à qua miſſi fuerant , referunt. illa , recenti adhuc cruore madidum capillis arripuit , ac ſub linteolo , quod ipſi à gremio defluebat ad pedes , abſcondidit , & cum eo ad virum ingreditur ; quem rogat , quid agat , ut ſe habeat , num morbus abſceſſerit , vel ſaltem minor ſit factus. reſpondet ille , adhuc ſibi ægre effe. tum mulier , quid ſi ea , quæ te ægrum facit , tibi in conſpectum veniret , non ne adventu ſuo omnem tibi ab animo moleſtiam abſtergeret , & à corpore morbum expelleret ? cui ille , Facis , inquit , delicias , more tuo , (nam de hoc ſæpius inter ſe litigaverant ,) equidem mihi conſcius ſum , nullam effe cordi meo caram , præter te unam. at uxor , omnem è pectore iram expromens , Abi ſis hinc , inquit , impure , mendax ; tu ne , poſſe te mihi verba dare , exiſtimas ? eductoque è ſinu capite , Noſti ne hanc ? tene , inquit ; amplectere ; jam hoc tibi , me non invita , licet facere ; atque una opera id illi caput in os objecit. quo ſpectaculo , plus quam dici poteſt exterritus , parum abſuit , quin ab animo relictus , mortem obiret. at virili audaciâ mulier , viro ſemianimi relictus , ſe è cubiculo foras eduxit , ac vehiculo , ſex jugis trahentibus , ejus rei gratia parato , ad parentem , quanta inaximâ potuit fuga , contendit.

XCIV. Reges ac principes viros non esse ludibrio habendos.

Quod regale nobis nomen magnum & sanctum esse debeat, tum divinis tum humanis cautum est legibus, ac Petrus Apostolus edocet, qui modo Regibus honorem deferendum esse ait, modo eisdem nos, tanquam præcellentibus, subjectos esse debere contendit; neque facinus committi à quopiam gravius potest, quam cum regalis illorum majestas amplitudoque minuitur. quamobrem eorum audacia, qui ejus se sceleris conscientia constrinxerint, majoribus etiam poenis suppliciisque retunditur. quo etiam genere comprehenduntur ii, qui aliquo Reges facto, ludibrio atque contemptui habent. nam, si nihil est, quod privatus quisquam minus, quam se illudi ac despici velit, propterea quod sua unicuique existimatio ac dignitas gravis est, quanto magis existimandum est, cupere Reges, ab regali ipsorum fastigio, contemptum atque irrisum omnem abesse, quibus nihil tam propositum est, quam ut ipsos, omnes, propter imperii majestatem, vereantur ac metuant? atque illorum quoque audacia, qui istud vel leviter vel obscure moliuntur, impune non abit, sed, ea quam meretur poena, mulctata, ceteros, ne idem audeant, admonet: ut in eo, de quo cominemorabimus, accidit.

Fuit, non ita multo supra hanc nostram ætatem, Rex quidam, cujus nomen, etsi nulla subest causa, cur reticeatur, tamen, non pessime factum iri existimo, si nulla ejus mentio fiat; fuit, inquam, Rex quidam, in cujus regno locuples vir, ex procerum numero, duo optima ac præstantissima oppida possidebat, ex quorum fructibus, in omnibus se rebus magnifice copioseque tractabat, ac magnum præterea equorum numerum alebat, eorum erat oppidorum jam pridem cupidus; unus ex Regis propinquis, illi carus in primis; sed quia oppidorum dominus ea non invitus habebat, neque erant venalia, ac præterea multas inde, aucupii ac venationibus, animi remissiones ludosque sibi parabat, nulla conditione adduci poterat, ut alieni juris mancipiique ea

fieri pateretur; præterea indignabatur, à Regis propinquis ea sibi oppida eripi; ereptionem enim esse, non venditionem, cum ab iis, qui rerum potiuntur, adversus animi sui sententiam cogitur aliquis rem, à majoribus suis sibi relictam ac traditam, vendere; deinde superbum, ac non ferendum esse existimabat, in cognati Regno eos dicere homini honesto, splendido; ac locupleti, *Vende mihi ædes, fundum, oppidum*; hoc est enim dicere, non es dignus tu, qui habeas tam bonas ædes, tam amplum fundum, tam elegans oppidum; meæ dignitatis ista sunt; tu intra fortunæ tuæ te limites contine. cum igitur ad has cogitationes, iræ atque indignationis plenas, revolveretur, ille Regis propinquus, cum videret, se suis artibus nihil posse proficere, optimum factu esse duxit, ab Rege auxilium petere. itaque ad eum venit, desiderium suum exponit; narrat, magnam familiæ suæ dignitati accessionem futuram, si cum reliquis suis opibus illa etiam oppida conjungerentur. Rex, quamquam videret, quoties venditor rem venalem non habeat, nec suo arbitratu vendat, non esse licitum cuiquam, sive privato sive Regi, eam ingratis quovis sibi precio parare, quique memoria teneret, quid de vinea Nabothi scriptum legisset, quod non fuisset fas Regi Achab, à suo eam domino invito, quovis etiam pretio, quantumvis magno, redimere, negotium tamen se suscepturum, & quoad æquitas & ratio pateretur, suam in ea re auctoritatem interpositurum, pollicitus est. itaque ad se venire hominem jubet, orat, ut, si sua voluntate, si suo commodo fiat, non enim sibi propositum esse vim illi afferre, propinquo suo duo illa oppida vendat. ille, qui non esset nescius, Reges, etiam cum rogant, cogere, non est ausus adversari contra illius postulatum, sed respondit, tum in ea re, tum in aliis, se, Regem, ex ipsius voluntate, usurum. Rex laudat, gratias agit, peritis quibusdam mandat, ut oppida illa æstiment, atque ex illorum æstimatione propinquus, cui emebatur, domino premium exolvat. quod factum est statim; ac præterea Rex ad premium, auctarium adjiciendum curavit; ac simul ait, *Quandoquidem mei honoris gratia, oppida isti induxisti animum vendere, si*
quid

quid semel à me in beneficio & gratia postulaveris, quantumvis magnum, neque tribui cuiquam solitum, id à me continuo impetraturum te scias. verum postea ille, qui vendiderat oppida, in ocio, factum suum reputans, tulit ægerrime, tam bona sibi oppida passum esse elabi è inanibus; cœpitque cogitare, qua nam ratione posset, quod perperam fecisset, emendare atque corrigere. cumque id sedulo versaret in animo, neque quidquam placeret, quod reperisset, tandem illi, regię pollicitationis, venit in mentem, qua, in oppidis vendendis, quidquid semel in beneficio & gratia postulasset, id à se continuo ablaturum esse sponderat. nec mora, Regem adit, ac promissi eum sui esse memorem rogat. Rex aliud quidvis cogitans, optime se illud in memoria habere respondet; proinde peteret, si quid vellet. ille se ait cupere ab oppidorum venditione recedere, precium restituere, ac res venditas recuperare. Rex levitatem hominis admiratur; sed memor promissi, ne videretur, ab eo, in quo suam interposuisset fidem, velle discedere, dolorem suum dissimulavit, inandavitque propinquo, ut liceret illi rem suam redhibere; id quod statim est factum. sed non diu etiam est factum postquam hæc acta sunt, cum ille levitatis stultitiæque suæ pœnas dedit. nam cum receptis oppidis, solitis se animi remissionibus daret, accidit, ut, de quodam sibi subiecto, nescio ob quam noxam, supplicium fumeret; sed cum damnati parens, gravius, pro noxa, in filium esse animadversum quereretur, admonitus ab amicis ac popularibus suis est, ut Regem per epistolam adeat, & injuriam, filio factam, exostulet. Rex dat prætori negocium, ut de ea re diligenter inquirat, ac si perperam judicatum inveniat, eam fraudem non inultam esse patiatur, sed pœna iudicioque constingat. prætor jubet, rei iudicatæ tabulas ad se transmitti; ex quibus cognoscit, miserum illum, ad falsum crimen injectum, & iniquo iudicio, fuisse damnatum. quamobrem, qui damnaverat, comprehensus, & conjectus in carcerem, tandem, bonis ejus omnibus publicatis, ac reciso à cervicibus capite, temeritatis suæ pœnas dedit. cujus oppida, quoniam una cum reliquis bonis facta erant publica, Rex

propinquo illi suo, qui erat eorum cupidissimus, gratis addixit.

XCVI. *Magistratus ac iudices, adversus re-
orum insidias, præcipua Dei ope auxilioque
muniri.*

Qui partem aliquam Reip. sibi traditam, regendam susceperunt, eam debent fortiter ac gnauiter administrare, neque improborum hominum audacia, minis, atque potentia deterreri, quo minus illorum scelera ac flagitia, poenis, à legibus, constitutis, persequantur atque coerceant. etenim persuasum esse illis debet, se præcipua quadam divinæ providentiæ partē contineri, cujus tutela auxilioque tecti atque muniti, insidias, à reis sibi locatas, effugiant, ac periculis omnibus superiores evadant; ut perspicue, plures ante annos, videre licuit, in quodam ecclesiæ Anconitanæ Episcopi Vicario, quem mirabiliter Deus ex impii ac sacrilegi cuiusdam telis eripuit, cujus ille nimiam cum virgine, Deo sacra, consuetudinem amicitiamque conatus erat pro imperio ac potestate dirimere. Est Anconæ, celebris sacrarum Deo Virginum domus; quarum virginum mores à vitæ religiosæ disciplina deflexerant; in eo præsertim, ut diligentius munditer se haberent, corpus orna- rent, formam excolerent, quam ejus vitæ mulieres deceret, ac multo se mallent ex pulcro corporis ornatu, formæque elegantia, quam ex optimo ingenio ac sanctissimis moribus, laudari; tum, ut voce ac fidibus canerent elegantius, quam esset virginibus necesse, neque virorum consuetudinem conspectumque refugerent, sed in maxime adamarent, ac procacibus eorundem sermonibus se dederent; non sine summa, Episcopi, Abbatissæ, quæ virgo erat grandæva, ac veteris disciplinæ restituendæ in primis cupida, ac populi totius, offensione. cui incommodo cum Episcopus vellet occurrere, & prolapsos earum virginum mores revocare, atque optimis legibus institutisque constringere, vetuit, virum ad eas quemquam accedere, & longi materiam sermonis as-
ferre.

ferre. cui edicto cum minus esset obsequens vir quidam nobilis, sed admodum impurus atque scelestus, qui neque domo illa abstinebat, neque sermones cum una earum virginum, cujus erat cupiens, segregabat, sed à mane usque ad vesperam continuabat, admonitus est à Vicario, ut ne quid ejusmodi amplius auderet, sibi que perpetuo domo illa carendum esse existimaret. sed ad sepulcrum, ut dicitur, mortuo verba faciebat: non enim fiebat, ut ille pertinacia desisteret, sed in contumacia magis magisque perseverabat. quoniam Vicarius, cum nullam jam precibus nec admonitionibus relictum esse locum agnosceret, statuit, majore eum vi, hoc est, terroribus ac minis, de sententia depellere, atque interminatus est homini, si post hac in illa domo, vel adeo in iis regionibus, ubi ea domus sita esset, conspiceretur, sacrificiis interdicturum se eum, atque effecturum, ut numero impiorum sceleratorumque haberetur ab omnibus. quo audito, sic ille exarsit, ut pugione educto, ter illum eidem in brachio sit conatus insingere. sed videte, quis nam casus Vicarium adjuverit, vel potius, quam nam Deus ratione morti illum subtraxerit. nam semper accidit, ut pugionis mucro in laminam incurreret, qua cauterium obductum habebat, neque ullum, vel tenue ipsi vulnus insingeret. statim factus est hominum concursus; atque scelestus ille, manifesto in facinore deprehensus, conjectus est à lictoribus in vincula; & quoniam crimen erat magnum atque atrox, visum est dignum, quod in arce omnium gentium, & in orbis terrarum theatro, in judicium vocaretur. itaque catenis oneratus, perductus est Romam; ubi cum diu in squallore ac tenebris jacuisset, tandem, amissis bonis omnibus, vitam, in summa rerum inopia & egestate, finivit.

XCVII. *Puella perjura, altero oculo capitur.*

ANNO MDCXVIII, mulier, honesto loco nata, inopia & egestate coacta, Roma discessit, ac profecta est Taliacotium, quod est oppidum in Marsiis, ibique coepit virgines, quæ annum duodecimum non excederent, literas docere, præterea acu pingere, Phrygium-

que aliquod opus efficere. quamobrem, discendi gratia, multarum ad eam concursus fiebat; quarum una accusata est apud ipsam, quod alteri cultellum, scite factum, furripuisset. quam ipsa primo blande appellavit, rogavitque, ut, quod sustulisset, referret; sed postea impudentissime neganti, à se quidquam ablatum, interminata est, si mentiri persisteret, se de ea verberibus supplicium quam longissimum esse sumpturam. at illa, quo omnem à se furti suspicionem removeret, Si mentior, inquit, D. Luciam deprecor, ut me luminibus orbam efficiat. vix biduum ab hac imprecatione interceserat, cum altero capta est oculo, adeo ut pupilla emarcesceret, & saniem foras emitteret. hæc excepta sunt ab eis, qui præsentés fuerunt, ac rem ipsam oculis acceperunt.

XCVIII. *Pecunias, ex ecclesiasticis redditibus coactas, & cognatis relictas, cito dilabi.*

Quanto in errore versentur, qui ecclesiasticis bonis utuntur ac fruantur, si opes ac divitias, avariter ex eis collectas, putant generi ipsorum fore sempiternas, multæ nostra patrumque memoria summorum virorum familiæ declarant, quæ intra paucos annos, quam ad summum pervenerant, præcipiti fere lapsu conciderunt, adeo ut vix aliquod sui vestigium reliquerint. non est necesse à me quemquam nominari; quocunque oculos converterimus, licet ibi plurima harum familiarum quasi cadavera diruta atque prostrata conspiciere. sed incredibile dictu est, quam cito, me puero, immensæ Abbatis cuiusdam opes, liberis ipsius, ut erat fama, relictæ, perierint. nam illi, præter ternas ædes amplissimas magnificentissimasque, in celeberrima urbis parte sitas, atque ornatissimam suppellectilem, magnam etiam, tum in nominibus, tum numeratam, pecuniam testamento perceperant. hæc bona tam multa, ac tam late dispersa, si flamma corripuisset, prope dixerim, non tam cito in finem redigere potuisse, quam sunt ab ipsis dissipata atque consumpta. vix integrum decennium effluerat,

efflūxerat, ab adita hæreditate, cum infinitæ eorum largitiones, immanes fuitus, improbissimæque effusiones, nihil fere ex tantis opibus reliquerunt. ex quo factum est, ut, qui antea conspecti essent in serica atque aurea veste, postea pannis pene obsiti, ab omnibus despicerentur; qui antea multo magnoque comitatu instructi per urbem incessissent, postea soli, atque ab iis deserti, quos aluerant & locupletaverant, prodirent; qui rheda, auro interlita ostroque constrata, vecti essent, postea pedibus iter haberent. itaque aliis risum, aliis misericordiam commovebant, aliis prudentioribus erant exemplo, quam longe insania ac scelere prodeant, qui, ex facultatibus pauperum, familiam ac nobilitatem generis se posse fundare ac stabilire, sibi persuasum habuerint.

XCIX. *Non oportere, ædium proferendarum gratia, Dei immortalis ac Sanctorum suorum templa diruere.*

Non defuere hac nostra memoria, qui, ut domos ædificarent, vel hortos, quos voluptatis sibi causa comparaverant, laxiores efficerent, templa religiosissima antiquissimæque diruenda soloque æquanda curarunt: verum id, quamvis auctoritas publica semper accesserit, tum ipsis, tum ipsorum familiæ, scæde atque infeliciter cessit.

Quidam vir locuples ac nobilis, non multis ab hinc annis, quo ædes suas quadraret, templum B. V. sacrum, & antiqua religione præditum, demoliendum, atque alterum, in alia parte, non ita magno sumptu excitandum curaverat: verum non diu hoc perfunctus est gaudio. nam ipse amplo ornatus magistratu ac munere, obiit, & ingentis pecuniæ, qua illud comparaverat, jacturam fecit, non sine magno totius familiæ damno; ejusdem vero frater, nullo morbo præeunte, delapsus est in furorem, adeo ut non solum intra verba desiperet, sed nudus in viam exiret, sibi que aliisque noceret, quamobrem vinctus, non ita multo post in catenis est mortuus.

Alter

Alter etiam, longe ampliori munere præditus, quod impense coëmerat, magna etiam apud Principem auctoritate & gratia; qui sine ulla dubitatione, si longior illi vita suppeditasset, processisset honoribus longius; quo ædibus, quas omni luxu instructas ornaverant, cubacula aliquot & ambulacra adjungeret, Ædem sacram, suis ædibus contiguam, demolitus fuerat, primum, intra paucos menses, valetudine devolutus est, adeo ut nec manibus nec pedibus uti posset, deinde cum ingenti familiæ suæ damno, doloris magnitudine & acerbitate, de medio sublatus: illas vero magnificas ædes, in quibus ædificandis tantum sumptu processerat, &, quod refert, Dei domum everterat, soloque æquarat, heredes ejusdem, re necessaria compulsi, coacti sunt statim, cum incredibili jactura, divendere.

Alter item, Romæ, vir nobilis, vetustissimum templum in stabulum equorum converterat. non tulit hanc injuriam Deus, sed vindicavit, tum in ipso, tum in ejus liberis. nam & ipse fere semper conflictatus est cum adversa fortuna, & filii, quos genuit, parum mente valuerunt, neque ad senectutis iuvitia pervenerunt; nam ferme omnes ante quadagesimum vitæ annum sunt mortui; de quibus ille, qui ceteros ætate antecedebat, cum, ex insania, violenter quadam manu faceret, victus est, diuque in compedibus habitus. nempe summa ac singulari sapientia, hoc præsertim supplicii genere usus est in illos Deus. ejus enim liberos, ex hominibus, passus est prope in pecudes verti, qui pecudum greges in ipsius templum induxerat.

C. Neque joco, neque serio, sanctos viros ludibrio esse habendos.

Sixtus V Pont. Max. pro sua in B. Virginem pietate Sac religione, Basilicam S. Mariæ ad nives in Exquilis expolivit, ornavit, sacello augustissimo auxit, auro, lapidibus preciosis, omnique regalis opulentia cultu referto; tum, ut ea clarius magnificentiusque pateret ad oculos, humiliora circa ipsam ædificia dirui, soloque æquari

æquari imperavit; præterea plures directas ad eandem Basilicam vias aperuit ac munivit, collem Exquilium, antea arduum, molliuit, & in ejus medio obeliscum, ex ruinis Mausolæi Augusti Cæsaris erutum, erexit: quibus rebus perficiendis, fuit necesse multas ædes subvertere, & in his ædiculam, ad radices ejus collis sitam, ubi depicta erat imago D. Antonii Abbatis; cui faber murarius, qui ædiculam demolendam conduxerat, quo fortasse facetus videretur, Pace tua, inquit, Antoni, non potes effugere, quin tibi hoc malleo, quem gero, crus adimam. vix ea dixerat, cum pede lapsus, è ponte, quem in alto suspenderat, decidit, & crus alterum misere fregit; atque suo illo gravissimo miseroque casu, viro sanctissimo, omnique honore dignissimo, quem petulanter læserat, insulsi illius joci poenas dependit.

CI. Opifex quidam, Dei ac S. Caroli Cardinalis ope, ex dæmonis manibus eripitur.

CArolo Cardinali Borromæo, à Paulo v Pont. Max. in Sanctorum numerum relato, tanta apud omnes gentes, ac Romæ præsertim, ubi quondam opibus & auctoritate floruerat, sancti viri religio esse cœpit, ut essent miraculo, concursus, omnis ætatis atque ordinis hominum, qui ad sacram ejus Ædem omnibus horis fierent. at in iis, à quibus vir ille sanctissimus singulari studio ac religione colebatur, opifex erat Romæ, qui habitabat in foro agonali; hic quotidie bene mane surgebat, atque in Ædem D. Ambrosii se conferebat, ut sacrosancto Missæ sacrificio interesset, quod in sacello B. Caroli fieri celebrarique solitum erat. hic die quodam, cum solito maturius surrexisset, fit illi obviam in via ignotus quidam, quem postea humani generis hostem esse comperit, qui summa vi hortari & cogere eum cœpit, ut regrederetur, neque pergeret longius; nihil enim opus esse, eo die, Missæ sacrificio ipsum adesse: at ille, nunquam se commissurum, respondit, ut, nisi eo sacrificio absoluto peractoque, reverteretur, cujus gratia domo migrasset, tum rursus dæmon instare, ut regre-

grederetur; nam illud ipsi sacrum, quo tenderet, magnum damnum vel malum allaturum. cui ille, Dei ac B. Caroli fiducia tutum, sperare se, ait, quæcunque instarent pericula evasurum. verum dæmon, ubi eum videt, nullis neque precibus neque terroribus de sententia posse deduci, ad vim confugit, atque, impetu facto, oborto eum colló est conatus abstrahere. sed Dei ac B. Caroli nomine invocato, violentas dæmonis manus evasit, nec præterea ab illo est aliquid periculi ortum, vel mali.

CII. *Insignem musicum, jam ferme morientem, modorum pœnitet, quos impuris carminibus adhibuerat.*

LVcas Marentius, cui, nostra tempestate, magnum erat inter musicos nomén, multa modulatus erat parum honesta, nec satis Christiano homine digna; ad quem jam ægrum planeque depositum accessit P. Iuvenalis Ancina, cujus antea meminimus, quo amicum inviseret; & consolaretur extremo illo tempore. sed simul ac ipse Patrem aspexit, petivit, alte suspirium, atque, Vtinam, inquit, mi Pater, modos, quos feci, vel nunquam edidissem, vel delere sanguine ipso possem, ut nullum eorum vestigium extaret. sed jam neutrum in manu sua erat. nam neque infecta facta reddi possunt, neque scit, ut Horatius inquit, *vox missa reverti*. verum tum ille quidem est mortuus, sed fortasse, si convaluisset, nihilo melior esset effectus, sed morem antiquum obtinuisset. quamobrem recte sublati sunt à Deo, dum ea illi mens erat, qua potuit ab eo peccatorum illorum veniam impetrare, quæ tum ipsum commisisse pudebat pigebatque.

CIII. *Ado-*

CIII. *Adolescenti, graviter aegro, longam demon schedulam objicit, ubi omnia ejus peccata descripserat.*

Idemmet P. Juvenalis scriptum reliquit, cum etiam tum versaretur in aula Oratoris Cæsarei, eique navaret operam medicus, ibi vicinæ, ubi habitabat, adolescentem quendam graviter, ac sine ulla spe salutis fuisse ægrum; & cum invitatus esset, ut adolescentem illum, si sibi videretur, inviseret, non invitum venisse ad eum, sed repente, nova re atque inopinata percussum, propemodum exhorruisse. etenim audiebatur ille æger altercari, cum nescio quo ab omnium oculis aspectuque remoto, ac vehementer perturbatus, atque perterritus, identidem dicere, *Quam longa hæc est schedula? quam ingens? profecto voluminis cujusdam instar videtur habere.* at scribit Juvenalis, venisse sibi in mentem, exquirere de familiaribus, quid ille adolescens hominis esset, & quod vitæ genus secutus fuisset; ac reperisse, hominem esse nequam, & flagitiis coopertum; ac tum demum intellexisse, quid sibi verba illa vellent; nimirum vitæ rationem mox reddituro, volumen criminum suorum, ante oculos statui, quæ, si vellet, inficiari non posset. ac credibile est, idem omnibus accidere, qui secus quam decuit vixerunt; quod videtur voluisse Deus illis verbis significare, *Existimasti, inique, quod ero tui similis? arguam te, & statuam contra faciem tuam.* etenim improbus, quod non statim à Deo puniatur, se liberari, non in aliud tempus reservari, arbitratur; sed postea, mortis tempore, ab opinione sua se fuisse deceptum intelligit. addit Juvenalis, adolescentem illum esse mortuum; utrum justorum, an peccatorum morte, se adhuc comperti nihil habuisse; sed verisimile est, illum, dignum moribus vitæ exitum habuisse. raro enim accidit, ut vita, turpiter acta, honesta ac laudabili morte terminetur.

Non videtur mihi prætereundum hoc loco, quod de duobus quibusdam amicis legitur, quorum unus laudæ atque

atque virtuti, voluptatibus alter studebat. mortuus est voluptarius ille, & aliquanto post conspectus, & auditus ab altero, qui superstes fuerat, verba illa proferre, *peccantem me quotidie, & non me pœnitentem, timor mortis conturbat me*; & interrogatus, cur reticeret ea, quæ sequuntur, *miserere mei Deus, & salva me*, Quia misero mihi, inquit, sempiternis & acerbissimis apud inferos ignibus tradito, nulla neque salutis neque misericordiæ relicta spes est. quæ cum dixisset, è conspectu evolavit, intolerabilem odoris teterrimi fœditatem ex se relinquens.

CIV. *Atrox divinæ severitatis exemplum in duos editum, qui, nefaria libidine, Dei templum deturpaverant.*

ILLud vero horrendum formidandumque, quod in sermonibus D. Vincentii Ferrerii scriptum invenitur. Refert vir hic sanctissimus, cum, vespere feriæ quintæ majoris hebdomadis, luminibus remotis, Christi domini passionis historiam populo frequenti narraret, duos quosdam, in angulo ejus ecclesiæ, ubi sacram illam contionem habebat, suadente libidine, hortantibus tenebris, ceterorum animis attentis, nefario execrandoque concubitu, sacrosanctum illud templum ausos esse polluerè; tum ipsum (divinitus, ut arbitror, edoctum) clamores maximos extulisse, & magna voce cœpisse lumina poscere. etenim in illis tenebris, divinam omnipotentis Dei majestatem gravi & inexpressibili scelere violari; ad quam vocem accurrisse ædituos, aliosque cum facibus, explorasse omnia, atque invenisse infelicium duorum illorum corpora, ita ut una erant, tanquam arida quædam ligna, fœtido nigroque igne torreri.

CV. *Memoranda atque admirabilia duorum longe illustrium virorum exempla, qui, delata ipsis Cardinalatus insignia, nisi coacti, recipere noluerunt.*

Cum multa, hac nostra memoria, contigerint satis digna, quæ posteris in exemplum prodantur, tum haud scio, an quidquam sit dignius, in quo commemorando efferendoque præclara inter se eruditorum hominum certent ingenia; quod nimirum inventi sint duo, qui egregia quadam magnitudine animi, & contemptu rerum humanarum, ea fastidirent atque contemnerent, quæ alii per ignes ferrumque, ut dicitur, petunt; videlicet Cæsar Baronius Soranus, & Robertus Bellarminus Politianus; quorum uterque delatam sibi à Clemente VIII Pont. Max. amplissimam Cardinalatus dignitatem constantissime repudiavit, ac nisi Pontificis imperium in eos atque potestas vim adhibuisset, nulla conditione, eorum quisquam, tanto se honore cohonestari sustinuisset. nempe soli ex omnibus intellexerunt, quanto majus esset, edita in altum loca refugere, quam appetere. sed non est mirandum, tantum facinus ausos esse eos, qui ex duorum longe sanctissimorum hominum disciplina prodierint. alter enim in nutrimento, ut ita dixerim, Sancti Philippi Nerii educatus, ex illa indole eam in recusandis honoribus animi demissionem arripuit; alter ex Sancti Ignatii Loyolæ schola profectus, ea didicit, quæ tantopere alii admirantur, contemnere, ac pro nihilo ducere.

CVI. *Frequens sacræ Eucharistiæ usus, tutissimum adversus carnis nequitias præsidium.*

Inter admirabiles sacræ Eucharistiæ fructus ille in primis numeratur, quod eum, qui frequenter ac pie eadem utatur, firmissimò adversus carnis illecebras præsidio servet, atque muniat.

Narravit olim vir mihi longe carissimus, quem tanquam me diligo, qui audet omnia sua consilia mihi credere, cujusque voluntate hæc de illo, suppresso tamen nomine, cominemoro; se, vehementissimo quodam amoris ac libidinis æstu compulsus, lapsus esse in muliere quadam; à cujus consuetudine, cum vellet postea recedere, & ad prioris vitæ consuetudinem redire, non fuisse sibi ejus rei potestatem; quod obfisti non posset, quin mulier, ferox ingenio, ac freta liberis adultis ætate, per vim domum ad se non introiret, rursusque, quibus posset inodis, ipsum ad peccandum conaretur attrahere, adeo ut interdum, ad vim confugeret, & quia corporis magnitudine viribusque præstabat, ipsum male multatum ad terram abjiceret: verum adversus ejus impetus hoc remedium excogitasse, ut singulis diebus Dominicis, præter Christi domini, B. Virginis, & Sanctorum aliquot dies festos, Christi corporis mysteria susciperet; quo fiebat, ut hoc singulari præsidio tanquam vallo munitus, ex illis periculosissimis pugnis superior semper excederet. at multis mihi cum lacrimis narrabat, quod, die quodam Dominico, cum nescio qua de causa neglexisset iis se armis tegere, quibus indutus hosti terribilis erat, venisse illam, cœpisseque ipsum, ex solito, suis artibus ad nequitiam allicere; tum vero, nudatum armis, atque infirmis viribus, ne primos quidem ejus impetus sustinere potuisset, sed confestim turpiter deditionem fecisset; quamobrem, malo suo edoctum, deinceps cantiores esse factum, neque unquam commisisse, ut sine salutaribus illis armis in certamen descenderet. quibus egregie munitus omnes sævissimæ illius mulieris impetus audacter excepit, ac fortiter propulsavit.

CVII. *Quid puella acciderit, quæ reprehensa à parentibus, quod fūco malas muliebri præter modum expoliret, dicto audiens esse noluit.*

Formæ studium atque cupiditas, adeo insita est in animis mulierum, ut ea cultus sui cura, in ipsis ferri tollerarique posse videatur, quæ intra certum modum sese contineat, verum si honesti fines transeat, reprehensione digna sit atque odio.

Mulier erat quædam, quæ proprium & naturalem oris sui nitorem contemneret, eidemque adventicium fūcoque quæsitum induceret, ac totos dies purpurisso, cerussa, aliisque id genus pigmentis, sibi malas inficeret. itaque, cum esset honestis orta parentibus, in morem meretricis, fictam pictamque in hominum conspectum prodire non erubescibat; quæ res magnum propinquis, ac parenti ipsius in primis, dolorem inurebat; qui non cessabant eam hortari atque admonere, ut nimiam illam cultus sui curam diligentiamque remitteret. sed nihil proficiebant; nulla enim cujusquam, neque auctoritate neque oratione, adduci potuit, ut quidquam de inani illo studio deponeret: verum cum illi parens, deterrendæ ejus gratia, atque ab inani illa sollicitudine abripiendæ, Deo esse invisus diceret, quæ sibi formam fingerent, & novam quasi faciem imponerent, easque procul à divino ipsius conspectu repelli; contempsit illa, atque arrogantibus sane verbis, si me, inquit, nolit Deus ad se recipere, abigat quo velit, nihil ejus conspectum moror; nam certum est mihi, suum corpori cultum non eripere. mortua est mulier, & Christianæ sepulturæ mandata; sed tellus, tanquam dedignaretur eam amplecti, quæ Deum à se repudiasset, suo è gremio foras exclusit. quod cum patri renunciatum esset, elatam è templo, ad litus maris deportari jussit, atque in arena sepeliri; quæ item retinere apud se eam noluit, cui prope fuerat Dei conspectus invisus; itaque paulo post foras evomuit. tum pater, commotus, evocasse dicitur dæ-

monem, & clare omnibus audientibus dixisse, ut ejus quoque sibi corpus haberet, secumque ad inferos traheret, cujus jam animam esset potitus. atque ejus imperiis præsto fuisse diabolus creditur. nam infelix illud cadaver, ab oculis sublatum, nusquam postea est visum.

CVIII. *Delicatae cujusdam mulieris luxus, à Deo fædo horribilique morbo, compefcitur.*

Mulier quædam Venetiis fuisse traditur, quæ ita nitide corpus suum curaret, ita molliter delicateque haberet, ut dedignaretur ejus sordes communibus atque usitatis aquis abstergere, sed rosaceis tantum, aut aliis ejusmodi odoratis aquis uteretur: verum hæ tam putidæ ambiciosæque deliciae magnum illi, apud Deum, odium pepererunt; qui graviter offensus, tam fædum illi morbum immisit, ut ejus fœditatem odoris ne bestiae quidem ferre possent; ancillæ autem, quod non auderent ad eam accedere, ne ejus corporis afflatu exanimarentur, procul stantes, cibum ægræ porrigerent, ac statim deinde recederent.

CIX. *Ludos publicos à privata aliqua calamitate vix esse sejunctos.*

Pública spectacula à privato aliquo damno vel malo non procul abesse, testes sunt hominum cædes, rixæ, spectaculorum ruinae, & alia ejusmodi, quæ non parum sæpe contingunt, quamobrem sapienter faciunt, qui alienum ab his nugis animum gerunt. at fuit vir nobilis, qui solemnes popularibus suis ludos daturus, admonitus est à viro prudenti ac probe, ut animum ab his rebus avocaret; fere enim semper ejusmodi gaudiis luctum aliquem esse finitimum. cui respondit, minus bella ea esse spectacula, quæ non essent cum aliquo infortunio conjuncta. sed infortunium illud, quod non abfore ab iis ludis prædixerat, in domum suam recidit. nam cum rixa committeretur, in illa ejus interfectus est filius.

istuc

istuc & superius, à Io. Matthæo Ancina, qui suis fortasse oculis utrumque acceperat, habui.

CX. Vitam male actam, similis fere exitus plerumque consequitur.

VEnetiis adolescens nobilis, ex amplo patrimonio nihil sibi reliqui fecerat, sed libidinibus totum absumperat: verum cum ex ægritudine animi, sive potius ex intemperantia, lethalem in morbum incidisset, neque esset, ubi in suo pedem poneret, recto receptus est à meretrice, ad quam bonam facultatum suarum partem detulerat, & in culcita plumea lectoque splendido collocatus. sed ad extremum vitæ adducto, atque exhalanti jam animam, sacerdos aderat nemo, qui esset auxilio ad bene moriendum; sed circumstabant lectum congerrones, collusores, & compotatores ejusdem, qui, ad mortem hilariter obeundam, hominem hortabantur his verbis, Morere æquo animo; non enim in publico, ut metus erat, occisus, vel in stramento, ut æquum fuerat, positus, sed in culcita plumea, & sub serico conopeo, ex hac vita discedis. atque inter has cohortationes consolationesque, & in complexu illius meretricis, illud mortis genus obiit, quod quivis Christianus detestatur ac refugit.

CXI. Dei atque Sanctorum templa sacris precibus, non autem impuriis cantionibus, celebranda.

A Nno Domini MDCXXX, cum in Æde D. Petri in Vaticano egregii cujusdam operis forma ædificaretur, & magnus fabricorum numerus, ex machina lignea, Apostolorum principis aræ imposita (ea enim illo erat opere exornanda) elaboraret, eorum unus, fortasse molestiæ, quam labor habet adjunctam, minuendæ vel fallendi temporis gratia, amatoriam quandam cantunculam exorsus est canere, ita clare, ut à sacerdote, qui

prope ab eo loco confessiones audiebat , exaudiretur. à quo admonitus, ne templum, omnium religiosissimum, ipsis sacratissimis Apostolorum corporibus imminens, impuris illis cantiunculis contaminaret; contempsit ille, neque minus lascivum illud profecutus est carmen. sed brevi spretæ religionis & adinonitionis pœnas exsolvit. nam pede lapsus, ex altissima illa machina gravissimo casu corruit, atque ad ipsam Apostolorum aram, miserabiliter elisus & comminutus, occubuit.

CXII. Neminem, quantumvis humilem, esse contumelia afficiendum; nam potest illum Deus repente ad summum honoris fastigium evehere; qui autem contumeliam fecerit, insolentiae suæ pœnas dependere.

IMprobi parentis filius, si propriis peccatis prematur, interdum tum suæ tum parentum improbitatis pœna defungitur; quemadmodum subalpini cujusdam filius, cujus parens cohortem, cui præerat, cum in cœnobium Fratrum Dominicanorum hyematum duxisset, humanissimis verbis admonitus est, à Fratre Michaële Ghislerio, ejus cœnobii Priore, ut militum suorum licentiam compesceret, qui, ut mos est illorum hominum, in ea religiosa domo, quidvis sibi licere existimabant. ac homo inhumanissimus, magna oris verborumque contumacia, Si hiscere, inquit, audes, jubebo te præcipitem in proximum hunc puteum dari; erat enim in eo peristyllo puteus, quem sibi fratres ad usum domesticum foderant. quam contumeliam vir sanctissimus animo æquissimo tulit. sed aliquot post annos, celeriter, per omnes honorum gradus, ad summi Pont. fastigium evectus, præfectum illum militum, qui ita fuerat in ipsum contumax, sibi ad pedes jacentem aspexit, missum à suis civibus Romam, de maximis rebus legatum; quem interrogavit, num Fratris cujusdam Dominicani meminisset, quem olim, de militum suorum injuriis querentem, asperissime rejecisset, atque etiam interminatus esset, se
jussu-

jussurum eum præcipitem in puteum agi, si esset ausus mutire. ille, se totam rem optime in memoria habere, respondit. tum Pontifex, Ego ille sum, ait, quem tu dignum ea contumelia judicasti. ad quam vocem non minus consternatus est animo miles ille, quam undecim illi fratres, auditis illis verbis ex eo in quem impii atque crudeles extiterant, *Ego sum Ioseph frater vester, quem vendidistis in Ægyptum.* verum Pontifex, hominis jacentem animum excitavit, eundemque humanissimis verbis, ac pluribus etiam beneficiis ornatum atque auctum, à se dimisit. illud vero, ut dicere institueram, divinæ animadversionis exemplum admirari licet, quod ejus filius apud eum puteum est interfectus, in quem fumus Pont. ex illius edictione, præcipitandus & ad mortem dandus fuerat, nisi quiesceret.

CXIII. *Spreta ac violata sacri cujusdam Templi religio, multorum hominum interitu, expiatur.*

QUOD Dei immortalis Tempia pie & caste celebranda sint, atque omne ab eis scelus & flagitium removendum, multa atque gravia, edita in homines impios & sacrilegos, exempla testantur. sed in primis argumento sunt homines, ad mille & ducentos, anno MDCXI, horribili incendio necati.

Est locus in Regno Neapolitano, magna & antiqua religione præditus, Deiparæ Virgini sacer, distans Avelino quinque millibus passuum; quem in locum, die sacro Pentecostes, ex vicinis oppidis pagisque incredibilis cujusvis generis hominum multitudo confluit, religionis ac pietatis ergo. erat Ædi sacra adjuncta vobis pene instar domus, ad hospitem adventum excitata, in qua trecenta & eo amplius cubicula numerabantur; ad hæc multa accedebant ambulacra, & loca, cuivis pervia, quæ omnia à multitudine complebantur; nec cum possent omnes excipere, necesse erat multis, in templum ipsum divertere, ubi, sceminis permisti, pernoctabant, epulis vinoque operam dabant, multaque alia

nefaria supra faciebant, non satis digna quæ in intimis
 lupanariorum recessibus comitterentur; madebant pa-
 vimenta vino, redolebant epularum nidore parietes,
 personabant fidium ac vocum impurissimarum cantu,
 fervebant omnia stupris, adulteriis, ac furtis. quæ res
 mihi videntur in primis Deo quasi vim quandam adhi-
 buisse, ut eorum, de quibus loquimur, supplicio cete-
 ros edoceret, quid sit periculi sua ac Sanctorum suo-
 rum templa flagitiis atque sceleribus inquinare atque
 polluere. Itaque mense Iunio, sacro diei Pentecostes per-
 vigilio, mediam circiter noctem, ingens illud ædifi-
 cium, plenum hospitibus, qui ad decem millia conve-
 nerant, ignem concepit, ac duabus horis deletum est
 totum. at ingens illa hominum multitudo, terrore me-
 tuque percussa, verensque ne intra ædes opprimeretur,
 duabus ædium portis, quarum ea, qua aditus erat in
 peristylum, janitorum incuria, inventa est clausa, sa-
 lutein sibi atque exitum quæritabat; quorum homi-
 num pars magna, cum ipsi se impedirent, multitudine
 & angustiis oppressa exanimabatur; alii, ne in eas
 angustias devenirent, de fenestris se præcipitabant in
 viam, alii ab igne intercepti comburebantur. quam-
 obrem magni ubique mortuorum acervi conspicieban-
 tur; quorum numerum qui iniere, eos referunt ad mil-
 le & quingentos & eo amplius pervenisse; quorum om-
 nium plus mille in ædium portis oppressi, abeuntium
 terrore & fuga deperierunt. eximuntur ab hoc nume-
 ro infantes & pueri, qui, una cum parentibus, in tur-
 ba elisi interierunt; qui vero vel crura frugerunt, vel
 oculos amiserunt, vel se in turba ruperunt, propter eo-
 rum multitudinem, non fuit eos facile ad certum nu-
 merum revocare. Hæc excerptimus ab epistola episco-
 pi Avellini ad Marcellum Vitellestum, Basilicæ S. Ma-
 riæ ad Nives Canonicum, scripta.

CXIV. *Morientis cuiusdam exemplo ostenditur, non esse pœnitentiam in supremum vitæ tempus rejiciendum.*

QVam male sibi consulant, quantumque à ratione recedant ii, qui pœnitentiam, rem peccatoribus tam necessariam, in supremum vitæ tempus rejiciant, horribiles multorum exitus probant, quibus ea res infeliciter cecidit. sed quid habeat ea res mali, ostendit nuper sacerdos quidam Etruscus, annos prope sexaginta natus, qui anno MDCXXIV, quadragesima jam exeunte, delatus est æger in Nosocomium S. Ioannis, nationis Florentinæ; quod est in urbe Roma; ubi etiam feria V. maioris hebdomadis, peccata sua confessus est, atque, ex præcepto Ecclesiæ, Christi corporis sacramenta percepit; sed paucos post dies ita æger esse cœpit; ut medici diffiderent. quamobrem persuasus est à Parocho, ut sacro se oleo ungendum sacerdoti præberet; quod ille consilium lubens admisit, ac statim deinde à Parocho, qui cubitum ivit, admonitus, ut, si qua in re opera ipsius egeret, se per valetudinarium evocaret. erat cubiculum, ubi Parochus cubabat, Nosocomio adjunctum, ut facile, si quid in eo ageretur, exaudiri posset. itaque, horam noctis circiter quintam, magnis ejus ægri clamoribus & lamentationibus excitatur; qui æger, tanquam si cum aliquo concertaret, modo arguebat, modo dicta refellebat, modo vocem summittebat, modo tollebat. accurrit Parochus, atque eum invenit, in summam suæ salutis desperationem adductum, dicere, Heu, mihi, longe post hominēs natos improbissimo, omnes ad divinam misericordiam aditus sunt præclusi; cui utinam nunquam in hanc miseram lucem edi contigisset. atque his similia quamplurima addere, quæ desperatio dictat. non defuit Parochus, tam necessario tempore, laboranti succurrere, & jacentem desperantemque rebus suis animum ad spem salutis erigere; sed operam inanem sumebat. nam, commodum eam ad rem tempus præterisse clamabat; ac,

Vide, inquit, dæmonem, qui me pedibus abripere, secumque conatur abstrahere; atque, eadem opera, reductis ad os genibus, glomeris cuiusdam instar, se convolvebat. tum Parochus, ad fugandum dæmonem ejusque vim inhibendam, aquam lustralem, exorcismos, & preces adhibuit. cui dæmon ægrotantis ore, sed voce dissimili, respondebat, aquam lustralem, exorcismos, precesque, nullam adversus se vim habere pro eo, qui sibi jam pridem, ob nefaria ejus scelera atque flagitia, esset addictus. huic dæmonis orationi fidem in primis astruebat ipsiusmet ægri confessio, qui sacrosanctæ ac divinissimæ Trinitatis, Patris & Filii, ac Spiritus sancti opem à se repudiabat, neque rei quidquam sibi amplius cum Deo esse narrabat, quod mox præceps agendus esset in ultima inferorum loca, ibique una cum Iuda, ceterisque omnium ætatum sceleratissimis hominibus, sui similibus, æternis pœnis suppliciiisque excrucians. Dæmon execrandas hominis libidines cupiditatesque in medium proferebat, multa Italiæ oppida, ac præsertim Venetias, amores & delicias illius, commemorabat; objiciebat illi poëticiæ studium, cui multum temporis atque operæ dedisset; revocabat in memoriam, flagrantem illius cupiditatem studiumque, thesauros veteres defossos inveniendi, improborum hominum amicitias, ludos, jocos, convivia, atque alia quamplurima, quæ longum esset enumerare, quarum omnium voluptatum distractio, vastitas, & interitus in foribus esset. illud unum Parochus urgebat, ut desperatione debilitatum, ad fiduciam divinæ misericordiæ, præsertim bohi latronis exemplo, traduceret, qui puncto temporis ex cruento sicario vir sanctissimus, ex nefario prædone, regni caelestis possessor evaserit; hunc sedulo sibi subjiceret, de hoc cogitaret; ita enim (superatis desperationis scopulis) reliquum sibi cursum, ad divinam misericordiam, facilem fore; etiam, dare operam tempus, nondum infinitam illam divini in eum amoris vim exaruisse, sed large, ut antea, fluere, modo ea ipse peccata, quæ sibi objicerentur, intimo animi dolore desleret. *Nugas agis*, inquit dæmon; *acta res est*; audebit ne ille divinæ bonitatis mentionem facere, qui eam

eam à se repudiarit ac rejecerit? quem poterit de peccatis dolorem asferre, qui eum animo conceperit nunquam, qui contritionis vim, qualis sit, ne definiendo quidem, explicare didicerit? proinde, quo dignus est, properet, nimirum ad damnatorum supplicia. quæ supplicia num ad breve nescio quod tempus durabunt? minime, num ad longissimum, videlicet ad decies centena annorum millia? minime, verum ad multo plures. quam diu igitur acerbissimis illis doloribus excruciabitur? quam diu Deus existet, hoc est, in omni æterni temporis spacio. respondebat æger, vera ipsum loqui, propterea nihil esse in se moræ; itaque præiret, se continuo præeuntem secuturum. denique, multis verbis ultro citroque habitis, dæmon recessit; cujus abitu, æger recreatus, Deo, inquit, gratias, (hanc primum Christiani hominis vocem emisit,) discussis tenebris, sua demum menti lux rediit; centum amplius dæmones, impetu facto, mihi ad pedes advolarunt; unus, forma major ceteris, me faucibus arreptum, obtorta gula, secum conabatur abstrahere, multis præterea crinibus me esse affinem aiebat, unde longissime absum. tum coepit, interruptis ac morientibus vocibus, divinam sibi opem implorare, ac plura poenitentis atque adeo contriti animi signa præbere. at interrogatus à Parocho, num veller rursus peccata, quorum ineminisset, confiteri, respondit, id debilitatas fractasque jam vires non pati, neque ita multo post, identidem persans, excessit à vita.

CXV. *Quanto scelere se alligent, qui emptores decipiunt.*

Quamvis propositum sit nobis, ut diximus, ea tantum mandare huic nostro libro, quæ nostra, vel paulo superiore memoria, à nemine, quod sciam, litteris comprehensa, contigerint; attamen non arbitror alienum à proposito, quod legentium utilitatem in primis respicit, nonnulla etiam inferere, quæ in veterum libris, aliarum rerum multitudine quasi obruta, plurimorum notitiam effugiunt.

• Narrat

Narrat Mombricius in vita Sancti Bassani, Laudensis Episcopi, virum illum sanctissimum, cum Mediolanum se contulisset, venisse obviam deceptori cuidam, vendenti, quæ ad pondus non responderent, atque animadvertisse parvulum quendam Æthiopem, stateræ lanci hærentem, eandem deprimere; tum Episcopum rogasse eos, qui cum eo erant una, num illud idem acciperent oculis, quod ipsi pateret? respondisse illos, se non plus videre, quam cæteros, qui præsentés adessent; tum Episcopum dixisse, Quid igitur precibus parcimus? cur non impetramus à Deo, ut vos quoque visionis ejusdem participes faciat, quo res tam admirabilis, vestris etiam testimoniis clarior existat, ac meritis laudibus, divinæ misericordiæ vis magnitudoque efferatur? nec mora; in preces fusi, Clemens sacerdos, Elboniusque diaconus, perpaullum se Æthiopem intueri, clamaverunt. quamobrem Episcopus mendacem illum, in stateris suis, seorsum à ceteris eductum interrogavit, cur ponderibus falsis emptores deciperet. ille primo negare, à se quidquam dolose fraudulenterque committi; sed acceptis iis, quæ Deus salutis ipsius gratia demonstrasset, ad Sancti Episcopi pedes accidere, peccatum suum fateri, ejusque veniam orare. cui sapiens Episcopus, pœnæ loco, imposuit, ut, quod ipse unciatim emptores defraudans coëgisset, universum in pauperes erogaret. quod cum ille sine ulla mora fecisset, plenus spei lætitiæque, quodquam venerat, Dei in se clementiam commemorabat, ac suo alios exemplo admonebat, ne fraudes sectarentur, sed suum unicuique tribuerent.

CXVI. *Mulier ægra ex longo gravique morbo, D. Bernardini Senensis ope sanatur.*

Qua tempestate D. Bernardinus Senensis omnium ævi sui longe sanctissimus, Perusii commorabatur, eam, vitæ sanctitate & innocentia, ac præsertim notandis animadvertendisque hominum vitiis atque peccatis, probitatis opinionem sibi confecerat, ut esset omnibus exemplo atque miraculo, itaque singuli ejus se precibus

cibus commendabant ; quibus freti , omnia se à Deo impetraturos arbitrabantur. sed ex iis, qui in ejus opem confugerunt, mulier fuit vidua , gravi diutinoque morbo confecta ; hæc magnam in spem sanitatis venerat , si assequi potuisset , ut semel ejus vestes attingeret. hac igitur fiducia divinæ misericordiæ nixa , sancti viri vestibus manus admovit, easque pertractare cupidius cœpit. quæ res non mediocrem servo Dei animi permoti- onem attulit ; qui , præter eas quarum confessiones excipiebat , nullam ad se mulierem patiebatur accedere , vel sermones cum ipso conferre. sed cognita probata- que mulieris fide, captus misericordia, perfectam à Do- mino sanitatem eidem revocandam restituendamque curavit.

CXVII. *Idem S. Bernardinus, Perusii, ado-
lescenti, qui belli quam pacis studiosior exti-
terat, subitam mortem prædicit.*

Hic igitur vir sanctissimus , cum accepisset Perusii, dissensione inter cives orta, populum frequenter ad arma concurrere , manus conferere, ac magnam civium cædem facere , eodem accurrit , & concione advocata populum hortari ad concordiam cœpit ; & cum jam oratione sua popularium animos ad pacis studia pro- penfos agnosceret , Fiat , inquit, discessio ; quique pacis ociique sunt cupidi , in dexteram partem secedant ; qui- bus autem bellum magis est cordi , in alteram. & inven- tus est nemo , qui bellum paci, perturbationem ocio, antefendum existinaret , præter unum adolescentem nobilem , factiosum , qui fretus opibus divitiisque, qui- bus pollebat, perturbari ac perimisci omnia cupiebat ; hic solus , cum sua familia , in contrariam partem se contulit. cui vir sanctissimus , non sine cælesti aliquo mentis instinctu , Quoniam , inquit , belli quam pacis cupidior inveniris, nunquam fiet hodie, ut vivus pedem intro feras in domum. contempsit adolescens sancti viri dicta ; sed mox , ex eventu , nec inania nec falsa fuisse comperit , sed verissima atque certissima. nam inde dis- cedens,

cedens, ante quam limen ostii attingeret, exanimatus ante ades occubuit.

CXVIII. *Excommunicati cadaver vim olei, ex columnâ manantem, in perpetuum suppressit.*

MOs est Ecclesiæ, jam inde ab Apostolorum temporibus ductus, ut certis quibusdam criminibus evicti, nisi resipiscant ac mores emendent, Christianis sacris interdantur, templorum aditu prohibeantur, & à fidelium cæterorum communione congressuque removeantur. sed fit interdum, ut quibus ita interdictum est, non eos modo, homines congredi, adire, alloqui nolint, verum ipsa etiam terra refugiat, atque impiorum sceleratorumque numero habeat. nam alios, sepulturæ mandatos, foras excussit, & tanquam è complexu rejecit, alios ad se recipere noluit, alios aliis exemplis sibi quoque invisos execrandosque esse declaravit. illud vero admiratione ac memoria dignum, quod mox commemorabimus.

Erat, urbis cujusdam in templo, columna, è marmore facta, unde oleum, ad alendos lychnos qui ibi ardebant, large copioseque manabat. accidit, ut non procul ab eadem afficeretur sepultura vir quidam, hoc genere poenæ ab ecclesia damnatus; sed, tanquam si præcisis fistulis alio ejus olei cursus derivatus esset, aut penitus, deficiente humore, exaruisse; continuo illa vis olei constitit, neque amplius aliqua ejus gutta defluxit. ac nemo dubitat, quin eo defecerit, quod execrandum illud cadaver propinquum habuerit, atque ex ejusdem vicinitate, admirabilis illa columna eam quasi contagionem attraxerit.

CXIX. *Labores, quantumvis magni, si pro Christo suscipiantur, leves, contra iidem, quantumvis parvi, si eorum Christus causa non sit, graves videri solent.*

QUOD Deus perpeffionem malorum, quantumvis gravium ac difficilium, eadem in se transmittendo, leviora nobis efficiat, cum alias sæpe in multis, tum proximis his annis in captivo quodam apparuit, ex optima sanctissimaque religiosorum hominum familia. hic, cum navigaret, captus est à piratis, & Turcæ cui-dam in servitutem traditus; cui, quam multa, apud injustum & inclementem illum dominum, aspera & acerbata ferenda fuerint, dici verbis non potest; sed fiebat, nescio quo pacto, ut nihil fere laboris molestiæque ab ea sibi calamitate afferri sentiret, sed omnia, quantumvis gravia ac difficilia, levia quodammodo atque jucunda efficerentur: sed cum postea, piorum hominum liberalitate ac misericordia, redemptus, suis fratribus restitutus esset, ac nudis pedibus, ut est inos eorum fratrum, faceret iter, accidit, ut jacens humi spina alterum illi pedem non ita graviter læderet, doloris tamen, quamvis non maximi, impatientia commotus, querebatur, atque ut fit, plura, prope impotenter, efferebat. sed cum postea, sive pudore, sive religione aliqua, nimios illos animi motus repressisset, atque ad se rediisset, cœpit admirari, ac secum ipsemet quærere, cur acerbissimum servitutis jugum animo ita æquo tulisset, in unius vero spinulæ punctione tantopere commoveretur. continuo, tanquam divino aliquo animi motu impulsus, *Quid mirum est, ait, si illud mihi jugum leve videretur, quod Christus mecum pariter ferret, hoc autem tam leve malum gravissimum accadat, quod mihi soli ferendum est totum?*

CXX. *In rebus adversis, vim maximam, ad sui ipsius notitiam obtinendam, inesse.*

INter cæteras utilitates, quas adversæ res pariunt, ea in primis numeratur, quod, qui cum eisdem consistantur, ad sui notitiam revocentur, & intumescentem, seseque altius efferentem, animum detumescere, atque ad humum redire compellant. sed fit, ut omnes rebus secundis florere postulent, neque hanc utilitatem putent esse tanti, ut cum adversa fortuna quidquam sibi negotii esse contendant; sed postea, ab eadem comprehensi, quidque ea habeat in se utilitatis, experti, gaudent, gratias agunt, magnoque beneficio se esse à Deo affectos fateri coguntur, cum illud ipsis objecerit, unde res omnium utilissima, & in qua fere sunt omnia, hoc est, sui ipsius notitia, percipitur; secus enim, futurum, ut semper, in sui ipsorum ignorance detenti, fere nihil in vita dignum hominis ederent. quod quidem viri cuiusdam principis, ex Scotia, aliquot etiam provinciarum domini, intelligentiam non effugit. hic genere, uxore, liberis, summis præterea opibus ac divitiis præditus, cum ob fidei Catholicæ propugnationem, singulare cum quodam certamen iniisset, & graviter ipse in altera manu, & in capite vulneratus, adversarium occidisset, coactus est omnibus rebus amissis, nudus, inops, Romam profugere, supplexque ad Pauli v. Pont. Max. pedes accidere; qui Pont. pro paterna sua in omnes homines caritate, complexus est supplicem; ac primum pecunia juvit; tum hospitali cuidam religiosæque domui alendum tradidit, quin in singulos menses aureis nummis attributis, quibus privatam nobilis viri vitam tueretur, qua in domo, victu, vestitu, ac ceteris rebus modice habitus, duodecim ferme annos exegit, ea vitæ integritate & innocentia, ea animi æquitate atque patientia, ut esset omnibus exemplo. &, quod mirum videri debeat, quamvis aliena misericordia sustentaretur, pauperum tamen non obliviscebatur, sed illorum æque meminerat; semper enim aliquid sibi, suum defraudans genium, detrahebat, quod illorum inopiæ suppeditaret; neque,

neque, ex summo regalis fere vitæ fastigio in ultimum pene locum deturbatus, ullam unquam vocem emisit; quæ præsentis eum inopiæ pndere vel tædere significaret; immo sæpissime in gratiarum actionem erumpebat. etenim hoc maximum beneficium se Deo debere profitebatur, quod per eam rationem, suam ipsius cognitionem, antea sibi obscuram, tradidisset. qui demum, cum jam nonaginta prope annos expleisset, in morbum implicitus, susceptis Ecclesiæ Sacramentis, sanctissime ex hac vita decessit.

CXXI. *Spiritualis vitæ actiones, non ex nostro, sed ex patris spiritualis arbitrio, suscipiendas esse.*

Recte atque sapienter docet Apostolus, non esse cuiusvis spiritui temere credendum, sed quærendum diligenter investigandumque, unde ortum habeant, utrum à Deo, an aliunde; etenim ab eo, qui se transfigurat in Angelum lucis, eas sæpe cogitationes immitti, quæ, etiam spiritualium rerum peritos, in errorem inducant, plusquam necesse sit, experti didicimus. Ex iis, qui recti specie decepti, in dæmonis insidias devenerunt, fuit nostra memoria monachus quidam, ex familia S. Bernardi, quæ Romæ cœnobium habet, in thermis Diocletiani; hic, desiderio arctioris vitæ incensus, cœpit, summa vi, à superiore suo contendere, ut se ad Eremitas Camaldulenses transire permetteret; cupere enim se vehementer, ajebat, ab hominum conspectu usuque remotum, per rerum cælestium contemplationem, arctius Deo copulari atque conjungi. vir prudens, ac dæmonis artium non ignarus, hortari eum cœpit, ut ea cogitatione desisteret, quam decipiendi ejusdem gratia dæmon immitteret; posse enim, etiam in media turba, sibi secretum facere, ibique in contemplatione divinarum rerum hære, si velit. at ille, neque tam bene præcipientis consiliis acquiescere, neque admonitionibus credere, unum instare de initione, veheementerque contendere; qua demum impetrata, antea quam se penitus in

solitudinem abderet, tanquam voti causa voluit Laurentanam Ædem invifere. cum igitur alacris iter illud arripuiffet, in oppidum venit, mari propinquum, & ad cauponem divertit; & cum jam in eo effet, ut coenam intreret, pedem intro in cauponam tulit oppidanus quidam, ipfi ignotus, qui eum perquam familiariter falutavit, rogavitque quid ageret, quoque properaret; ille, nullas ab eo infidias metuens, nihil reticuit, at vafer ille, cum sermone blando, ac multa pollicendo, fe in ejus familiaritatem infinuaffet, Poftquam, inquit, nunc primum ad tuam amicitiam mihi aditus patuit, in fignum conciliati inter nos amoris gratiæque, invito te, in crastinum, ad pifcatum; capies enim voluptatem ex numero, varietate ac multitudine pifcium, qui capiuntur; poftredie, Deo bene juvante, te itineri atque labori recentem atque integrum dederis. ille, homini fidem habens, gratias egit, quoque ipfe vocaret, fe venturum promiffit. poftredie, ut erat constitutum, ad mare perveniunt, lembum conscendunt, ex litore folvunt; fed cum lembus longius in altum proveheretur, neque pifcator neque quifquam cum reti confpiceretur, cœpit fufpicari, fibi data effe verba, atque infidias parari; neque ab opinione fua deceptus eft; nam qui ipfum abduxerat, fibiſum edidit; id enim erat illi fignum cum prædonibus; ac repente piraticus myoparo remigio ad eos recta contendit; neque auræ, neque venti citius; quo animadverfo, rogabat deceptorem illum monachus, ac multis cum lacrimis exorabat, ut vorforiam caperet, ac revorforiam ad terram faceret. ille, quippe cui cum piratis conveniebat, non audire, atque ejus poſtulatam precesque negligere, immo adverſus eos lembum vehementius impellere. quomobrem piratæ lembum confequuntur, fiſtunt, intrant, & monachum pene exanimatum catenis onerant, & Epirum in ſervitutem abducunt; quem poſtea mercatori cuidam vendunt, qui rus hominem abegit & gregi equorum paſtorem cuſtodemque præfecit. paſcebat igitur equos, neque, ubi gentium locorumque eſſet, poterat ſcire; jamque menſium ac dierum rationem oblitus, non quibat dies feſtos à profefſis internofcere. verum, die quodam, cum equos, ut conſueverat, paſtum duxiſſet,

set, collem inscendit, unde erat prospectus in mare; tum vero in spem libertatis erectus, cogitare cœpit de fuga; nec mora, postridie, rebus aliquot convasatis, citato equo illuc contendit, & ad mare descendit, ac forte onerariam Venetorum navem, præter litus vela facientem, aspexit; tum ille, plenus spei latitiæque, voce, pallio, ut accederet, significavit. vectores, rati id quod erat, Christianum esse aliquem, qui in potestatem barbarorum venisset, ac vincula rupisset, continuo onerariam ad litus impellunt, hominem adeunt, rogant, quis sit, unde sit; ubi Christianum esse hominem monachumque comperiunt, ac barbaro homini à piratis venditum, navi tollunt, ac Venetias deportant; ubi, piorum aliquot benignitate, vestitu ac viatico sublevatus, primum Anconam, tum Romam, perrexit, ac satis jam satis suo exemplo edoctus, quid sit periculi, sui ipsius regendi habenas sibi arrogare, neque eas perito superiori permittere, quem divinæ interpretem voluntatis sibi delegerit, consilium illud, ad Eremitas transeundi, contempsit, atque in ea familia permanere constituit, in quam ab ineunte adolescentia, non sine cælesti mentis instinctu, sese dedisset. itaque ad cœnobium suum se contulit, ad superiorem aditum petiit, cujus conveniendi potestate facta, eidem ad pedes accidit, & multis cum lacrimis, quidquid sibi adversi accidisset, aperuit. ille, ut pium decebat patrem, ejusdem miseris illacrimans, iussit afferri stolam primam, eaque illum induit, & sicut antea, filiorum numero habuit.

CXXII. *Virginibus, ac Deo sacris præsertim, periculosam esse, nimis scite eleganterque canendi rationem, si ea, secus quam deceat, utantur.*

S Altandi, recteque canendi, tum voce tum fidibus, artes, quam mulieri sint inutiles ad pudicitiam tutandam, vel, ut recte quidam dixit, quam magna sint instrumenta luxuriæ, clam est, ut arbitror, neminem. quæ artes cum virginibus omnibus sunt indecoræ, tum maxime iis turpes, qui se in aliquam sacrarum Dei vir-

ginum domum, voti gratia, dicarunt, si in iis se gloriæ & ostentationis magis, quam Dei cultus & honoris causa exerceant; sæpe enim hoc illis fœde atque infelicitèr cadit; ut de quadam, nostra hac memoria, narratur. Est Florentiæ cœnobium, ex virginum nobilium flore magna ex parte collectum, quarum aliquæ, mûsicæ arti studiosius operam dabant, non tam ut ea in rebus divinis uterentur, quam ut, cantiunculis cantitandis, viros ad se venientes oblectarent; quo fiebat, ut magnus quotidie eorum numerus, adolescentium præsertim, sacram illam domum frequentaret. verum ceteris una, & canendi artificio, & vocis suavitate, &, quod refert, formæ elegantia orisque venustate, longo intervallo antecedebat; in hac vehementer exarserat juvenis quidam, nobili genere natus, multis literis, iisque reconditis, præditus, miræ ad poësim indolis; qui multa, tum soluta tum numeris adstricta oratione, præclarè in lucem ediderat; sed ingenio malo pravoque; quippe qui multorum erat sibi facinorum conscius, atque olim, se vidente, passus erat domi suæ, à duobus sicariis, per insidias, notum quendam caussidicum precio necari; quin etiam ipse, concubia nocte, interfecti corpus in cloacam urbis quandam deferentibus, cererum illuxerat; quod erat argumento, in partem auri, quod pro capite illius fuerat repensum, eum venisse, inopia fortasse coactum, quod à parentibus relictum, totum ferè libidines dissipasset, atque, conjectus in vincula, una cum aliis duobus, qui innocenti illi mortem intulerant, supplicio fuisset affectus, nisi potentiorum amicorum opera, quibus erat ob ingenium apprime carus, illud evassisset; at quanto amici illi rectius æternæ hominis saluti consulissent, si à sua ope auxilioque destitutum, passum cum essent, pœnas legibus dare; piis enim eorum sermonibus, qui supplicio afficiendis adsunt, sublevatus, non sine pœnitentia excessisset è vita. nam aliquot post annos, crimine prodicionis evictus, dum bidui, nescio quod flumen, navigio trajicit, est interfectus. hic igitur, virginem illam amabat; verum ejus amor intra verba tantum obrutusque continebatur, neque ad rem se se conferebat; qua consuetudine fruebatur, ut cum maxime,

me, tum cum re necessaria coactus est Romam proficisci; & quia ægre ab ea divellebatur, tanquam amoris sui vicarium, amicum intimum, & quasi alterum se, illi reliquerat, ut, cum eo cùm esset, secum se esse existimaret, cum eo sermones cùm sereret, cum ipso absente, se loqui arbitraretur. at ille, qui relictus fuerat, plus quam amicus imperaverat, fecit; nam in ea diligenda non amici personam, sed propriam gessit, non vicariam illius operam, sed peculiarem mulieri suam exhibuit. etenim, & egregia illius forma, & mira vocis cantusque dulcedine, & liberali consuetudine, victus est adeo, ut mori videretur, qua hora procul ab ea vitam exigeret. itaque in ea convenienda frequens erat; sermones ad multas horas cum ea producebat, & vix, noctu divelli ab ejus colloquio poterat. quæ res cum ad Episcopum aliosque superiores permanasset, statuerunt, nihil prius opus facto esse, quam malo huic, ne serperet longius, occurrere, ac juvenem, quantum potest, ab illius cœnobii aditu vestibuloque repellere. quod factum est statim; sed, num ea interdictione deterritus, post hac amari obsecutus est minus, aut cœnobio illo abstinuit inagis? immo multo acrius ac vehementius exarsit, & secretiore via locoque, à custodibus auro corruptis, ad colloquium admissus, totos cum ea dies, & partem etiam nocturnam conterebat. verum hæc quoque via, superiorum vigilantia, interclusa est, atque obstructa, & custodes positi, ne ille interdum cœnobii limen intraret. itaque, amore ardens eo processit amentia, ut, maximiis propositis præmiis, per eos egerit, quibus ostii claves commissæ erant, apud quos antea se intimum fecerat, quo sibi noctu fores aperirentur, ac pateret ad virginem aditus. at quod est oppidum tam clausum, tamque munitum, quod non expugnet pecunia? donis, ac dona perpetuando, perfecit, ut quidquid ibi esset janitorum, torum haberet in potestate, & ab eisdem, clam omnes, in cellam virginis admitteretur. sed quia, ut Salvator noster inquit, *nihil est opertum, quod non reveletur, nihil occultum, quod non sciatur*, quædam ex aliis sororibus, quibus erat in priinis molestum, tanto illam apud omnes esse in amore & gratia, cœperunt insidias illi lo-

care , & clanculum animadvertere , quemadmodum
dissidium ejus ferret , à cujus , non modo consuetudine ,
sed etiam congressione prohiberetur ; ac nocte quadam ,
earum uni venit in mentem , cubiculi , ubi ipsa cubabat ,
ostio anres admove , ut nosset , num quod , ex aman-
tis desiderio , peteret alte suspirium , vel inclusus in pe-
ctore amor , in lacrimas ac voces erumperet ; atque duo-
rum , inter se colloquentium , visa est voces audire , &
rata id quod erat , esse ibi virum , cujus illa amore capta
detinebatur , arripit repente sese subito , ad Abbatisam
advolat , altiori sopitam somno magnis clamoribus ex-
citatur , ac , Fero , inquit , ad te flagitium ingens , atrox ,
bonæ illius mulieris , quam nuper tanto labore à viri ,
cujus erat cupida , consuetudine amicitiaque distraxi-
mus , (facinus indignum ,) nunc , contra cœnobii leges ,
contra edictionem illi habitam , contra jus fasque , in cu-
biculo eum suo habet inclusum ; veni , & quod à me au-
ribus accipis , tuis ipsa oculis arripe . Abbatisa miratur ,
quærit , quis fores aperuerit , quis , inter se illos conve-
nas fecerit , currit , per vim fores aperit , intrat , inopi-
nantes opprimit , male verbis accipit ; tum vinclos ma-
gistratibus civitatis tradit ; apud quos etiam agitari res
cœpit . quod ubi perlatum est Romam , & ad ejus , qui
amicitiam inter illos duos conciliaverat , aures accidit ,
vehementer commotus , summa ope succurrendum illis
esse constituit ; ac primum omnia sua studia , omnem
operam , curam , industriam in eo locavit , ut Romæ , ubi
ipse erat graciosus , causæ cognitio deferretur ; id quod
est adeptus ; tum vehementius etiam laboravit , ne quid
in eos gravius statueretur , hoc est , ne pœna capitis affi-
cerentur ; quod etiam impetravit , eoque facilius , quod ,
quæstione habita , iudicibus liquere non potuerat , præ-
ter verba , rei quidquam aliud inter ipsos fuisse , & Ab-
batisa non in lecto cubantes eos , sed sellis seorsim com-
mendatos , inter se colloquentes offenderat . decretum
est igitur , ut uterque perpetuis tenebris vinculisque man-
daretur , & illa suo in cœnobio , hic in ima aliqua turri
concluderetur ; sed aliquot post annos , amico illo adni-
tente , rursus ex illis vinculis ac tenebris in libertatem
ac lucem sunt revocati .

CXXIII. *Adolescens, quodam in horto inclusus, adeo ut nulla exitus ratio esset, D. Virginis ope mirabiliter foras egreditur.*

QUOD, in rebus dubiis atque asperis, tutissimum sit nobis perfugium in B. Virgine, multis sæpe in laboribus atque periculis præsens auxilium ejus oblatum ostendit. quam inultos catenis & compedibus vinctos, quam multos, custodiis ac munitionibus clausos ac septos, ex vinculis, ex carceribus, ex hostium manibus eremit, & in libertatem eduxit? quam multos insidiis inimicorum expetitos, atque adeo interclusos, ex ipsis faucibus mortis eripuit! sed, proximis diebus, auxilii sui vim declaravit in puero, filio cujusdam, qui templorum januas festa myrto coronandas redimit. is se in hortum contulerat, Velabro proximum, florum legendoram causa, quibus B. Virginis aram in templo Pacis ornaret cumulareque; sed inconsultius ibi moram agentem nox oppressit, & quod gravius est, spes exeundi deseruit; nam & clavis intra seram effracta, & perpetua circumdata horto maceria, nullum ad egrediendum exitum dabat. quamobrem timore perterritus, ne cogeretur nocte perfrigida pernoctare sub dio (nullum enim ibi tectum continebatur, quo se reciperet) & simul parentum curâ sollicitus, qui, rei totius ignari, ex filii desiderio sumnam essent sollicitudinem accepturi, discruciabatur animi, tantum, ut neque quid ageret, neque quid consilii caperet, certum haberet. sed cum jam terras nox opacasset, neque in humanis auxiliis spei quidquam esset relictum, statuit in ejus Virginis opem confugere, cujus honoris gratia se in eas plagas indidisset. non defuit orantis votis ac precibus Virgo; nam continuo, adolescente ipso mirante, &, præ gaudia, ubi esset, nesciente, lignea maceriae scala incumbens apparuit; per quam cum hilaris ac spei plenus ad sumnam maceriam pervenisset, alia rursus solitudine oppressus est, cogitans quemadmodum inde descenderet; altior enim erat maceria, quam ut in viam posset se saltu de-

mittere. sed eadem virgo beneficium, dudum à se initum, nova re alia ac mira perfecit, atque alias adolescenti scalas, in alteram maceriarum partem inclinatas, objecit, per quas ille descendens, protinus in templum Patris, ad agendas Virgini gratias, lætus accurrit.

CXXIV. *Summam vitæ sanctitatem ab eis
exigi, qui sacris initiari desiderant.*

EA in sacerdotibus, iisque, qui sacris initiari volunt, sanctitas & integritas vitæ requiritur, quæ (quoad mortali homini fas est) proximè ad divinam accedat. *Sancti*. Deus inquit, *estote, quia ego sanctus sum.* quo fit, ut qui secus, quam Dei ministros deceat, ad id munus accedunt, ea interdum calamitate feriantur, qua illis omnis ejus honoris capeffendi obeundique facultas tripiatur.

Pluribus ab hinc annis Bononiæ, in iis, qui in eo gymnasio rei litterariæ operam navabant, Diaconus erat quidam, cujus vita, in multis inquinata flagitiis atque sceleribus, quovis supplicio potius digna erat, quam sacerdotis honore ac munere. hic die quodam, animi causa, in agrum exierat, & socii cum eo aliquot, scloppis ad aucupium instructi; quo cum venissent, cœperunt suos singuli sclopos explodere, sed sclopus Diaconi, ignem non concepit; quod ille facti è sulphurei pulveris inopia ortum existimans, alterum tantum superiorem ad pulverem adjecit; sed cum sclopus vim ignis ferre non posset, disruptus est, ac plures distractus in partes, quarum una alteram illi manum graviter vulnificavit, ac duos ab ea digitos abstulit; ex quo contigit, ut ad animi vicia, quibus abundabat, quibusque in primis carere debebat, illud quoque corporis viciū accederet, quo à sacerdotis locupletis ministerio in perpetuum excluderetur, cujus ampla vectigalia jam animo devoraverat, ut ex iis posset, in summa nequitia, large luxurioseque vitam exigere.

CXXV. *Dies*

CXXV. *Dies festos, non in opere faciendo, sed in divinis laudibus, aliisque pietatis operibus, esse traducendos.*

QUod dies festi, Dei & Ecclesiæ præcepto, sacris rebus ac divinis obeundis consecrati, in iis, quæ ad Dei cultum pertinent, exercendis, traducendi sint, non autem in opere faciendo terendi, ut de aliis taceam, aratoris cujusdam exemplo docemur. arabat hic, de quo loquimur, in agro Casertæ proximo, jugera aliquot, ac die D. Andreæ Apostolo sacro atque solemnî, totus erat in iis excolendis conferendisque; admonitus est ab oppidanis prætereuntibus, ut opere desisteret; eo enim die D. Andreæ Apostolo natalitia dari, cui eum honorem cultumque oportere tribui, qui esset tanto Apostolo dignus, contempsit ille, & contumacibus sane verbis, Quid ad me, inquit, D. Andreas cum suis piscibus attinet? hic me agellus, non ille vel alius quispiam Apostolus, alit. non abstulit impune hoc dictum, tam impium tamque superbum. nam semen, ab eo sparsum & occatum, primum quidem è terræ gremio in herbam erupit, tum in stipulam fastigiatum apparuit, postremo ad maturitatem, hoc est ad spicas, pervenit, sed in quibus nihil præter aristas, & inanes quasdam tunicas, piscem olentes, conspiceretur, cum reliquæ ejus agri segetes, spicas, tritici granis, candore & pondere præstantibus refertas, extulissent. quo quidem exemplo, visum est Deo, nos admonere, ne in iis, quæ ad necessarium usum pertinent, nostræ industriæ sollicitudinique magnopere confidamus. etenim eum, qui totus in se ipso nititur, neque à divina providentia prorsus dependet, cælesti præsidio nudatum, etiam ab ipsa natura destitui.

CXXVI. *Solum pii cujusdam viri prædium communis aliorum omnium calamitatis expertus existit.*

Longe huic dissimilis alter extitit, ex castello quodam, Lurbi propinquo, cujus nomen, multa me adhortantur, ut reticeam. hic D. Gregorium Pont. Max. præcipuo quodam honore cultuque prosequebatur, ac die ejusdem festo, quotannis solemne eidem sacrum faciendum curabat, in quo se, familiam, & prædiolum quoddam suum, ejus tutelæ patrocínioque commendabat. sed contigit, annis ab hinc aliquot, circiter vindemiæ tempus, ut in ejus agri vineas maxima vis grandinis rueret, adeo ut omnem fere ejus anni vindemiam interciperet; quod ibi propter eorum hominum avaritiam sæpenumero accidit; nam fama est, eos aquam vino miscere, ac mistum pro mero divendere. accurrit ille, exanimatus metu, ut prædii sui calamitatem aspiceret; sed præter expectationem invenit omnes circa ipsum vineas, grandinis impetu verberatas, suum autem prædium prorsus ejus calamitatis expertus extitisse; neque dubitavit, viri sanctissimi ope, in cujus tutela patrocínioque latebat, vim illam tempestatis à suo prædio fuisse depulsam.

CXXVII. *Franciscani cujusdam, valetudinario præpositi, anima in cælum migrare conspicitur.*

Quidquid laboris sollicitudinisque in procurandis ægrotis infumitur, totum sibi tribui Christus existinat, idque, post hujus vitæ cursum, amplissimis præmiis honoribusque prosequitur. etenim, supremi judicii die, præmia ac pœnas, pro cujusque merito, persolurus, iis, qui ejusmodi pietatis operibus studium suum dederint, se dicturum affirmat, *Infirmus eram, & visitasti me*, iisdemque, præ gaudio, admirantibus & rogan-

rogantibus, ecquando ægrotanti ipsi suam præstitissent operam ac pietatem. responsurum, *Quod uni ex minimis meis fecistis, mihi fecistis.*

Est in oppido Italiæ Fratrum Franciscanorum cœnobium, eidemque sacra ædes adjuncta, D. Honufrío dicata, ubi, per annos complures, F. quidam Ioannes cœnobii ejusdem valetudinario cum summa pietatis diligentiaque laude præfuerat; sed demum ipse quoque in morbum incidit, quo, brevi consumtus, laborum simul vitæque cursum absolvit. ægrotabat, per id tempus, puella non humili loco nata, quæ paulo post etiam interiit; hæc, sublata voce, cœpit ex tempore dicere. Frater Ioannes, Frater Ioannes, quo abis? inane, mane, innox te persequar; ne properes. quod mater admirans, nondum enim aliquid de Ioannis interitu aures ejus acceperant, misit ad cœnobium, qui de illius statu investigarent atque perquirerent; ac reversi renunciarunt, eadem hora eodemque temporis puncto eum expirasse, quo puella in cælum evolantem aspexerat; quæ, non ita multo post, suis illum vestigiis est prosecuta.

CXXVIII. *Insignis quidam blasphemus, in jugulo vulneratus, occiditur.*

CVm mihi semper improbi, semperque flagitiosi, visi sunt ii, qui, nullo Dei timore perterriti, tradunt se libidinibus constringendos, tum ii omnem, non modo improbitatem, verum etiam immanitatem superare videntur, qui, nulla plerumque de causa detestabiles in Deum execrationes & maledicta conjiciunt; quo fit, ut rato ejusmodi hominum genus, etiam hujus vitæ tempore, debitas ipsorum impietati pœnas effugiat; sicuti in eas quidam incurrit, qui, paucis ante annis, Florentiæ in jugulo transverberatus interiit. hic in jaciendis mittendisque diris in Deum execrationibus adeo erat assuefactus, ut, etiam nemine lacessente, lingua ipsa sua in eis sponte laberetur. quapropter ejus mortem, magis ad Dei vindictam, quam ad aliquam adversarii ejusdem vim referendam esse, omnes existimant. etenim ille, qui

qui cum controversiam habebat, erat timidus, ignavus, lingua magis quam manu promptus, præterea ob dicacitatem, vel potius scurrilitatem, qua nullius neque famæ neque dignitati parcebat, in summo suorum civium odio atque contemptu; contra ipse, strenuus, acer, truculentus, & tractationis arinorum longe peritus, ac multis carus & acceptus; neque tamen, cum haberet hæc omnia superiora, victor è pugna discessit. rixæ causam dederat blasphemi istius servus, ab ignavo illo atque procaci, inale verbis acceptus; qui cum, aucupii causa, cum sclopo in illius fundum esset ingressus, ab eoque deprehensus, iussus erat domino suo renunciare, ut si deinceps passus esset, quemquam servorum suorum eum in agrum pedem inferre, continuo se tum servum, tum dominum, usque ad necem verberaturum. quod ubi violentus ille rescivit, non tulit, & graviter exarsit, deditque operam, ut quam primum hominem inveniret; repertumque in foro, ita acriter, stricto in eum gladio, invasit, ut debilitatum metu, ac popularium fidem nequidquam implorantem, (nemo enim erat, ut dixi, qui non eum extinctum cuperet,) recedere, seque post columnam occultare coëgerit. sed dum, amenti similis, dirasque in Deum blasphemias evomens, eundem acrius insectatur, in pugionem, quem ille quoquomodo se tuendi causa sublatum gestabat, jugulum induit, ac tantum inde sanguinis effudit, ut statim sit mortuus. neque quisquam dubitat, quin divino consilio in ea potissimum corporis parte vulneratus sit, unde diræ illæ in Deum execrationes prodibant; sicut nemo dubitat, quin cædis illius eventus referendus sit ad divinam iustitiam, non ad aliquam adversarii virtutem; nam ille, cum feriebat, exanimatus metu, prorsus ubi esset ignorabat; immo ab animi atque corporis viribus destitutus, ægre per manus delatus est in proximum ibi templum, ibique aceto aliisque fomentis animus, qui eum liquerat, ad vitæ munera revocatus. Hæc à viro optimo mihiq; amicissimo, Hieronymo Vbertino, patrio Florentino, accepi.

CXXIX. *Mulier vidua à Deo impetrat, ut pallii, quod concinnaverat, vitium ignoretur.*

Mulier paupercula, Olympia nomine, olim notissimo Romæ sarcinatori nupta, non sine lacrimis sæpe commemorat, quod cum vir suus decessisset, nec sibi quidquam præter quatuor liberos reliquisset, sua eos industria, parce ac duriter, una secum alebat. sed quamquam dies noctesque operæ ac labori non parceret, eo interdum inopiæ redigebatur, ut, cum panis deficeret, neque esset unde emeret, caulium aliorumque olerum thyrsis, suam liberorumque famem sustentaret. at cum sarcinator quidam preciosum ipsi pallium, patricii cuiusdam, consuendum detulisset, accidit, ut operi intenta, alterum ejus caput, in ardentes prunas demitteret, quas, depellendi frigoris causa, ante pedes sibi subjecerat; quod statim ignem comprehendit, latamque sphericæ formæ foramen contraxit; quod ubi illa animadvertit, quantam vim lacrimarum dederit, quam multas, quantoque animi ardore incensas, Deo ejusque genitrici preces effuderit, quid me attinet dicere? res est ejusmodi, ut satis verbis explicari non possit. nam si, quidquid domi ipsi erat, vendidisset, vix damnum, quod dederat, redemisset. ad hæc, nulla ejus saltem sarcinandi spes reliqua erat; nam materies unde illud pallium constabat, Luca advecta, in vestiariis urbis tabernis non reperiebatur. interim sarcinator adest, pallium poscit, accipit, explicat, aspicit, tacet, subintum sericum indnit, in eodem silentio manet; tum domino illud reddit, qui itidem explicat, inspicit, laudat, ac manu precium exolvit. mulier, ubi videt, neminem queri, animum recipit, atque ingentes Deo gratias agit, qui illorum oculos avocasset, ne vitium, sua culpa contractum, animadverterent.

CXXX. *Maledica mulier, ejecta lingua, moritur, & sepelitur.*

ERat Galleſii mulier adeo infreni lingua atque mordaci, ut nulla eſſet illi voluptas major, quam aliorum exiſtimationem mordicus carpere, idque vel plurimum, nullis impulſa inimicitiiſ, nullis laceſſita injuriis, nullis præmiis adducta, ſed, naturali tantum inclinatione, ad id incitata rapiebatur; neque ullis amicorum admonitionibus, vel ſuperiorum objurgationibus, à prava illa conſuetudine revocari potuerat; ſed demum, lethalem in morbum conjeſta, fuit popularibus ſuis exemplo, ne temere in aliorum exiſtimationem invaderent. nam ſtatim uſum vocis amiſit; videlicet, ut mea fert opinio, ne ea lingua, quæ aliorum famæ non peperciſſet, per confeſſionem peccatorum, Deum ſibi parcere cogeret; neque ita multo poſt, una cum anima, linguam foras eiecit. itaque ejecta lingua, ita ut erat, elata, mordacitatis ſuæ obvius adinonebat, qui etiam, in meritam maledicæ illi gratiam à Deo relatam eſſe, affirmabant.

CXXXI. *Mulio quidam, à dæmone, cui ſe dederat, rapitur.*

ANus, prope decrepita, narrabat, olim patri ſuo inſignem ſub onere mulum interiſſe, at illum, ſive doloris impatientia, ſive quod nihil Deum vereretur atque metueret, (nam plerumque huic generi hominum, qui jumentis agendis vitam agunt, nihil fere hominis eſt, præter figuram ac ſpeciem,) magna voce dæmonem arceſſiſſe, ut ſe arriperet, atque una ſecum abſtraheret; tum dæmonem forma horribili præſto fuiſſe, abreptumque hominem medium, ipſa inſpectante, & clamores maximos edente, foras per fenestram abduxiſſe; ad ejus clamores, concurſus vicinorum factos eſſe, atque, re cognita, ab eorum uno in tutelam receptam, nam tum erat quinquennis, ac filix loco habitam; poſtremo, ſuo tempore, honeſto cuidam viro in matrimonio collocatam.

CXXXII. *Declamator quidam, falsæ suspitionis causa, occiditur.*

VItain hominis mortalem ac miseram, innumeris, ut B. Iob inquit, refertam esse calamitatibus atque miseriis, perspicuum est adeo, ut orationis luce non egeat. etenim, nisi quolibet temporis puncto à divina ope tanquam vallo muniamur, à pluribus nos animi corporisque malis sit invadi necesse. quis crederet, honestas ac laudabiles cujuspiam actiones posse ab altero in suam contumeliam ac dedecus rapi, eique, qui ob eas dignus erat honore ac præmio, damnum & interitum parerè? at istuc etiam Anconæ, anno MDCXXXV, usu venisse comperimus. est ibi, quemadmodum etiam Romæ, & in aliis illustribus ac celeberrimis Italiæ locis, eruditorum quorundam hominum conventus, quem Academiā vocant, ubi præclara illa ingenia, ad poësin atque ad alia ejusmodi humanarum artium studia, sese exercent. declamaverat ibi adolescens, in primis nobilis; thesis fuerat, an filius improbus, atque damnosus, jure à patre exheredetur; cumque à propriis personis atque temporibus controversiam, more rhetorum, avocasset; defenderat, qui esset ejusmodi, bonis illum patriis, recte multari. adfuit ibi forte, vel id ab aliis, quæ adfuissent, audivit, adolescens item nobilis, quem parens, ob flagitia, exheredem bonorum suorum fecerat; qui totam illam controversiam ex sua causa ortam existimans, graviter exarsit, ac declamatorem illum ex improviso adortus, per frontem stylo transfixit, ac mortuum ad terram abjecit. quamobrem cum possit etiam ex recte factis in damnum vel malum incurri, cui non sit perspicuum, nisi Deus adsit, neminem satis esse paratum ad cavendum, ex Davidis sententia, qui, nisi, inquit, Dominus custodierit civitatem, inanes ac supervacuas eorum vigilias esse, qui in præsidio, ad defendendam urbem, sunt collocati.

CXXXIII.

CXXXIII. *Celebris quidam mimus, ex scur-
rili dicto, ab adolescente, qui se eo dicto lace-
ratum existimabat, per dorsum in scena trans-
figitur.*

QUod satius sit, non cognoscere viam justitiæ, quam post agnitionem, ut inquit Petrus Apostolus, retrorsum converti, ostendunt exempla, in eos edita, qui de tenebris vocati in admirabile lumen gratiæ, rursus ad opera tenebrarum revolvuntur ac recidunt. sed illud in primis formidabile mihi videtur, quod anni **MDCXXXIV** mense Ianuario, famoso cuidam mimo contigisse narratur. hic, de sæculo translatus à Deo in celebrem religiosamque familiam, hoc est in sortem ac societatem sanctorum, primum turpiter ab ea defecerat; tum captus amore infamis cujusdam mimi, matrimo-
nii eidem vinculo se devinxerat; postremo, turpitudini turpitudinem addens, dederat operam, ut in eum gregem admitteretur, in quo ipsa numerabatur. cœpit igitur in scenam prodire, ac doctoris stulti ac scioli partes agere; qui, ut erat ingenio ad eam rem apto, ac liberalibus disciplinis exculto, non minimam laudem merebatur; si laus ea est appellanda, quæ turpi atque inhonesta ratione colligitur. verum cum, die quodam, Florentiæ, ut diximus, in scenam productus, doctoris partes egregie tueretur, dictum, sane facetum, sed mordax emisit, quod visum est, adolescentem nobilem in primis carpere; neque aliter ille cum adesset, quam sibi dictum accepit. quapropter elatus iracundia, de inferenda homini nece cogitavit; sed interim dolorem suum dissimulans, tacite se post scenam intulit, eductoque gladio infelicem illum per dorsum transjecit; quo ex vulnere, ante spectatorum oculos, mortuus concidit, desertæque vocationis pœnas Deo dependit.

CXXXIV. *Veru, laqueari suspensum, decidens, cauponi jugulum trajicit.*

Quod genus hominum, quibusque præditum moribus sit, improba cauponum natio, editæ in eos leges & Principum edicta declarant, quibus eorum libido avaritiaque compescitur. sed ex ceteris vitiis, quibus abundant, principem locum obtinet fraus, perjurium, & linguæ procacitas, quæ interdum etiam ad execrabiles in Deum blasphemias precesque prolabitur; quo fit ut sæpe ab ipso Deo, vel miserabili morbo, vel morte, vel aliqua alia insigni calamitate, feriantur. quæ cum ita sint, horribile est illud, quod anno MDCI meis ipsemet oculis vidi.

Erat eo tempore Romæ vetus ac celebris caupona, quæ quoniam signi gratia, pictum in scuto solem præferabat, Solis nomine vocabatur; & quia magni popinorum ad eam concursus fiebant, caupo semper plures ad culinæ munia conductos habebat; quorum unus, ceteris fortasse deterior, cum, die quodam, bene mane surrexisset, ut obsonia curaret, & ad ignem apponeret, lignea in sella confedit, colloque reflexo, sopori se tradidit. horrendum dictu, veru, quod una cum aliis multis è laqueari pendebat, sponte divulsum, ac recta decidens, jugulum eidem trajecit, ac misere vitam ademit. id, quemadmodum dixi, licuit mihi oculis accipere, quod habitabam ibi vicinæ.

CXXXV. *Magnam in se vim mali sæpe eos attrahere, qui aliis libidinis materiam obijciunt.*

Qui re, opera, auctoritate, consilio, alios ad peccandum inducunt, celerem sæpe ipsi mortem incurrunt. quod merito illis evenisse existimatur. nam qui animabus necem inferre conantur, præter æterna supplicia, non alia magis quam mortis poena digni videntur. atque, ut veteribus exemplis supersedeam, an-

no MDCXI quidam, cæteroqui vir prudens ac probus, quique liberos, quos susceperat, quam optimos esse cupiebat, in hanc fraudem incidit. erat huic cum viro quodam principe vetus consuetudo atque necessitas; cuius etiam negocia, quæ erant maxima atque gravissima, procurabat. accidit, ut ejus frater, summa spe præditus adolescens, Romam veniret; itaque dat ille statim amico cuidam suo negocium, ut domum, familiam, rhedam, atque alia, ad domesticum usum necessaria, inveniat; præterea imperat, ut noctu scortum illi quoddam adducat, quod tum erat imprimis potens, magnificentum, sumptuosum, ac nobile. quæ res mihi, admodum adolescenti, visa est non satis decora, id ætatis homine, ejusque virtutibus; ac mirabar, ea illum adolescenti facinora objicere, unde eum potius avocare debuerat. sed voluit nimirum comis & urbanus videri. etenim meretricum domos celebrare, sumptum facere, ælea ludere, scortum ducere, comitas habetur; neque ejusmodi res minus in permissis rebus atque concessis numerantur, quam esse ac bibere; tanquam si non modo oporteat, verum etiam necesse sit, adolescentem parere voluptatibus, & dare aliquod tempus ad ludum ætatis. sed cito poenas dedit. nam fere in diebus paucis, quibus hæc acta sunt, in febrim incidit; quæ primo visa est levissima, neque aliquem metum ostendere, sed statim ita periculose ægrota- re cœpit, ut medici diffiderent, dieque septimo, cum maximo familiæ suæ damno, mortem obierit. atqui mirum erat omnibus, optima valetudine hominem, firmissimo corporis habitu, in victu & in cæteris rebus temperantissimum, tam cito fuisse sublatum. sed mihi, qui eram conscius, quanto ille scelere se obligasset, nullam, ejus celeritas mortis, admirationem incussit.

CXXXVI. *Miseros, non esse illudendos; posse enim eundem casum, atque etiam gravio- rem, ad nos recidere.*

Sunt quidam ingenio adeo malo, adeo immani, adeo truci, ut rebus aliorum adversis delectentur & gau-

& gaudeant. videlicet, si quem uspiam gravi aliquo ictu ad terram dari, aut vulnerari, aut in re familiaris, aut in existimatione damnum vel labem cernunt excipere; continuo illam ejus calamitatem irrisione dignam existimant. sed derisores ejusmodi raro crudelitatis suæ poenas effugiunt. nam ipsi plerumque longe majori infortunio mactantur, quam illud fuerat, quod in altero illuserant irriserantque.

Superioribus annis, juvenis quidam, una cum sociis aliquot, rheda vehebatur; cumque, re quadam necessaria coactus, vellet descendere, à rhedario impetrare non potuit, ut rhedam sisteret; quamobrem saltu se in terram ejecit; sed homo, non aptissimus ad saltandum, non potuit casum & prolapsionem effugere; quem ubi unus ex sociis humi jacentem aspexit, continuo eos cachinnos extulit, eam lætantis exultantisque animi significationem præbuit, ut si lepidos aliquos ludos aspexisset; neque illo die aliquis ab eo ridendi jocandique finis est factus. verum cum, paucis ab eo die mensibus interjectis, idemmet ille derisor vellet rheda pedem efferre, à suis ipsius vestibibus impeditus & supplantatus, afflictus est humi, casu adeo gravi periculosoque, ut brachium fregerit; atque haud scio, an ille æquo animo sustinuisset, ita casum suum irrideri, ut ipse alienum illuserat.

CXXXVII. *Vindicandæ injuriæ partes non esse à nobis usurpandas, sed totas in Deum rejiciendas.*

Summa divinaque ratione à Deo præcipitur, ne damno vel contumelia affecti, vel injuria lacesciti, odia inimicitiasque suscipiamus, & acceptas injurias persequamur. solus enim has sibi partes Deus vindicat, ad quem omnis, tum judicandi, tum poenas ac præmia constituendi, potestas redit: ille se injuriarum nostrarum ultorem fore profitetur. Verùm vindictæ mora atque dilatio efficit, ut hanc nobis provinciam arrogemus. etenim (quæ nostra est elatio animi atque superbia) statim eorum supplicio cupimus oculos pascere, quorum

in nos cupiditatem atque perfidiam sumus experti. sed Deus, qui est patiens redditor, præsentis fraudis pœnam in diem reservat, sed pœnæ dilationem, supplicii magnitudine gravitateque compensat. Ego, tanquam me, novi, quem improbi ac nequam homines duo perpetuo exercebant, quorum unus omnibus eum injuriis & contumeliis insectabatur, alter iniquissimis litibus divexabat: verum eos ille adeo non oderat, adeo de referenda hominibus improbissimis gratia non cogitabat, ut etiam quotidie pro illis Deum deprecaretur, & insectationes illas atque injurias, non ad illorum hominum improbitatem, sed ad justam Dei in ipsum iram, referebat, & iniquissimis illis tanquam Dei ministris, prope dixerim, honorem habebat. at brevi improbi homines patientissimo illi satis pœnarum, & plusquam satis, dederunt. etenim eorum uterque intra biennium est mortuus, atque eo mortis genere, quo nullum est Christiano homini detestabilius. nam cum multis essent flagitiis cooperti, neque, ut credibile est, toto vitæ suæ tempore, Dei vel suæ ipsorum salutis meminissent, vix colligendi sui, vel peccata desendi exiguum nacti sunt spacium; cum uni, ferme ab initio morbi, mens prope abierit, neque amplius redierit, quem morbum ex intemperantia contraxerat; alter vero, pro recentibus facinoribus judicium metuens, cum se quotidie à lictoribus inquiringibus fuga subtraheret, subita propemodum morte decesserit.

CXXXVIII. *Recte sapienterque facere eos, qui aliquem sibi Sanctum advocatum adoptant.*

QVI, adversus vitæ hujus pericula, aliquem sibi tutelarem Divum adoptat, in cujus præsidio, post Deum, tutissime lateat, minime hic decipietur, sed pietatis suæ fructum, cum usus venerit, feret. multi enim multa sæpe mala evadunt, unde sine aliquo cælesti præsidio se nunquam fuisse evasuros, fateri coguntur. Ego, jam ferme ab adolescentia, B. Antonio Abbati in meam-

meamque domum in tutelam dicavi, eundemque certis quotidie precibus deprecatus sum, ut me, meaque omnia, præsertim ab incendiis vindicaret; neque spe atque opinione mea deceptus sum. nam superioribus annis, cum domi meæ B. Virgini aram ex ligno excitassem, ac duo insuper candelabra, item lignea, satis grandia atque pervetera, collocassem, accidit, ut nocte quadam cubitum iens, oblitus sim cereos, qui in eis ardebant, extinguere; sed cum mane surrexissem, neque cereos aspicerem, ad candelabra propius accessi, ac vix demum intellexi, cereos exarsisse, neque fere quidquam candelabris nocuisse; tantum, quo in loco flamma defierat, vix tenue quoddam concepti, sed statim sedati ignis vestigium apparebat; quod miraculo proximum, D. Antonii tutelaris mei opera auxilioque factum non dubito. nam cum, nostra memoria, ex tenui pusillaque flamma, &, quod mirabilius videatur, ex parva sæpe favilla, ædium maximarum incendia prodierint; quis non fateatur, divinitus factum, ne duplex flamma, ex duobus, digiti pollicis crassitudine, cereis veniens, primum candelabra, tum aram comprehenderet, deinde per tabulam pictam, aræ conjunctam, sursum properans laquear arriperet, ac totam domum in cinerem verteret? quamobrem servatæ ab incendiis domus, meritis Deo, ac B. Antonio, tutelari meo, gratias habeo atque ago.

CXXXIX. *Quidam vinctus, D. Famiani ope, tetto è carcere horribilique, divinitus educitur.*

ET quoniam de patrocínio Sanctorum mentio injecta est, de altero referam, eadem ratione divinitus ex summis vitæ periculis, atque adeo ex ipsis mortis faucibus, erepto. Apud Galeſinos, privatum & publice, mira est religio D. Famiani Eremitæ; quem ajunt, ex Polonia usque profectum, venisse Galeſium, ibique diem obiisse supremum, sed multa statim prodigia ejusdem in cælum recepti felicitatem declarasse. quod is autem oppidum illud præcipuo quodam amore patrocínioque

complexus sit , multis sæpe difficillimis in rebus præfens
 ejus auxilium oblatum ostendit. itaque à Galefinis , sa-
 cris anniversariis , colitur , ejusque sepulcrum , magna
 omnium frequentia , celebratur. sed in iis , quorum vo-
 tis ac precibus occurrit , liCTOR quidam numeratur , qui,
 quoniam conjectus in carcerem , vincula ruperat , ex fu-
 ga retractus , detrusus est in puteum , in mirandam al-
 titudinem depressum , ibique catenis & compedibus
 vinctus , multos menses , omnium rerum inopia , mace-
 ratus. etenim vix , ac ne vix quidem , tantum panis &
 aquæ misero præbebatur , quod esset ad tuendam vitam
 satis ; adeo ut interdum , ad levandam sitim , sit co-
 actus urinam suam ebibere. tot igitur ærynnis , per plu-
 res menses , ut diximus , vexatus , & attritis vestibus nu-
 dus , atque inedia confectus , pro certo creditur D. Fa-
 miani ope , cui ille se commendaverat , tantarum mise-
 riarum effugium invenisse. nam cum , die quodam , cu-
 stos ad eum carceris venisset , & in puteum despexisset ,
 neminem vidit ; atque admiratione vehementer elatus ,
 cœpit diligenter investigare , qua nam ratione illinc vin-
 ctus ille emerisset ; nec , cum omnia perscrutatus esset ,
 reperire potuit , unde exisset , cum volentibus egredi
 multis esset opus scalis , multique præterea essent pessuli
 removendi. illud vero admirationem auxit , quod in sa-
 cello , D. Famiano sacro , repertæ sunt catenæ , com-
 pedes & manicæ , in quibus ille fuerat ; neque suspicari
 quisquam potuit , à quo ea illuc fuissent illata , cum sa-
 cellum illud egregie sit undique septum ac munitum ,
 neque aliam habeat fenestram nisi clathratam , clathris
 autem ita angustis inter se spaciis , connexis colligatis-
 que , vix ut per eadem spacia catenarum annuli , ne dum
 annexæ catenis manicæ , compedes , & collaria , trajici
 possint.

CXL. *Dæmon adolescenti, à quo thesauri reperiendi causa fuerat evocatus, celerem adventu suo interitum parit.*

IMproba atque insatiabilis avaritiæ sitis ita plerosque mortalium occupat, ac miris modis excruciat, ut eos interdum in maximas ac sceleratas fraudes impellat. sed ex iis, qui laborant hoc morbo, vanissimum est eorum hominum genus, qui in defodiendis reperiendis-que thesauris operam locant suam, neque aliud quidquam loquuntur & cogitant. atque eum sæpe in locum quorundam insania progreditur, ut sperent, carminibus atque cantionibus se posse dæmones, ad eos sibi thesauros demonstrandos, adigere, ad quorum illi custodiam excubare dicuntur. quo fit, ut non parum sæpe dæmonum dolis illusi atque decepti, præter irrisionem, damnum etiam ac mortem incurrant. Sed in iis, qui in ejusmodi dæmonis fraudibus hæserunt, numeratur adolescens, non humili obscuroque loco natus, quem à me nominari non est necesse. hic vel audierat, vel sibi persuaserat, in ædibus, ubi habitabat, quæ sunt Romæ ad forum seu carcerem Sabellum, magnam vim auri & argenti esse defossam; sed quia locum ignorabat, precibus & cantionibus dæmonem ab inferis evocabat, qui signa & notas ostenderet locorum, quibus cognitis, sibi ipse defoderet, & thesaurum, quem peteret, nullo errore inveniret. sed tandem, vocatus, affuit dæmon. etenim nocte quadam intempesta, cum vigilans in lecto jaceret, & fortasse in ea cogitatione totus versaretur, sensit, pulsari ostium cubiculi, & continuo, Ecquis, ait, ostium id pulsat? cui ille, Diabolus sum, inquit, quem tantopere conventum expetis; aperi, ac sequere me. adolescens, diaboli nomine audito, primo vehementer exhorruit; tum, spe lucri erectus, confirmavit se se, abreptaque machæra, ac D. Virginis Lauretanæ imagine, quam habebat, eademque sibi apposita, ita ut in collo penderet, cubiculi ostium aperuit, & horribili facie umbram aspexit; quam præeuntem persecutus est

in cellam vinariam, ubi ingentes divitiæ expositæ cenebantur, auri & argenti magna vis, incredibilis gemmarum numerus, unionum aliarumque rerum preciosissimarum acervi; quorum adeo nihil est ausus attingere, ut etiam summo incredibilique horrore perfusus, in cubiculum se receperit, & in lecto collocarit; unde non surrexit amplius, sed tertio die est formidine metuque consumptus. Hæc à Io. Andrea Curto Novocemensis diœcesis accepi, qui propter vicinitatem potuit scire, (habebat enim ædes illius ædibus adjunctas.) atque eadem inemini, recenti re, multorum sermonibus celebrari.

C X L I. *Mulier, iniquissimo animo moriens, à dæmone, cui se dediderat, palam abripitur,*

Sunt quidam, qui æquam moriendi conditionem, omnibus propositam, animo adeo iniquo patiuntur, ut lethali aliquo morbo impliciti, si audiant, sibi esse perendum, præ animi ægritudine, ad ineptias, vel potius ad insanias delabantur; ac, si daretur optio, multo mallent bonis cælestibus in perpetuum carere, quam semel vitæ commodis privari. quod signum est animi, vel nimium terrenis rebus addicti, vel prorsus increduli. nam videntur non assentiri iis, quæ de æterna felicitate, vel de mortuis in vitam revocandis, catholicæ fidei veritate traduntur.

Narravit, domi meæ, unus ex Patribus ministris infirmorum, Spoleti, mulierem nobilem, adolescentem, præterea divitiis ac forma præstantem, ex mortifero morbo in summum vitæ discrimen adductam, Deum enixe rogasse, ut sibi parceret, neque in ipso ætatis flore vitam adimeret; sed cum morbus augesceret, atque ipsamet, deficientibus viribus, ad ultima ventum esse sentiret, more gigantum, cœpit bellare cum Deo, atque ad eum conversa, Quandoquidem, inquit, tam immature mihi vitam eripis, ego quoque meam tibi animam adiuno, ac dæmoni, una cum corpore, trado; quibus dictis, præsto fuisse dæmonem, libentique animo

mo oblatum sibi munus excepisse, & cum eo suam in domum, hoc est ad inferos, revertisse.

CXLII. *Puer pecuniam, ad sacra pro mortuis faciendâ collatam, furtim avertens, novercæ in somnis indicatur.*

NE cuivis somnio temere à nobis fides habeatur, facile somniorum ipsorum vanitas levitasque convincit. verum aliqua sæpe nobis per quietem ostendi, quibus pondus aliquod insit, neque continuo eisdem fidem abrogemus, sacrarum litterarum testimonio docemur; unde licet multa colligere, non tam somnia, quam oracula, quibus divinitus alii monebantur, ut periculum aliquod instans declinarent, aliis honor & claritas, ad quam evehendi essent, simulacris ac similitudinibus, ad eam rem aptis, significabatur, aliis, quæ tum ipsis tum aliis eventura essent, multo ante denunciabantur. Atqui non est dubitandum, quin ad id somniorum genus referendum sit illud, quod, amplius sunt viginti anni, mulieri cuidam viduæ objectum est Romæ. Erat huic mater, quæ octavo quoque die plura piacularia sacra, pro expiatione animarum, quæ purgatorio igne detinentur, faciendâ curabat, atque eleemosynam privigno ejus viduæ, filiæ suæ, ut diximus, sacerdotibus deferendam tradebat; qui nunquam totam persolvebat, sed semper partem ejus aliquam avertebat; neque id unquam mulieri subolere potuerat. verum vidua illa visa est videre atque audire in somnis, qui diceret, privignum suum eleemosynam, ad sacra faciendâ tributam, defraudare, proinde matrem admoneret, ut alium fideiorem eligeret. quod somnium, cum filia matri suæ narrasset, illa primo contempsit; post venit illi in mentem, filiæ somnio aures dare; nec rem illam inquisitam dimittere. itaque ædituum ejus ecclesiæ adit, percontatur ex eo, quot à puero illo Julios octavo quoque die ad sacra faciendâ perciperet. ille sumit codicem, in quem eleemosynarum ratio referebatur, inspicit, ac puerum invenit, ex singulis eleemosynis singulos minimum Ju-

lios solere detrahere sibi que habere. qua re comperit, filia somnium à veritate non discrepare, sed cum ea mire congruere; atque in eam opinionem adducta est, ut pro certo existimaret, Dei permisso, aliquam earum animarum, quarum, ea sacra fieri, plurimum intererat, secundum quietem, filia indicasse, fraudari eam pecuniam, quæ esset ad ipsarum expiationem attributa.

CXLIII. *Laurentio Ratto, musico, consuetudine recitandi mortuorum officium, admirabili quodam ostento, commendatur.*

QUAM magnos atque uberes pietatis suæ fructus ferant, qui funera defunctorum, vel sacra pro eis facienda, procurant, exemplis aliquot supra docuimus; nunc Laurentii Ratti, musici, hujus ævi, præstantissimi exemplo, idem demonstrabimus; cui, re nova atque admirabili, Deus ostendit, hoc pietatis officium esse sibi longe gratissimum. sed non alienum videtur à proposito, pauca de Laurentio, ejusque moribus, antea proponere. hic, puer nondum septuennis, à Vincentio Vgolino avunculo, musico item eximio, pene è complexu parentum evulsus, perductus est Romam, & musicam edoctus; in cujus disciplina sanctissime educatus, tam diu permansit, quo ad ex ephebis excessit; nam postea sex deinceps præcipuarum urbis ecclesiarum exitit musicæ moderator & magister. quo munere, cum egregie omnibus in locis, tum illud diligentius & exquisitius in Collegio Germanico, administravit; nam, & diligentia, & nova atque admirabili modulandi ratione, omnium in se animos & studia convertit. tum inde, post longum tempus, in Ædem Lauretanam in Antonii Cifræ demortui locum translatus, paulo post, tanquam in complexu B. Virginis mortuus, triste omnibus sui desiderium reliquit. de ingenio autem hominis, quid me attinet dicere? quid illa ejus in faciendis modis celeritas, lepor, venustas memoretur? plures ille Missas, vesperras, psalmos, & cantiones sacras modulatus est, quam alii cecinerint; plus ille, unica sæpe nocte, ex se operæ dedit,

dedit, quam multi integris mensibus fecerint; nam, detractis paucis illis horis, quas naturæ necessitati tradebat, integram Missam, tribus etiam choris concinendam modulabatur, &, quod prope omnem fidem excedit, graphice eleganterque describebat. Sed, ut eo revertamur, unde discessimus; anno Domini MDCIV, mense Septembri, cum, annos natus quatuordecim, etiam tum esset in contubernio Vincentii avunculi, ut diximus, pridie diei natalis Deiparæ Virginis, summo mane, inissus est ad furnarium, ut panes afferret in prandium; exeunti ab æde sacra ejusdem Virginis, quam vocant in montibus, quo orandi causa introierat, fit obviam forma egregia juvenis, qui, Tibi Laurenti, inquit, omissis cæteris curis, properandum est mecum, ultra pontem Milviu[m], defuncti cujusdam sepeliendi gratia. at Laurentius modeste excusavit avunculi imperium, à quo mittebatur ad furnum. at ille non accepit excusationem, sed, Veni, inquit, novi enim pietatem tuam & studium in B. Virginem, quæ colitur in monte Carmelo. puer, audito B. Virginis nomine, spondit illi operam suam, cum hac tamen condicione, si veniam ab avunculo impetrasset. nugæ agis, inquit adolescens, id nunquam ab eo impetratum referes. jam tibi, puer ait, morem geram, sed, libera mea opera ut sit? curriculo domum abibo, ibique tesseram hanc, quam gero, deponam. ut lubet, inquit odolecens, ego te hic manebo. it puer, domum venit; vestimenta, quibus tegebatur, exuit, trita atque obsoleta alia induit, cæterarumque rerum oblitus, ac vix sui compos, cum acu & filo culcitam sumit, seque ad adolescentem celeriter recipit. sunt igitur taciti una in via, atque semiquadrantis horæ curriculo, trium fere millium iter emensi, arundinetum intrant, miliarii unius intervallo à ponte Milvio disjunctum; ubi mulieres aliquot eximia pulchritudine, & ætate integra, ignoti cujusdam cadaver, in loculo positum, circumstabant; quarum domina atque magistra videbatur esse una, forma ita eleganti, ita venusta, ut nihil supra; quæ libellum Officii B. Virginis à puero sibi dari poposcit, acceptumque tradidit adolescenti, qui fuerat dux & comes itineris, eumque recitare jussit illa

Iobi capita , in Officio defunctorum apposita, *Parce mihi Domine.* at mulieres una cum puero , responsoria , singulis capitibus adjecta , funebri cantu , prosequabantur. quibus expletis , quæ mulier erat ceteris venustior , ut diximus, subsequenter & adjuvantibus cæteris, cœpit precationem illam funebrem præcinere, *Subvenite Sancti Dei,* atque eadem opera scrobem effodere, in qua mortuum collocarunt , huiusque texerunt. quo factò , mulier , ad puerum conversa , Contine te , inquit , in hac tam laudabili consuetudine recitandi mortuorum officium ; erit enim , si usus veniat , ut tu eisdem suffragiis adjuveris , quibus iste à nobis sublevatur. his dictis , evolarunt omnes ab oculis , nec quisquam visus est amplius ; immo ne foveæ quidem , quam foderant , vestigium ullum apparuit. Laurentius , pene alienata mente, aliquandiu cum tortuosis arundineti illius semitis , vel potius labyrinthæis flexibus luctatus , demum in viam publicam exiit , & aliquanto post , Tiberis ripas & Milvium pontem agnovit. sed dum ex culcita , quam, ad arcendos solis calores , secum attulerat , umbraculum texit, venire illi in mentem ea omnia, quæ ab avunculo in mandatis habuerat , cœpitque se ocys movere. jam pontem transierat, cum bufalos , ad quinque & viginti numero , ad se recta venientes adspexit ; quos bubulci duo , fœda & horribili facie vultuque, fustibus in ipsum incitabant. quare ille plane vehementer exterritus , ad vota confugit , vovitque , si D. Francisci Affassinatis ope , functus illo periculo esset , cinctorio suæ Religionis fune , se , quoad viveret , præcinctum iturum. rein miram , votis nuncupatis , bufali illi, qui sæviter afflantes naribus, parati erant , in eum impetum facere , continuo iter ad lævam arripuerunt , ac celeri in Tiberim cursu se se dederunt. at ille , progressus paululum , respexit , ac neque bufalos , neque bubulcos uspiam vidit. itaque solutus metu , cœpit ociosus iter domum habere ; ubi invenit omnia , ex ejus habitu , plena mœroris atque tumultus ; præterea avunculum , citato equo , ex Vrbe exisse , ut ipsum abeuntem prosequeretur , & , inventum , ex fuga retraheret. sed continuo , ejus aspectu , mutata sunt omnia , &

metui

metui securitas, ac moerori successit hilaritas. Hæc ego, tum à Vincentio avunculo novi, qui, recentiore, de puero milles audivit, tum ex pueri ipsius epistola, suo chirographo ad patrem scripta, ubi diserte rem totam, sicuti gesta erat, enarrat. Addit Vincen-
tius, puerum esse oblitum in ea scribere id, quod Fratri Marco Vgolino, alteri avunculo, multis audientibus, dixerat; videlicet, proxima superiore ejus diei nocte, se vidisse in somnis illa omnia, eo quo dicta sunt ordine.

CXLIV. *Idem Laurentius, ab hominis insolentis injuria, mire defenditur.*

Sed, quod hætenus narravimus, plus habuit admirationis quam laudis, plus delectationis quam utilitatis; at, quod subjicitur, est ejusmodi, ut admirationis habeat minimum, laudis plurimum, delectationis fere nihil, utilitatis multum. etenim omnia in eo insunt, lenitatis, patientiæ, atque animi de se demisse humiliterque sentientis exempla.

Quo tempore in Collegio Germanico, summa cum laude, musicæ rei præerat, pro eo, quod ob eximiam modulandi rationem inagno erat in honore ac nomine, fiebat, ut in festis aliarum ecclesiarum diebus, vehementer ejus opera expeteretur; quam ille ex se probam ac laudabilem dabat. verum, die D. Ambrosio sacro, cum in ejus Aede, virginibus illis navaret operam, lepide contigit, ut ex cantoribus Pontificiis unus, aliud fortasse agens, nec ad Laurentium plaudentem aspiciens, erraret, aliisque errandi causam afferret. hunc, completo sacro, seductum, amicissime Laurentius admonuit, ut posthac attentius plausus numeraret; sua enim culpa totum concinentium chorum perturbatum pene conticuisse. quod ille ægre ferens, barbara quadam arrogantia elatus, sane contumaciter, Itane, inquit, mecum agitur? i, ac pueris tuis istuc præcipe; mei enim similes à nemine admonentur. ac processisset etiam verbis longius, nisi
ami-

amicorum interventu repressus fuisset. vix dies octo ab hoc sermone intercesserant, cum in summa Agonali platea Laurentius eum videt, atque occupat prior, ac salvere jubet; tum, detractis sibi è crumena aliquot nummis, qui pro mercede ejus diei, quo absurde cecinerat, eidem debebantur, tradidit. at ille in eadem contumacia perseverans, arrogantibus sane verbis, ac stomacho & iracundia effervescentibus, Ita ne, inquit, tibi idoneus videor, quem more puerorum corripias, ac pene ferula perterrefacias? num ita factum oportuit? Laurentius primo se excusare; sed cum ille magis instaret, demisse humiliterque, ut sibi ignosceret, exorare; ac cum nihil proficeret, jamque prope esset, ut verberaretur, divina ope, præsentissimo illi periculo ereptus est. nam adfuit ex improvviso cerebrosus quidam, quem pridie ejus diei ille contumax, inter altercandum, contumelia affecerat, ac, Pessime, exclamat, non potes nunc mihi elabi è manibus; atque, eadem opera, rejecto pallio, eidem in os involavit, & plus quam quingentos colaphos infregit, tum calcibus & pugnis ad terram abjecit, ut etiam vicinia illa, quæ Laurentio venisse eum auxilio existimaret, lataretur, ac nihil ab eo rectius factum esse affirmaret. postremo contumax ille surgens, male multatus, ac dedecoris ignominiaque plenus, domum revertit; qui postero die, quam illa erant acta, Vincentium avunculum adiit, demisseque ab eo, ut sibi ignosceret, exoravit; se nolle factum, quod fecisset. sed, re inter cantores patefacta, inventus est nemo, qui non eum execraretur; denique in tantum omnium odium venit, ut nemo eum amplius cantatum provocaverit; adeo ut, cum stipendiis sacelli Pontificii desperaret se posse musice, ut antea, vitam exigere, lucri causa ludum alearium domi suæ instituerit. quamobrem in carcerem conjectus, & ex albo cantorum expunctus, jussus est exulatum abire.

CXLV. *Æquissimum prudentissimumque
optimi ac sapientissimi iudicis iudicium.*

REgibus ac iudicibus orbis terræ, (si nihil sit propositum, nisi quod est æquum ac rectum) Spiritus Sancti numen adesse, argumento in primis est æquissimum illud atque omnium linguis ac literis celebratum Regis Salomonis iudicium, duabus illis meretricibus redditum, quarum utraque, puerum superstitem, suum esse filium asserbat. nostra vero memoria, Matthæum Burattum, probitate, ac juris scientia, non unum è multis, potius inter multos prope singularem, rationem illam edoctum divinitus arbitror, qua improbi cujusdam dolos detexit, & mulieris viduæ indemnitati consuluit.

Quo tempore hic vir sapiens ac doctus, Auditoris Cameræ Vicarius, juri dicundo præerat, mulieri cuidam viduæ scita septingenta persoluta fuerant; quæ illa, sæpius rogata, vicino, viro nobili, in mercimoniis quibusdam coëmendis occupato, mutua dederat; atque ille quartum post mensem se eidem remuneraturum spondederat; & quo mulieri cautum esset, syngrapham scripserat, eidemque tradiderat: verum cum ejus pecuniæ dies non advenisset solum, sed multos jam menses præteriiisset, neque ille pecuniæ reddendæ mentionem plus faceret, quam si eam nunquam mutuam accepisset, cœpit eam mulier efflagitare; quam ille semper, vana spe inflatam, à se inanem dimittebat. sed ubi illa, se duci, neque sibi quidquam præter verba dari cognoscit, pergit multo acrius instare, atque urgere. at postquam vaser, omnem sibi ereptam excusationem, videt, negat se nummum cuiquam debere. itaque mulier, una cum syngrapha, tabellionis cujusdam officium intrat, ubi scribæ aderant plures, quorum uni rem narrat, & syngrapham tradit; qua ille inspecta, cachinnos effert, ac mulieri imperat, ut sociis legendam ostendat; qui item cachinnos effusissimos edidere. quod mulier admirans, Quid, inquit, sibi isti volunt? quid rident? at si sedes, & quasi regio ridiculi, deformitas est, non adeo me turpem

pem agnosco, ut rideri debeat. in pauca ut conferam. ad tabellionem mittitur, qui, re cognita & syngrapha diligenter inspecta, mulierem fuisse deceptam agnovit, ac, Noli, inquit, mirari, si rideris; tibi enim os sublitum est pulchre; nam inficiator, qui syngrapham scripsit, nihil in eam intulit, præter salutationem ad B. Virginem, cujus initium est, *Salve Regina*. tum mulier flere, conqueri, lamentari, Dei atque hominum fidem implorare. at tabellio, Parce inquit, fletibus, citius Burattum judicem adi; is, pro sua auctoritate atque sapientia, aliquid inveniet, quo nebulonis istius fraus detegatur. accurrit mulier exanimata, & ad ædes iudicis venit; commodum, cum ille, causis cognitis, è tribunali descenderet, accedit, injuriam sibi factam exposulat, narrat, quemadmodum pecunia dotali ab inficiatore illo everfa sit, quam à se mutuam acceperat, ut mercimonium quoddam coëmeret; genus etiam mercimonii, in quo pecunia collocata fuisset, exponit; syngrapham affert, quam vaser ille, cautionis loco, conscripserat. iudex, re cognita, mulierem ludos esse factam, pro certo existimavit, & in proximum ibi cubiculum secedere tantisper jubet, dum inficiatorem illum ad se se arcessat. mittit igitur, qui eum adducant; adductum humaniter excipit, salutatur, seducit, rogatur, quid rerum agat, ut valeat; ut merx illa, quam proxime emerat, lucro eum affecisset, interrogatur. cui ille, non male sibi negocium sub manus successisse respondet. rogatur rursum, num mutuum, ad eam rem sumtum, mulieri reddidisset? respondet ille, se mulierem quidem nosse, sed neque illi, neque mortalium cuiquam, nummum ullum debere. tum iudex, prolata in medium syngrapha, quæsit, num chirographum suum agnosceret? non est ausus negare. sed quoniam, inquit, istud spectat? eo, ait iudex, ut scuta septingenta, hic sine ulla mora dissolvas; nam, si cuivis alteri tecum res esset, eundem cogere legis præscripto atque ordine tecum agere, neque iudicio non antea damnarem, quam legitima omnia confecta essent; sed quoniam omnis tibi cum B. Virgine res est, pedem ex hoc cubiculo non feres, nisi eidem, quod satis sit, facias. sed cum ille clamaret, ac
sibi

sibi vim fieri diceret, judex, Evocato, inquit, aliquis liſtores, qui vinctum hunc abſtrahant, & in ſanctiorem carcerem condant, atque, eadem opera, rheda equos adjungite; nam mihi ſummus Pont. adeundus eſt, ac de improbiffimo iſtius furto docendus. tum ille, vinculoꝝ metu adductus, & ſimul iram Pontificis veritus, qui tunc erat Paulus v, ſi hæc tam inſignis fraus paululum eidem ſuboliſſet, multis cum precibus à judice impetravit, ut ſibi liceret mulieri ſatisfacere; ac, miſſis qui pecuniam afferrent, eandem ſine controverſia mulieri enumeravit.

CXLVI. *Conclavis ruina, patrinus, una cum ſuſcepti à ſe matre, obteritur.*

Patrinis, ſeu ſuſceptoribus, ſacroſanctas debere eſſe mulieres eas, quarum liberos de baptiſmi fonte ſuſceperint, divinæ in eos animadverſiones oſtendunt, quorum lapſa eſt libido in hoc tam vetito concubitus genere.

Frater quidam Capuccinus, anno MDCXXXIV, Romæ, de ſuſceptore quodam narrabat, qui ejus, quem ſuſceperat, matri per flagitium conſueverat. hic amicorum cohortationibus admonitionibuſque coactus, demum ab ea conſuetudine ſe amoverat, neque totos tres menſes quidquam cum illa rationis habuerat. ſed cum, prævæ conſuetudinis vi incitatus, deſiderium mulieris ferre non poſſet, demum in idem cum ea lutum revolutus eſt. cum igitur uterque ocioſus, animo obſequeretur ſuo, neque divinæ juſtitix veniret illis in mentem; nocte quadam, cum inter ſe complexi jacerent, conclave, in quo erant, corruit, eoſque obtrivit. quod autem improbiffima illorum cupiditas præſertim, à Deo, ad ſupplicium vocaretur, illud oſtendit, quod eos tantum, ac neminem præterea alium, ſubitus ille caſus oppreſſit. nam pueris, qui juxta cubabant, utpote innoxiiſ, nihil nocuit, ſed vivi atque incolumes ex ea ruina eruti ſunt.

CXLVII. *Statim ab ineunte ætate, prætermiſſis voluptatibus, directum ad virtutem iter ſuſcipiendum eſſe.*

Solent plerunque adoleſcentes vitia libidinis, ætatis ſexcufatione, defendere; tanquam ſi illa ætas vix poſſit ſine caſu & prolapſione conſiſtere, vel tanquam ſi impunitam omnium rerum licentiam & libertatem obtineat; quorum utrunque abeſt à veritate longiſſime. etenim, omnibus fere ſæculis, inventi ſunt plures, qui vel rectum ad laudem iter, ſine caſu aliquo, tenuerunt, qui vero ſe flagitiis inquinaveſſent, multis à Deo plagis, ac ſubita interdum morte affecti, ſpretæ caſtitatis pœnas dederunt.

Me adoleſcente, duo erant fratres, ſanguine germani, ſed ad omnia vitia plane gemelli. hi pueri, propemodum pares ætate; nam vix alter altero triennio erat major; hi, inquam, patris indulgentia, nequiſſimi, turpiſſimis erant imbuti cupiditatibus; adeo ut, prius quam puberes eſſent, non modo pudicitia ſua non parcerent, ſed alienam ereptum etiam irent, ſcortarentur, vino atque epulis una corpus atque animum onerarent. verum cum nullis, majorum natu, perſuaſionibus adduci poſſent, ut vitæ ſtatum commutarent, ſed priſtinum mordicus victum tenerent, uterque horribili à Deo morbo percutitur; cujus vi, primum major, tum minor, conſumptus interiit. quamobrem fuerunt æqualibus ſuis exemplo, puerorum & adoleſcentium flagitia, nulla apud Deum ætatis excuſatione defendi.

CXLVIII. *Aliquot nobiliſſimi, itemque improbiſſimi adoleſcentes, fruſtra concionatoris voce, de loco ſuperiore, admoniti, eodem anno interfecti, contumaciæ pœnas dederunt.*

Sunt etiam aliqui, qui non ſolum propter ætatem, verum etiam propter ſummas opes, ſummamque nobilita-

bilitatem, omnia sibi licere arbitrantur, ac prope sibi persuasum habent, ipsorum nobilitati atque potentiae, æquum esse, ipsum etiam Deum cedere, fascesque summittere.

Narrat idem Angelus Lomellinus, de quo sæpius mentionem fecimus, non ita multis ab hinc annis fuisse Ianuæ adolescentes aliquot, genere, opibus, copiis, ejus civitatis facile primos, qui ea licentia, quam ipsis tribuebat ætas, ac summa nobilitas, intolerantius insolentiusque se jactabant; neque solum libere, petulanter, effuse, ac libidinose vitam agebant, verum etiam in Aedes sacras coibant, ea præsertim hora, qua concio tota, rerum divinarum interpreti, operam dabat, ibique, summa populi totius offensione, consueverant impudentissime mulierum formas contemplari, inter se colloqui, cachinnos tollere, inultaque alia facere, quibus ludibrio Deus haberi videbatur. non desuere, qui eos privatim admonerent, ut moribus illis desisterent, ac Deum in primis vererentur ac metuerent; quod illi, more suo, neglexerunt. Quamobrem concionator quidam, è congregatione Somnaschæ, quam vocant, nullum privatis admonitionibus relictum esse locum animadvertens, statuit impiam illorum contumaciam, de loco superiore, palam arguere; quod cum, magna vi vocis & contentione animi, ageret, ad objurgationes minas addidit, atque inter cetera interminatus dicitur, si impii in Deum esse pergerent, neque mores corrigerent, fore ut ille, crucis baculo, ipsorum nequitiae obviam iret. qua illi oratione vehementer commoti, universi eum adiere, ac, verborum contumeliis antea oneratum, monuerunt, ut linguam compesceret; nam si pergeret esse molestus, ac dicere, ipsos crucis baculo verberandos, fore ut alius antea illi, valido fuste, scapulas & brachia dolaret. quibus vir Dei in præsentia, quid responderet, non habuit; verum rem totam in Deum rejecit; neque vero prædictionem suam fefellit eventus; nam Deus injuriam, sibi factam, ultus est probe. nemo enim illorum, sua morte, defunctus est; sed intra anni unius spacium, ad unum omnes ferro interempti, perierunt.

CXLIX. *Duo adolescentes nobiles , anno vertente , ea ipsa die trucidantur , quo virum innocentem occiderant.*

Verum istorum audacia atque temeritas, tantummodo intra verba se continuit, neque in aliud prætereā facinus exiit; sed aliorum duorum, summo item genere, summisque opibus adolescentium immanitas progressa est longius; quæ non intra verba tantum sæviit, verum etiam viri innocentissimi saturari sanguine voluit. atqui hi adolescentes, pessimis effusissimisque moribus præditi, quo libidinibus suis largius obsequerentur, nihil sumtui modestiæque parcebant, ac pene fortunis omnibus se properabant evertere. quos imminantes eorum sumtus ut aliqua ex parte coerceret, cœpit parens, eorundem luxuriæ parcius suppeditare. id illi sacerdotis cujusdam, sanctissimi religiosissimique viri, opera factum existimantes, qui sacerdos erat patri à confessionibus, summum & inexpiabile in eum odium conceperunt; quod demum exitium, ac pestem, hominis innocentis capiti attulit. nam eidem, die D. Stephano sacro, ad aram supplicanti, impii illi sicarii pugionem demiserunt in pectus; cui morienti non alia vox excidit, nisi ea, Itidem vobis parco, ut D. hodie Stephanus iis pepercit, à quibus lapidibus obruebatur. sed tanti sceleris rei, non diu jactare se potuerunt. nam, anno vertente, illo eodem die sunt interfecti, quo sacrilegas sanctissimo viro manus attulerant. atque divina plane ratione factum videtur, ut alii, viro innocenti, eorum sanguine, quorum ille scelere atque perfidia interisset, parentarent.

CL. *Celebre emporium, una cum mercibus eo advectis, subito igne conflagravit.*

Quamvis sæpe Deus, peccatis hominum provocatus, statim ut diximus, de referenda hominibus impuris gratia, non cogitet, quia, cum sit benignus atque
mise-

misericors, cogitat cogitationes pacis, & non afflictionis; attamen, si nulla poenitentia consequatur, si peccata peccatis adjiciantur, ac divinæ ejus iracundiæ quasi faces admoveantur, continuo erumpit, quasi fulgur, ira ejus, & tarditas supplicii, ejusdem gravitate compensatur.

Quoddam est oppidum Æmiliæ, ubi anniversariis Deiparæ in cælum assumptæ sacris, nobile quotannis emporium celebratur, quo non vicinarum modo urbium, sed remotarum quoque partium mercatores cum mercibus conveniunt; & quoniam magna ibidem pecuniæ vis cogitur atque tractatur, meretrices, muni, & circulatores complures, eodem, quæstus sui gratia, conveniunt. præterea, quia oppidum est angustum, quam ut tantam tum virorum tum mulierum multitudinem, tota ex Æmilia confluentium, possit excipere, in Ædem Deiparæ sacram, quæ ibi à Patribus Carmelitis tenetur, aditus mulieribus patet, quo fit, ut iis diebus, qui in eo mercatu consumuntur, multa improbe, avare, flagitiose, contra jus fasque perpetrentur. quæ cum diutius ferri tolerarique non possent, visum est tandem divinæ justitiæ, severe atque acriter vindicare; atque illud in primis animadversionis genus arripuit, quod dolorem efficeret, peccatorumque materiam causasque præcideret. etenim opes ac divitias, quæ solent esse instrumenta libidinis avaritiæque, subito igne delevit. sunt in eo mercatu omnes propemodum casæ, silvestribus ex caninis viminibusque, quibus facile ignis excitatur, extructæ, atque contextæ; in earum una, mulier, quæ cauponiam factitabat, cum pisces frigeret, flamma in frixorium descendit, & exinde oleo fota, resiliit, ascendensque tectorio adhæsit, tum ad reliquas deinceps casas progrediens, omnes antea comprehendit, & in cinerem vertit, quam ferri auxilium posset; rerum ferme omnium jactura; adeo ut damnum, quod eo die factum est, ad decies centena aureorum millia pervenisse existimetur.

CLI. *Mercator occisus, se palam ei, à quo fuerat interfectus, ostendit, ac mandat, ut nosocomium extruat ex precio mercium, quas advexerat.*

Non solum fidei catholice veritate certum atque exploratum nobis est, in morte non totum hominem interire, sed animum, immortalis natura præditum, incorruptum permanere: verum etiam, compluribus visis, id adeo confirmatum est, ut non tam impii, quam insani sit hominis, de ea re amplius dubitare. sed, ex omnibus visis, illud est admirabile, quod à P. Nicolao Riccardio, Sac. Palatii magistro, Matriti ante annos aliquot contigisse narratur.

Erat ibi vir quidam summe nobilis, & Marchionis etiam titulo clarus. hic cum, nocte quadam, animi causa, ut fit, domo egressus, ejus oppidi vias obiret, in quadam domus cujusdam versura, capite obvoluto, hominem ibi stantem offendit, ac suspicione offensus, & fortasse insidias metuens, interrogavit, quisnam esset; sed responsum ab eo nullum accepit. quamobrem majorem in modum commotus, jussit eum gladium educere, atque in cerramen cum ipso venire; qui in eodem silentio perseveravit, ac nihilo se magis commovit, quam si lapis vel stipes esset. tum ille, iracundia elatus, districto in eum gladio impetum fecit, ac bis punctim verberatum, ad terram afflixit, ac statim deinde, domum se recepit. sed, cum aliquot dies interpositi, propemodum ejus facti memoriam subdukissent, & nocte quadam ociosus domi cœnaret, evocatur ab ostio, ab homine ignoto, cui cum famuli respondissent, paulo eum ante, cœnam iniisse, nec posse cuidam operam dare, ille majore vi orare eos cœpit, ut nunciarent domino, ut prodiret; ea enim se afferre, quæ ad ipsum maxime pertinerent; tum illi, odio victi, nunciant domino, hominem stare ad januam quendam, ipsis ignotum, qui eum magnopere evocaret. quo audito, surrexit ille, ac prodiiit, & quendam videt, à quo interrogatur, si eum nosset;

set ; cui ille, Non equidem, inquit ; neque te ante hunc vidi diem. quod cum is , qui rogaverat , mirari videretur , Nonne , ait , meministi , te tali nocte quendam , obvoluto capite in via stantem , transverberasse , ac statim neci dedisse ? is ego sum , qui quidem multas ex India merces advexeram , eratque in animo , ex pecunia , quam ex eis redegissem , celebre in hoc oppido nosocomium extruere ; sed quoniam tua mihi sævitia ejus rei facultas adempta est , propterea , quæ meæ fuerant partes , eas scito ad te rediisse ; cape sis has claves , & quidquid duabus promptuariis in cellis mercium inveneris , vendito ; tum quidquid ex collybisticis istis symbolis mihi debetur , exigito , ex eaque pecunia , quæ cogitaveram , tu ipse perficito. nec plura locutus , è conspectu evanuit. hoc viso , tanto vir ille nobilis horrore peresus est , ut propemodum à sensibus destitutus , vix animam retinuerit , ac suorum manibus delatus in lectum , ægre , ac multis medicamentis adhibitis , effectum est , ut ad se ipsum rediret. verum ita retentus est in vita , ut , cum esset formosissimus , perpetuam in facie , atque in omnibus membris , maciem palloremque servaverit. Hæc à P. Nicolao Riccardio sunt excepta , ut diximus ; qui cum esset in Hispania , non satis habuit , hæc ex sermonibus vulgi percipere , sed voluit etiam ex eo cognoscere , unde alii didicissent ; hoc est in re tanta indaganda , noluit rivulos consectari , sed statuit fontem , ut ajunt , adire.

CLII. *Clericus ob coronam , quam ipsi invito tonsor in capite circumscripserat , interfectis cæteris , à barbaris diligentissime servatur.*

EA genus hominum Deus caritate complectitur , ut de singulorum salute sollicitior sit , quam alius quivis parens , vel mater. *numquid* , inquit ille , *oblivisci potest filii uteri sui ? & si illa oblita fuerit , ego tamen non obliviscar tui.* quo amore ac providentia fit , ut sæpe homines , properantes se ad interitum dare , retineat , ac prope invitos ac repugnantes , ex faucibus mortis eripiat. atqui

paterna ejusdem in nos cura sollicitudoque, superioribus annis, mirabiliter in sacerdote quodam enituit, qui iter mari facturus, antequam navim conscenderet, caput tonsori commisit, quo illud molesto ac supervacuo capillorum pondere exoneraret. & quoniam erat illi fortasse in animo, laxius vitæ genus persequi, cui rei impedimento clericalis habitus erat, tonsori præceperat, ut nullam, in tondendo, clericalis coronæ formam effingeret, ne quod in ipso clerici vestigium deprehenderetur. at tonsor, imperii oblitus, priusquam ullum præcideret pilum, coronæ orbem solito laxiorem ejusdem in capite circumscripsit; quo ille animadverso, usque adeo elatus est stomacho & iracundia, ut exiliens, multisque tonsorem maledictis afficiens, è tonstrina prodierit, neque quidquam eidem pro mercede persolverit. ita igitur, ut diximus, tonsus, ingressus est mare, jamque navigium, quo una cum vectoribus multis vehabatur, altum capefferat, cum à piratis conspicitur, expetiturque, cumque nulla fugæ ratio esset, circumfistitur, capitur, atque eadem opera, vectores ad unum omnes obruncantur; sed simul ac ventum est ad istum, qui ægre passus fuerat, ad coronæ similitudinem, sibi caput tonderi, ac pileus eidem detractus, continuo corona capiti hærens apparuit, tum prædo, qui erat eum obruncaturus, *Parcite huic*, inquit; namque initiatus est sacris. quo audito, inventus est nemo, qui ausus sit eum attingere. itaque ab ea corona salutem invenit, qua se moleste tulerat insigniri; atque ob eam rem, percussis cæteris, barbaris illis sacrosanctus est habitus, unde ipsi tonsor verborum contumeliis dignus est visus.

CLIII. *Minister hæreticorum, qui res miras, à B. V. patratas, à Catholicis confictas esse contenderat, palam à dæmone, uti sibi fuerat imprecatus, eripitur.*

Sunt quidam sapientes hujus sæculi, qui tum maxime sapientia cæteros se anteire existimant, cum, quæ à Deo, B. Virginis vel Sanctorum intercessione, supra
natq-

naturæ vires eduntur , tanquam aniles fabulas , vel ad lucrum captandum ficta , convellere ac labefactare conantur ; immo codices , stipeos , plumbeos , atque alia , quæ sunt dicta in stultum , præ se eos esse arbitrantur , qui assensione suam miraculis præbent. verum istorum sæpe stultitiam Deus ea omnia superare vincit , quæ ipsi in eos , quos irridebant , convenire jactabant. quod videlicet suo ipsi malo edocti , demum fateri coguntur , se non minus stulte , quam impie , conatos fuisse , miraculis fidem abrogare , quorum in se vim experiri cogerentur.

In oppido Subalpinæ regionis, Monte regali nomine, Deiparæ Virginis imago religiosissime colitur , quæ anno MDCXIV adeo florere miraculis cœpit , ut non oppidanos modo , sed propinquarum etiam urbium ac regionum incolas ac cives ad se se attraheret ; qui incredibili pene concursu , partim voti solvendi causa , partim ad petendum auxilium , conveniebant. qua in primis fama compulsus Helvetiorum quidam pagus , hæretica labe infectus , certum illuc hominem , cum mandatis allegavit ; primum ut mira illa , si vera essent , oculis ipse suis acciperet , tum penitus perspecta ac cognita , ad ipsos pagi ejusdem moderatores ducesque referret. qui cum Montem regalem , ut erat præceptum , venisset , comperit , rem ipsam multo esse fama majorem. nam quotquot ad B. Virginis opem auxiliumque confugiebant , omnes fere voti compores abire cernebat. quam B. Virginis benignitatem , in omnes large effusæque diffusam , sensit etiam in se se maxima ex parte fluxisse. nam , singulari B. Virginis munere , & celebritate illa & religione hominum permotus , amplexus est catholicam fidem , à qua antea abhorrebat. itaque reversus in patriam , & quæ oculis ipse acceperat , quæque in se expertus fuerat , popularibus suis exposuit ; qui cum fidem faceret , vehementerque omnium animos ad B. Virginis studium & Catholicæ religionis amorem impelleret , id hæreticæ impietatis minister quidam animadvertens , suggestum conscendit , ac , vehementissima contentione animi , conatus est iis , quæ ab eo dicebantur , detrahere , cum diceret , hæc esse nota atque vulgata sacerdotum

nostrorum commenta, ad emungendas simplicium viro-
rum crumenas. neque tamen multum proficiebat; nam
propensior erat populus in ea, quæ audierat. tum ille
commotior factus, coepit multa capiti suo mala impre-
cari, nisi falsa ea essent, quæ ipsis deferebantur; atque
in primis precatus est Deum, ut, si mentiretur, ipsis in-
spectantibus, à dæmone abreptus, in æternos cruciatus
abstraheretur. neque diutius suo à capite pestis, quam
sibi imprecatus fuerat, absuit. nam continuo, cunctis
cernentibus, abreptus est, &c, quo erat dignus, aspor-
tatus. quamobrem suo infortunio fidem iis, quæ nunci-
abantur, obtinuit, sicut optaverat; nunc vero apud in-
feros positus, una cum dæmonibus, quibus se addixerat,
credit & contremiscit.

CLIV. *Cæsaris amanuensis, eidem, vita fun-
ctus, apparet.*

QUOD animæ defunctorum, cum è corporibus ex-
cesserint, peccatorum sordes, quas in vita college-
rint, purgatorio igne abstergant, quodque, piorum ho-
minum suffragiis, acerbissimo omnium supplicio exi-
mantur, tum fide Catholica, tum sacrarum litterarum
testimonio, perspicuum est adeo, ut de eo dubitari non
possit. verum id multis sæpe Deus monstris prodigiisque
confirmat, atque oculis subjicit; quo nimirum, ad id
pietatis officiique genus, promptiores alacrioresque red-
damur.

Ferdinandus Cæsar, qui, calamitosis hisce temporibus,
imperii navim in summis tempestatibus periculisque
moderatur ac regit, amanuensem habuit, consiliorum
omnium participem: is obiit mortem, sed aliquanto
post Cæsari in conspectum venit; quem ille cum esset
intuitus, alacri atque præsentis animo, ejus adventus
causam exquisivit; sed nullum ab eo responsum accepit;
sed ejus loco sibi dexteram dari conspexit, quam imper-
territus Cæsar accepit; verum ita ardentem offendit, ut
ferri tolerarique non posset. quamobrem fuit coactus
protinus eam amittere; sed vix amisit, cum illè excessit
ex oculis. at tum demum Cæsar intellexit, quænam
ejus

ejus adventus causa fuisset, cujusque auxilii esset ille egens in primis. itaque, postero die aliisque deinceps, pro illius anima, multa piacularia sacra facienda curavit, quorum vi, flamma illa incendioque præreptum illum, sit verisimile in cælum abiisse; non enim alias se Cæsari videndum objecit. Hæc ego nobilem virum Polonum, Gottifredo nomine, narrantem audiui, qui tum temporis in aula Ferdinandi Cæsaris versabatur.

CLV. *Altilia quæ, die sacro Parasceues, in prandium viri principis hæretici allata fuerant, reviviscunt, atque è patinis evolant.*

QVibus statutum ac deliberatum est à divinæ legis præscripto non recedere, si quæ exterior vis ingruat, quæ sanctum istud propositum extorquere conetur, fere semper divinum aliquod è cœlo auxilium accedit, quod vim illam disjiciat, ipsosque in eo, quod proposuerint, adjuvet atque confirmet.

Narrat idem Gottifredus, in Regno Poloniæ, unum ex Regni proceribus, summis quidem opibus atque potentia, sed acerbissimo in Catholicam religionem odio præditum, quo magis Catholicorum sacris illuderet, feria vi majoris hebdomadæ, jussisse opiparum exornari convivium, omnis generis altilium carnibus confectum, ad idque per vim fuisse sacerdotem quendam attractum, pietatis ac religionis fama notissimum; qui quia recusabat venire, quod eo die, ex veteri Catholicæ Ecclesiæ more, jejunaret, est coactus ad illud metu mortis accedere. sed cum esset animadversum, nihil eum nisi panem attingere, & in totum à carnibus abstinere, jussum esse, eadem mortis formidine injecta, etiam carnes assumere. tum illum, ex dolore animi, ingemuisse, ac positus humi genibus, ejusmodi ad Deum orationem habuisse. Domine Deus, adjutor meus, quo redactus sum vides; exurge obsecro, mihi que in auxilium accurre, neque tuos dies festos deridiculo haberi, neque sacrosanctam hanc lucem, anniversariis Passionis tuæ sacris celebrem atque solemnem, hoc intempestivo hæreticorum convivio, ac vetito eduliorum genere contaminat

minari à me violarique permittas ; evoca fœdas ab inferis furias , quæ totum , quod hic est , abstrahant , atque in infernas domos apportent. vix ea dixerat , cum , quidquid ibi erat avium , revixit , plumas recepit , fugam arripuit , & è inensa , atque adeo omnium è conspectu , recessit. at vir ille princeps , quanquam tum sævus in Catholicos , tandem , divini numinis auxilio , ex hæreticorum castris in nostra præsidia confugit , & quamdiu vixit , extitit Catholicæ religionis cultor eximius ; qui postea gravi diutinoque implicitus morbo , Hierosolymitanam peregrinationem suscepturum se vovit , si contigisset convalescere. neque fecit secus , quam pollicitus erat. nam simul ac licuit , summa cum pietate ac religione loca illa sacra , Christi Domini vestigiis impressa , perlustravit ac veneratus est , ejusque etiam itineris commentarium omnium atcuratissime scripsit ; demum reversus in patriam , optimum atque sanctissimum exitum vitæ habuit , ac mortuum se peregrini habitu efferrî , terræque mandari præcepit.

CLVI. *Virgo nubilis, fame coacta, potius quam castitatem venderet, detractam sibi comam matri vendendam exhibuit.*

Statim superque , ut arbitror , exemplis demonstravimus , creatori & conservatori omnium Deo insignem ab eis injuriam afferri, qui in summis vitæ difficultatibus ac periculis , ab alio potius quam ab ipso vitæ auxilium exposcunt. aut enim nihil in eo esse nobis opis existimant , aut nulla nos divinæ ejus providentiæ parte contineri fatentur , à qua providentia , ne volucres quidem cæli , atque adeo ne lilia quidem agri excluduntur ; atque , cum summa Dei omnipotentis injuria , sapiens illud Davidis consilium prorsus è memoria ejiciunt, qui, *Iacta*, inquit, *super Dominum curam tuam, & ipse te eruet.* Quod autem , qui, ex ejusdem Davidis sententia , spes suas omnes collocatas habent in Deo, de spe & opinione sua non decident, perspicuum sit ex eo, quod mox dicturi sumus.

Mulieri viduæ filia erat, nubilis virgo, forma non mala; neque quidquam aderat, quo eam honesto cuiuspiam viro collocaret. etenim quæ sunt etiam ad vitam parce ac duriter agendam necessaria, omnia deerant; adeo ut, quæcunque loco moveri possent, quibus res ipsius paupercula continebatur, aut vendidisset, aut pignori opposuisset. quid multa? eo inopiæ redacta erat, ut de vendenda filia pudicitia cogitaret. cujus consilii cum participem filiam fecisset, eandemque summo-
pere adhortata esset, ut illud in se flagitium admitti per-
peteretur, quod unicum esset remedium, ne fame ac
caterarum rerum inopia conficeretur; prudens virgo
assimulavit, se cum matre sentire, sed dieculam ad eam
rem petiit; æquum enim esse ajebat, omnia antea expe-
riri, quam ad illud extremum atque ultimum remedium
decurrere; quod ipsis semper integrum foret. his dictis,
productam, auroque simillimam comam, suo capiti
ferro detraxit, matrique vendendam exhibuit. quam
cum illa deinde in foro venalem haberet, vir locuples
ea pulchritudine delectatus, constitit, rogavitque, num
ne ea sacræ cuiuspiam Deo Virgini præcisa esset. tum ma-
ter egregium filia facinus, summamque illius paupertate-
tem exposuit, qua suadente, capillos sibi ademisset, quo,
sine pudicitia jactura, necessitatibus vitæ prospiceret.
obstupuit vir ille locuples, virginis sagacitate atque
prudencia, simulque captus est misericordia ejusdem
miseriarum. itaque celans in animo, quod cogitabat,
mulierem bono esse animo iussit; sed plenius doceri cu-
piens, discessit, & clam vicinos adiit, eosque de vir-
ginis vita ac moribus percontatus, invenit, illorum de
virginis pudicitia sermones cum ejusdem matris oratio-
ne congruere. qua fama compulsus, virginem indo-
tatam duxit uxorem domum, summa patris sui volun-
tate, qui in affinitatibus conglutinandis bonam virgi-
num famam divitiis omnibus anteferebam existima-
bat. quo exemplo fit omnibus palam, quod nullus spe-
ravit in Domino & confusus est. quis enim permansit in
mandatis ejus, & derelictus est? aut quis invocavit eum, &
despexit illum?

CLVII. *Hæreticus, Catholici viri derisor, cuius oratione ad veram fidem trahebatur, in sua perfidia, brevi post tempore, moritur.*

Pessimum peccantium genus merito illud habetur, cui non modo cogitatio nulla conversionis ad Deum occurrit, sed perpetua peccandi voluntas inhæret. hos si quispiam, caritatis studio ductus, salutaribus monitis ab errore in viam revocare contendit, non solum inanem operam sumit, sed ultro etiam ab eis illusos irrisusque discedit: quo fit, ut isti ad auxilium cælestis gratiæ, omnes sibi aditus intercludant ac sepiant. nam *voluntarie peccantibus*, ut inquit Apostolus, *jam non datur pro peccatis hostia. terribilis autem expectatio iudicii.*

In Gallia Narbonensi, apud Montem Pessulanum, vir quidam Catholicæ religionis, & salutis animarum studio incensus, dabat operam sedulo, ut hæreticum, obstinatum in primis, ad Catholicæ fidei castra traduceret: verum egregii illius conatus in irritum recidebant; nam à perfido illo fidei desertore deridiculo habebatur. qui fidei desertor, in quodam colloquio, tanquam per ludibrium, Libenter, inquit, religionem istam, quam omnibus præfers, amplecterer, nisi sacerdotis, qui vobis est à confessionibus, sævitiam pertimescerem; ille enim, pœnæ loco, Compostellanam mihi peregrinationem injungeret, quod sane nimis longum est iter, atque à rationibus meis alienum. tum ille, irrideri se minime ignorans, Vide, ait, ne tua isthæc pertinacia aliud te quam primum iter, multo isto, quod prædicas, longius, cogat arripere. quæ verba, non ininantis sed prædicentis, non adversantis sed vaticinantis fuisse, miser ille non ita multo post sensit. etenim paucos post eum sermonem, menses an dies? in sua perfidia, multisque aliis in sceleribus ac peccatis est mortuus; atque ex pii illius hominis prædicatione illud ingressus est iter, quo nullum, neque longius neque difficilius neque periculosius, invenitur.

CLVIII. *Ob*

CLVIII. *Ob secularia negotia non esse sacram
Ædium cultum oblivioni mandandum.*

NON est eundem inficias, multa sæpe homini ex improviso contingere, in quibus casus, non ratio dominatur, eumque, qui ejusmodi quapiam calamitate miseriæque afficitur, invenustum & infortunatum dicere non dubitamus: verum si infortunium, in quod incidit, culpa aliqua antecesserit, digna animadversione, non ea continuo infelicitati illius assignanda est, sed culpæ, quam commeruit, tribuenda. non vagabitur oratio mea longius, sed me ipso, peccatorum omnium maximo, continebitur.

Cum, Anno MDCXXXIV, die D. Nicolao sacro, Principis Apostolorum Ædem, non tam orandi, quam præfecti musicæ conveniendi causa, introissem, eundem, transactis suis partibus, prope è templo egredientem offendi; cui statim me comitem addidi, oblitus Apostolorum sepulcrum supplicatione aliqua venerari; & , cujus nunc criminis me magis pudet pigetque, saltem ante aram maximam genua flectere. itaque, egressus templo, cœpi ire una cum illo in via. secutus est etiam alter nos musicus. sed vix totam illam plateam, quæ templo eidem adjacet, sumus emensi; cum Apostolus, ferens indigne, religiosissimum illud templum adeo irreverenter à me habitum, voluit me levi saltem castigatione corripere, & flagitii, quod admiseram, admonere. forte, qua nobis transeundum erat, agaso quidam, jumentum ad clathros cellæ cujusdam vinariæ, humi depressæ, alligaverat, atque hordeum eidem objecerat: at jumentum, pronum in pastum, ita funem, cui alligabatur, in terram demiserat, ut animadverti vix posset, præferri à me, in alias cogitationes distracto: verum, repentino advenientium aspectu perterritum, caput attollens, funem etiam sustulit, qui tanquam in insidiis humi jacebat. in quem ego incurrens, ab eodem supplantatus, in genua concidi. at casum illum, & prolapsionem divinitus extitisse, non casu, duo in primis sunt argumento; primum, quod cum in medius inter duos incede-

cederem, soli mihi contigit cadere, aliis non item; fuerat enim, ni fallor, idem illis quoque casus subeundus: deinde cum recta ad urbem tenderem, ac proinde urbem in conspectu haberem, Vaticanam vero Ædem à tergo reliquisset, postulabat ratio, ut eum in locum versus prolaberer, quo iter haberem; sed, nescio quo pacto, contigit, ut cadens, templum, quod à tergo reliquisset, aspicerem; ut, qui sponte, ac sine malo, debitum religiosissimæ Ædi honorem & cultum exhibere neglexisset, eundem illi invitum & cum dolore præstarem, multisque essem exemplo, ne adeo rei suæ dent operam, ut, quæ sunt Dei, obliviscantur.

CLIX. *Mors militis cujusdam Poloni, scelerati hominis, pessima.*

F Andreas Rais, ex religiosa Io. Dei familia, à confessionibus ægrotantium, in Nosocomio S. Io. Colabitæ, in insula Tiberina, refert, anno MDCXXIII, cum in insula Danubii prope Viennam, quod est oppidum totius Austriæ multo maximum ac celeberrimum, propter sedem Imperii, Nosocomii illius Præfecto vicariam operam daret, defecisse à Ferdinando II Cæsare populos, sibi subjectos; quorum opes cum in dies magis augescerent, coactum esse Cæsarem, ad externa auxilia confugere, & præsertim ad Sigismundum Poloniae Regem, à quo Ruthenorum sex millium exercitum comparavit; verum hos Ruthenos, cum die quodam, prima luce, ad ripam Danubii consedisent, & pontem transire conarentur, ex improvviso in Germanos incidisse, qui, duce quodam, insigni Ferdinandi Cæsaris perduelli, pontis eos aditu prohibebant; itaque pugnatum ibi esse acriter, & multos utrinque amissos; sed inter saucios, repertum esse juvenem Polonum, in primis suæ civitatis nobilem, ea corporis proceritate, ut usitatas corporum magnitudines palmo superaret; hunc Vngarico telo graviter in capite vulneratum, quod membranam, qua cerebrum continetur, vulnus aperuisset, amicorum manibus delatum esse in illud Nosocomium,

inimum, & in lecto collocatum; ibique, ex catholica religionis ritu, pœnitentiæ & Eucharistiæ sacramentis, ad mortem, si obeunda esset, probe munitum. sed cum, multos jam dies, æger lecto detineretur, neque ulla sanitatis, sed contra, manifesta mortis signa se darent, delirium accessisse, cœpissèque, aliena eum loqui, ac, truci voce, horribiles ore sonitus edere; unde F. Andream mortem esse homini in propinquo, coniecisse, prope- rasseque, ejus animam Deo commendare; sed subito quodam horrore fuisse correptum, ex eo, quod cœpisset æger violentius se gerere, ac plurima horrenda visu agere, quæ summum terrorem incuterent. ad hæc, ab utraque lectuli ejus parte, horribiles armorum strepitus exaudiebantur, atque à dextera clangor tubæ incitantis in pugnam, à sinistra vero militum concursus & cædes excipiebatur, ita clare, ut aliorum ægrotantium aures verberaret, ac pro se quisque sedulo, quid illuc tumultus esset, interrogaret; demum, inter hos terrores, animam exhalasse, cum antea ululans, ac pauca quædam verba, Polonæ linguæ ignaro non intellecta, exprimens, corporis totius mole se in altum extulisset, ac ipsius pondere in lectum proruisset: quo facto, neque amplius se commovisse, neque illos armorum strepitus exauditos. postridie mane prima luce, cum duces ac signiferi aliquot ad nosocomium accessissent, F. Andream omnia eis, quæ essent acta, narrasse; sed nullam admirationem attulisse; quod dicerent, hominem illum insigni crudelitate sævitiaque fuisse, neque quidquam aliud in vita meditatum esse, nisi cædes, latrocinia, atque alia ejusmodi militaria facinora; verum ejus se hominis jacturam iniquissimo animo ferre, cui, in re militari, non erat facile parem invenire.

CLX. *Duo libidinosi, subita morte moriuntur.*

ANNO MDCXXXV, Procurator quidam Romæ, cui cum muliere impudica vetus erat usus consuetudoque, cœperat leviter ægrotare; quamobrem accersiri eam jusserat, ut ejus opera, si res posceret, utere-

tur; quæ dicto illi audiens, venit: verum, proxima nocte, morbus illi amplior est factus, adeo ut mori videretur: sed interea, dum unus ad medicum, ad sacerdotem alter accurrit, ut eos adducant, ille miser vim morbi ferre non potuit, sed in complexu mulierculæ, animam exhalavit.

Eodem anno, vir alter impurus, cum vellet cum amica in colloquium venire, nec locus alter commodior occurreret, quandam ædem sacram utriusque colloquio delegerat. nam fere usus obtinuit, ut in locis sanctissimis religiosissimisque, ejusmodi de rebus veneris negotia tractentur. quo cum illa ad diem atque horam dictam venisset, atque aliquot ibi horas ejus adventum expectasset, vidit inter plures cereos defuncti corpus efferri; quem cum esset intuita, illum esse cognovit, quem expectasset. etenim miser, subita oppressus morte, decesserat.

CLXI. *Patronus, qui causas clientum suorum adversariis prodebat, bis à Deo admonitus, cum non resipisceret, morte punitur.*

ERat Anconæ I. C. ex quodam Æmiliæ pago, egregie quidem doctus ac prudens, sed mire perfidiosus cupidusque pecuniæ; qui sæpe, in eadem causa, cum ab actore & à reo pecuniam accepisset, contrarium defendebat illi, quod eorum alteri scripserat: verum tantam sibi apud omnes auctoritatem, tantam ingenii doctrinæque opinionem pepererat, ut nihil putarent agi posse callide, nihil perite, ubi ipse non adesset. verum cum, die quodam, in nescio quo judicio, contra rem cujusdam viri nobilis, sed non admodum divitis, venisset, non tulit ille, sed, ut erat acer ac ferox, sica homini in facie vulnus infixit, seque ab urbe removit. cumque aliquandiu patria domoque caruisset, & quod refert, cum jam nihil in marsupio relictum esset pecuniæ, qua vitam sustentaret, egit per amicos, aliosque, ut I. C. oblitus injuriarum, pacem cum ipso componeret; sed frustra. nam homo iracundus, & animi per-

diti,

diti, nullis cujusquam persuasionibus, nulla auctoritate adduci poterat, ut tam insignite sibi factam injuriam, esse inultam pateretur. quamobrem ille statuit optimum esse factu, vitæ expertem hominem facere; ac feriis Bacchanalibus, cum fere omnes tota, hac illac, urbe personati discurrent, cum cognatus illi quidam adesset, bajuli habitu atque persona nimum agens, sclopum minusculum in illum emisit, qui innoxius, plumbeam glandem, quam exploserat, in macharæ pistoriensis, quam ille pallio tegebat, capulum impulit, atque incolumem eum dimisit; qui tamen mortis dilationem & moram, non autem effugium invenit, supplicium, quod momento pene temporis, ac nullo fere doloris sensu, animam adimeret, declinavit; sed in illud quod sensim, nec sine summo animi cruciatu, ad mortem daret, incurrit. nam cum aliquanto post, palam ejus criminis invidia laboraret, quod eorum causas, quos defendendos susceperat, adversariis proderet, Romæ reus prævaricationis est factus, ac vocatus, ut ad causam dicendam adesset; quo cum venisset, & multitudine testium obrueretur, ac cerneret, non posse se judicium ac poenam effugere; animum despondit, ac demum, ea animi ægitudine, mortem obiens, non expectavit judicium sententiam, sed antevertit.

CLXII. *Virgines, sanctimonia atque modestia, non autem amatoriiis artibus, debere sibi viros, quibus nubant, querere.*

IN pluribus Italiæ, atque adeo orbis terræ oppidis, hic neque satis honestus, neque laudabilis inolevit usus, ut virgines nobiles, nimis enormiter liberæ, amatorum greges, quasi invitatos, habeant, in templum entes ac redeuntes secum trahant, ad colloquium admittant, munuscula ab illis a lata percipiant, invicem amplectantur, dexteram dexteræ jungant; quæ tametsi nuptiarum, quas propositas habent, excusatione tueri conentur, gravem tamen Dei offensionem habent adjunctam, egregie, ut carera, S. Carolus Borromæus de-

creto suo cavit, ne sponſi eſſent una, neve inter ſe colloquerentur, atque adeo viderent antea, quam ſacerdos matrimonii eos nexu conjungeret; metuens; ne interea vitioſum quidpiam colligerent, in quo Deus maxime offenderetur. placuit tamen, hoc ſe invicem adeundi ſalutandique officium, antequam mulier in viri manum conveniret, ad ipſorum parentes novos affines pertinere. quod autem mos hic, de quo loquimur, pravus ſit, Deoque ingratus, exempla interdum in eos edita, qui illo utuntur, ſatis oſtendunt. atque in eis, quæ ob hanc cauſam, omnium maximo ſupplicii genere comprehenſæ ſunt, virgo quædam Anconitana numeratur, genere & forma ſatis ſplendida; hanc amabat adoleſcens quidam, & illa illum contra; nec ceſſabant, inter ſe aſpicere, colloqui, & plura etiam hiſ facere, quibus amor ſignificari mutuus ſolet, neque ad alium ſinem, niſi ut tandem connubii lege devincti, ætatem agerent ſimul. erat virgini frater germanus, cui erat hic amor ſane moleſtus, non id adeo, quod ex eo ſuæ & familiæ exiſtimationi aliqua dedecoris nota inureretur; etenim mos civitatis ab omni eum ſuſpicionem infamiæ vindicabat; ſed quia, ſi futuræ fuiſſent nuptiæ, virgini nomenanda dos erat, quam ægre patiebatnr à ſe divelli. itaque ſimulans, totum eum amorem in ſuum dedecus redundare, imperat ſorori, ut eo deſiſtat, & ſuam cum adoleſcente conſuetudinem diſtrahat. virgo, quæ ſibi eſſet conſcia, nullum famæ exiſtimationique periculum metuendum eſſe ab eo amore, qui nihil niſi nuptias, rem videlicet honeſtam ſanctamque, ſpectaret, neque eſſet neſcia, quid metum illum fratri conſlaret, ejus dictum ac minas nauci non fecit, ſed adoleſcentem amare ac colere ſtudioſius cœpit. hic ille pulcræ, virginis opprimendæ, dotiſque, quæ illi debebatur, lucrandi occaſionem ſe eſſe nactum exiſtimavit; neque eam dimiſit. nam ſimulans, ſe eſſe illi iratum, quod in eo, quod imperaverat, ſibi minus præſto fuiſſet, die quodam, exeuntem illam domo, pugione proſecutus eſt, multiſque vulneribus conſoſſam reliquit. neque tamen ſanguine, qui largiter effluebat deterrita, abjecit animum virgo, ſed regrediens domum, pugionem, quem frater lateri
ipſius

ipſius infixum reliquerat , ſuapte manu extraxit , ac totam ſe medicorum poteſtati permixit ; qui quamvis magna eam cura curaffent , non potuerunt tamen morti præripere. nam lethali febre correpta , ex vulnerum gravitate coorta , diem obiit extremum ; ac fuit virginibus exemplo , ne per eam rationem viros quærent , quos ſibi in matrimonio conjungerent , quæ gravem Dei offenſionem haberet adjunctam. quanguam enim impie frater egit , licentia tamen virginis nimia fuit , nec proſecto immunis à peccato , pœnam promerito.

CLXIII. *Hospitum uxores violandas non eſſe.*

Multa , apud veteres , violati hoſpitii exempla numerantur ; ut de Paride , qui à Menelao , regali cultu & magnificentia , hoſpitio exceptus , Helenam uxorem ejusdem , per ſummam ab eo perfidiam ac neſas , abduxit ; unde tanta malorum Ilias , Trojæ , quo ea fuerat perducta , inanavit. ſic Theſeus Ariadnam , hoſpitii , totque in ipſum aliorum ab ea beneficiorum immemor , deſerto in litore relictam , decepit ; ſic Demophoon Phyllidam , ſic Iaſon Medeam , hoſpitii jure violato , corruptit. longum eſſet omnes reſerre , quos in exemplum violati hoſpitii , vetus ac noſtra memoria protulit , quibusque ea fraus male vertit. quamobrem , omiſſis cæteris , uno tantum oratio noſtra definietur , cui magno ſtetit , voluiſſe hoſpitis uxorem ad nequitiam adducere ; neque ea abibit longius , ſed in ea Vrbe continebitur , in qua verſamur. Venerat Anconam mercator quidam locuples , ſuarum mercium diſtrahendarum cauſa , atque hoſpitio diverſerat apud hominem ejus civitatis nobilem , qui habebat in matrimonio , ætate integra ac præſtanti forma , mulierem. hæc , ut regionis illius fert uſus , & quia mercator magnam vim auri & argenti ſecum attulerat , viro non invito , omnibus in rebus illi aderat , una ſecum erat , iſdem conviviis , iſdem poculis utebatur. quæ mulierum cum externis viris liberius vivendi conſuetudo , quam non longe abſit à flagitio , plena eſt exemplorum hiſtoria. in quo Græci ali-

ci aliquanto melius, quam Latini, matrum familias ac virginum pudicitiae famaeque consuluisse visi sunt, apud quos nefas erat, mulieres primum locum ædium tenere, in celebritate versari, in convivio virorum accumbere, nisi propinquorum, aut uspiam quam in interiore ædium parte sedere, quo nemini, nisi propinqua cognatione conjuncto, esset aditus. contra nunc, apud plerosque, comitas habetur, perpeti, uxores suas, ac nubiles filias, in conventum virorum venire, sermones de rebus lubricis & inutilibus cum illis habere, frequens convivium inire, alea ludere, ac multa alia facere, quibus libidinis ardor excitetur, impudentia corroboretur, mores boni depereant. quid mirum est igitur, si mercator ille, suavissimis hospitis nuptae moribus delinitus, consuetudine illectus, pulcritudine captus, in illa exarserit? verum quia fieri vix potest, ut amatori mutuum in amore non fiat, neque eventus ex sententia succedat, praesertim si tempus & occasio ei rei operam dent; accidit, ut brevi mulier mercatori omnibus in rebus morigera fieret, & quamvis summam uterque daret operam, ut ita furtivum illum amorem clam virum haberet, ut ne quid illi unquam suboleret, tamen non potuerunt id assequi. nam, qua ille erat sagacitate, primum odore aliquo, ac leviter pressso vestigio, deinde palam & aperte, ad intimum ejus amoris cubile pervenit. & quia jam pridem, ad aurum hospitis, oculos adjectos, & in eo mentem intentam, ac defixam cogitationem habuerat, quemadmodum honeste eo illum interverteret, optatum negotium sibi in sinum delatum esse gavisus est, & rationem se invenisse existimavit, qua jure hominem auro & vita spoliasset videretur. itaque, fortasse non sine conscia uxore, quae ipsa quoque, pro innata mulierum generi avaritia, auro inhiabat, manifesto in flagitio deprehensum, obtruncavit. atqui cogitaverat quidem, ut diximus antea, se lege defendere, quae moechos manifestarios à viris occidi non prohibet; tamen unus est illi scrupulus injectus, ne aurum ab ipso, cujus illum magnam vim Anconam deportasse constabat, repeteretur, & cum nolle referre, veniret in suspicionem furti, atque omnium esset opinio occidendi homi-

hominis causam non adulterium fuisse, sed prædam. quomobrem in cella vinaria foveam, quæ mortui hominis corpus caperet, fodit, in eaque extinctum collocavit, & supra tellurem iniecit. verum cum mercator nusquam conspiceretur, neque cuiquam esset dubium, si interemtus fuisset, quin cædes ab ejus domo orta esset, ad quem ille divertisset, hæc suspicio iniecit magistratibus curam, perquirendi inveniendique, quid homini accidisset; atque hospitis familia in quæstionem vocata, ab eo illum occisum, & in cella vinaria sepultum, quod uxori stuprum intulisset, compererunt; & quamquam magnam hospes culpam commisisset, tamen judices mitius cum eo agendum esse existinarunt, quod se famamque suam ab existimatione hominum vindicandi causa delapsus in eam esse diceretur. neque ita multos post annos, re cum fisco composita, ab exilio, in quod, pœnam capitis metuens, sponte confugerat, est revocatus in patriam.

CLXIV. *Qui libidinibus se constringendum tradidit, ad omne nefas ab illis deferri se sinit.*

Nihil est, quod tam cujusvis intersit, quam statim ab ineunte ætate domitas habere libidines, & coercitas rerum omnium voluntates; quas nisi quis ab initio teneat, & rationis imperio cõhibeat, eo deinceps ab illis abreptus abstrahetur, unde non sit ei liberum emergere, & ad frugem redire; immo eo redigetur, ut nullam legem tenere se putet. quid autem ille non audeat, qui omnia sibi licere existimet?

Fuit paucis ante annis Romæ vir quidam, non summo ille genere ortus, sed ingenio atque opibus, si iis honeste uti voluisset, non exiguis, neque vulgaribus; quibus rebus fretus, non dubitavit ad Reimp. accedere, à qua repulsam non tulit, sed humaniter est receptus, atque in eorum relatus numerum, qui à supplicibus libellis referendis, Referendarii vulgo nominantur. quod munus cum egregie administraret, magnum apud eos, qui rerum potiebantur, docti, strenui, atque prudentis

viri nomen sibi pepererat; atque processisset honori-
 bus longius, si iter, quod instituerat, persequi, neque
 latam voluptatum viam inire voluisset, quibus volupta-
 tibus ita se depravandum corruppendumque tradiderat,
 ut familiares opes, quas alea ac ventre perdidderat, brevi
 deficerent, & quo munus suum recte tueri posset, neces-
 se haberet æs alienum grande conflare. sed in iis, à qui-
 bus scœnori pecunias acceperat, vestiarius quidam erat,
 qui præter pecuniam, quam scœneri dederat, magnam
 illi vestium vim, credita pecunia vendiderat, sed cum
 dies solutionis, non solum advenisset, sed multos jam
 menses præterisset, neque, cum sæpius peteret, præter
 spem & promissa, quidquam ab eo referret, cœpit, fla-
 gitator acer atque molestus, quotidie illum obtundere
 atque enecare; cui cum nihil esset, quod daret, nisi
 verba, venit in mentem, odium illud à se dolis dimo-
 vere. quos cum satis instructos in corde haberet, die
 quodam, à prandio, misit, qui suis illum verbis evoca-
 ret, quod paratus esset, sortem illi ac scœnus, ac quid-
 quid præterea pro vestibus deberetur, exsolvere. hoc il-
 le nuncio, plus quam dici potest, exhilaratus, advolat,
 ventis atque avibus citius; intronissus, accipitur à de-
 bitore humaniter, qui, Nihil tibi, inquit, erit amplius
 in me moræ, jam tuum accipies; interim mihi syngra-
 pham tuo chirographo scribe, qua fatearis, tibi solu-
 tam rem esse, caveasque, amplius eo nomine neminem,
 cui petitio sit, petiturum. ille, qui nihil metueret, ne-
 que quidquam sibi longius videretur, quam dum argen-
 tum acciperet, statim syngrapham, in eas quas ipse po-
 stulabat leges, exscripsit; qua ille accepta, vestiario, Abi,
 inquit, hinc domum, redito huc post quartum circiter
 diem, tum argentum non morabor, quin feras; nunc
 enim non est mihi operæ; negotiosus sum. ille, qui
 cum argento, se domum reversurum existimaverat, tum
 demum in insidias se devenisse cognovit, ac magna vo-
 ce, Circumvenior, ait, tuam fidem Deus; vel mihi
 argentum, vel syngrapham redde; ne, si iudex hæc de re
 sit capiendus, rem mihi solutam esse, meo chirogra-
 pho vincas. tum ille, iratus, Itane, impure, tibi ido-
 neus videor, qui creditum abjurem, qui te dolis deci-
 piam?

piam? enimvero hoc non est ferendum; eductoque pugione, miserum illum, nequidquam Dei atque hominum fidem implorantem, multis vulneribus confossum, ad terram abiecit. hoc tam ingenti facinore perpetrato. non parum commotus est animo, atque in Ædem ibi proximam fugit, metuens, ne, re patefacta, à prætoris cohorte corripereetur, & in carcerem conderetur, ut inde eductus, & ad carnificem datus, pœnas, tanto scelere dignas, morte persolveret; sed cum postea, ad se ipsum rediens, animum ad cogitandum instituisset, putavit, causam suam expeditissimam fore, si iudicibus probasset se, non solum provocatum, sed vi, atque adeo capillo, ut dicitur, abreptum, ad injuriam, ab homine nequissimo sibi factam, vindicandam, fuisse abstractum, qui multis verborum contumeliis, atque eo homine indignis, quem Princeps in illo honoris gradu collocasset, ausus esset negare, eam sibi pecuniam enumeratam fuisse, cujus à se acceptam syngrapham, suo chirographo scriptam, posset ostendere. qua defensione, pro certo existimabat, & mortis periculum à suo se capite posse propellere, & multa aureorum centena lucrari. verum, ut plerunque stulta sunt hominum consilia & inanes cogitationes, res aliter cecidit. nam cum uxori vestiarum de viri sui interfectione esset allatum, suspicans id, quod erat, nummos, qui debebantur, neque aliam causam, hanc illi mortem confecisse; hoc repentino calamitatis suæ commota nuncio, ita ut erat, discincta veste ac passis crinibus, ad principes civitatis, quibus erat, ob vicinatem aliasque necessitudinis causas, nota, accurrit, ac magnis vocibus deplorat viri sui interfectionem, orbitatem filiorum queritur, viduitatem suam, familiæ exitium atque ruinam lamentatur; clamat, vociferatur, ob pecunias creditas, si repetantur, interfici homines, liberos orbos parentibus fieri, matresfamilias in viduitatem, in solitudinem, dari; orat, obsecrat, ut tanti facinoris reus, in carcerem, in iudicium, in supplicium rapiatur. illi permoti, mandant prætori urbis, ut illum confestim in carcerem condi, in reos referri, atque ex vinculis dicere causam curet; qui statim dicto audiens, jubet hominem, qui animo ocioso ac libero do-

mis sedebat, in carcerem duci, ut, quemadmodum sese res habeat, per quæstiones ac tormenta perquirat. hinc licuit intelligere, quanta veritatis vis sit, utque nihil sit miserius animo hominis conscio. nam, cum posset ita causam instituere, ut antea excogitaverat, ac multa tacendo, multa negando, leviozem suam pœnam efficere; nihil tamen inficias ivit, nihil clam habuit; sed omnia, sicuti erant gesta, narravit. itaque, post longam ac diligentem causæ cognitionem, iudicium sententiis damnatus est, ut securi feriretur. illud vero ordinis, cui erat adscriptus, honoris gratia, datum illi est, ut non totum diem, quemadmodum fieri solet in aliis, qui supplicio afficiuntur, sed ad breve nescio quod tempus, populo ad visendum pateret, ac statim sepultura afficeretur.

CLXV. *Prudens mulieris, mortijam proximæ, famæ & salutis animæ suæ recte prospiciendi ratio.*

Cum omnibus indicta lex est innocentiae, præceptumque, ut libidines suas teneant, ne turpiter in aliquo flagitio labantur, tum mulieri in primis nuptæ, lex ista statuitur, cujus vetiti concubitus, præter Dei offensio- nem, & legitimi tori injuriam, quam continent, longius progrediuntur, atque in aliorum damnum & incommodum recidunt. etenim cum alteri viro nupta sui copiam corporis facit, si quid ex eo compressu conceperit, & in lucem ediderit, cum ignoretur, liberis illud ex marito susceptis, se infert ac miscet, ac paternorum eorundem bonorum, quasi fundi cujusdam calamitas, quod ipsos capere oporteret, intercipit; cui rei nisi interea prospectum aliquid sit, mulieris, quæ tantum dedit damnum & malum, salus æterna in summum delictum adducitur. verum majoribus res hæc periculis ac difficultatibus implexa videtur esse, quam ut, egregia sapientis cujuscumque opera, expedita reddi possit ac certa. mirum tamen nobilis cujusdam foeminae, ex illustri in primis ac celebri Italiae oppido, in ea explicanda, consilium

filium apparuit ; quod haud scio, an sapienti cuiquam ex illis, qui numerantur in septem, venisset in mentem. hæc genere, ætate, ac forma insignis, ad juvenis cuiusdam pulcritudinem, qui ipsius erat cupiens, exarsit ; cumque libidinis, qua intus flagrabat, æstum ferre non posset, dedit operam quam occultissime, ut cum eo esset, suamque ex eodem voluptatem exleret. sed accidit, ut ex ejus complexu gravida fieret, & quia poterat id, quod natum esset, ad virum, cui nupta erat, referre, statuit illud tollere, & una cum ceteris liberis alere. verum, cum multos post annos, gravem in morbum incidisset, eoque in dies ingravescente, ad ultima jam ventum esse sentiret ; quo æternæ suæ saluti prospiceret, & filio, quem ex adulterio susceperat, provideret, ne inopia coactus emendicaret, morti jam proxima, convocatis filiis, ejuscemodi verba habuit. Mihi, ut videtis, finis vitæ jam adest ; itaque, nihil faciendum est prius, neque diligentius, quam ut æternam meam salutem, quoad ejus fieri potest, in tuto constituam ; quod fieri non posse aliter video, nisi meum vetus flagitium, quod adhuc clam omnes habui, vobis aperiam. ideoque huc vos convocari, ac, remotis arbitris, claudi cubi- culi ostium jussi, ne quis fortasse, cum auritis plagis, rem omnem aucupetur, & non sine mea ac vestra infamia, in publicum proferat. sed amor mihi meus, quo vos universos semper sum amplexa, quoque vos inter vos amari ac diligere animadverti, magnam spem facit, ut consilium, quod datura sum vobis, non aspernemini, sed æqui bonique faciatis. cumque filii, se ita esse facturos, ac, ne latum quidem unguem ab eo, quod ipsis jus- sisset, discessuros, respondissent ; incipit illa, Ego, etiam tum adolescens, & ætatis ardore, & amoris vi, cui ob- sisti non posse videbatur, impulsa, cum alieno viro rem habui, (jam enim pudorem, quo aſtea deterrebar, ab- jicio,) sed, quod minime opus erat, concepi, ac, no- no post mense, quod conceptum fuerat, peperì ; ac vestro hoc numero continetur ; atque etiam indicabo, si pla- ceat. tum illi, re improvisa percussi, mirari, inter se aspicere, matrem, ne id faceret, orare, tum mutuis se amplexibus implicare, polliceri unusquisque, & suam

in eo fidem jurejurando obligare, bona inter ipsos patria, non aliter nisi per æqua parte viritum, fore dividenda. quibus illa auditis, vehementer gavisus est, Deo laudes dixit, voluntati illorum gratias egit, postremo sublatis iis, quæ mortem illi insuavem reddebant, æquissimo animo debitum naturæ persolvit.

CLXVI. *Atrox adolescentuli, in domo virginis deprehensi, cædes.*

Quantum damni malique afferat, quantamque ad convellendas deturbandasque quamvis veteres, atque altis nixas radicibus sanctitates, vim habeat mulierum, improbarum præsertim, vicinitas, ille toties, omnium linguis atque literis usurpatus Davidis Regis casus prolapsioque demonstrat. etenim cum esset exemplum innocentiae virtutumque omnium, cum nullum spectaculum illo gratius haberet Deus, si oculos ad res humanas convertere voluisset, continuo ex illo sanctitatis culmine, unico vicinae mulieris aspectu, dejectus est, & ad duo maxima & ingentia scelera atque flagitia, præcipiti lapsu, devolutus. verum cum omnes, qui vicinarum formis contemplandis, paulo licentius, oculis tanquam habenas remiserint, in eas plagas incidunt, unde se expedire vix possint, tum adolescentes præsertim, se multo facilius in eas indunt, & arctioribus nodis implicant, quorum ætate fluxus animus, & parum ad consistendum firmus, paulo momento huc illuc impellitur. Novum est quod referam, & hoc eodem anno & mense, quo hæc scribimus, exortum. erat Romæ adolescens, annos sedecim natus, ex humili quidem genere, sed ingenio ac moribus haud illiberalis; nam, patris diligentia, cni erat unicus, bonis erat artibus, sed musicis in primis, eruditus; ac satis jam scite eleganterque voce ac fidibus canebat. atque, ut initia se dabant, magnam spem omnibus ostendebat, fore, si vita suppeditasset, ut cuius, canendi artificio, par fieret. hic habitabat, cum patre, modicis ædibus, è regione earum, ubi pullarius pullos suos venales habebat.

erant

erant pullario filia virgines nobiles duæ, quarum una adolescentulum illum, quia forina erat non mala, & ipsi allubescerebat, & musicæ artis peritus, interdum noctu occentabat ostium, coepit perditæ amare, ac primum aspicere, tum nutare, nictare, & amorem illi suum per literas significare, atque ita impudenter & aperte hæc omnia facere, ut vicini in iis omnes graviter offenderentur, & adolescentuli ipsius parens pullarium, virginis patrem, non semel adierit, monuerit, rogaverit, ut filia pudicitia, vel, si ea, familiarium custodia, satis tuta esset, saltem famæ consuleret, ne ubi eam dare nuptum vellet, hæc fama, quæ interdum plusquam crimen ipsum nocet, nuptiis obstaret; proinde eam castigaret, corriperet, objurgaret, omnesque ad fenestras aditus, unde esset prospectus in viam, patrio jure & potestate, prohiberet; se idem cum filio acturum, quavis majorem diei ac noctis partem, domo abesse contingeret, utpote qui suas operas cocus alteri locatas haberet, nec semper observare posset, filius quid ageret suus. hæc sæpe cum illo severe & graviter locutus est; sed inanem operam sumpsit: nam pullarius, sive negligentia, sive qua erat in liberos indulgentia, criminationem illam à filia moribus alienam existimans, verbum illi ea de re nullum fecit. unde majores illa animos sumpsit. & ad suos amores persequendos, inulto est alacrior effecta. sed non fuit illi magnopere laborandum, ut adolescentem, imperitum rerum, ejusmodi in palæstram attraheret, ubi dedecore depugnatur & damno. in qua, usque adeo se impigrum præbuit, ut virginis etiam in amando sedulitatem diligentiamque anteiret. nunquam fere ille à vicinia pedem efferre, pro domi suæ foribus vel stare vel sedere, ad fenestras, ubi illa ipsi operam dabat, fere semper oculos conversos habere, literis misce ad eam scriptis, quas amor habet molestias, lenire. cui tandem illa fuit autrix, ut scalas pararet, eaque nocte, quæ D. Laurentii pervigilium consequeretur, domi ipsius parietibus adnotas, ascenderet; se enim, ad fenestram adveniienti præsto futuram. hæc cum ille ex præscripto profecutus esset, & ab ea domum intromissus, factum est, sive casu sive dedita opera,

opera, ut illac juvenis quidam transiret, paululum virgini cognatione adnexus, sed qui misere eam deperiret, quique jam diu adolescentis, cui ob zelotypiam erat infensus, opprimendi occasionem aliquam aucuparetur; & scalas intuens, suspicatus est, eas, quasi machinas ad expugnandam virginis pudicitiam, fuisse ab adolescente collocatas; statimque removit, ac secum abstulit. sed cum adolescens vellet reversionem facere, omnem sibi exeundi facultatem fuisse sublatam vidit, & ingemuit, suæque vitæ pertinuit; sed à virgine, cum jam dies appeteret, inclusus est in armarium, ibique totum diem S. Laurentio sacrum, sine cibo delituit; vespere autem, cum virgini spes esset, se posse eum aliqua clam foras emittere, armarium aperuit, unde miser adolescens, parum caute, nec sine strepitu exiens, rivali, qui erat in insidiis collocatus, indicium fecit; qui accurrens, & tanquam cognatus, ut illatam generi injuriam ulcisceretur, ferro impetum in eum fecit, & sex ac viginti plagis confossum ad terram abjecit; in quo cruentum & inexpiabile odium, & plusquam ferinam rivalis hominis rabiem, licuit aspicere, quam nulla sanguinis illius exforbendi satietas caperet, neque in misello corpusculo locum relinqueret, ubi rursus ferrum infigeret. ut dictum sit à sapiente divinitus, *Dura sicut infernus amulatio*, quod obtrektoris acerbitas, rivalis cruciatibus perinde non possit expleri, ut orci crudelitas, damnatorum pœnis, nunquam sit mitior atque remissior.

CLXVII. *Mulier vicinum, quem amabat, abeuntem in Galliam, simulata insania ac morte, prosequitur.*

PErpetuæ insidiæ, quas humani generis hostis, minus ad cavendum paratis, struere in vicinitatibus solet, hortatur nos, ut complures, qui per hanc rationem sint capti, enumeremus. Atque cum omnis vicinitas huic ejus quasi aucupio apta sit, ea tamen, quæ ex villarum propinquitate contingit, longe aptior existit; nec im-

meri-

merito. nam & camporum viriditates , avium cantus, decurrentium aquarum murmur , dulcis , obstrepentis auræ , sibilus, frigidulæ virentium silvarum umbræ , si sit quod amemus , prope nos ad nequitiam videntur attrahere , vel saltem ad omnem animi remissionem ac ludum impellere. itaque cum juvenis quidam , nobilis in primis, in Italiam è Gallia venisset , seque in patriam contulisset , cognatos propinquosque omnes, quos erat aspiciendi cupidus , quoniam ætas erat summa , & calores maximi , ex urbe , ut est mos illius regionis , rus comineasse invenit. quamobrem ipse quoque rus abiit, ubi , non solum à cognatis , sed à vicinis etiam est humaniter ac peramanter exceptus. in quibus matrona quædam fuit, nobili genere natâ , forma in primis bona & eleganti. hanc ille , simul aspexit, adamavit, & usus occasione , quam regionis mos dabat ; nam concessum est ibi , ut viri mulieribus alienis se iminisceant , sermones cum illis conferant, in ambulationem veniant , convivium incant, ludant ; hunc igitur morem secutus, non sibi deerat, sed frequens, ubi illa aderat , esse , nullaque ejus tuendæ satietate expleri ; quæ adeo nihil ad ejus amoris æstum levandum mitigandumque pertinebant , ut ampliorem etiam ac vehementiorem efficerent , eumque cogèrent , primum oculis , vultu , tum cum minus illa animadverteret, vel simularet se non intelligere , literis nunciisque significare ; sed nihil proficiebat ; nam mulier constanter & literas & nuncios rejiciebat. sed quia nullum est oppidum tam munitum , quod longa tandem obsidione non expugnetur , tundendo atque odio assecutus est , ut ea paulo mitiore uteretur ; deinde perfecit , ut nihil illi se ipso carius existeret. ne mul- ta , ita totum mulieris amorem suum fecit , ut nullam ejus illi partem relinqueret, quam in virum , liberos , ac rei familiaris curam divideret. sed mulier , qua erat sagacitate atque prudentia , ita clandestine ac caute rem totam agebat, ut nihil unquam cuiquam suboleret. verum hanc mulierem amabat , ut cum maxime , tum juvenis , & illa illum contra ; cum nuncius è Gallia venit , qui eum illuc magnopere evocaret , quod ejus patruus , amplissima præditus dignitate , cessisset è vita. quod

quod cum mulieri multis cum lacrimis enarrasset, illa quoque vim lacrimarum dedit, & dolorem, quantum maximum animo capere potuit, accepit; ex quo cum paululum se collegisset, Dic, ait, obsecro, si ad te in Galliam venero, tuæne mihi domus fores patebunt? cumque ille annuisset, immo nihil sibi in vita jucundius accidere posse affirmasset, quam ut cum ea ætatem ageret, mulier læta, Abi, inquit, atque istuc Dens iter tibi fortunet; ac me illuc, ubi tu futurus eris, expecta. ne multa; proficiscitur ille, in Galliam venit, ac mulierem certiorum per literas facit, quam in urbem Gallia pervenerit, quamque in domum diverterit. at ea, non statim, sed aliquot post menses, ne quisquam suspicari posset, juvenis, qui abiisset, desiderio id sibi contingere, insaniam simulat, facitque ea omnia, quæ faciunt ii, unde mens omnis & ratio discessit. credit vir ac domestici omnes. sed quo facilius curari posset, ac ne vicinis atque adeo populo fabula fieret, rus ducunt, ac curandam medicis tradunt, familiarinque custodiis, ne quid sibi vel alteri noceat, obsepiunt. sed postquam satis sibi insanisse visa est, nihil amplius esse opus stultitia, sed ratione utendum existimavit; si ratio appellanda est, quæ sit inimica rationi, quæ Dei injuriam habeat adjunctam, quæ divinarum humanarumque legum claustra perfringat, quæ contra æternam animæ salutem veniat. ergo sibi mentem rediisse fingit, seque penitus in veterem sanitatis locum restitutam ostendit. quamobrem, qui eam vincitam asservabant, è vinculis eximunt, ac sinunt libere abire, quo velit. at illa, die quodam, ceteris in templo rei divinæ operam dantibus, cum domi sola esset, multas struices concinnat lignarias, ac supra, mortui cujusdam cadaver, quod duorum, quos sibi fidos fecerat, opera effoderat, imponit, & igni comburendum tradit; tum amiculo ejus generis induta, quo in sodalitiis confratres utuntur, cujus cucullus, à capite ad os decidens, totum os contegit, inter illos duos, quos sibi obnoxios fecerat, eadem veste indutos, mediam in urbem se confert, & cum nox advenit, una cum illis, citato equo, in Galliam contendit. at familiares, è re sacra redeuntes, ac pyram,

ram, una cum ossibus, ardentem inspicientes, pro certo existimarunt, mulieris fuisse illud opus, quæ, furore percita, incendio vitam finire decrevisset; neque aliquam in ea, quam mortuam esse credebant, perquirenda operam sumpserunt. tantum tamque atrox à vicinitate illa profectum est nefas. sed multos post annos auditum est, eam usque ad annum quintum & septuagesimum vitam produxisse. verum, utrum eam facti pœnituerit, pœnisque ultro susceptis, ejus maculas eluerit, an non, certum sciri non potuit.

CLXVIII. *Mulier nupta, vehementissimis à dæmone tentationibus oppugnata, mori maluit, quam illis assentiri.*

Quamvis nullum ex vicinitate flagitium consequatur, vix tamen fieri potest, quin ex inutuis virorum mulierumque obrutibus, ex frequenti consuetudine usque, vetitæ impuræque cogitationes multæ exoriantur, quæ lethale animæ vulnus infligant. etenim cum, in animo constructæ, ab oculorum judicio removeantur, neque aliquod famæ & existimationi dedecus vel damnum inurant, difficile est assensionem ab illis nostram cohibere, quibus tandem, si nos assentiri contingat, etiam ante effectum operis, quantum culpæ satis est, absolutum atque perfectum est scelus atque flagitium. neque sibi quisquam polliceatur, fore se ab impuris cogitationibus immunem ac liberum; nam eas invitis etiam nobis ac recusantibus, à dæmone injici, facile intelliget, si velit in sanctorum hominum, ac virtutum omnium principum, vitam inspicere. inveniet enim, alios, quo impuras cogitationes, quibus acriter oppugnabantur, ab animo propulsarent atque repellerent, toto se corpore in spinis ac vepribus volutasse, ut videlicet voluptas, quæ ab illis cogitationibus prodibat, corporis dolore cruciatuque expelleretur; alios, sæviante hyeme, in rigentes frigoris vi aquas sese mississe, ut eo rigore ardorem concupiscentiæ, quæ in illis effervescebat, extinguerent. Verum ex iis, qui nostra

tempestate magno excelsoque animo præditi, cupiditatibus suis fortiter acriterque obviam ierunt, mulier nobilis, nobili item viro nupta, egregium ex se facinus edidit, dignum, ut, in exemplum similis virtutis, omnis posteritatis memoriæ radatur. hæc cum vehementissime se commoveri sentiret in adolescente, quem vir suus, vicinitatis jure, arctissimo sibi familiaritatis nexu constrinxerat, quemque domum sæpissime adducebat convivam sibi, cumque Deum vereretur ac metneret, & existimationis in primis bonæ cupida esset, nolebat flagitii quidquam cum illo committere, neque impuris illis cogitationibus assensionem præbendo, animæ suæ nitorem inquinare. itaque dabat operam sedulo, ut suo ab animo, quantum potest, eas abigeret. verum cum adolescens omnibus fere horis ipsi esset in oculis, adeo ejus imaginis formam ex animo non debebat, ut eidem etiam altius insingeret, quæ res tantum miseræ conflagrabat ardoris, ut jam pene mortem esse in propinquo sentiret, nisi induceret animum, id quod ipsa minime volebat, cupiditati illi morem gerere. restabat aliud nihil, nisi, ut virum, quanta maxima vi posset, oraret, vel ut amicitiam cum adolescente dirimeret, vel à domo sua eum saltem procul haberet. id quod illa fecit diligentissime. sed vir, suspicione offensus, rogavit, num quàm ille pugnam ipsi dedisset, vel saltem, num quod animi minus erga ipsam honesti & continentis signum ostendisset, quod persancte negavit; sed cupere se, ait; sermones iniquorum effugere; vereri enim se, ne illi obijcerent lenocinium facere, quod, cum habeat ætate integra domi uxorem, ad eam forma bona adolescentem commessatum intromitteret; in quo etiam existimatio sua, quæ vita ipsa sibi esset carior, periclitabatur. cui ille, Quandoquidem, inquit, nihil tibi ab eo molestiæ infertur, sermones hominum flocci non facio; dicant quod lubet; ego ut animo meo libitum est faciam. qua oratione, misera, de ea spe, quæ ultimum ac solum morbi ipsius remedium esset, ejecta, animum despondit; cumque in dies ægritudo fieret amplior, in tabernum incidit. ex qua cum sibi moriendum esse intelligeret, litteras suo chirographo scripsit obsequavitque, quas confessa-

fessario , rei totius conscio , traditas vetuit , ante suum è vita discessum , aperiri. quod cum postea factum esset , inventum est scriptum in eis , se , naturali quadam vi cogente , eatenus in adolescentem illum , quem vir suus domum adducebat , fuisse propensam , ut , cum vellet cohibere libidines suas , ne erumperent , seque in illum effunderent , eum in locum fuisse adductam , ut aut moriendum esset , aut illis obtemperandum ; sed inavuisse vitam amittere , quam deditionem facere , idque nulla impulsam re alia nisi , ne Deo injuriam , generi contumeliam , castitati labem inferret , quod cum esset auditum , adeo omnes , qui aderant , in admirationem extulit , ut clamarent , ac faterentur , mulierem illam , castitatis pudicitiaque exemplum , non unum è multis , sed propemodum singulare existere.

CLXIX. *Infelix trium liberorum exitus , quos parens , ob interfectam ab ipsis novercam , omnibus precibus devoverat.*

QVam sœde filiis res illis ceciderit , qui suis parentes injuriis impulerunt , ut se devoverent , atque omnia ipsis mala deprecarentur , aliquot improborum filiorum exemplis , quorum insignis in parentes improbitas , scelere juncta , exstiterat , supra satis ostendimus : verum quantam hæc devotio viam in eos habeat , quibus jure parens maledixerit , satis hac nostra memoria factum est palam in tribus , qui facinus atrox ac sævum , in summam parentis injuriam , admiserant. hi Romæ , in urbe totius Italiae multo maxima ac celeberrima , in amplissima familia nati , & corporis proceritate , oris elegantia , atque animi virtute , ceteris concivibus suis , qui una essent ætate , longe multumque præstabant ; sed non minor illis superbia inerat. nam cum parens suus , priori uxore defuncta , alteram duxisset , nobili quidem loco domi suæ natam , sed fama non integra , quod Prorex Siciliae , qua in insula illa nata erat , à parentibus abductam vitiasse diceretur , id ægre illi tulerunt , quod ex eo concubio non leve familiae suæ dedecus inultum

esse arbitrarentur. verum ille, qui eximia mulieris pulcritudine, in qua mire exarferat, captus, non alia conditione ejus usuram corporis capere, nisi matrimonii lege, potuerat, eorum dicta neglexit. itaque irati, in novercam conjurarunt, & cum domo parens abesset, fistula displosa, nihil tale suspicantem, interemerunt. quod nbi parens, qui eam, ob singularem pulcritudinem atque alias animi dotes, unice diligebat, accepit, omnibus liberos precibus, quod tale facinus ausi fuissent facere, detestatus, vetuit sibi amplius in conspectum venire, ac magnifico eam funere efferendam curavit; quod ego funus, admodum adolescens ac pene puer, aspexi, cum undique innumerabilis hominum multitudo conflueret, ut tam formosæ, ut ipsi loquebantur, extinctæ pulcritudine, quæ etiam tum in ejus ore hærebat, oculos pascere. res mira; malo ad unum omnes letho interierunt; quorum primus, qui, præter forinam, singulari virtute præditus erat, ob suspicionem stupri, principis uxori, in cujus aula versabatur, illati, dum Romam pergeret, in itinere occisus est; alter, cum virginis cujusdam dotatæ, quam etiam ob pulcritudinem deperibat, nuptias adamaret, eaque ipsi recusaret nubere, quod modicis opibus esset, fratrem natu majorem, qui itidem in novercæ necem consenserat, ad quem, utpote ad familiæ principem bona omnia redierant, veneno sustulit; quo crimine comprehensus ac convictus, magno suggestu, in medio foro, excitato, ob generis nobilitatem, est primum securi percussus, tum sectus in frustra.

CLXX. *Virgini, ab adolescente deceptæ, cui nuptiarum spe se vitiandam permiserat, vita ferro eripitur.*

QVemadmodum more fiat pessimo, Deoque in primis molesto, ut virgines adultæ, meretriciis prope artibus, loquacibus nimirum obtutibus, suavibus colloquiis, illecebrosisque blandiciis, adolescentes, qui modo ætate ex ephebis exierint, in sui ipsarum amorem concen-

conentur impellere, paulo ante significavimus. & quamvis hæc omnia dicantur fieri propter nuptias, quæ solæ sunt ipsis in voto, non tamen propterea se à peccatis, quibus implicantur, expediunt. quis enim sapiens, bonum illud sibi dari velit, cui malum accedat? verum quam sæpe amores isti cultoribus suis decoquant ac decollent, gravissima infortunia, ad quæ, tanquam ad saxa, sævis fluctibus feruntur, ostendunt. & quamvis, ex omnium fere seculorum memoria, plura repeti hujus rei exempla possint, unum tamen recens huc afferam, quod possit esse omnibus disciplina, ne dubia hæc & incerta, ad secundos nuptiarum exitus, semita incedant, sed ea ad illos quæ trita est omnium itineribus via nitantur. Morem hunc malum, de quo loquimur, jam pridem Januæ, viri omnium nobilissimi præstantissimique missum fecerunt, quarum filias non antea sponis aspiciendi alloquendique facultas datur, quam dotis tabulæ, & alia legitima, confecta sint omnia; verum morem enim adhuc retinent plebei homines, ac minorum, ut ita dicam, gentium cives, iique in primis, qui plures habent filias, quibus honeste collocandis res illorum paupercula suppeditare non possit. nam filiæ eorum, aucupium virorum facere instituunt, quos in matrimonio sibi conjungant. atque erat quidam in iis, ex honesta, sed non admodum locuplete familia, qui neque in mercatura, neque in alienis negociis, quæstus faciendi gratia vertebatur, sed in re sua, quamvis non ampla, vitam ociose degebat. plures hic filias habebat, vafas, malitiosas, catas. ita enim sunt ibi mulierum fere omnium ingenia. earum unam amare occæpit adolescens, ejusdem loci atque ordinis, elegans, lepidus, ac venustus, magis joci ac fallendi temporis gratia, ut mos est ociosorum; (etenim ille tantundem erat ignavus atque iners, quantum parens industrius ac diligens, ob quas virtutes, à suis civibus diligebatur.) simulabat igitur, se eam amare magis, quo sibi risum atque ocium quæreret, quam quod aliqua ejusdem cupiditate flagraret; sed demum intellexit, quid esset periculi, cum amore coludere. nam paulatim, aspiciendo colloquendoque, tantum ex ea consuetudine, quam ludibundus inierat,

ardoris incendiique contraxit, ut partem sibi viscerum abrumpi sentiret, quoties ab ea divelleretur. nec minor intus virginem ignis urēbat; quo adeo æstuabat, ut insanire videretur, ac, ne malum longius serperet, parentes ipsius eam illi cum adolescente consuetudinem sint conati dirimere, ac mutuo illorum amoris distractionem, dissidium, & vastitatem asferre. sed frustra; nam adolescens, qui discidium virginis ferre non posset, omni mente, in ea cogitatione curaque versabatur, ut inveniret, quemadmodum virginis aspectu atque colloquio oculos explere, ac saturare animum posset; & cum multa occurrerent, illud demum arripuit, quod audierat vel legerat, ancillas sibi esse faciendas suas, qui primas ad dominam vias affectaret. itaque orando, assentando, largiendoque, affectus est brevi, ut famulam, quæ erat virgini pedissequa, custos & janitrix, totam haberet in potestate, eique se ac suos amores commendaret. qua re ita virgo incessit omnibus lætitiis, ut cum voluptas animo non contineretur, foras erumperet; ac summum adolescentis in se amorem prædicabat, acumen ingenii laudabat, qui tam acute rationem, qua cum ipsa posset esse, reperisset; jamque nuptias animo devoratas habebat; ac noctu, famulæ suæ opera, dum parens altiori oppressus somno in lecto jaceret, de fenestra adolescenti secum in via colloquente operam dedit; tum ex vicinis ædibus propius ejus auribus orationem accepit; postremo ausa est etiam suam in domum illum excipere; quod diceret, eum locum tutiorem ac remotiorem ab arbitris fore. scitis, quid suadeat nox, amor, & occasio; sed non antea sibi vim fieri passa est virgo, quam, præsentē famula, jurejurando cautum ab illo esset, curaturum se, idque à patre impetraturum, ut quam primum domum suam nova nupta deduceretur: verum cum illi sæpius eundem ludum luderent, contigit, ut mulier gravida fieret. tum illa vehementius, quam antea, orare, instare, urgere, ut nuptiæ fierent; promissi fidem, jurisjurandi religionem, in memoriam revocare, ipsius famam, familiæ existimationem & decus, quod magnum, ex suo partu, quod latere non potuisset, vulnus esset accepturum, ante

te oculos ponere ; qua ille oratione commotus , cœpit patrem orare , ut eam sibi liceret ducere. negavit parens , avidus pecuniæ , id se posse illi concedere ; non enim è familiæ suæ re esse , mulierem , ita tenuiter dotatam , in eam dari ; proinde cogitatione illa desisteret ; nam se conditionem , multo illa , quam afferret , locupliorem , unde maximæ ad ipsum divitiæ pervenirent , inventurum. adolescens , tanti spe lucri proposita , statim immutatus est totus , & contra fidem , contra iurandum , contra bonos mores , omnem ex se se de illa eiecit conjugis animum ; cui , cum vitium inferret , tam sancte affirmaverat , se nunquam commissurum , ut non eam uxorem duceret , quæ suum ipsi animum , atque omnem vitam credidisset. quod ubi illa rescivit , continuo miseræ animus concidit ; quæ , neque quid ageret , neque quo se verteret , neque consilii quid caperet , habuit ; ac sollicitam eam in primis habebat metus infamiæ , quæ in se atque in familiam refundenda esset , si clam patrem , sorores , atque adeo omnes , ejus partus evenire non potuisset. hæc ejus animum cura , magis quam Pentheum Bacchæ , ut est in fabulis , diripiebat , distrahebat , dilacerabat ; jam corpus cœperat plenius apparere , atque in dies magis intumescebat ; patris sororumque conspectum evitabat , Dei immortalis ac Sanctorum templa , & publicum omne , horrebat ; nemo aderat , cujus fidei auderet clandestinum hoc infortunium committere , quique , si illud ei credidisset , rem ita dubiam , ita implicatam , docte , sapienter atque cordate reddere posset explicatam ac certam opera sua. Famula , criminis herilis conscia , ipsa quoque ex adolescentis servi compressu grvida , (nam dum domini erant una , illi etiam stupri societatem inierant ,) antea quam quisquam se esse gravidam sentiret , è domo illa surripuerat se , ac longius abierat. itaque miseræ reliquum erat nihil , nisi ut se totam lacrimis ac dolori permitteret. jam eam omnis ventris occultandi ratio defecerat , quod præter modum inflatus ac tumidus , neque fasciis arcte obligatus deprimi , neque alio artificio oculis spectantium subripi poterat ; agrotationes , quarum inflatum illum conabatur excusatione defende-

re, nemini probabantur; interrogata quid esset, in respondendo, mire à se ipsa discrepabat. in has igitur angustias adducta, cum consilia omnia frigerent, tandem sororibus, rem totam diligentius exquirentibus, veram morbi causam aperuit; quæ incredibili re atque atroci percitæ, cujus infamia in ipsas immigrabat, & ubi voluisset eas parens nuptui dare, repudiolas suas nuptias factura esset, corripiunt sese, ad patrem excurrunt, & tantum domestici mali nuncium apportant; quo ille nuncio, dolore, quantum animo maximum capere poterat, affectus est; sed cum paululum ex eo se collegisset, & consilium cogitationum suarum advocasset, cœpit exquirere, quid in re tanta, optimum factu esset; cumque multa se objicerent, illud demum arripuit, ut summam daret operam, quo adolescenti filia nuberet. ita enim acceptum in existimatione damnum posse sarciri. itaque, de cognatorum omnium sententia, constituit, optimum esse factu, ad hominem cum primis honestum ac nobilem confugere, qui cum adolescentis parente, non exiguæ pecuniæ rationem habebat, ejusque, in tanta re, auxilium opemque deprecari. itaque hominem adit, injuriam ab adolescente filiæ suæ factam enarrat; quam posse sanari ostendit, si ille manere in eo, quod promiserat, vellet; orat atque obsecrat, ut patrem adolescentis, qui à nuptiis abhorrebat, oratione atque auctoritate sua, quæ plurimum apud eum posset, illis assentiri compelleret. respondet vir nobilis humaniter, se rem suscepturum, ac diligenter cum illo sermocinaturum, ac pro certo existimare, fore, ut pro rei æquitate, ac sua in illum auctoritate, tria inter ipsum & illum verba non essent commutanda; proinde bono animo esset, ac rem confectam haberet. hoc ille responso exhilaratus, tanquam si res esset in vado, omni animum cura exoneravit. venit igitur vir ille nobilis ad parentem adolescentis; rogat eum, pro sua fide ac diligentia, pluribus verbis, ne affinitatem sibi oblatam respuat, neque tam insignem honestæ familiæ notam, à filio inustam, hædere patiatur, sed filium sinat servare, in eo quod dixisset, fidem, nuptiasque, quas virgini pepigisset, rite persolvere, erat ille, ad quem

quem ejusmodi orationem habebat , in magno ære alieno, contra in suis paucis nummis; quamquam ex negociis, in quibus vertebatur, quæ erant plurima, aliquam sibi locupletis hominis famam confecisset; quod æs alienum, ex dotata uxoris , quam filio invenisset, pecunia, se dissoluturum esse existimaverat ; ideo neque ulla æquitate orationis , neque persuasionibus , neque precibus, neque nobilissimi illius viri auctoritate permotus est , sed totum illud postulatum causamque neglexit: verum vir ille nobilis , ita ab eo discessit , ut tamen rem illi omnem attentius ac diligentius considerandam expendendamque relinqueret. sed , jam temporibus exactis , nono post mense mulier pepererat. cognati, quod ex verbis viri illius nobilis , nullum de nuptiis dubitandi locum esse relictum, crederent, jamque eas palam divulgaverant , decreverunt , quod natum esset , domum ad adolescentem mittere ; qui , paternis consiliis & admonitionibus imbutus, non modo illud recusavit accipere , sed suum non agnovit, quod mater cum aliis etiam rem habuisset ; ac deferentibus inquit , ut properarent puerum tollere à janua. hoc nuncium , puerperæ cognatis allatum , ita eorum animos, qui alia omnia expectaverant, perculit , ut curriculo ad eum, quem sibi in hac causa patronum elegerant , exanimati venirent ; à quo etiam acceperunt , adolescentis patrem ita obstinate eorum affinitatem repudiare, ut nullis neque admonitionibus neque precibus neque minis adduci posset , ut æquibonique partem aliquam vellet ; sed curaturum se , ut sui eum facti dictique pœniteret. neque ullam interposuit moram , sed statim ab eo creditas illi pecunias , in quibus negociabatur , exegit. unde cum errorem suum agnosceret , neque propositum haberet illum emendare atque corrigere , quod , quidquid fecisset , nihil ad collapsam suam existimationem sublevandam profuturum esse intelligeret , conjectus est in morbum ex agritudine. at cognati mulieris , quibus nuptiarum spes omnis occiderat , nihil , nisi de referenda impuro adolescenti gratia , qui tam indignis eam modis ludificaverat , excogitabant ; jamque semel atque iterum conati cum fuerant insidiis opprimere , sed non potuerant conata perficere,

ficere, quod ille, sibi metuens, vix unquam domo egrediebatur; nec sine advocatis audebat publico se se committere. sed mulier, cui magis quam ceteris acceptæ injuriæ dolor animum ad persequendam dabat, voluit experiri, num melius res sibi procederet. habitabat illa in ea urbis parte, quæ, quia paulo depressior est, Vallis clara appellatur; contra adolescens, quingentorum ab ea passuum intervallo suas in edito loco, Castello pnsillo nomine, ædes habebat, ad quas mulier, hora noctis quarta, virili habitu, venit, pulsat januam, atque, Evocato mihi, inquit, aliquis domini filium; eo enim convento est opus. agnovit adolescens, qui una cum aliis ad fenestram accurrerat, notam mulieris vocem; sensitque, se paululum, ex veteris cum ea consuetudinis memoria, commoveri; eaque impulsus, non animadvertens, adventus illius causam, non ejus visendi studiū, sed injuriæ ab ipso acceptæ ulciscendæ cupiditatem, existere, ad ostium se contulit, eique, Ecquid, inquit, ð mulier, esse dicam causæ, cur hoc noctis, & cum hoc ornatu incedas? ego, ait illa, quam paucissimis absolvam; venio exquisitum ex te, quid tibi sit animi erga me; num tibi semper sim futura ludibrio. &, cum lacrimis, ubertim ex oculorum fonte deductis, ac suspiriis alte petitis, cœpit suas illi misérias enarrare, in quantum propter ipsum parentis propinquorumque omnium odium contentioneinque venisset, quam multis, omni populo, minus secundis de se sermonibus locum aperuisset, propterea quod ipse in fide, quam dederat, non stetisset; orabat, obsecrabat, ut se domo reciperet, ac promissi sui summam exolveret; quod, si nihil in ipso moræ fuisset, continuo, sedatis omnibus discordiis, cuncta essent in tranquillo futura. verum ille, propositi sui tenax, ex justis mulieris querelis, quibus arcte se teneri sentiebat; variis excusationibus elabi conabatur. at mulier, intelligens, omnes suos conatus in irritum cadere, atque occisam illam rem esse, oravit enim, ut saltem, redeunti sibi domum, dignaretur esse comes in via. quod ille primo negavit, sed ita commode elocuta est, ut non potuerit recusare, quominus comes cum ea iret usque ad Regis Hispaniarum oratoris ædes, quæ

erant

erant in declivi illius collis, ubique ipsa armatos sex, occidendi ejus gratia, in insidiis collocaverat. verum quia adolescens semper erat in metu, fratres consobrinos duos, item armatos, sequi se jussit. at ubi ab eo loco propius absunt, ad quem usque adolescens se comitem mulieri futurum promiserat, cœpit illa quasi defessa esset ambulando, pedetentim ingredi, ac post alios ire. non fugit hoc unum ex consobrinis adolescentis; qui, suspicione offensus, minus grandes gradus facere, & suis eam vestigiis persequi instituit; cum ecce tibi sex illi, qui erant in insidiis, ex occulto (nam spissæ noctis tenebræ lucem plane suppresserant,) sclopos emittunt, & consobrinum alterum, qui lateri adolescentis hærebat, graviter feriunt. at ille, quamvis ad necem vulneratus, non sibi defuit, sed continuo suum quoque sclopuum explosit, atque ex adversariis unum, ad terram abjecit. adolescens, cum se post putem occultasset, domus cujusdam parieti adjunctum, armatorum illorum tela & incursum refregit. quod cum consobrinus alter, qui mulierem observabat, aspiceret, ira ac furore percitus, educto ferro, impetum in eam fecit, multisque vulneribus inpositis, semivivam reliquit, confessarii ac vicinorum opem nequidquam implorantem; quorum nemo, ad ferendum auxilium, accurrit, quod sæpe ejusmodi turbæ in ea vicinia fierent, ad quam, Regis Hispaniarum legati honoris gratia, fere nunquam lictores accederent. ut ad pauca redeam, finis fuit ejusmodi, ut paulo post mulier, hoc est, post tres circiter horas, mortem obierit, atque una viri illi duo, quos vulneratos concidisse diximus; verum illam, cum totam noctem humi infra jacuisset, primò mane cognati sepulturæ mandarunt; adolescentis vero parens, fortunis omnibus, nobilis illius viri insectationibus eversus, in summa rerum omnium egestate, biennio post ab omnibus desertus derelictusque decesserit; filius autem, propter quem ea turba evenerat, patria domoque pulsus, sine re, sine ingenio, sine bonis artibus, suas alteri operas locare, vel subinde regiones mntando, victum emendicare, sit coactus; denique, sorori defunctæ, ne ad conciliandas sibi nuptias, iis artibus, quæ germa-

næ sorori male provenerant , uterentur , factum sit , cognatorum opera , ut in quandam sacrarum Deo virginum domum conjicerentur.

CLXXI. *Puer , inde usque ab infantia male educatus , per summum scelus matrem innocentem occidit.*

Nihil plerumque tam à parentibus negligi videmus , quam primam illam puerorum educationem. etenim non modo non laborant , ut ea severa sit , atque ex optima ac sanctissima disciplina , verum etiam dant operam , ut ea perquam mollissima & perquam solutissima sit ; atque huic tam fractæ enervatæque educationis generi , indulgentiæ nomen imponunt. quod nulla ratione , immo turpiter ac flagitiose , ab illis fieri constat. in ea enim vitæ filiorum parte elaboranda formandaque sunt negligentes , quæ est quasi solum ac fundamentum ceterarum. nam si ea altius in animis hærent , quæ prima homines didicerunt , quod , omnium aliarum rerum expertes , ea avidius arripiunt , ac tenacius retinent , nonne ea in illis sunt imprimenda , unde meliores , non autem deteriores in dies , evadant ? quisnam existimabit , cum adoleverit , levi ac parabili cultu corporis se fore contentum , qui in cunis jacuerit , humi reperit in serico , in purpura , in auro ? quis sperabit , modicis ac vulgaribus cibis famem depulsurum eum , cui simul ac palatum sapere cœpit , exquisitissimæ epulæ opiparaque obsonia edendi cupiditatem expleverint ? quis credet , cupiditates suas cohibiturum esse eum , qui , quidquid inciderit in animum , velle consueverit ? quis arbitritur , pudorem suum præstiturum esse eum , omni verborum obscœnitate vitanda , cujus impuras voces risu osculoque parentes exceperint ? quis affirmabit , nemini nocituros esse eos , qui infantuli à parentibus , dum in complexu eorum essent , manus non abstinerint ? Vidi ego , puerulos parentibus in os unguibus involare , quod aliquid postulantibus ipsis ad nutum præsto non essent , illos vero inepte atque improbe pios , non modo non aude-

audere verberibus eorum audaciam infringere, sed ne leviter quidem verbis reprehendere, ne eos flentes aspiccerent. fit ex iis consuetudo, deinde natura, qua compulsi inventi sunt non pauci, qui impias parentibus manus attulerunt. ex hoc numero fuit quidam Anconæ, annos natus non amplius sedecim, ex veteri honestaque familia; cujus tutela, patre è vivis sublato, ad matrem redierat; quam adolescens, natura ferox, & ab omni honestate relictus, ex parentum negligentia formandi custodiendique in ætate prima pudoris atque modestiæ; nec verebatur nec metuebat, neque aliqua in re ejus dictis obsequens erat; accedebant ad animum, tum ætate tum sua sponte ad pejora omnia propensum, amicorum propinquorumque quorundam familiaritates, quibus illum expediebat esse quam teterrimum; eorum ille consiliis obtemperabat, atque, ex eorum libidine, voluntates suas omnes moderabatur. quibus filii injuriis commota mater, & quia florenti adhuc erat ætate, oblatam sibi, medico cuidam nubendi occasionem, occupare statuerat. quod cum cognatis ac filio molestum in primis accideret, quod intelligeret, ea affinitate rem sibi familiarem minui; unde futurum esset, ut minus deinceps luxuriæ ipsius suppeditaretur; cumque adolescens, manu promptus, & ad quidlibet audendum projectus, ira & cupiditate, hac illac, raperetur; fuit persuasus à cognatis, ut ferrum intra materna viscera conderet, ubi ipse genitus, & humana natura, tanquam veste, indutus fuerat, & apud quæ, novem mensibus, tanquam hospitio diverterat; denique, ut eo manus sanguine contaminaret, unde procreatæ essent ac conditæ. quod homo, sævo ac carnifici præditus animo, statim arripuit. nec mora; cum mane quodam illa, ut mos est mulierum, cura cultus sui anxia, ad speculum acu comatoria crines sibi disponderet, ac pigmentis os fingeret pingeretque, rogata est ab eo, ut surgeret, ac mundum sudariolum sibi præberet; quod cum illa non neglexisset, contulit se ad arcam, ubi vestem lineam habebat inclusam; in quam cum, sudarii depromendi gratia, se inclinasset, stricto pugione à filio, qui primas partes susceperat, petitur, tum cognatis adjuvantibus, qui subsidio illi

illi venerant , pluribus vulneribus confossa , ab eo , cui vitam dederat , vita privatur , ac negligentia indulgentiaque , quam in eo nimis molliter educando adhibuerat , poenas exolvit.

Hinc perniciosæ parentum in liberos indulgentiæ , jure tribuendum est illud , quod de Sicula puella , ejusque amatore , scripsit ad me vir omnibus iis virtutibus , quæ in Episcopum conveniunt , cumulatissimus , Fabius Chisius , Episc. Neritonensis ; quod totidem verbis , quibus ab eodem narratur , exponam ; non enim dici postulat elegantius neque venustius. In insigni insulæ Siciliae urbe , puella quædam nobilis juvenem exterum adamare coepit , nihil tale cogitantem , qui studiorum causa illuc se contulerat ; ac eo , vesaniæ ac libidinis impetu , adacta est , ut , die quodam , sumpta occasione , ore impudenti , renunciaverit id ipsum juveni , atque in noctem proximam invitaverit. accepta sponsione , juvenis , quamquam eodem die , secta sinistri brachii vena , sanguinem misisset , juxta à medicis præscriptam verni temporis purgationem , paruit. cum vero satur aut fessus libidine , obdormivisset , contigit , ut sponte aperta vena , effusoque sanguine , expiraverit. quod puella deprehendens postea , somno excitata , matrique renunciâns , atque cum ea invito consilio ad crimen occultandum , suis humeris media nocte cadaver in templi limine collocavit. illuxit dies ; varius rumor de nece juvenis illius , & civium concursus ad feretrum , quod de more locaverant in eodem templo. interim furere illa , nec , quamvis à matre monita , conquiescere , nec stare loco ; immo circa vespertas illius diei petiit , liceret sibi inter spectatores accedere , ac mortuum aspicere ; tum negare mater ; illa vero vehementius persistete. abiit tandem , matre comitante , amore percita ; cuinque de conspectu fuit amati juvenis , educto cultro , quem veste tegebat , exclamans , Ego perdita , causa fui tuæ necis , dilecte mi , immissoque ferro pectori proprio , manubrio tenuis , cecidit super ipsum , & suam ad orcum victimam profecuta , insigni hac infamiae nota gentem suam infecit. Hæc vir ille præstantissimus. unde licet intelligere , perniciofa hæc matrum in filias indulgentia quorsum evadat. quam-

quamquam mater hæc, de qua diximus, progressa sit longius. non enim pauxillulum insane, sed totum insane, filiam amavit; quæ sustinuerit, peccati illius conscientia esse. nam quid debuerat mater, cupida existimationis bonæ, tum suæ tum filiæ, nisi cum compertum habuisset de illius amore, ab ea illam insania retrahere, atque ab adolescentis illius non modo familiaritate, sed etiam congressione, materno jure ac potestate, prohibere, imino honesto cuiquam viro nuptui eam dando, omnes impurissimorum amorum causas illi præcidere? at contra tam leni ac victo in eam animo fuit, ut, ne sollicitam eam haberet, non modo furoris illius se comitem, sed ducem etiam præbuerit; neque illud in mente habuit, filiæ flagitium in Dei, quod caput est, offensionem, & in suam familiæque universæ dedecus infamiamque recidere. itaque fit verisimile, nunc illam apud inferos in æternis illis ignibus positam, una cum eo, quem eundem in interitum traxerat, vitiosum matris amorein, qui tantam sibi calamitatem suppliciumque conflagraverat, omnibus precibus detestari, & quovis illam odio perniciosiorem asserere.

CLXXII. *Mulier, curæ cultus sui nimis dedita, gravi à Deo pœna punitur.*

Quamvis deliciæ cultusque omnis mulieres decere videatur, neque quisquam tanta eloquentia inventus sit usquam, qui potuerit illis ornatus sui curam adinere, tamen, si hæc illarum sollicitudo studiumque intra aliquem modum se se contineat, jam ferri tolerarique posse censeatur; præsertim in nuptis, quarum unicum est votum, à suis viris amari ac diligere, à quibus verentur, ne, sine mundicia cultuque, insulsæ atque invenustæ habeantur; quamquam causæ, quæ obrem amandæ, & in primis caræ essent habendæ, ingenii potius suavitas, morumque sanctitas deberet esse, quam formæ bonum, & cultus cujusvis amœnitas; nam formæ præstantiam, ornatusque nitorem, ingenium malum, ac mores incommodi, pejus cœno deturpant; contra,
turpem

turpem vestitum, mores pulcri, re ipsa, commendant. atque sæpe fit, ut gravior à Deo atque severa in eas exempla edantur, quas maior æquo, in se ipsis ornandis poliendisque, labor & cura contorqueat. ut in quadam vidua, ex honesta familia, Romæ nuper evenit. hanc formæ quovis modo augendæ tantus ardor, vel furor potius, incessebat, ut senas quotidie horas eidem excolendæ traderet, ac se lavandi, fricandi, tergendique, expoliendi, fingendi pingendique nullum finem modumque statueret; cumque esset, ut diximus, vidua, nunquam domi (nam foris haud licebat) collum baccatis monilibus vacuum gerebat, versicolori semper veste induta, beneque aurata ingrediebatur; formosorum, quorum circa se multos habebat, consuetudine delectabatur; nullum sermonis genus à se alienum existimabat, sive modestum, sive molle, sive facetum, sive hilare, sive procax. quamobrem sermo erat omni populo, aperiebaturque maledicis hominibus, quorum plena sunt omnia, divulgandi locum, quod parum honeste pudicitiam haberet. sed non est passus Deus, exquisitam illam atque inutilem, intuenda augendaque forma, mulieris sedulitatem, cum tanta divinæ ipsius majestatis contumelia atque hominum offensione conjunctam, inultam abire; nèque diem supplicio distulit; sed repente indidem, ubi illa peccabat, graves ab ea pœnas ac justas expetiit. nam primum caput illi præter modum intumuit, cujus capillis, Cosmianis, ut veteres loquebantur, medicamentis, aureum fulgorem conabatur inducere, quosque tanta disponebat arte, ut partim, sicut nunc mos est, ad genas fluere sineret, partim eleganti nodo devinctos, vertici daret, ut inde inextricabiles incautis spectantium oculis laqueos intexeret; tum malæ, quas cerussa purpurisque non infecerat sed incrustaverat, tam scœdum, tam atrum nigrorem contraxerant, ut horrorem iis qui aderant incuteret; oculi ita extabant prominebantque, ut pene è suis sedibus discederent; linguam, foras ejectam, crebris sibi morsibus dilacerabat; & in hoc oris habitu animam edidit; singulare mulieribus illis exemplum, quibus carior est forma corporis quam animi, pulcritudinis fama quam pudicitia.

CLXXIII. *Virgo, ad stuprum à vitrico expetita, satius ducit, vitam, quam pudicitiam, amittere.*

Mulierum virorumque una in unis ædibus commoratio, atque convictus, quantum periculi habeat, quantumque inutilis sit ad pudicitiam castitatemque tutandam, multorum, tum nostra tum vetere memoria, horribiles casus prolapsionesque declarant, quorum alii natarum, alii sororum, scedis funestisque complexibus se se contaminarunt; quod etiam sanctissimorum hominum, atque omnis doctrinæ elegantia principum auctoritate & exemplo confirmatur; qui ne, ex mulierum consuetudine, quæpiam in animum cogitatio illabere-tur, quæ aliquam illis maculam aspergeret, cognatarum etiam sermones conventusque vitabant. quamobrem sapienter à matribus illis familias sit, quæ filias innuptas, quas habent, in interiore ædium parte continent, quò nemo accedat, neque germanus frater, neque alius, quavis propinqua cognatione conjunctus; alterum more Græcorum, à quibus interior illa pars ædium Gynæconitis appellabatur. verum hæc promiscue cum viris mulierum habitandi consuetudo quantam vim habeat ad flagitium vel facinus concipiendum perpetrandumque, paucis ante diebus, Romæ in tabellione quodam, homine impurissimo sceleratissimoque, apparuit. hic viduam secum quandam matrimonio junxerat, cui filia erat nubilis, forma adeo eleganti, adeo venusta, ut nihil supra. quæ pulcritudo cum omnibus fere horis vitrico veniret ad oculos, tantum illi inflavit incendium, ut vitam insuavem redderet, nisi aliqua ejus potiundæ facultas obringeret. itaque, hortante libidine, & occasione operam dante, cepit ille primum, ad expugnandam virginis pudicitiam, pugnis quibusdam uti levioribus. quod cum mater, ab eadem docta, rescisset, hortata eam est, ut impuri illius conatibus, quanta maxime vi posset, obfisteret, neve tantum in se flagitium ac facinus admitti pateretur. interea, quo suo viro, omnis,

virginis clam ipsam opprimendæ, occasio præriperetur, à suo eam latere nusquam longius abire sinebat. at ille, cum uxorem suis cupiditatibus obstare intelligeret, die quodam, amens libidine atque furore, obtorto illam collo, in proximum cubiculum est conatus abstrahere, ibique includere, ut custode remota, quod ipsi collibuisse, virgini faceret; sed recusantem illam venire, aliquot vulneribus affecit. quainobrem illa, male mulcata, Filia, inquit, te pudicitiamque tuam, ab istius prædonis vi inpetuque, quavis potes ratione, defende. ad quam vocem illa exterrita, cum non alia fugæ ratio pateret, se se præcipitem de fenestra in viam eiecit; eoque casu statim est mortua. utrum recte an secus, non disputo; sed habeo, quam Lucretiæ, cujus castitas, omnium fere linguis ac literis, laudibus in cœclum effertur, non solum opponam, verum etiam anteponam. nam illa, post admissum in se dedecus, voluntaria morte se pudicitiamque suam existimationi hominum vindicare conata est; hæc, antea morti se tradidit, quam cujusquam experiri vim posset: illa ita mortem appetiit, ut apertum aliquem suspicioni aditum reliquerit, quod antea stupro consensisset; hæc, cum integra se interemerit, aliqua vel minima prostitutæ pudicitæ suspicionem laborare non potuit.

CLXXIV. *Viro religioso, mulierum consuetudinem, atque adeo aspectum, esse vitandum.*

Quantum religiosis hominibus, iisque præsertim, qui perpetuæ castitati, obedientiæ, ac paupertatis cultui se voti religione obstrinxerint, expediat, intra cellæ suæ fines se continere, nec foris evagari; contra, quam sit eisdem perniciosum, multitudini se committere, sermonibus hominum dare, sæcularium, ac mulierum præsertim domos, officii amicitæque gratia, frequentare, facile intelligent, qui complurium, tum ex veteri tum ex nostra memoria, fuerint horribiles miserosque casus recordati. est enim in cella pax, quies, tranquill-

quillitas, ocium; foris vero seditiones, bella, insidiæ, tumultus; in cella mens à mortalibus rebus abducitur, & in cœlum erigitur, contra foris animus à cœlestium rerum contemplatione avocatur, & ad hæc humilia & inferiora deprimitur, præterea si quispiam, humanæ consuetudinis vitio, in se aliquem excitari motum libidinis sentiat, fugiendo seque occasione subducendo, eum statim, dum tempus & facultas suppetit, comprimere ac rationi subesse compellat; ne, si patiatur vires accipere, in eum malorum gurgitem deferatur, unde emergere ac pedem referre, cum velit, nullis humanis viribus possit; & in primis oculos à contemplandis mulierum formis avertat, neque iis credat, qui docent, ab iis ad Deum, tanquam, per gradus, ascendi; nam malo suo discet latum exinde aditum aperiri, unde præcipiti ad inferos lapsu devolvatur; ut patet ex hoc exemplo. Quidam ex religiosa arctioris disciplinæ familia, ingenio, quo multum præstabat, assecutus est brevi, ut cœnobio cuidam præficeretur, ac magnum in Concionatoribus nomen haberet; qua fama compulsi Cremonenses, magnis eum præmiis invitaverunt, ut, à Cinerilibus ad usque Paschatos solemnia, Cremonæ conciones ad populum haberet, quo cum venisset, ita sermonis elegantia, vocis suavitate, actionis venustate, ac doctrinæ copia, ad se animos auditorum attraxit, ut inter se omnes in eo diligendo colendoque certarent, sed in iis, qui officiis eum omnibus prosequerentur, civis cujusdam locupletis ac nobilis animo erat carus in primis; huic erat filia unica, forma & vultu adeo eleganti, adeo venusto, ut nihil supra, quæ cum ipso habitaret, propterea quod virum non haberet, hanc ille cum sæpius aspiceret, colloqueretur, frequenter una in unis ædibus esset, ac non parum sæpe cibum cum ea caperet, factum est, ut ad insaniam adamaret, adeo ut cum amoris vim ferre non posset, hac sibi ratione viam munire ad explendam suam libidinem instituit. decesserat, paulo ante, civis quidam Romanus, qui Cremonæ uxorem duxerat, eamque ita liberaliter honesteque tractaverat, ut moriens magnam apud omnes civium Romanorum, probitatis famam relinqueret, cœpit igitur

tur virginis parenti persuadere, ut Romanum alium, re, genere, ac moribus, illi qui decesserat, similem, filia virum daret; quem se inventurum pollicebatur. parens, Romani illius mentione commotus, qui ob insignem probitatem, magnum omnibus desiderium sui reliquerat, concionatoris consiliis sibi obtemperandum duxit, atque, si inveniretur, inquit, ille quem diceret, nullam fore per ipsum moram, quin daret illi suam gnatam uxorem. Quadragesimæ igitur tempore, & Paschalibus feriis exactis, ita ab eo discedit, ut civem illum Romanum, quem idoneum filia ipsius sponsum fore putaret, quam primum se cum suis ad ipsum literis missurum, asfereret. interim abiens, secretum secessit in locum, ibique eatenus latuit, neque mortalium cuiquam, quid ageret, aut ubi nam gentium esset, aperuit, quo ad capillus & barba promissior fieret, quo se posset hominum notitiæ surripere, ac probare pro eo, cujus personam gerendam simulandamque susceperat. sed jam capillus & barba productior, ita hominis faciem immutaverat, ut facile cuivis posset glaucomam ob oculos objicere, & assimulare, se eum esse, qui non esset. atque ardens libidine, literas à Concionatore commendaticias, ad parentem virginis datas, miro artificio factas, effluxit; in quibus significabatur, eum, qui attulisset, Romanum illum esse, qui ipsi gener, & filia sponsum futurus esset; proinde honorem illi haberet, & omnes humanitatis benevolentiaque significationes, quas parentes liberis solent, ostenderet; & cum his literis, Cremonam versus, iter arripuit; quo anteaquam pervenerit, paululum constitit in quodam oppidulo, Cremonæ propinquo, ubi ejus fratres commorabantur; à quibus, tanquam concionatoris amicus (etenim plures sibi cum illo dicebat necessitudinis causas intercedere) exceptus est humanissime liberalissimeque, atque aliquot apud eos dies, hospicio divortit. hoc interim spacio forte accidit, ut die quodam unus ex fratribus illac transiret, ubi novus iste Romanus, qui nunquam Romam aspexerat, molli-ter recubans, somno se dederat, atque ex positione corporis, suum sibi fratrem concionatorem est visus aspicere: verum quia id putabat non posse contingere, suis oculis

oculis fidem non habuit , nec voluit id vidisse quod vidisset , rem tamen animo comprehensam retinuit. sed Romanus hic civis , optatus expectatusque Cremonam ingreditur ; prodeunt illi obviam focer ac nova nupta, advenisse gaudent , exornant ample magnificeque convivium, lectum genialem sternunt , nuptiæ magna omnium cum voluptate lætitiaque fiunt , sponfi ac familiares dant operam epulis, ludis, choreis, omnique hilaritati : sed vix dies quindecim intercesserant ab eo die , quo mulier in viri manum convenerat, cum superioribus, quorum ille auctoritate concionandi munus acceperat, quia nondum ad cœnobium se recepisset , cœpit esse suspectus ; ac veriti, ne uspiam se contineret ubi animo obsequeretur suo , literas primum dederunt ad fratres , quarum erat sententia , ut , si ille apud ipsos esset, quam primum missum facerent ; satis jam indulgisse eum genio , jam nimis diu à cœtu suorum abesse. quibus lectis, continuo venit illis in mentem Romani illius, qui, Cremonæ ducturus uxorem ; apud ipsos hospicio divorterat ; auxit suspicionem frater ille , qui eum in dormiente corporis situm deprehendisset , in quo concionator cubitare solitus erat ; & quo suis vestigiis vulpem prosequerentur ac comprehenderent , profecti sunt Cremonam ad uxorem , ab eaque , summa vi , in beneficio & gratia petierunt , ne gravaretur diligenter exquirere, num , in quadam corporis parte viri sui , signum quoddam , puta nævum , vel simile huic , hæreret ; magnam enim gratiam se ab ipsis inituram , quod plurimum rationibus ipsorum expediret , hoc nosse. respondet mulier non inhumane , daturam se operam diligenter , ut fieret ipsis satis ; atque ea , quæ proxime consecuta nox est , viri sui corpus perlustrat , atque in ea parte , illud, quod ipsi dixerant , signum deprehendit. sed mulier cæta , quæ cum eo faceret mutuum , à quo se unice amari ac diligi intelligebat , quæque suspicaretur, nimiam illam hominum illorum curiositatem non alio , nisi ad illius perniciem , spectare , revertentibus illis, nullum se insignem in toto viri sui corpore notam offendisse , respondit. at illi, quibus erat deliberatum ac fixum , occultos sycophantæ illius dolos , ex illis latebris simula-

tionis, in apertum lucemque proferre, statuunt illius nomen quæstionibus fidei deferre. fit reus, in carcerem conditur, quæstio habetur; at ea fuit hominis astutia, ea in respondendo cautio atque prudentia, ut nihil ex eo potuerint iudices, unde merito condemnari posset, exculpere; quin etiam, ob morum suavitatem, sermonis elegantiam, doctrinæ varietatem, ita Cardinalis Camporæ, qui tum eam cathedram Episcopus obtinebat, ad se animum attraxerat, ut totum hominem possideret, & ab ejus latere nunquam discederet, ac nihil propius sit factum, quam ut, adnitentibus uxore & sœcero, summa cum illius voluntate, ex reis eximeretur. sed raro insignia flagitia, scelere juncta, subsequentem poenam effugiunt. nam res accidit, quæ hominis illius improbitatem, integumentis simulationis obductam, evolvit, atque in conspectum dedit, cum, die quodam, à prandio, Cardinalis variis cum eo sermonibus pomeridianas horas festive hilariterque traduceret, incidit mentio de causa; atque erat illi auctor Cardinalis, ut crimen, cujus insimulabatur, si forte admisisset, confiteretur; se enim fore illi auxilio, pollicebatur, daturumque operam, ne quid pro ejus magnitudine in ipsum gravius statueretur. sed cum nihil ageret, divini numinis instinctu (neque enim existimari aliter potest) venit illi in mentem, ab eo exquirere, ex qua nam curia, seu parœcia esset, dum erat Romæ. qui, S. Spiritus, respondit; cujus olim hospitalem domum Cardinalis, Præceptoris nomine, administraverat. quo responso totam suam causam ac defensionem evertit. nam, cum instaret Cardinalis quærere, quis nam esset, ejus Ædis situs, quæ forma; continuo illi, re inopinata & improvisa percussio, color immutatus est, vox hæsit; & cum conaretur dicere, aliena respondit, ac perspicuam suam improbitatem fecit. quamobrem Cardinalis seductum illum, primum humanissimis verbis, tum minis atque terroribus, coëgit crimen fateri, quamque induerat simulationem, exuere; reductoque in vincula, Romani hominis persona eripitur, & religiosi species & imago relinquitur; tum, magno cum puellæ dolore, quæ illum æque ac se ipsam diligebat, matrimonii illud vinculum quo

quo contra jus fasque sese implicaverat, abruptitur; postremo, de omnibus sacrorum ordinum gradibus dejecto, perpetuus carcer definitur, ubi in tenebris, quod reliquum erat vitæ, transigeret. verum Cardinalis, qui perpetuis eum tenebris vinculisque mandaverat, inemor amoris ac benevolentiae, qua complexus eum fuerat, eatenus benignitatis in eum clementiaeque progressus est, ut non ita multo post, ab eo carcere, in unum aliquod suæ familiæ cœnobium transferri mandaverit, atque eundem denique in veterem sacerdotis concionatorisque locum restituerit; qui postea totam hujus rei seriem Etruscis complexus est versibus, rhytmorum lege solutis, sibi, è re nata, non teterrime cecidisse testatus est, Deoque immortales gratias egit, quod pnteo illi, in quem præceps se se demerferat, os non præcluserit, sed sua ope auxilioque exendi ex eo facultate donaverit.

CLXXV. *Innocentiam ubique, & in tribunalibus præsertim, tutam existere.*

A Teste locupletissimo gravissimoque, qui rem vidisset, non autem ex auditu argueret, accepi, mulierculam quandam, nobilis ac sumptuosæ meretricis ancillam, stimulis conscientiae actam, Quæstoribus fidei, dominæ nomen detulisse, quod veneficiis atque cantionibus dedita esset; itaque dominam in jus, ad causam dicendam, vocatam fuisse. illa, quæ ab amatoribus fortasse didicisset, in judiciis, eorum testium dictis fidem abrogari, quos ira, odium; vel cupiditas aliqua, ad testimonium dicendum compulisset, eos omnes, qui sibi in hac causa posse obesse existimaret, quos inter ancillam etiam numerabat, hoc uno genere circumscribere statuit, quod infenso animo atque inimico venisse diceret; & ancillam in primis, quod fuisset in eam acerbior ac vehementior. ac fidei faciendæ gratia, tres primum nobiles viros adduxit, qui interrogati responderunt, se vidisse ancillam lacrimantem, ac brachia loris

infensam affirmabat ; deinde tres alios , inferioris ordinis ac loci , testes adhibuit , qui oculis eam suis , à domina verberari vidissent. itaque erat omnium consultorum sententia , ut decerneretur , ancillæ indicium falsum videri , ac dominam ex reorum numero eximendam esse. verum illa non inficiebatur , se cum primis illis testibus multis cum lacrimis questam esse dominæ sævitiam , ac perpetuas cum ea sibi iniinicitias fore dixisse , sed id dominæ voluntate à se factum affirmabat ; quæ per hanc rationem cogitabat ab amatoribus suis , conciliandæ inter ipsam ac dominam gratiæ causa , pecunias , abradere ; alios vero tres , qui testificabantur , se vidisse eam à domina verberari , palam & constanter mendacii arguebat. quamobrem iudex quæstionis , vir sapiens ac doctus , cui præfagiret animus , vera mulierem loqui , consilium iudicabat , quamvis invitum , dimittendum , & causæ cognitionem in aliam diem differendam ; nam fore , ut multa interea possent occurrere , quamobrem res , quæ esset obscurior , illustraretur ; nec sua eum fefellit opinio. etenim aliquot post dies , ex illis tribus unum , mercatorem , regionis illius domino carum , longa statura , bene vestitum , in conspectum mulierculæ humilis , sordidæ ac paunosæ adduxit , ut ex oculis , ore , vultu , colore conjiceret , utrius oratio propius ad veritatem accederet ; ac testem interrogavit , num eam vidisset verberibus cædi ; qui , vidisse , respondit. ac illa , primum profiliens in genua , Tu ne , inquit , audes hoc dicere ? qui , etiam , ait. tum irata , in pedes atque adeo in digitos erecta , prope ut illi in os unguibus involaret , magna vi animi & vocis , sublati in altum oculis , Deus cœli , inquit , tuque Deipara , obsecro vos obtestorque , ut sæviter in ejus , qui mentiri sustineat , carnem animadvertatis. expalluit ille , sed nihilo magis è sententia decessit , neque imprecationibus mulieris , eventus , quem optaverat , defuit. nam paucis diebus post , ille testis apud alium iudicem accusatus est , quod uxorem interemisset , & adeo sæva atque atrox habita quæstio est , ut ab equuleo , ubi post multas horas crimen fateri coactus fuerat , inferioribus corporis partibus laceris , & brachii utriusque ossium commissuris ex sua sede distractis ,

relatus

relatus sit in carcerem, ut de eo supplicium fumeretur ;
 cujus infamiam ut effugeret, magna vi terque quaterque
 caput in parietem impulit , illudque lethalibus vulneri-
 bus multis affecit. tum quæsitore per sacerdotem , eam
 ad rem aptum , fecit eum admonitum , ut , si sua sibi
 salus æterna cordi esset , quæ in mulierem insontem pro
 testimonio dixisset , revocaret , ac palinodiam caneret,
 antea quam affectus supplicio ex hac vita migraret. pa-
 ruit ille, ac corpore lacero , ac vulneribus pleno , dela-
 tus feretro ante Quæsitorem , ac palam professus est, sua
 ac sociorum testimonia mendacio niti , sed ad ea dicen-
 da , meretricis gratia fuisse compulsos, quo eam periculo
 litium liberarent. quibus actis, innocens absolvitur meri-
 trix, atque alii duo, ea qua digni erant pœna mulctantur.

CLXXVI. *Mulierum nuptiarum formosarum-
 que contubernia esse vitanda.*

VIr quidam nobilis ex Æmilia Anconam venerat, ubi
 lecto exceptus est à cive item in primis nobili , cui
 erat uxor , ex vetere & illustri familia : verum quia vir
 ille nobilis ex Æmilia, cognationem sibi quandam , suo
 cum hospite esse commemorabat, fiebat , ut sine ulla
 suspicione , tanquam cognatus , uxoris illius consuetu-
 dine perquam familiariter uteretur ; quæ nimis arcta
 multorum jam mensium consuetudo ususque , non po-
 tuit effugere malevolorum sermones. erat mulieri fra-
 ter , cupidus existimationis bonæ ; hic à famula illius
 oneratus est suspicionibus , persuasusque , ut tantam si-
 bi ab hospite factam injuriam ulcisceretur ; cui ille, quia
 non parvam rerum suarum fidem habebat , aures adhi-
 buit , & ab eadem introductus in cubiculum , ubi ille
 penè nudus (erat enim æstas) in quadam arca , altiori
 oppressa forma , iacebat. solam emissa , cum non ad

ab eo, quem ad scelus illud impulerat, tanquam herilis peccati conscia, latum atque amplum in facie vulnus accepit.

CLXXVII. *Fraudulentus decoctor graviter à Deo punitur.*

EA est hominum quorundam improbitas, avaritia, fraus & pecuniæ, quovis modo cogendæ, ardor ac studium, ut, dum ipsi locupletes fiant, nihil pensi habeant, quemcumque, qui se ipsis dederit, fundis, familiis ac fortunis omnibus evertere. atque audaciores eos ad hanc rem facit pessimus mos, qui introductus in Remp. est, ut, cum quis à pluribus, vel pecunias mutuo aut scœnori acceperit, vel cæca die, ut veteres dicebant, mercimonia emerint, quæ statim, oculata die, aliis revenderent, præda onusti se pro decoctoribus gerant, nec nummum ulli resolvant. adjuvant improbitatem istorum, Principum virorum favor & gratia, à quibus literas auferunt, quibus cavetur, ne quisquam esse illis incommodus ac molestus audeat. itaque eos videas, impune tota urbe volitare, & obvios creditores risui ac ludibrio habere: verum cum satis jam defessi sunt, misere eos litibus & iniquissimis judiciis exercere, & quo etiam id, quod prædati sunt, in tuto constituent, seque molestiis omnibus eximant, per amicos interpretes cum creditoribus agunt, ut cum ipsis decident, & si quis, centum ab eis aureos petit, triginta, qui decem, unum accipiat, atque hac decisione satis ipsis esse factum, in publicas tabulas referat, caveatque, amplius eo nomine neminem, cujus petitio sit, petiturum; quod miseri creditores, sublati in cælum manibus, in beneficio & gratia accipiunt; quo facto, improbi illi intra se rident, seque pulchre esse furatos existimant. Ex hoc numero, proximis diebus, Florentinus quidam fuit, qui Neapoli negociabatur, ibique etiam uxorem duxerat, ac plures ex ea liberos susceperat, atque ingenio callido atque versuto, & oratione subdola asscutus erat, ut nemo ipsi metueret credere, immo certatim omnes, quidquid mercimonii apud ipsos esset, credita pecunia, trade-

tradebant ; quæ ille statim Romam fratri , improbitate , avaritia , fraude , ipsi gemino ac simillimo , mittebat , ut præsentī pecunia distraheret , quam pecuniam ita celatam atque constructam haberet , ut nemo posset persentiscere , ubi ea esset abscondita. quod cum multis jam annis fecisset , magno ære alieno se se devinxit , ac , saturatus præda , statuit creditoribus manum adire , nec quidquam illis enumerare , si posset. itaque ex improvīso Romam advolat ; mittit , qui sermones spargant in vulgum , suas sibi merces decoxisse ac decollasse , neque numinum unum esse relictum , quem posset creditoribus solvere. quo audito illi exanimati , veniunt Romam , quo eum confugisse compererant ; in quibus multæ erant mulieres pauperculæ , quibus opera vita erat , & quidquid domi venale habuerant , illi crediderant. at cum ille , partim se occultaret , partim à potentioribus per amicitiam & gratiam impetrasset , ut nemo sibi molestus esset , perfecit , ut eos , Romam venisse , & inanem illam operam sumpsisse pœniteret. itaque , litium molestiis defatigati , ac desperatis suis rebus , domum , inaniiores quam venerant , sunt reversi. sed quia dolosus ille decoctor Neapoli uxorem , quam ob elegantiam formæ unice diligebat , ac liberos reliquerat , quos Romam cuperet adducere , ut una secum bonis undique ereptis uterentur fruerenturque , soceri opera perfecit , ut cum creditoribus , summa illorum cum voluntate , decidere liceret. atque inter ipsos convenit , ut minimum quid caperent ex eo , quod sibi debebatur. sed statim , Deo vindice , sensit , quid periculi sit , socios in negotio circumvenire. nam cum navigio uxorem ac liberos Romam veheret , ac recusaret , ob zelotypiam suam , præter litus navigare , milites metuens , contra triremes Etruscas ibi dispositas , ne uxorem ab ipso per vim abducerent , altum petiit , ubi cum in piratas incidisset , una cum

INDEX EXEMPLORVM IANI NICII ERYTHRÆI.

- 1 **S**acerdotes sanctis esse, neque entumeliis ac verberibus afficiendos.
- 2 Eleemosynarum usum non dimittendum.
- 3 Mortuos suffragiis iuvandos.
- 4 Avaritiam seu pecunia studium procul à magistratibus esse debere.
- 5 In quovis loco, sed præsertim in Ædibus sacris, abstinendum esse ab inferenda alteri injuria.
- 6 Dies festos, piis operibus, non ludis jocosque transgredendos.
- 7 Sacerdotes, ac reliquos divino cultui mancipatos, castimonia sectatores in primis debere esse.
- 8 Inimicitias non esse persequendas.
- 9 Diebus festis cultum & honorem adhibendum.
- 10 Parentibus summum, Dei præcepto, honorem cultumque tribui oportere.
- 11 De eadem materia.
- 12 Sacerdos è Sac. Iesu, novo officio, mulieris insidias effugit, à quâ ad stuprum incitabatur.
- 13 Alterius ex eadem Societate, falso crimine accusati, in sufferenda calumnia, virtus & constantia.
- 14 Juvenis meretricem, castitatem ipsius labefactare conantem humant cadaveris capite objecto ad penitentiam revocat, seque periculo eripit.
- 15 Cadaverum defunctorum aspectum, ad vitia extirpanda, plurimum prodesse.
- 16 Rei familiaris, vel existimationis damnum, rectam homini mentem injicere.
- 17 Vir nobilis ac pius, ei, qui ipsi colaphum impegerat, alteram maxillam objicit.
- 18 Graviter vulnerato, condonando inimicis injuriam, statim vulnus obducitur & sanatur.
- 19 Malevolus quidam, dum probum ac pium virum ex insidiis aggreditur, subito stupore corripitur.
- 20 Fratricida justas Deo facinoris sui penas exsolvit.
- 21 Damonis insidia, cogitationes quas in nobis excitat, cum prudentiore communicando, vitantur.
- 22 Optimum & Christiano viro dignum vita exitum à Deo esse petendum.
- 23 Alter itidem ob amorem, prudens sciensque, ad interitum, vult voluntarium.
- 24 Male illis evenire, qui Deum sacrosque ejus ritus deridiculo habeant.
- 25 Egregium singularis cujusdam obedientia exemplum.
- 26 Libidines hominum à Deo, non solum in futura, verum etiam in hæc vita, panis supplitiisque restringi.
- 27 Panes benedicti, ut vocant, S. Nicolai Tolentinatis, magnam vim habere adversus tempestates & incendia.
- 28 Non esse, in rebus dubiis, de Dei providentia desperandum.
- 29 Cuidam, D. Dominici Ædem, qua Suriani colitur, visendi vehementer cupido, equi ad iter divinitus suppeditantur.
- 30 Impurus muliebrium formarum in templo spectator, à Deo graviter plectitur.
- 31 Ad castitatem tutandam, nihil esse utilius, quam occasiones omnes devitare.
- 32 Rusticanus quidam, diras in Deum ac B. Virginem execrationes fundens, ex improvviso de calo tactus extinguitur.
- 33 Vir quidam nobilis, pugione transfixus, S. Dominici ope, divinitus sanatur.
- 34 Egregia Allobrogis cujusdam pietas religioque narratur.
- 35 Sanctos Dei, non verborum contumetis esse prosequendos, sed honore cultuque afficiendos.
- 36 Anticus quidam, in complexu meretricula, subita morte extinguatur.
- 37 Pessime sibi eos consulere, qui, metu inopia, à Domino Deo suo recedunt.

I N D E X.

- 38 *Dua alia mulieres, quæ, quia divina providentia spem ab animo eiecerant, & in libidinibus collocarant, infelicem sortita sunt exitum.*
- 39 *Senis decrepiti, pecunia adipiscenda causa fratricidium.*
- 40 *Infelix libidinosi cuiusdam aulici exitus.*
- 41 *Anica, quam Deus flagellis nos feriat, admoneat, ut caveamus.*
- 42 *Turca, ad Christum conversi, mira in retinenda fide constantia.*
- 43 *Adolescentis libidinosi pudenda, ejus in morte, terro comprehensa igni, ardere conspiciuntur.*
- 44 *Duos quosdam adolescentulos, gravissimè peccantes, ignis exurit.*
- 45 *Vir atque puella, simul concumbentes, repentina morte illuntur.*
- 46 *Horribilis cuiusdam mors, qui fornicatam rursus ad flagitium, cuius ipsam paviscunt, conabatur adducere.*
- 47 *Tres adolescentes, qui ierant, ut pudicitia S. Tuscanæ vim afferrent, à damone strangulantur.*
- 48 *Non esse, in rebus adversis, de Deo desperandum, nec ad demonem confugiendum.*
- 49 *Meretricis, impudentissima protervitas, palam corripienda gravata, complures honesti viri publice plectantur.*
- 50 *Vetus exemplum, superiori simile.*
- 51 *Adolescens, in complexu amica, à rivali confoditur.*
- 52 *Novum divina iustitia exemplum, in mulierem perditâ libidinis editum.*
- 53 *Ægrotus quidam, ad extremum casum perductus, non potest adduci, ut concubinam ejiciat.*
- 54 *Qui castitatem tantam rectam habere postulat, debere eum oculos in primis abstinentes habere.*
- 55 *Alterum, de incontinentia oculorum, simile superiori, exemplum.*
- 56 *Cui sunt res minus secunda, di-*
- 59 *Infideles, congruenter natura revertentes, à Dei auxilio non deseri.*
- 60 *Quatuor mulieres, in primis nobiles, sed forma bono seroces, dignas vanitatis contumaciaque ipsarum penas luunt.*
- 61 *Quid sit periculi, in rebus dubiis, opus suas in hominum gratia, non autem in Dei ope collocatas habere.*
- 62 *Suam iis spem decollare atque decoquere, qui peccata, quæ fecerint, occulta & impunita fore semper existimant.*
- 63 *S. Antoninus, cognomento Patavinus, cuiusdam suum auxilium imploranti, succurrit.*
- 64 *Defunctus quidam, qui secus quam decuerat, vixerat, servo suo se videndum præbet.*
- 65 *Hebraus, capitis sententia damnatus, susceptis Christianis sacris, mortem a quo animo subit.*
- 66 *Turca moriens, subita baptismi cupiditate corripitur.*
- 67 *Adversus res nostras arduas atque difficiles, multum esse præsidii in orationibus iustorum.*
- 68 *De duobus improbis liberis, quæ matrem verberaverant.*
- 69 *Dens S. Francisci de Paula, crystallo inclusus, osculo meretricis tactus, abruptitur.*
- 70 *Librorum inutilium tractationem interdum morborum causâ existere.*
- 71 *Deum non trideri.*
- 72 *Deum solum esse, qui possit à nobis animi corporisque morbos expellere; neque quemquam ex hominibus esse, tanta potentia præditum, in quem ea res cadat.*
- 73 *Puer impudicus, Deo ita permittente, jugulatur ab eo, cui erat corporis obsequio devotissimus.*
- 74 *Lepidum Philippi III, Hispaniarum Principis, ad Philippum patrem, de illius potentia, responsum.*
- 75 *Gravissima duorum liberorum sup-*

- 78 Vix fieri posse, ut, qui fæde flagitiisque vitam insituit ac persequitur, non etiam eadem celeriter atque infeliceiter devolvatur.
- 79 Duos sacerdotes, unum lingua, alterum oculis captum, ob eximium illorum erga sacram Eucharistiam studium Deus idoneos ad sacrificandum dedit.
- 80 Qui periculi vel damni evitandi causa ad Deum confugit, si postea ab eo desciscat, interdum in ea mala incurrit, quæ se effugisse crediderat.
- 81 Christi servos non esse ludibrio habendos.
- 82 Damon, medici forma atque habitu, spe certa salutis oblata, graviter agrotantem illudit.
- 83 Mortem, omnibus locis atque horis, hominibus impendere.
- 84 Non esse temere de quoquam judicandum, quamquam aliquod ejus factum nulla excusatione defendi posse videatur.
- 85 De altero, qui propter inopiam, per simulationem osculationis, pauculos ab altari, ore hianti, nummos exceperat.
- 86 Ecclesiasticas censuras esse metuendas.
- 87 Censurarum ecclesiasticarum poenam, in res quoque ratione sensuque carentes, vim suam interdum exercere.
- 88 Fons aqua purissimus liquidissimusque, ex anathemate ater, multoque oblitus cuncto prorumpit.
- 89 Mulier perjura, terra hiatu, quemadmodum ipsa sibi imprecata erat, excipitur.
- 90 Duo nequissimi homines, admissi in hominem innocentem sceleris poenas pendunt.
- 91 Sceleratum plerumque hominem consimilis delicti poena persequitur.
- 92 Spectatores comidarum acriter interdum à Deo puniri.
- 93 Virgo, qua pejeraverat, igne crematur.
- 94 Nobilis mulieris in pellicem savitia.
- 95 Reges ac principes ultros non esse ludibrio habendos.
- 96 Magistratus ac iudices, adversus verum insidias, præcipua Dei ope auxiliisque muniri.
- 97 Puella perjura, altero oculi capitur.
- 98 Pecunias, ex ecclesiasticis redditibus coactas, & cognatis relictas, cito dilabi.
- 99 Non oportere, adium proferendum gratis, Dei immortalis ac Sanctorum suorum templa divuere.
- 100 Neque joco, neque serio, sanctos viros ludibrio esse habendos.
- 101 Opifex quidam, Dei ac S. Caroli Cardinalis ope, ex damonis manibus eripitur.
- 102 Insignem musicum, jam ferme morientem, modorum panitet, quos impuris carminibus adhibuerat.
- 103 Adolescenti, graviter agro, longam damon schedulam obicit, ubi omnia ejus peccata descripserat.
- 104 Atrox divina severitatis exemplum in duos editum, qui, nefaria libidine, Dei templum deturpaverant.
- 105 Memoranda atque admirabilia duorum longe illustrium virorum exempla, qui, delata ipsis Cardinalatus insignia, nisi coacti, recipere noluerunt.
- 106 Frequens sacra Eucharistia usus, tutissimum adversus carnis nequitias presidium.
- 107 Quid puella acciderit, qua comprehensa à parentibus, quod furo malas muliebri præter modum expoliret, dicto audiens esse noluit.
- 108 Delicata ejusdem mulieris luxus, à Deo, fædo horribilique morbo, compestitur.
- 109 Ludos publicos à privata aliqua calamitate vix esse sejunctos.
- 110 Vitam male actam, similis fere exitus plerumque consequitur.
- 111 Dei atque Sanctorum templa sacris precibus, non autem impuris cantionibus, celebranda.
- 112 Neminem, quantumvis humilem, esse concupiscentia afficiendum; nam potest illum Deus recepte ad summum honoris fastigium evehere; qui autem concupiscentiam

I N D E X.

- meliam fecerit, insolentia sua penas dependere.
- 113** Spreta ac violata sacri cuiusdam templi religio, multorum hominum interitum, expiatur.
- 114** Morientis cuiusdam exemplo ostenditur, non esse paenitentiam in supremum vita tempus rejiciendam.
- 115** Quanto scelere se alligent, qui inpiore decipiunt.
- 116** Mulier, agra ex longo gravi-
que morbo, D. Bernardini Senen-
sis ope sanatur.
- 117** Idem S. Bernardinus, Persii,
adolescenti, qui belli quam pacis
studiosior extiterat, subitam mor-
tem pradicat.
- 118** Excommunicati cadaver vim
elci, ex columna manantem, in
perpetuum suppressis.
- 119** Labores, quantumvis magni,
sipro Christo suscipiuntur, leves,
contra idem, quantumvis par-
vi, si eorum Christus causa non sit,
graves videri solent.
- 120** In rebus adversis, vim maxi-
mam, ad sui ipsius notitiam obti-
nendam, inesse.
- 121** Spirituales vite actiones, non
ex nostro, sed ex patris spiritu-
alis arbitrio, suscipiendas esse.
- 122** Virginibus, ac Deo sacris prae-
sertim, periculosam esse, nimis
seite elegantique canendi ratio-
nem, si ea, secus quam deceat,
utantur.
- 123** Adolescens, quodam in horto
inclusus, adeo ut nulla exitus ra-
tio esset, D. Virginis ope mirabi-
liter foras egreditur.
- 124** Summam vita sanctitatem ab
eis exigi, qui sacris initiari deside-
rant.
- 125** Dies festos, non in opere fa-
ciendo, sed in divinis laudibus,
aliisque pietatis operibus, esse tra-
- 128** Insignis quidam blasphemus,
in jugulo vulneratus, occidi-
tur.
- 129** Mulier vidua à Deo impetrat,
ut pallus, quod concinnaverat, ve-
ustum ignoretur.
- 130** Maledica mulier, ejecta lin-
gua, moritur, & sepelitur.
- 131** Mulio quidam, à damone, cui
se dediderat, rapitur.
- 132** Declamator quidam, falsa su-
spicionis causa, occiditur.
- 133** Celebris quidam mimus, ex
scurrili dicto, ab adolescente, qui
se eo dicto laceratum existimabat,
per dorsum in scena transfigi-
tur.
- 134** Verum, laqueati suspensum, de-
cidens, cauponi jugulum traji-
cit.
- 135** Magnam in se vim mali sape
eos attrahere, qui aliis libidinis
materiam obiciunt.
- 136** Miseros, non esse illudendos;
posse enim eundem casum, atque
etiam graviozem, ad nos recide-
dere.
- 137** Vindicanda injuria partes non
esse à nobis usurpandas, sed totas in
Deum rejiciendas.
- 138** Recte sapienterque facere eos,
qui aliquem sibi Sanctum advoca-
tum adoptant.
- 139** Quidam vinctus, D. Famiani
ope, retro è carcere horribilique, du-
vinitus educitur.
- 140** Damon adolescenti, à quo the-
sauri repertiendi causa fuerat evoca-
tus, celerem adventu suo interi-
um parit.
- 141** Mulier, iniquissimo animo mo-
rueus, à damone, cui se dediderat,
palam abripitur.
- 142** Puer pecuniam, ad sacra pro
mortuis facienda collatam, furivum
avertens, noverca in somnis indi-
catur.

- 145 *Æquissimum prudentissimumque optimi ac sapientissimi iudicis iudicium.*
- 146 *Conclavis ruina, patrinus, una cum suscepti à se matre, obicitur.*
- 147 *Statim ab incunte aetate, praetermissis voluptatibus, directum ad virtutem iter suscipiendum esse.*
- 148 *Aliquot nobilissimi, isemque improbißimi adolescentes, frustra consionatoris voce, de loco superiore, admoniti, eodem anno interfecit, contumacia panas dederunt.*
- 149 *Duo adolescentes nobiles, in vertente, ea ipsa die trucidantur, quo virum innocentem occiderant.*
- 150 *Celebre emporium, una cum meribus eo adveclis, subito igne conflagrat.*
- 151 *Mercator occisus, se palam ei, à quo fuerat interfecit, ostendit, ac mandat, ut nosocomium extruat ex precio mercium, quas advexerat.*
- 152 *Clericus ob coronam, quam ipse invito tonsor in capite circumscripserat, interfecit ceteris, à barbaris diligentissime servatur.*
- 153 *Minister haeticorum, qui res miras, à B. V. patratas, à Catholicis confictas esse contenderat, palam à damone, uti sibi fuerat unprecatus, eripitur.*
- 154 *Casaris amanuens, eidem, vita functus, apparet.*
- 155 *Alitula qua, die sacro Parasceues, in prandium viri principis haetici allata fuerant, reviviscunt, atque à patinis evolvant.*
- 156 *Virgo nubilis, fame coacta, potius quam castitatem venderet, detracliam sibi comam matri vendendam exhibuit.*
- 157 *Haeticus, Catholici viri derisor, cujus oratione ad veram fidem trahebatur, in sua perfidia, brevi post tempore, moritur.*
- 158 *Ob secularia negotia non esse sacrarum Ædium cultum oblivioni mandandum.*
- 159 *Mors militis cuiusdam Poloni, sielerati hominis, pessima.*
- 160 *Duo libidinosi, subita morte moriuntur.*
- 161 *Patronus, qui causas clientum suorum adversariis prodebat, bis à Deo admonitus, cum non respiceret, morte puniitur.*
- 162 *Virgines, sanctimonia atque modestia, non autem amatoris artibus, debere sibi viros, quibus nubant, quarete.*
- 163 *Hospitum uxores violandas non esse.*
- 164 *Qui libidinibus se constringendum iradiit, ad omneneas ab illis deferri se sinit.*
- 165 *Prudens mulieris, morti jam proxima, fama & saluti anima sua recte prospiciendi ratio.*
- 166 *Atrox adolescentuli, in domo virginis deprehensi cades.*
- 167 *Mulier vicinum, quem amabat, abeuntem in Galliam, simulata insania ac morte, prosequitur.*
- 168 *Mulier nupta, vehementissimis à damone tentationibus oppugnata, mori maluit, quam illis asfentiri.*
- 169 *Infelix trium liberorum exitus, quos parens, ob interfecit ab ipsis novercam, omnibus precibus deoverat.*
- 170 *Virgini, ab adolescente decepta, cui nuptiarum spe se vitiandam permiserat, vita ferro eripitur.*
- 171 *Puer, inde usque ab infantia male educatus, per summum scelus matrem innocentem occidit.*
- 172 *Mulier, cura cultus sui nimis dedita, gravi à Deo poena puniitur.*
- 173 *Virgo, ad stuprum à vitrico expetita, satius ducit, vitam, quam pudiciam, amittere.*
- 174 *Viro religioso, mulierum consuetudinem, atque adeo aspectum, esse vitandum.*
- 175 *Innocentiam ubique, & in tribunalibus praesertim, iniam existere.*
- 176 *Mulierum nuptiarum formosarumquo contubernia esse vitanda.*
- 177 *Fraudulentus decoctus graviter à Deo puniitur.*